




平田文集
目




漢書門	
一〇二七七	類
七四函	架
一二架	冊

別-58-8.

内閣文庫	
漢書	類
一〇二七七	架
七四函	冊

内閣文庫	
番 號	漢 10277
冊 數	12 (1)
函 號	函 3 1

重 3 - 1



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM: Kodak



国立公文書館
National Archives of Japan

糊などで貼り付けられている部分がめくれない個所があります。

原本の文字など不明瞭な個所があります。

綴じ部(喉部分)の文字など不鮮明な個所があります。

昭和三十一年十一月、六冊と十二冊に
分冊し題簽と新にした。

平齋文集目錄上

卷第一

古賦

大冶賦

閔氓賦

卷第二

詩一

廬山五嶂

晚晴

過四望山

左蠡

老圃賦

烘蚕賦

解纜

水宿

阻風呈趙史君三絕

落星寺

入山

橋

萬杉寺酌觀音泉

瀑布開先寺後

青玉峽

大孤山

東西林

天池燈

庾樓

谷簾泉

楚城靖節祠

湯泉

歸宗墨池

三疊泉

白鶴觀

楞伽山房二絕

水行

洪園洗心堂飲中偶成

荅仲肅梅

鄱江樓晚望

有感

取涼二絕

敞雲樓二絕

正月三日遊東西園

擬古送莊郎中歸朝二首

次林同年韻二絕

送陳倅

陪郡侯出郊勸農六絕

夜讀夷堅放卷偶成

秋夜

次韻曹提管楚東之作

中秋對月次曹提管韻

和黃宰木犀

清斯樓分韻得星字

次韻曹提管梅

次黃宰早春韻

分岐四絕呈及甫

白鹿書院

和黃幾叔墨梅二絕

和黃宰招飲

觀芳草次黃宰韻

古意謝崔楊州辟七首

送清同年數調官歸

嚴陵道上雜詠七絕

爲清隱打化僧說偈

丁東泉

昭君行

春日山行二首

挽中書俞侍郎二首

贈希聲居士

江頭寄致遠二絕

寄崔帥卿

贈趙同年別

壽崔帥卿七絕

續洗兵馬上李制置

送興元聶帥

送新婺州汪總領歸歎

送崔少蓬南歸五首

平山

勸農呈丘帥二首

挽孫謙伯二首

次繆仲右韻二首

用胡衛道贈姚居士韻

孫推內子挽詩

李致遠夫人挽詩二首

送商總郎三絕

挽伯父二首

次張亞夫君雨

挽李漕二首

次洪漕韻二首

寄趙景周撫幹二首

贈洪子需二絕

口占

贈相者

送丘都承

卷第三

詩二

呈同行諸丈

遇風出陸次程及甫韻

次及甫韻送致遠別

九日復口

荅程及甫徐少望

宿柁頭次及甫入沌韻

又荅孫正叔

祖母哀挽二首

夜泊劉郎浦 二絕

夜泊柳子口

荊州江浮水燈作佛事

江陵

渚宮

又次及甫渚宮

艤舫

次及甫即事

登無盡墓次程教韻 二絕

次及甫覺寒

舟中望南山次及甫韻

青草夢詩

次及甫入峽雜詠峽口

十二培

平善埧

至喜亭

三游洞 二絕

釣魚石翁

蝦蟆培泉

聖節日望拜黃牛祠有感

荅及甫和

又用韻

十月晦過巫山 二首

峽中

八陣圖

次費伯矩贈行韻 五首

崔綿谷共賦亭次韻

詩告至李漢州

叅政李公以勤謹和緩勵後學江憲益以公

廉忠信爲八歲因賦詩贈別

次王同年 晞鴻不遇之韻 九日閱武退而紀事

酬吳教程丞

迭高才卿守永康 二首

贈相士郭少僊

水僊

鏡月酒後戲呈及甫

偶成

梅 二絕

荅吳叔永叔長 二首

荅家朝南 二絕

次高永康送行韻

重過劔門

荅程教見和梅詩二

和虞仲易送行二首

次李閬州稟議三首

夢中得蕎粥詩

和程教元日韻

次鄭宣撫詩刻韻

酬黎倅元夕

春日即事

再用韻

春行

次程廷邁春行

送王萬里赴闕

再和廷邁

草堂

次虞憲日近即事絕

垂去

送崔吉甫分韻得舍字

次李叅政晚春口占十絕

次朝南送研屏香几韻

和李叅政東園韻十絕

次程季允韻

謝高倅送糟蟹破故紙

荅高才卿二絕

次劉後溪和雁湖即事絕

四月壬午發利州絕

漩口

帽子簷水宿

發閬州二絕

回龍寺松

龜勝寺枸杞

伏中宿富樂山賞泉

次張伯脩韻

宿觀音寺次朝南韻絕

青渠追和宋金部壁間韻

幽芳晚涼倚窻觀稼絕

龍尾

食菜

讀楞嚴

得老人書中詩用韻

次徐隆慶壽詩韻二首

詩三

壽崔西清二首

試院口占二絕

隨筆

林氏著存亭

馬城詩寄趙藉令

挽李貫之郎中二首

次張義立登九頂三絕

大像
烏尤

清音亭

萬景樓次韻六絕

壽鄒茶使三首

次曹瀘南韻三首

大雲寺同王翬父晚歸

用伯脩韻迂虞提刑

嘉陵江舟中三絕

落棗

岸行

新井道間

安泰

戲成四十字寄王翬父

和黎德升贈別

應提刑招飲北山

伯矩同登牛頭

過三鶴山二絕

入少城

題李叅政范殿撰大散關詩後

次李公謹美人行見寄後溪挽詩二首

柳絮二絕

追和及甫雪

用虞仲易觀棊詩韻

拜和老人見寄韻

彌牟觀土八陣寄程嘉定

楊漢州見和荅之絕二

荅程嘉定二絕

賦隆慶徐守蜀固堂

送王崇慶得樽字

昭化

送交代王公輔

行三盤墓頤棧道三

赤崖

讀史三絕

用蜀行送徐隆慶守金州 毀鄧艾廟

西龍道院

賦龍州焚金丹砂

七夕

夜坐

雨

范漕仲武李克雲坡

官舍見月三首

酬程嘉定楊漢州見和三首

又次程嘉定三首

次及甫見寄二首

次費伯矩護印道中韻 生日口占

用王火井見寄韻三首 送曹瀘南赴闕

薺餽飽 羅浮高壽崔制置

張太博亨泉 用韻谷廷邁

送范漕赴召八絕 被檄出城

次李綿州韻二首

劍外驢

潭毒關

送崔先生東歸

次仲禹韻二首

壽鄭制置

讀書樓二首

發龍州

泥溪兩首

荅及甫見和兩首

唐何循吏廟

先妣忌日發昭化

荅贈劉交代二首

僊鶴樓避暑

次韻張提刑方送行六絕

卷第五

詩四

次楊瀘南韻

岑公洞

開濟堂

東屯

高齋

中秋秣歸岸下

懷程及甫

二絕

獨醒亭

溫泉院

二絕

劉家江阻風

二首

千竿夾

包港風濤

二首

寧宗皇帝挽詩

二首

送章君範之湖南幕

寄題張宰壓雲樓

二絕

送杜陽安奉親還蜀

二首

和高續古省中雪

省中和何子溫見寄

和何特夫見寄

送秦祕監還蜀

二首

送張行父守贛

二首

送客一首送真侍郎

和讀古蜜木

贈小兒醫

和續古謝送墨

題周昉明

乙酉應詔言事去國

天基節趨寶福院寒甚

大人用韻再一首

乙酉歲暮有感

三絕

敬和大人新年韻

梅

二絕

又用韻

二絕

挽禮上人

和開之杜日

春事

寒暄不齊

二絕

敬次老人即事

清明

二絕

次韻西塢道庵

雪歎

二絕

桂子次韻贈阮甥

次韻雙桂

閑居

鍾惠叔轉示趙臨安兩山堂諸公詩刻隨喜

二首

燕巢

浮溪周居士挽詩

次韻子有賦著圖書所九日

荅子有

夫容

荆公

冬雷行

送郎丞

文炳

之桐城

奚左藏

士達

挽詩二首

次韻可庵梅

邛杖次韻

疇甫叔挽詩

二首

夢中和人梅詩山礬韻

又用韻

聞山陽夏全之變

丁亥歲朝把筆

侍老人展墓歸和尊韻

次韻梅影

春雪

招隱三章贈李洋

次韻遊龍門

挽阮開之

柳杏

柳用前韻

上巳呈子有

顏延年三月三日率爾成詩重韻太率可笑

百舌

晚食

次韻茶蘼

二絕

官採木

楊花

春禽雜言

次韻賦桃源無脚橋

次韻映山紅

送家同年守簡池

浮玉道士琴

山中吟

損戒

二首

引鏡

苦笋

丁謂

食糟行

五月庚申夢人指為馬周且誦詩兩句覺而足之
苦笋用前韻 天象

用虞提刑見寄韻荅之 次韻夏日

瀑布 狐鼠

次韻高夢 示諸兒

續夢 淨梵僧頤蒙堂

讀漢書 六月廿八入朱陀山寺

促織 荅子有

用韻荅游司直但見寄 龍池沙漲

卷第六

詩五

秋半聞鶯

夕陽

讀書螻室

秋山即事

方氏棣華桂叢亭各一首 送黎德升出守眉州首二

晨起 敬和老人秋日山行

和子有雨中述懷 尋梅

會心 清虛堂六言為淨梵僧作

挽萬將仕 寄題真相寺遙月堂

烏息隱山堂覓詩 米積外科僧照源堂

至節前一日遊汪茫田 至日歡喜口號二絕

獨夜 雪留董景揚

立雪 高壺隱挽詩

山房藏書萬三千卷子有賦詩用韻

又答景揚
挽章冠叟

再用陀字韻
斷葛行

卒歲
疥癢

和雪
寶雲庵戒師

戊子新元老人七十有詩自述敬和

用韻答子有
歲事

羅察院父瑞桂堂
治平寺清音堂

春行
二月二日晴枕上口占

敬和老人青梅
點檢山房用呵字韻

同曰次韻可庵
長寧高守見寄

陳尉信伯括水傷冒雨下朱陀示兩詩次韻

老人挈累下西市感而賦詩呈友人二首

用老人韻賦瑞梅
鍾太君挽詩

鍾雲叔挽詩
羅震龍母胡氏挽詩

水牡丹
東山塔影

東西山二絕
敬和老人寓舍

午困
再賦二首

題李杜蘇黃像
生雲軒雲閑閣各一首

夏至過東市二絕
和黃伯淵見寄二首

敬和老人覽鏡
又和憶可庵

次韻夏日
敬和老人荷花

鎮越堂辭

西庵晚步

次韻七夕

蜘蛛

晚徑六言

中秋

敬知老人石菖蒲

又敬和還家自喜

又敬和還家

次韻趙丞讀紹運圖

洗研

贈俞次孟

己丑新年

病起獨步

荅請事簡

寓事六言

次韻西山

次韻遣懷

挽元寂王道士

古意

中春望後一日登玲瓏

夢語

次韻安羅花

讀漢事

粥罷

識字行

散策

花獅

老人賦芝隱樓次韻

又敬和寓舍

除妄

晚涼

迎秋

敬和老人盆池

喜雨簡趙丞

古樂府用禮減翁韻四

槿花

用王司理韻送別首二

挽鍾孺人

挽阮宜義

獎菊二絕

章升伯妻孺人挽詩

用禮減翁韻

山中旅生米用子有韻

初霜

九州山僧房

挽俞致政

挽銅里葉提點

徽州葉司理送冬筍

挽俞景染

用韻荅厲輔卿二首

用老人功臣淨土院韻

石斛

卷第七

詩六

庚寅元日甲子晴

元夕

水仙蘭

燈歎

對門 兩絕

禽語

讀元公輔傳有感

示諸兒

春行

次趙保之清明

葉子真見寄因和酬之暮春即事

次韻閔飢 兩絕

茶筴病

口占酬俞端叔牡丹

次韻何伯溫 三首

山鄉

錢德成山水窟

壽程宰 三首

曉出

行臨安縣圃

寄題永嘉林氏真意堂

荅隆慶李守 標

次俞紫微止止堂韻

繡觀音酬郢州王知錄丹青美人之贈 兩絕

乍涼

七夕

秋思

寓興

阮亭甫壽樂堂澹庵

秋懷二首

記夢

山行紀事

和何伯溫見寄二首

和子有感時

歲抄用韻二首

侍老人遊雙林

和老人明朝中春二首

春行次韻

病齒

春思三絕

偶成

三月晦東山

續夢

作茶行

送程於潛兩首

新月

百合花

雨中次韻兩絕

送徐顯道尉無錫

二花

理菖蒲

閑居二首

雙林志廉得元暉筆法爲賦六言兩首

送阮深甫尉桂東二首

侍老人宿超然館聞鐘

翠蛟亭兩絕

贈石室朱修行兩絕

送趙處士遊方

何正言母安人挽詩

初釀

贈前京東王制屬

翁媼行

哭郡城火辛卯

還自谷川道中兩絕

遊勝因寺

謹次老人至節韻

至節出謁回二絕

病目

板菊枕

前提舉挽詩二首

奚知縣挽詩

臆中步月 二絕

何正言挽詩

謹和老人惠山泉 二首

歲暮山中紀事 三首

除夜

新年

謹和老人欲還故廬

謹和老人春行

又塔院

燈夕獨酌 二絕

送游考功將漕夔門 七絕

夢乞聰明於東坡

老人晚得女真真又曾孫女金華皆再周而

殤葬塔院後今春焚化用前韻賦詩謹和

送澄維那訪舊湖山

葉主簿挽詩

謹和老人古硯韻

路逢徽州送牡丹入都

首夏一絕示徐錦囊

荅王仲鈞 兩首

次子有下第韻

荅駱肖秦

初夏即事

重午山蹊獨步

卷第八

詩七

觀物 二首

抹利

晚蓮

涼月 二絕

挽阮倅

挽李丞

和子有催歸

謹和老人蓮桂 二絕

移居西郭重樓

自和

小雪前三日侍老人行山共十四首

長橋渡宿妙勝閣

閬山妙嚴院次無垢韻二出閬山

和老人鳳口遇雨

翔鳳山資福寺

宿資福小閣次韻二

楊塢道場山葉推官無盡景

梅

和樓前梅

送李致遠安遠簿

夜坐

又用韻

洪崖圖行

歲晏

謹和老人賦梅

和趙保之青田即事

鵬月二十五夜

送程宗武遊岑寧

謹和老人雪晴

元寂宮生祠行

婆餅焦

孫教授挽詩

筴蕨

浴罷氣體和

金不換歌

酬東風引

溪行

用吳祕書正月晦韻

寄禮滅翁

撥櫓

碧桃曲

燭下次海棠

送李微之倅成都

次叔厚韻

二佳

遊僊洞次壁間韻

用韻答趙主簿

謹和老人羅山

寄題辛氏塵外樓

初夏

里人送芍藥用韻

寄高子厚

憫農

和禮滅翁感錢氏舊事

滅翁爲日者求詩

用鍾侍郎韻贈懶谷

暑夕

王章

暑坐

和老人夏日即事二首

田家建除體

和趙青田燕坐

新秋藥名兩首

和老人看高子厚修墓

用子有述懷韻爲壽

俞成大送新芋

范待制子長挽詩二首

和俞成大八月梅花

謹和老人秋日遣懷

月下用鄭大參韻

東山即事

過增口道中

謹和老人九日

和老人賦牛尾狸二首

用趙忠簡孫壁韻

和老人初冬即事

和老人初冬寓筆一絕

又和

還可庵謁墓遂入都

臺中聽雪

呈司封吳舍人

謹和老人除日

清凉院僧房致齋

銓闈董試上已二絕

除夜哭內

省闈試士

集英殿策士待宣

六月十六日宣鎖

恭和御製賜聞喜宴詩

謹和老人瘳字韻

謹和大人喜晴

奉御香祈天竺觀音於昭慶寺是日得霽

謹和老人賦退朝

後省試進奏院吏

十一月五日鎖學士院

直玉堂和李參政韻

老人生朝爲壽

孟享從駕二絕

太廟致齋

卷第九

記

饒州州學新田記

重築采芹堤記

東圃記

楊州重修城壕記

利州通判廳記

清約堂記

洞霄宮施田記

於潛丞廳續題名記

奚疑堂記

著圖書所記

於潛登科續題名記

浮溪橋記

知心堂記

於潛縣廳題名記

臨安真相院修造記

竹洲記

北君軒記

善園記

東山婆娑巖壑記

餘杭重建縣治記

鎮江府學田記

卷第十

序

楚泮榮登義約序

送何龔父序

於潛洪氏譜系圖序

豫章外集詩注序

桂巖雙蓮圖序

春秋說序

兩漢詔令序

送程叔運之湖南京

嬾窟詩藁序

題跋

龍州免運糧夫碑跋

易齋詩藁跋

崔文昌書翰跋

俞拙庵偈語跋

陶同年詩卷跋

彭忠毅謚勅跋

家朝南避僞回任檄跋

徽廟草書千文跋

高廟千文跋

程剛愍死事跋

題洪崖圖

題西岳降獵圖

題天台十八尊者像

范丞相謝表跋

劉忠肅尚書右丞告跋

忠肅元費官制擬草跋

忠肅遺龔輔之手啓跋

觀劉忠肅手簡

題劉忠肅和洗竹詩帖

觀劉忠肅書金剛經

書李立之十全堂詩後

書天竺果古鏡住持箴

卷第十一

箴

緝熙箴

并序

好軒箴

銘

可齋銘

三研銘

雙室銘

端齋銘

阮逢時澹庵銘

龔時甫庸齋銘

鶴巖銘

贊

老人壽容贊

崔先生壽容贊

白李韓柳贊

東山渡水布袋贊

蜀繡轉經觀音贊

昭君贊

莫愁贊

鍾冠之出山佛贊

題子馨弟寄容

雜文

兩漢詔令總論

八陣圖說

漢碑考

勸農文

大人里居上梁文

疏

普信院重建佛殿疏

朱陀寶福院鐘樓疏

寂照寺佛殿疏

卷第十二

奏狀

復官申省狀

禮部郎官辭免申省狀

辭免除監察御史申省狀

辭免殿中侍御史申省狀

第二次辭免狀

辭免中書舍人申省狀

第二次辭免狀

辭免兼同修國史實錄院同修撰奏

乞祠奏

再乞補外申省狀

辭免兼權吏部侍郎申省狀

病乞補外奏

辭免兼直學士院奏

辭免兼侍講奏

經筵乞祠奏

辭免除吏部侍郎兼給事中奏

再辭免奏

辭免除給事中奏

再辭免奏

辭免兼侍讀奏

乞叢祠奏

辭免翰林學士知制誥奏

再辭免奏

第三次辭免申省狀

乞檢會八次奏申特昇閑廩奏

辭免除端明殿學士在京宮觀奏

再辭免奏

乞將慶典一官改賜父親銀緋申省狀

卷第十三

表

龍州射到任表

謝曆日表

瑞慶聖節賀表

功德疏

謝授中書舍人告仍賜紫章服表

謝特理磨勘授朝請郎告表

謝授侍講告表

謝授給事中兼侍讀賜對衣金帶表

遺表

簡劄

上廟堂劄子

與張司業劄子

賀游景仁工部書

答游工部簡

答葉子真書

答黃濟叔簡

與李微之校理書

答印松巖帖

三十一
答楊平叔知丞簡

與俞提舉簡

答何正父簡

答沈簿餽歲餽

答葉子真書

答高處州書

答魏鶴山書

答吳叔永寺丞書

又至節小簡

答張簿惠白魚帖

答程宗武書

通崔菊坡書

答毛君玉簡

答吳叔永司封書

又答借書帖

答葉子真書

答真福州書

答張鹽官簡

答趙南塘書

答蘇上舍書

答禮威翁帖

同前必書

答淮東趙帥書

答袁守書

與余京尹書

通余尚書書

答趙淮東書

答真福帥書

答趙揚州書

答吳總卿書

徐倅

卷第十四

內制一

戒飭將帥撫恤士卒詔

四川安撫制置使趙彥呐獎諭詔

新除吏部尚書李璫辭免專一提領纂修

高宗皇帝正史不允詔

楊鳳孫辭免除安德軍承宣使依舊提舉佑
神觀免奉朝請不允詔

崔與之辭免除廣東經略安撫使兼知廣州
不允詔

從臣李皇等乞將所得俸給減半幫支不允
詔

真德秀辭免資政殿學士在京宮觀兼侍讀
不允詔

右丞相鄭清之再上奏劄待罪不允詔
知院喬行簡等再上奏劄待罪不允詔

喬行簡辭免除兼參知政事不允詔

喬行簡辭免權監修國史日曆不允詔

右丞相鄭清之乞解罷機政不允詔

右丞相鄭清之乞俾還故里不允詔

鄭清之辭免授特進左丞相兼樞密使不允

詔

喬行簡辭免特授金紫光祿大夫右丞相兼

樞密使不允詔

魏了翁辭免兼直學士院不允詔

喬行簡辭免提舉國史實錄院提舉會要勅

令經武要略不允詔

曾從龍辭免除知樞密院事兼參政不允詔

鄭性之辭免除同知樞密院事不允詔

陳卓辭免除簽書樞密院事不允詔

魏了翁辭免兼侍讀不允詔

魏了翁辭免兼同修國史實錄院同修撰不

允詔

新除左丞相兼樞密使鄭清之辭免特進不

允詔

魏了翁辭免兼權吏部尚書不允詔

兵部侍郎淮東制置使趙葵乞罷黜不允詔

崔與之再辭免除參知政事不允詔

寶謨閣學士提舉江州太平興國宮余鏞乞

俾致其事不允詔

權禮部尚書魏了翁乞賦祠廩不允詔

魏了翁辭免慶典轉一官不允詔

曾從龍辭免樞密使督視江淮軍馬不允詔

魏了翁辭免除同簽書樞密院事督視京湖

軍馬不允詔

鄭性之辭免兼叅知政事不允詔

陳韓辭免刑部尚書沿江制置大使不允詔

端明殿學士提舉萬壽觀兼侍讀李璫乞賜

骸骨不允詔

史嵩之辭免除華文閣直學士知隆興府江

西安撫使不允詔

鄭性之辭免同提舉編修勅令不允詔

李璫乞歸田里不允詔

魏了翁辭免兼同提舉編修經武要略不允詔

李鳴復辭免除權工部尚書不允詔

卷第十五

內制二

王遂辭免除戶部侍郎不允詔

趙立夫辭免除戶部侍郎不允詔

李性傳辭免除禮部侍郎不允詔

趙彥恢辭免除兵部侍郎不允詔

趙彥恢辭免陞兼同修國史實錄院同修撰
不允詔

特進左丞相鄭清之等奏乞賜罷黜不允詔

特進左丞相鄭清之等奏 天基聖節乞免

肆筵不允詔

同知樞密院事兼參知政事鄭性之乞賜黜
罰不允詔

李鳴復辭免王牒兼侍讀不允詔

王遂辭免同修國史實錄院同修撰不允詔

趙彥恢辭免侍講不允詔

左丞相鄭清之右丞相喬行簡再上表乞賜
罷免不允詔

李臯辭免除資政殿學士知眉州不允詔
李臯再上表辭免不允詔

淮東安撫制置使趙葵乞賜罷歸不允詔
戶部侍郎趙立夫乞畀叢祠不允詔

李鳴復辭免除權刑部尚書不允詔

鍾震辭免除寶章閣直學士知靜江府廣西
經略安撫不允詔

四川安撫制置使趙彥呐乞汰斥不允詔
泂江制置使兼江南東路安撫使知建康軍

府事陳韓乞畀祠廩不允詔

魏了翁辭免除簽書樞密院事疾速赴行在
奏事不允詔

謝奕昌辭免特授保寧軍節度使提舉萬壽
觀不允詔

謝奕禮辭免特授保康軍節度使提舉萬壽
觀不允詔

魏了翁再辭免恩命不允詔

皇叔祖少傅保寧軍節度使充萬壽觀使嗣
秀王師彌生日詔

同知樞密院事鄭性之生日詔

永寧郡王楊石生日詔

鄭清之再辭免授特進左丞相兼樞密使不
允批荅

喬行簡再辭免特授金紫光祿大夫之丞相
兼樞密使不允批荅

喬行簡再上表辭免恩命不允斷章批荅

鄭清之再上表辭免恩命不允斷章批荅

曾從龍上表再辭免除知樞密院事兼叅知
政事不允斷章批荅

鄭性之上表再辭免除同知樞密院事不允
斷章批荅

陳卓再上表辭免簽書樞密院事不允斷章
批荅

曾從龍再辭免樞密使不允批荅

魏了翁再辭免簽樞督視京湖軍馬不允斷

章批荅

曾從龍第二次辭免樞密使都督江淮軍馬
不允斷章批荅

文武百寮宰臣鄭清之等奏請 皇帝天基
聖節御紫宸殿上壽不允批荅

文武百寮宰臣鄭清之等再上表奏請

皇帝天基聖節御紫宸殿上壽不允批荅

謝奕昌再辭免特授保寧軍節度使提舉萬壽觀不允斷章批荅

謝奕禮再辭免特授保康軍節度使提舉萬壽觀不允斷章批荅

左丞相鄭清之丐閑不允褒語

卷第十六

內制三

鄭清之可特授特進拜左丞相兼樞密使加

食邑食實封制

喬行簡特授金紫光祿大夫右丞相兼樞密使加食邑食實封制

曾從龍可除樞密使督視江淮軍馬加食邑

食實封制

賜都督樞使曾從龍告口宣

賜樞使曾從龍批荅口宣

左丞相鄭清之口宣

右丞相喬行簡口宣

左丞相鄭清之批荅口宣

右丞相喬行簡批荅口宣

右丞相喬行簡批荅口宣

左丞相鄭清之批荅口宣

知院曾從龍同知鄭性之僉書陳卓批荅口

宣

樞密使曾從龍批荅口宣

節度使謝奕昌批荅口宣

節度使謝奕禮批荅口宣

賜京湖制置大使趙范淮東制置使趙葵等

及鎮江都統制王虎等銀合臘藥勅書

賜京湖制置大使趙范等及建康都統制王

鑑等銀合臘藥勅書

賜簽樞督視江淮軍馬魏了翁銀合臘藥勅

書

賜汾海制置副使兼知慶元府王定銀合臘

藥勅書

文舉殿試策

武舉殿試策

召試館職策

萬壽觀開啓甲子本命道場青詞

朱表

太一宮祈晴醮青詞

永祐陵下宮顯恭皇后殿神帳後壁山墻冊

損修整畢告遷神御還殿表文

孟冬朝獻祝香文

昭德崇勲閣安奉太師趙汝愚親像祝文

祭告功臣二十三人祝文

甲子本命青詞

滿散朱表

立春祭太一祝文

太一宮交年醮青詞

天基聖節青詞

朱表

孟春朝獻祝香文

攢宮補種祝文

孟夏朝獻祝香文

雨師雷師風師祝文

昭慈聖憲皇后永思陵憲節皇后憲聖慈烈

皇后下宮修葺奏遷神御表文

孟秋朝獻祝香文

天基聖節錫宴致語

勾合曲

端平二年端午貼子詞

皇帝閣五言三首
七言三首

貴妃閣五言二首
七言三首

端平三年春帖子詞

皇帝閣五言三首
七言三首

皇后閣五言二首
七言三首

貴妃閣五言二首

七言三首

端午帖子詞

皇后閣五言二首

七言三首

平齋文集目錄上

平齋文集目錄卷下

卷第十七

外制一

國子司業張處除祭酒仍兼侍講制

樞密檢詳袁肅除右司郎中兼權樞密副都

承旨制

袁肅除太府少卿兼知臨安府制

李鳴復除大理卿制

趙彥恢除大理少卿制

國子博士李大同除祕書丞仍兼崇政殿說

書制

著作佐郎蔣重珍除著作郎仍兼崇政殿說書制

校書郎黃朴除著作佐郎仍兼崇政殿說書制

太常博士徐清叟太學博士葉味道並除祕書郎仍兼崇政殿說書制

彭方除著作佐郎兼權侍左郎官制

張洽除著作佐郎制

敷文閣學士通奉大夫程瑛該慶典轉正議大夫制

著作郎權司封郎官吳泳除軍器少監兼直

禮部郎官兼學士院權直趙汝談除祕書少監兼權直學士院制

何炳除司農卿制

金淵李桀並除太學博士制

葉應輔除國子博士仍兼景獻太子府教授制

奉議郎袁立儒錡賞轉一官制

全子材除淮西安撫副使兼知廬州兼計度轉運副使制

楊邁特贈龍圖閣學士制

黃壯猷何處信課最各轉一官制

右正言王遂除殿中侍御史制

吏部郎中兼右司李宗勉除監察御史制

大理卿李鳴復除侍御史制

祕書丞兼崇政殿說書李大同除右正言兼侍講制

呂殊除太學錄制

蔡範除戶部郎中淮西總領制

歸順人李義承節郎張瑀李德魏珏保義郎制

歸順人同鼎武翼郎王聞顯武翼大夫呼延

實來伯友修武郎制

廣州觀察推官魏國梁歿于王事贈通直郎制

淮西路鈐范用吉授高州刺史節制京西北路軍馬制

江陵府副都統孟珙特轉武經郎制

西和州守陳寅妻安人杜氏男基暨壻死節贈官制

西和州守陳寅族人立照塋館客李良臣死節贈官制

權兵部侍郎陳公益磨勘轉中大夫制

徐僑除太常少卿制

楊一夔父秉遷明堂恩封承務郎制

韓昱特轉武功郎制

辛克承除太府卿制

資政殿大學士曾從龍明堂加恩制

資政殿學士葛洪明堂加恩制

左諫議大夫鄭性之明堂加恩制

吏部尚書崔與之明堂進封南海郡開國

公加恩制

余巖除華文閣學士汾海制置使知慶元府制

直祕閣新成都府路提刑趙彥覃除都大坑冶制

太后山陵復土錢忠表趙若浚轉一官制

李安國特轉武節郎制

游九功除司農少卿制

林禧子封父承務郎制

林禧子封母孺人制

歸順人孫政等一十八人並補承信郎制

歸順人王元純補迪功郎制

史復祖除刑部郎中制

李直柄除大理少卿制

趙范除兩淮制置大使節制巡邊軍馬兼沿
江制置副使制

趙蕤除大理寺丞陶木司農寺丞趙崇岳太
府寺丞姚珪國子監丞賈似道軍器監丞
制

林申除宗正寺簿趙鎬夫司農寺簿趙汝譔
太府寺簿余元虞國子監簿制

趙汝訥除司農寺丞杜範軍器監丞李以制
大理寺簿章勳將作監簿制

劉子澄除軍器監簿兼淮西安撫司參議官
制

張翀除祕書丞制

尤煇除樞密院編修官兼檢詳制

劉炳除諸王宮大小學教授制

謝奕禮除大宗正丞兼權兵部郎官制

賈似道特轉奉議郎制

謝采伯除軍器監制

魏峻除太社令楊瑯藉田令制

知瀘州魏了翁 明堂恩進封加食邑制

卷第十八

外制二

蔡仲龍除太常博士制

太社令季晞顏除大理司直制

敷文閣學士李臺 明堂恩加食邑實封制

戶部侍郎京湖制置使史嵩之 明堂恩進

封加食邑制

徽猷閣學士新知太平州鄒應龍 明堂加

恩制

華文閣學士知慶元府余鏞 明堂恩進封

加食邑制

楊汝明聶子述 明堂進封加食邑制

吏部尚書崔與之除端明殿學士提舉西京

崇福宮制

陳韓除權工部侍郎兼江西安撫使知隆興

府制

鄭伯謙差知常德府提舉常德澧辰沅靖州

兵馬制

復中大夫直龍圖閣致仕季衍特贈通議大

夫制

趙彥紆除直祕閣宮觀制

王儀特轉朝奉郎致仕制

李燾特轉朝奉大夫直華文閣致仕制

歸順人僞防禦使樊辛特補武翼大夫忠州

刺史淮西兵馬副都監制

李大謙特轉朝議大夫依前直寶章閣致仕
制

寶謨閣待制致仕毛憲 明堂加恩制

許應龍除禮部郎中制

傅堯除都官郎中制

淮西強勇軍統制呂深轉武經郎制

趙汝遇除度支郎中制

安恭行除大理寺簿制

陳隆之除直寶章閣權知沔州兼利州路提

刑兼提舉制

王翔除利路轉運判官制

宮觀葉莫除權發遣贛州提舉南安南雄汀

州兵甲制

陳良驥轉承議郎制

王丙特改承務郎制

叅知政事兼同知樞密院事喬行簡除知樞

密院事加食邑實封制

資政殿大學士新知建康府曾從龍除叅知

政事加食邑實封制

左諫議大夫鄭性之除端明殿學士簽書樞

密院事加食邑實封制

何顥久除直寶謨閣知鎮江府制

何琮除直徽猷閣福建路轉運副使制

董洪父自脩王公瑾父困方岳父欽祖趙子森父復先陳子椿父千期朱日炎父師友孫鏞父玠以明堂恩封官制

太中大夫曹叔遠特轉通奉大夫依前煥章閣待制致仕制

正議大夫程琚磨勘轉正奉大夫制

閻丘梓林炎趙崇媼趙崇森除大理評事制虞衡除大理寺正制

史彌忞除將作監丞制

趙與權起復直寶謨閣淮西提刑制

大理寺丞桂萬榮除考功員外郎制

權兵部尚書趙至道除直學士知鎮江府制

曾天麟除將作少監制

王淪轉承議郎制

歸順人沙兀惹特補修武郎添差蔡州兵鈐兼權蔡州事制

房應發轉文林郎制

劉顯以父評戰歿補承信郎制

石天瑞白華補秉義郎制

李駿起復直龍圖閣四川都大茶馬制

鄭寅除尚左郎官制

王邁轉朝請郎制

趙與芮除大理少卿制

鄧雲轉武節郎制

王旻

直寶謨閣宮觀劉宰除太常寺丞制

桂萬榮除尚右郎官制

前右正言何萬齡特轉朝奉大夫直寶謨閣

致仕制

兩淮制置使兼沿江制置副使趙范除江淮制置大使制

留元英除集英殿修撰知江州制

葉奭除國子博士應麟除太學博士兼莊文府教授汪之道除國子錄制

蔣重珍除起居舍人兼崇政殿說書制

黃壯猷除金部郎官制

趙鎬夫除司農寺丞兼提領安邊所制

陳振孫除諸王宮大小學教授制

方大琮除司農寺簿樓杓除軍器監簿制

知南安軍彭鉉職事修舉轉一官制

施梈差知融州制

曹叔遠贈光祿大夫制

李衍直寶文閣致仕制

卷第十九

外制三

林清之除直寶章閣都大坑冶制

黃埴權知建寧府制

戶部侍郎京湖制置使史嵩之除權兵部尚

書制

趙與芮除寶文閣待制提舉佑神觀仍奉朝

請制

辛克承除直顯謨閣主管紹興府千秋鴻禧

觀制

張洽除直祕閣主管建康府崇禧觀制

張嗣古除祕閣修撰樞密副都承旨制

謝奕禮除將作少監制

陳韞除大宗正丞制

張嗣古除右文殿修撰權知建康府江東安

撫制

張元簡除太府寺丞制

曾天麟除浙東提舉常平茶鹽公事制

僉書樞密院事鄭性之贈三代

故曾祖可大贈太子少保制

故曾祖妣陳氏贈咸寧郡夫人制

故祖獎贈太子少傅制

故祖妣陳氏贈齊安郡夫人制

故父汝永贈太子少師制

故母碩人黃氏贈宜春郡夫人制

故妻碩人潘氏贈清河郡夫人制

楊恢除知襄陽府京西安撫副使時暫兼京

湖制置司公事制

尤燭除直祕閣權知江陵府兼主管湖北路

安撫司公事制

知吉州劉煒叔職事修舉特轉奉直大夫制

范炎特轉承議郎與宮觀制

葉武子特落致仕除直祕閣主管華州雲臺

觀制

劉福轉武德大夫制

高之問除直祕閣主管亳州明道宮制

知樞密院事喬行簡贈三代

故曾祖勝之太保贈太傅制

故曾祖母孫氏婺國夫人贈越國夫人制

故祖堯太傅贈太師制

故祖母杜氏慶國夫人贈益國夫人制

故繼祖母蔣氏華國夫人贈吳國夫人制

故父森太師追封寧國公制

故母俞氏福國夫人贈魯國夫人制

故妻呂氏安定郡夫人贈東陽郡夫人制

故繼妻樓氏譙郡夫人贈吳國郡夫人制

趙應愚轉保義郎制

王珪轉武顯大夫制

繆夢達轉武德郎制

林演權知德安府制

李煒知崇慶府制

吏部侍郎鍾震除寶文閣待制知太平州制

謝奕禮除大理少卿制

吳昌裔除軍器監簿制

太社令魏峻上殿特改宣教郎制

王極權發遣順慶府制

權刑部侍郎周端朝磨勘轉中大夫制

曾庶贈通直郎制

姚珪除祕書丞制

吳昌裔除將作監簿制

彭方除將作少監兼景獻太子府教授制

江西安撫使陳韓除工部侍郎制

馮邦佐除直祕閣主管潼川路安撫司公事

知瀘州制

黎伯登除直寶章閣潼川府路提刑兼提舉

制

項寅孫除直祕閣權成都府路轉運判官制
童頤除直祕閣權發遣夔州兼主管本路安撫司公事制

游九功除祕閣修撰知慶元府兼沿海制置制

張元簡除湖北路轉運判官兼知鄂州制
何元壽除太府寺丞總領湖廣軍馬錢糧制
林半千除江東提刑制

丘岳除淮東路轉運判官兼知真州制

卷第二十

外制四

貴妃賈氏贈三代

故曾祖嗣業太子少保贈太子太保制

故曾祖母於氏贈文安郡夫人制

故繼曾祖母於氏贈通義郡夫人制

故祖偉太子少傅贈太子太傅制

故祖母於氏贈蘄春郡夫人制

故繼祖母陸氏贈和政郡夫人制

故父涉太子少師贈太子太師制

故母史氏贈太寧郡夫人制

桂如琥除川秦都大茶馬制

高稼知沔州兼利州路提刑制

陳隆之除直華文閣知興元府兼安撫制

陳公益除集英殿修撰知漳州制

王與權除國子司業制

尤焞除樞密院檢詳兼右司制

趙汝譔除樞密院編修官兼權兵部郎官制

朱揚祖除樞密院編修官兼權刑部郎官制

羅愚除淮西提舉兼知無爲軍制

黃朴除著作郎兼權考功郎官徐清叟著作

佐郎兼權司封郎官葉味道著作佐郎兼

權屯田郎官並仍兼崇政殿說書制

杜幼節除祕書郎兼莊文府教授制

趙與懃除太府寺丞余元虞國子監丞章勸

太府寺簿高奎國子監簿制

宣繒除資政大學士光祿大夫提舉洞霄宮

制

劉用行除太常寺簿制

林申差權發遣安吉州制

謝奕禮除右文殿修撰主管佑神觀仍奉朝

請制

林應龍轉承直郎制

戶部侍郎淮東總領岳珂磨勘轉中大夫制

慈聖太后山陵復土提舉官吳惟德轉翊衛
大夫制

叅知政事曾從龍贈三代

故曾祖詳太傅贈太師制

故祖澄太師衛國公贈魏國公制

才人賈氏故伯冲贈迪功郎制

才人賈氏故兄承奉郎貫道贈承事郎制

故母弟迪功郎史商卿贈修職郎制

趙以夫除江西路提舉常平茶鹽制

趙汝談除宗正少卿依舊兼權直學士院制

袁甫除祕書少監制

張嗣古右文殿修撰知平江府制

趙立夫除祕閣修撰樞密副都承旨制

朱鑑除大理寺簿林瓌軍器監簿制

張元簡除直寶文閣知鄂州兼沿江制置副

使制

真德秀除翰林學士知制誥兼侍讀制

曾穎秀除浙西提刑制

傅堃差知嚴州制

鄒應龍父徽贈宣奉大夫制

葉宰直華文閣知泉州制

陳舜臣湖北提刑林演湖北提舉制

桂萬榮直寶章閣知常德府彭方直祕閣知
袁州制

留元剛轉中大夫直寶文閣致仕制

李皇除權禮部尚書兼侍讀制

陳卓除吏部尚書兼給事中兼侍讀制

崔福轉兩官制

故通直郎游九言特贈直龍圖閣制

葉真除宗學博士金淵國子博士戚士遜太
學博士袁商武學博士兼魏惠獻王府教

授制

劉克莊除宗正寺簿制

戴杰宗學諭何昶恬太學正馮去疾太學錄

王萬國子錄制

顏頤仲司農寺丞魏峻軍器監簿制

韓濤除太社令制

史宜之直龍圖閣致仕制

王陞轉承節郎制

同鼎武節郎來伯友武翼郎王聞顯武節大

夫呼延賞武翼郎制

張震雷張萬取並補承信郎制

史彌鞏轉朝散郎高不儔轉奉議郎制

高平郡夫人毛氏進封和國夫人制

楊恢除直徽猷閣權知襄陽府京西安撫副使制

彭鉉廣東提刑石孝淳廣東運判制
陳畏浙東提刑制

卷第二十一

外制五

陶木除太宗正丞制

權兵部尚書史嵩之除寶章閣直學士官觀制

林楷特轉朝議大夫直敷文閣致仕制

趙范除龍圖閣學士京湖制置大使兼知襄

陽府制

史洽轉奉直大夫制

孟黠鄧泳各轉一官制

樓昉贈直龍圖閣制

李道傳贈直龍圖閣制

胡夢昱贈朝奉郎制

徐瑄贈集英殿修撰制

陳宓贈直龍圖閣制

張栻中奉大夫致仕制

楊必復贈朝請大夫制

尤元龍贈通直郎制

趙與貌贈奉議郎制

宋昭遠贈通直郎制

吳淵轉朝奉大夫制

趙必瀍轉承議郎制

王子申落致仕除刑部郎中制

趙希昔除工部郎官制

辛稭潼川府路提刑趙希濬夔州路提刑張

起良成都府路提刑制

汪之強特贈朝奉郎與一子恩澤制

楊伯雨除夔州路轉運判官制

王翔除直祕閣利州路轉運判官兼知利州

制

黎伯登除直華文閣知潼川府制

汪之道除諸王宮大小學教授制

趙凝除司農寺丞制

趙崇濤直祕閣知遂寧府制

李鉞差知嘉定府制

李良孫知隆慶府李仲熊知紹慶府制

劉竑之改知重慶府制

李景翔和糴賞轉朝議大夫致仕制

陳一薦屯田和糴賞轉承議郎制

歸順周岳補武功郎遙郡刺史淮東兵馬鈐

轄制

李敏補修武郎制

蒲南強落致仕差知茂州制

楊恢除直寶文閣淮西制置副使兼知黃州

制

工部侍郎知建康府陳韓明堂加恩制

虞孝先特轉一官授朝奉大夫制

陳亞卿知德慶府制

牛大年除直敷文閣主管建康府崇禧觀制

曾治鳳除直徽猷閣知建寧府制

沈安義辟差知宜州制

鄧雲特轉武略大夫制

留子邁救荒推賞轉朝奉大夫依舊潭州通

判制

王燭轉朝奉郎致仕制

章謙亨除京西路提舉常平茶鹽公事制

桑青轉武功大夫制

趙彥覃除直寶謨閣權知廣州兼廣東路經

略安撫制

翰林學士真德秀磨勘轉中大夫制

項容孫改差知順慶府制

李以制除大理寺丞趙師楷太府寺丞衛洙

大理寺簿魏峻太府寺簿制

朝謁八陵朱復之除軍器監簿制

曹友聞特轉承事郎權知天水軍事制

吳駟特轉武經郎制

城固縣尉趙僎特轉儒林郎制

武功大夫湯孝信轉右武大夫制

桂如琥除戶部員外郎制

吳昌裔除太常寺簿鄭逢辰將作監簿制

陳埏授中奉大夫直敷文閣宮觀制

中奉大夫趙善璫轉一官回授本生父不卞

贈承事郎制

中奉大夫趙善璫轉一官回授故本生母梅

氏贈孺人制

中大夫叅知政事陳貴誼特授正議大夫守

叅知政事致仕制

陳章特授中大夫致仕制

僞觀察副使顏仲明等一十四人並補承信

郎僞朝列大夫郝士特等四人並補承節

郎僞光祿大夫張俊特補忠翊郎制

陳貴誼特贈少保資政殿大學士制

黃壯猷除直祕閣權知紹興府兼浙東安撫

制

彭協贈承事郎制

歸順人王青等十一人並補保義郎制

卷第二十二

外制六

國用安除順昌軍承宣使右武衛將軍制

李琦武義大夫吉州刺史制

李琦除福州觀察使蕭均除和州防禦使黃

國弼轉武功大夫除蘄州防禦使李璨轉

武經大夫除和州防禦使制

歸順人李伯淵武翼大夫和州防禦使制

歸順人李璨補武功郎制

陳一薦除軍器監簿兼淮西制置司參議官制

劉用行知安慶府制

趙彥懷除太府卿制

崔福轉四官授武功大夫制

楊孝錫贈通直郎予一子恩澤制

龐謙轉武翼郎制

陳畏除大理少卿制

白身人任震亨襲父官補修武郎充珍州綏

陽縣公邊都同巡檢制

崔端純除倉部郎官制

朱實之差知肇慶府制

權刑部侍郎周端朝特轉通議大夫守刑部侍郎致仕制

李伯度除直祕閣京西轉運判官兼提舉提刑制

顏耆仲直祕閣淮東路提舉常平茶鹽兼提刑制

楊椿贈武經郎制

李安國轉武功郎依舊知金州兼管內安撫制

周宗傑轉四官授武功郎制

宮人丘氏封信安郡夫人制

陳隆之除屯田郎官兼知興元府兼利州路安撫制

盧進李聚朱廣等十六人歸順補承節郎制

李虎趙邦永轉右武大夫王政轉左武大夫制

周杆轉從事郎制

王瓚轉朝奉郎制

林瓌除直祕閣與宮觀制

殿前司統領劉喜轉武顯大夫制

董昇葛仙白身補忠翊郎制

游侶除軍器監制

知嘉興府趙與憲政績轉朝議大夫制

李昂英除大理司直兼廣東經略司機宜文
字制

李華依舊直華文閣廣東路轉運判官制

趙汝憚轉中奉大夫致仕制

趙希逾轉兩官授朝奉郎制

吳泳除祕書少監兼權中書舍人制

安癸仲除太府少卿依舊總領四川軍馬錢

糧制

陳康熈除司農寺簿兼知泰州制

歸順人王世昌補武翼大夫差知宿州制

歸順人張子良補武翼郎京東路兵馬鈐轄
制

歸順僞進士出身齊希古補承直郎制

歸順人西珪補承信郎制

歸順人于仙郭珍劉用游淑並補承信郎制

僞朝列大夫張德直改補文林郎僞朝列大

夫李國賢改補從事郎制

張叔寅贈宣教郎予一子恩澤制

趙善璫除刑部郎中制

黃朴差知安吉州制

叅知政事真德秀除資政殿學士提舉萬壽
觀兼侍讀制

呂延年除大理寺丞制

劉燁叔除太府寺丞制

何琮依舊直徽猷閣知福州兼福建路安撫
制

曾穎茂除直祕閣依舊福建路提刑制

趙彥候湖南路轉運判官姚子材湖南路提
點刑獄黃靜夫湖南路提舉常平茶鹽制

陳埏除直敷文閣知安慶府制

厲模直祕閣知常德府制

葛逢除著作郎劉炳除司農寺丞制

陳韓除工部侍郎汭江制置使兼江東安撫
使知建康府制

王與權知寧國府制

韓祥轉儒林郎制

鍾璵轉修職郎制

崔興等八人並補承節郎制

劉謙王鎔轉兩官並授保義郎制

王福轉武翼郎陞差淮西路鈐兼強勇軍都

統制

戴翼轉奉議郎制

何元壽除戶部郎官依舊總領湖廣軍馬錢糧制

王伯大除江南路提舉常平茶鹽兼知池州制

李江轉四官授武功大夫依舊淮東路兵馬鈐轄制

趙汝擇和羅賞轉朝奉大夫制

趙希惠轉承事郎制

陶木除祕書丞兼右司郎官制

趙與憲除大宗正丞兼權樞密院檢詳制

趙與競轉一官授儒林郎制

陳應星輸粟補迪功郎制

衛洙除大理寺丞方大琮太府寺丞制

劉煇叔除大理寺丞制

知高郵軍馬光祖政績轉朝奉郎制

何文美轉武德郎依舊淮安州副都統制

何處久除太府卿制

史嵩之除直寶謨閣致仕制

游九功除司農卿依舊知慶元府沿海制置使制

莫異德白身襲父官授銀青光祿大夫制

陳韓磨勘轉朝議大夫制

卷第二十三

外制七

吳淵除右文殿修撰知鎮江府制

蔣重珍除集英殿修撰知安吉州制

姚珪除直秘閣權知建寧府制

何炳除集英殿修撰知江州制

徐雄除國子錄制

陳大樸平黎蠻賞轉儒林郎制

張綽平蠻督餉賞轉儒林郎制

趙善翰知岳州制

黃朴改差知泉州制

塗顯行知崇慶府制

厲模楮綱賞轉朝請大夫制

權工部侍郎徐僑除集英殿修撰提舉佑神

觀兼侍讀制

黃堦知肇慶府制

丁晔除直寶謨閣准東路轉運判官制

魏了翁除權禮部尚書兼直學士院兼侍讀

制

叅知政事曾從龍除知樞密院事加食邑實

封仍兼叅知政事制

簽書樞密院事鄭性之除同知樞密院事加

食邑四百戶制

同簽書樞密院事陳卓除簽書樞密院事加
食邑四百戶制

余玠起復宣教郎襄陽府通判兼京西制司
機宜文字制

李勉平蠻賞轉朝奉郎制

徐清叟除將作監依舊兼司封郎官制

蔣峴除軍器少監仍兼權侍左郎官制

丘岳除兵部郎官趙與簋除都官郎中兼樞

密院檢詳文字制

趙汝諤除宗正寺丞仍兼右司制

汪之道除太常寺丞制

劉克莊除樞密院編修官兼權侍右郎官制

陳一薦護獻俘有勞轉朝奉郎制

顏信之獻俘有勞轉保義郎制

蔡仲龍除大宗正丞兼權屯田郎官袁商太

常博士並兼沂靖王府教授制

安恭行除大理寺正制

魏峻除宗正寺簿楊璟太府寺簿趙與爽藉

田令制

馮去疾除武學博士制

劉宰除將作少監制

尤燭除知江陵府兼京湖路安撫劉輝叔政
績轉一官依舊知建昌軍制

葛洪除資政殿大學士提舉洞霄宮制
何處久太府卿兼知嘉興府制

度正轉朝議大夫守禮部侍郎致仕制
禮部侍郎致仕度正贈通議大夫制

趙絀除大理寺丞諸葛十朋除大理司直制
李桀除諸王宮大小學教授制

何處恬除太學博士制

林宋偉除太學正林伯順除武學諭鄭斗祥
太學錄制

顏頤仲除戶部郎官兼知臨安府制

趙與憲除直寶章閣兩浙路轉運判官制

端明殿學士廣東經略知廣州崔與之除叅
知政事加食邑四百戶制

凌嵩除大理評事制

吳潜除太常少卿制

馮田改差知金州兼管内安撫制

真德秀轉太中大夫守資政殿學士致仕制

真德秀贈銀青光祿大夫制

同簽書樞密院事陳卓贈三代

故曾祖嘉謨朝奉郎贈太子少保特贈太

子太保制

故曾祖母黃氏上饒郡夫人特贈文安郡夫人制

故祖膏朝奉大夫太府少卿贈太子太傅特贈少傅制

故祖母蔡氏魏郡夫人特贈安國夫人制

故祖母汪氏魯郡夫人特贈崇國夫人制

故父居仁華文閣學士正奉大夫贈太師特追封申國公制

故嫡母王氏鎮國夫人特贈燕國夫人制

故所生母俞氏新安郡夫人特贈和政郡

夫人制

故妻林氏信安郡夫人特贈大寧郡夫人制

家抑除將作監丞制

趙堯夫除太社令制

史彌鞏王寓樞務羨賞各轉一官制

史全之監軍平蔡州轉兩官制

孫林張旺告發軍姦並補承信郎制

陳文孫知高州制

淮東路兵馬領轄耶律均復山陽有功轉三官授武德大夫兼知淮安州鹽城縣制

卷第二十四

啓一

謁莊提舉啓

謝葉提刑薦啓

謝費提刑薦啓

謝鞏都大薦啓

回鄱陽章宰啓

通交代林教授啓

生日回學職啓

謝黃留守科目啓

宗教謝廟堂啓

謝莊中書舉自代啓

謝廟堂啓

謝廟堂差幹官啓

通崔安撫啓

謝崔安撫舉改官啓

謝丘安撫舉改官啓

賀侍御啓

謝李坡舉自代啓

謝李制使舉改官啓

謝權帥洪提刑薦啓

謝賈制置特薦啓

卷第二十五

啓二

通李參政啓

上劉閣學啓

上安宣撫啓

添倅到任謝廟堂啓

通成都倅啓

回節推袖啓

回僉判袖啓

龍州到任謝廟堂啓

謝制置崔閣學啓

回生日啓

迂鄭制置啓

被旨奏事謝廟堂啓

賀廟堂定策啓劄

祕書郎謝廟堂啓

回胡判院啓

臨安諸友招講東山啓

再答招講啓劄

生日回啓

生日回程宰啓

生日回啓

生日回啓

生日回吳寺簿啓

復官謝廟堂啓

卷第二十六

啓三

賀鄭丞相啓

禮部郎官謝廟堂啓

回薛觀文啓

回程內翰啓

中書舍人謝丞相啓

回趙制使啓

回楊侍郎啓

回趙婺州劄子

回趙制置劄子

除禮部謝丞相劄子

答吳總卿劄子

答葉子真劄子

卷第二十七

易講義上

豫卦

隨卦

蠱卦

卷第二十八

易講義下

臨卦

觀卦

噬嗑卦

卷第二十九

故事

共三十一篇

卷第三十

策問

江東漕司不礙格

礙格

饒州堂試十八道

武舉公試

省試二道

卷第三十一

墓誌銘

吏部鞏公墓誌銘

孺人吳氏墓誌銘

吳氏孺人墓誌銘

孺人吳氏墓誌銘

鍾孺人墓誌銘

亡弟子文壙誌

舒夫人墓誌銘

高朝散墓誌銘

佛心禪師塔銘

二鍾君墓記

羅迪功墓誌銘

獅巖沈君墓誌銘

吳致政墓誌銘

郎迪功墓誌銘

卷第三十二

祭文

祭俞侍郎文

龍州武侯祠堂祭文

祭莊侍郎文

祭程廷邁文

祭鄒都大文

靈澤侯生日祭文

老人祭疇甫文

鍾惠叔哀辭

祭孫漢州文

諸父堂祭妣徐夫人文

老人祭亡嫂阮氏文

同日祭百二姑文

行狀

提舉俞太中行狀


平齋文集目錄下



平田文集

一五三

内閣文庫			
番 號	漢	10277	
冊 數		12	(2)
図 號		3	1



国立公文書館
National Archives of Japan

原本の文字など不明瞭な個所があります。

綴じ部(喉部分)の文字など不鮮明な個所があります。

平齋文集卷第一

古賦

大冶賦

余宦遊東楚密次冶臺職冷官閑有聞見悉纂二策垂去廼輯而賦之其詞曰

堪輿莫位峙嶽融瀆合地四與天九乾爲金而允屬發泰媼之珍閔轉靈脩之妙軸而築冶是臬段桃攻之有六出智創物重在泉幣燧昊倂興黃虞踵繼姒乙鼓于莊歷濟陽九之厄歲姬姜均于九府定帛刀之殊制侈卯金之七福筦鹽鐵於大農彌莢之與赤側獨五銖之適中宜乎識白水而錫

黃牛兆御天之六龍晉陽崛起齊秦賜爐含三體
之邈籀印初生之望舒雖會昌因州以辨名不易
開元之舊模彼其輕之則爲荇葉耒子鵝眼綆環
風飄水浮重之則比輪兩柱大布大泉直百當千
逞私智以膠擾夫豈足以操大利之權哉顓蒼監
德真人起涿聚五星摩兩日噓風雲旋斗極夷
崑崙蕩溟渤湖湘收波劒閣失險而王師飛渡於
采石攬六朝之王氣混江南之版籍治有永平仍
鎮楚澤列聖重規同文一軌穹符象瑜絜鵝疊
蠟升人申其厲禁九牧脩其貢篚於是監有永豐
永通阜財阜式熙寧廣寧神泉寶泉豐國豐遠寶

民惠
時分
蟠木南控丹穴西瞰大蒙北薄祝栗地產物宜旅
充庭實而萬寶畢萃莫東南之與匹蓋其鍾溫厚
之仁氣應絜齊之分域斗牛被飾以晶光江漢灌
輸其靈液淮海荆衡之壤厥貢三品會稽具區之
畛其利金錫漢鐵官長丞五十有一而專其官以
主丹陽之銅唐諸道置爐九十有九而重其使以
總江淮之鐵皆所以幹山海天地之藏充少府水
衡之積者也矧火德之王離薰協氣之嘉生銅鞮
牛而流魄銀走鹿而儲精釧溢釧錯丹永之入非
端之可名漕輶兼統肇於興國都提命官昉於

元平合江淮荆浙閩廣而建一臺則景祐之憲度
東治於饒西治於虔則元豐之章程戾淳熙之綜
核始復囊括於永平矣黃旗紫蓋天運有屬醴泉
器車地靈自鬻冶場之盛名在幹官者紛紛其可
覆鈔山濛山石堰岑水昭寶富寶寶成寶瑞雙瑞
嘉瑞大挺大濟永興新興興國興利大富廣富通
利通濟監務坑井殆幾萬計有畝而豐有興而廢
舉斯以旃特其凡例然或鐵山之孕銅或銅坑之
懷金或參銀而借發或且浸而且淋賜蠶羊僅之
言利莫能研幾而極深但見汰金有洲淘金有崗
瑞金有監通金有場史寶氣而貫虹蜺溢乎麟趾

裏蹠之祥豐城之黃瓌焉嗟嗟秋菊染霜寒英
墮落亭之紫爛焉陳陳春蒲闌水茸芽尚短樂安
精鏐胎瑞坑谷濬埒磧以採撫畫墁沙而披漉大
如落萁之豆小如脫糝之粟輕如麩之去麩細如
塵之生麩澄之汰之倏腴蒲掬渠陽澤銑毓奇溪
洞尋苗罽汭之邃破的礪壁之壅炊以火則流脂
鐵籠之烈淬以水則春糜鈔杵之重吉挺旅陳符
采飛動鑄神鼎而制嘉量是爲萬世不窮之用以
至銀城有場銀斜有坑銀玉有塢銀嶂有山寶積
張萬寶之空洞天壽倚一柱之嶺屹立巖墻而弗
頽慨徇利而忘安礮路深入閣道橫躡篝燈寒風

而上照梁杠挿水而下壓岸榜深窅之腹炮泐駢
石之脅捷跳蛙其不繫磔蒼髯而可鑷碓山藉礦
而殼雷淘池攪粘而飛霰流景倒燭星星曄曄燒
窖熟金爐裂鈇駟沸灰窠發氣初走於煙雲花徐
翻於霜雪它山莫優朱提則劣于以供王府匪頒
之用于以補冶臺貸本之闕是二品則然矣請復
究銅之爲說劉渢萃逋逃之藪擅採山之富而吳
之產豐於豫章卓氏爭王者之利錮齊人之業而
蜀之產阜於臨邛歐子破赤堇之山涸若耶之溪
而越之產不止於鑛鄒千將錢幣或造於楚晉冶
鑄多出於齊梁伏羲以來銅山四百六十有七今

之大要不過厥色之有三其爲黃銅也坑有殊名
山多衆樸蛇壇扶輿鬱積磅礴截薛岑嶸歲鬼曉
岫璘彬闌斑煥漾璀璨錯繄脉見函路灼牛飲盤天
井落礦紋異采乍純遽駁燠苗殊性欲斷還絡烏
膠綴金星爍款花淡丹砂渥鼠結聚團雞焦散泊
資餌膏油英潤濯濯宿炎煬而脆解紛剗刷而巧
斷批亢轟博浪之椎陷堅洞混沌之鑿巖雲欲起
而復墜石火不吹而自躍磅磅馳霆剝剝灑雹丘
示掩耳而疾遯木客捧心而竦愕膽寒野伏之夔
罔魂褫泥蟠之龍螭繚乎脩隧黝乎幽壑潛厝旁
呀陰窹斜卻共工觸不周而地維斷神禹闢尹閼

而龍門拓驪山百仞之下穿昆明萬夫之偕作曾
未媿其功用之博也逮其鑄寶齊畚甫具專諸虎
攫孟賁豕負徒堆阜於平陸矗岑樓於爐步煬炭
周繞薨薪環附若望而燎若城而炬始束緼於畢
方旋鼓鞴於爍怒鞭火牛而突走騎燭龍而騰鷺
戰列缺霹靂於焱庖舞屏翳豐隆於煙霧陽烏奪
耀熒惑遜度石迸髓汨流乳江鑠融臍膏注鉅再
鍊而麤者消釵復烹而精者聚排燒而汕溜傾吹
拂而飜窠露利固孔殷力亦良苦唯彼泉井淘沙
可鑄其浸銅也鉉山興利首鳩僦功推而放諸象
皆取蒙辨以易牙之口膽隨味而不同青澁苦以

居上黃醢酸而次中鑒以商婁之目泛浮漚而異
容赤間白以爲貴紫奪朱而弗庸陂沼旣瀦溝遂
斯決澆澍瀕溶汨密澈列銅雀臺之簷雷萬瓦建
瓴而淙淙龍骨渠之水道千漕分畦而滴滴量深
淺以施槽隨踈密而制閘陸續吞吐蟬聯貫列乃
破不輟之金乃碎不湘之錡如鱗斯布如翼斯起
漱之瓏瓏濺之齒齒沉涵極表裏以俱暢蒸釀窮
日夜而不止元冥効其巧譎陽侯獻其恠詭變蝕
爲沫轉澁爲瀘或挾下簞自凝珠蕊且濯且漸盡
化乃已投之爐鑄遂成粹美其淋銅也經始岑水
以逮永興地氣所育它可類稱土抱膽而潛發屋

索綯而亟乘剖曼衍攻峻增浮埴去堅壤呈得難
子之胚黃知土鉅之所凝輦運塞於介蹊燠積高
於脩楹日愈久而滋力礬既生而細礪是設抄盆
筠絡以皮是築甃槽竹龍以醺散銀葉而中鋪沃
銛液而下漬勇抱甕以潺湲馴翻瓢而滂潏分醺
淡於溜澠別清濁於涇渭其滲瀉之聲則糟立壓
酒於步兵之厨其轉引之勢則渴烏傳漏於挈壺
之氏左挹右注循環不竭晝湛夕漑薰染翕欲幻
成寒煖燥濕不移之體疑刀圭之點鐵若乃什課
登綱程促鐵往銅來錫至鉛續川浮舳艫之街尾
陸走車擔之緇屬出嶺嶠下荆蜀絕彭蠡洞庭而

星馳汧重淮大江而電逐四趨園府如輻有轂殷
麟軒磻削劣複陸頓之連城貯之列屋黑雲隕山
而亂委熊豹谿訝而起伏蓋不待銷飛廉釭瞿曇
而鍾官之用足於是鑄錢使攷其會辨銅令第其
品丁夫竭作匠師謹奮煤突整絜炭戶充牣鼓兩
儀之籥而大播役六丁之工而迭運祝融作女媧
進一煇濤生海門之微波再煇日吐扶桑之疊暈
三煇烘朝霞而爛照四煇洶屯雷而欲震張格澤
之輝燄迸攬搶之芒潤夸父即之汗翻漿而喝河
伯望之瞳眩花而瞬澄澈不穀通明無燼黑濁之
氣竭而黃氣次黃白之氣竭而青氣應液爰寫於

堯杓匣遂明於模印鑿之落落貫之磷磷砢之以
風車之輶軋輓之以水輪之硨隱縉網涓拭蠱覈
摩捃肉好周郭堅澤精緊文勁銀鈎色瑩玉填旣
刮垢以磨光始結縉而就準盡東門之漚麻不足
以爲其貫引百吏告功三官動色乃督鐸艘乃輸
王國版曹稽其贏虛之數起部程其精楠之績謹
內府之登儲衍外帑之椿積天子守之以恭儉冢
宰理之以均節與五銖開元而並行異黃榜紫標
之私殖金工鑠之則有禁蠻舶洩之則有辟宜京
師貫朽而莫校天下藏鏹而山則也其或用取鹿
皮制參飛錢通物之變扶時之偏亦本於輕重之

相濟子母之相權至論殖財莫如擇使有管仲則
藏富於國得劉晏則錢流於地言未畢客有在旁
啞然而笑曰子來自番知泉則詳坎蛙難語乎海
水醢雞未窺乎天光獨不聞負戾南面運塊北之
鈞而鼓四方者乎盪八卦範九章颺關雎播我將
融庶品於道德之橐斂衆寶於俊乂之場磨而不
磷者布在臺省動之斯和者坐諸廟堂旋乾轉坤
闔陰闢陽陶唐治虞規周矩商禮樂凝俗易窳而
良仁義鑄人革否而臧泰階以平天步以康前星
爛乎重暉旄頭瞻其不芒南風薰而民財阜膏雨
時而年穀昌于以植帝王太平之業詎止國霸功

之富強余乃豁然悟蹶然起拜手而系之曰天不
愛道聖賢興兮地不愛寶稼穡登兮人不愛情富
壽且安兮化工之巧莫窮其端兮

老圃賦

嗟余生之刺乖甘饁密而即疏痛虺隤其勸游羸
盤薄乎閑居老既怯於山橋窮莫備乎澤車坐玩
相牛之經間抄種樹之書五十弓兮野園數百武
乎破廬一禿翁以自業羣癡兒而共鉏冰解寒祛
霏開日舒濯濯我畦瀏瀏我渠穉甲怒長鮮英蔚
扶涉熟成趣驩然忘劬翁放鉏顧兒而言曰汝亦
知夫世有遇不遇之蔬乎駕釀施蓼廬醢侑菹藪

蒲羞鱉食苾薦魚芥醬且葢葱傑且胸烈有桂椒
滑有董榆已多乎燧人庖犧氏之初而况織翠屠
脍殷紅甃餽沐滴觴竿轟虺鍾竿猩唇豹胎之鼎
素龜紫駝之厨始饒涎其趨新中便腹而厭餘於
是葷臊望風而引卻芳辛候色而應頃擷翠茗於
崑丘掇瑤穎乎方壺蔗漿盛夏而凍合萍蘩祁寒
而煖敷行以白玉奉之綠珠五侯鯖兮遜美天酥
陀兮失腴此其遇合不翅初識之機雲晚見之嚴
徐也若乃巖壑棲遲竹屋槿籬尊擅場於秋風空
結鱸魚之思韭爭長於春雨未辦黃梁之炊荻生
而河鮑上橙熟而蟹螯肥拍雖勤而莫酬腹不負

其幾希已而凌寒采薇迎陽刈葵結萱堂背檐芹
澗湄饒黃獨之雪苗筐白薤之露蕤茗蘼蕪以滌
煩醪枸杞而補羸冷淘煮兮槐茁餽飽斫兮薺滋
法膏釧兮電突飫糞火兮蹲鴟酣糟紫薑之掌沐
醯青陳之絲雲蒸罌粟之乳瀉洵胡麻之糜輪囷
鵝鴨之瓠鬱屈龍蛇之芝婆娑熊蹯之菰鬢髮虬
髯之落鱗孕子兮搜魚鱉解裙兮樹雞竹競綳兮
稚子蕨初拳兮小兒以至太華之藕黃河之菇婆
羅之波稜大宛之首蓂南越之鹿角江東之嵒蹄
與夫蜀之雞蘇龍鶴枏脯加皮名品紛綸色光陸
離性異溫涼氣分王褒毛擇加精調膈得宜香聞

爽心味道解眉有舉按之接敬無轢釜之見欺芥
芬苾苾雜陳更進可以甦文園之渴療首陽之飢
彼其石芥老而逾勁苦筍少而已奇蕘有拂士之
風菊抱幽人之姿回睨蔓菁隨地而易質薯蕷視
人而變形曾不滿乎一啮矧肯數乎惡苴邪蒿臭
蒜而穢萎然是蔬也進不榮於珥貂鳴玉之齒退
不豪乎洒削胃脯之頤煙雲歎薄乎夜讀之吻風
露簸蕩乎朝吟之脾與齋鉢其爭道食方丈乎何
期其不遇可知已兒拱而前其然豈然諸葛以姓
行元脩以字傳玉糝得坡老而重銀茄爲倍翁而
妍與其見賞於肉食之鄙孰若託名於粹茹之賢

蓋窮患嫖名之不立而不患併日之食粥達患宿
學之不能行而不患一筋之萬錢苟道義之信飽
飯蔬食而樂焉翁捧腹一笑長歌振林皎白駒兮
東芻母金玉兮爾音

閔氓賦

嗟蚩蚩兮皇之氓惟皇引逸兮氓不自逸厥生考
室于山兮山嘯而瀑其降丘宅土兮土又墊而谷
中田爲廬謂可高枕無虞兮割吞齧爲川渠倚岸
環竹以莫厥居兮岸且善隕不可以久諸死殮無
衾兮生煬無竈哭不成聲兮仰天以詔天蕩蕩兮
何尤陽侯不仁兮挾天虐氓而橫流卑哇席卷兮
望已絕瀕滄圻兮高疇隨裂今夕之憂兮無以爲
歸明發之憂兮何以禦飢嗚呼蚩蚩之氓兮惟皇
之依

烘蚤賦

交送爽寒梅迎溽陰羸肌老幹敗絮故衾睡蛇甫
蟠跳蟲倏臨無蜂蠆材有豺虎心孕葉之隩宅第
之岑質眇乎粟觜餓也鐔其來施施其進駸駸假
託茵憑陵躡衽襟躁躍如舞潛行似瘖左發右應
前卻後侵螫其股錐惕其羶針據疾刺刺負芒森
森龜息正清撓不可禁蝶夢方相攪不可任爬搔
空疲摸索曷尋撫床以興子規夜吟赤脚張燈蒼

頭熾熾絮衾壓篝烈於金鬻初而蠕動如商望參
少焉紛綸如髮聚簪或壯或穉或纁或黔或尾而
丁或腹而壬龍跳虎擲疑聞鳴暗星流電激驚逃
沸殫力窮勢屈駢搏旅擒祈父爪牙凱平綠林蠹
爾最末虱爲賞音虱養大體尚知酌斟爾繁有徒
喋血懣深予其火攻難腥斧礚老妻在旁一笑振
衿謂彼族亦可爲世箴逢筭氣張見瓜影沉王極
必衰理無古今

俗諺謂蚤筭
擇來瓜皮去

平齋文集卷第一

平齋文集卷第二

詩一

廬山五猗

猗若人兮葛巾渡柴桑兮水冷泠稚子髡兩髦兮
從而後東家有酒兮綠參天其蔭柳山風涼兮月
暝枕白石兮未醒憐無極兮天游不知乾之爲馬
兮坤之爲牛

猗若人兮錦袍屏九疊兮紫雲高騎雲氣兮超遙
汗漫下上兮昌羊以遨左手兮提北斗之杓右手
兮挈東海之黿摩兩耳兮酣熱眇八荒兮秋毫
猗若人兮草堂谷簾夕陰兮香爐朝陽表溟滓以

爲門兮架虛空以爲屋四海非無友兮邀白雲而
同宿風露澹兮我琴舞玄鶴兮龍吟與太古兮同
音尚靈脩兮知心

倚若人兮黃犢春風蕩兮瑤草綠犢護草兮行復
止隔林呼兮老轂轅眠犢背兮閑閑仰看青天兮
飛鳥還恍夢游兮何所箕山潁水兮匪巢伊許
猗若人兮深衣萬鐘不爲泰兮一簞而遯肥溪之
清兮不受淄月離離兮風披披芙蓉兮涉採欲淡
兮心夷駕言兮何之羲文兮與歸

解纜

春落平蕪外舟行白雨邊鳩鷹山雨汝擗畫水之

玄宮冷誰能吏身閑便是僊康廬真箇去信有夙
生緣

晚晴

子規聲裏半晴陰百丈牽行岸草深挾雨倒回風
有力避山橫轉水無心人於熟處難爲別酒到離
邊不奈斟漁叟底知如許事擢歌穿入暮烟林

水宿

分席眠鷗渚廬山夢已通蓬聲踈密雨燈影往來
風我正思吾母兒應說乃翁擁衾天未曉此味與
誰同

過四望山

人遠鷺孤立湖平天四垂
施移舡解語帘舞酒求
知望眼傾三笑騷吟寄九思
今宵吾計得解鷺薦
鷗夷

阻風呈趙史君 三絕

長紅送酒出江城
檣燕喃喃第二程
風色似知攀
卧意打頭未肯放舡行

倚風晴纜着煙莎
一抹斜陽白鳥過
脫手簿書無
半點細翻黃卷課龜羅

遲速乘除轉晚飈
布帆快意定明朝
廬山試問高
多少欲望西川萬里橋

左蠡

山爲飛沙白江緣漲潦黃
古今雙去鷺天地一輕
航雋永還歌枕牢愁忍別觴
晴雲橫不度何處是
柴桑

落星寺

春秋隕石于宋五分作金焦
與星渚大圓鏡裏八
窓開面面魚龍聽人語
瀑垂一線吹不動山擁萬
騎明可數嗟哉蓄眼無此奇
欲倒銀河卷歸去

入山

簾輿軋幽徑喬松矯踈花好
鳥媚嘉蔭圓吭咽清
笳膏畦走秧馬茅簷嘶蠶車
誰知天下樂盡屬山
人家橋橫澗水斷寺古林屋斜

羅漢

銘架鎮法鼓

詩碑記煎茶尊者儼如故天奎失龍蛇劃然小窓
開五蕊撐豁舒斗酒軟兩脚捷步窮烟霞

三峽橋

太行擘破黃河出鼎鬪翻身滄海立老龍抱寶正
鼯睡地底黑風吹霹靂挹之以北斗之柄瀾之以
明月之璧啜之以太白東坡兩謫僊尚不負乎此
山之泉石

萬杉寺散珠亭酌觀音泉

蒼杉拱立萬夫長破衲素封千戶侯昨夜金僊失
瓔珞寒光蒲地不曾收

瀑布

開先寺後

青壁雙尖長劍倚博山突兀晴煙紫槐里先生醉
欲醒丫山道人定初起摩莎兩眼看飛虹猛悟上
身如此水崑崙絕頂有真瀑倒瀉生肥玉池裏淙
淙夜半漱白石十二瓊樓浸清泚是中有味人不
知白練銀河較形似

青玉峽

水繞江南阿李家滿空飛雪響雷車流將采石磯
頭去坐看浮梁壓浪花

開先乃李
中主書院

大孤山

洶長江其迅流歸傑石乎中峙送兩目兮雙帆有
美人兮千里

東西林

遠水兩尊宿未了人我心相距纔百武割據東西
林淵明游其間買酒時共斟虎溪醉來往同是廬
山陰清溜轉幽港斷雲度巍岑等作如是觀爐香
對森森

天池燈

山谷人家避李成誰知劫數莫逃兵到今鬼燐青
無數認作文殊佛火明

庾樓

湓城陶庾共功名廟食樓居孰重輕衮衮長江流
不盡淮山青處夕陽明

谷簾泉

山椒飛派落寒空闔水曾收第一功萬馬鐵衣行
夜雪六虬銀甲動秋風分甘晚到玉川子知味早
輸桑苧翁手弄潺湲坐盤石蒼涼新月上孤桐

楚城靖節祠

雨引莓苔上短垣流泉無恙自涓涓不如歸去來
兮好百世聞風只杜鵑

湯泉

水府燃犀處扶桑浴日時能觀雷復地始信坎生
離淨垢元無著溫涼祇自知驪山般鑒在莫受阿
環緇

歸宗墨池

龍跳虎躍入昭陵墨汁空留一段冰散作淋漓元
氣濕屋頭老木掛踈藤

三疊泉

捉月仙人不到處騎鵠凌風高着步龍從翠壁挿
天開天上飛來素濤怒玻璃琢出蓮花漏激電吸
蛛高下注布帆危掛八節灘飽風吹上龍門路冰
絲細織無幅綃雪花亂卷有聲絮蔚然而龍鏘然
韶大者如珠小者霧解衣盤薄踞虎豹遙送空濛
濕巾履金鋪玉戶蔡家姝拍手招人笑相顧麻姑
老矣不解事指點五雲推使去

白鶴觀

缺唇丹井應千尺禿頂靈杉恰百圍鶴去不聞人
下子黃蜂無數採花歸

楞伽山房 二絕

八萬猊床方丈室九千書卷半邊窻僂翁句子無
人問流水泠泠度石缸
風標勁似聶政姊筆力健如曹大家此手始能爲
此竹對渠枯木老槎牙

水行

岸曲頻移拖巾歌獨倚櫓月分雲外影風進水邊
涼宿鳥樹三匝佳人天一方清斯纓可濯誰爲賦

滄浪

洪園洗心堂飲中偶成

官事何時了抽身朱墨叢
未霜烏桕赤得日紫薇
紅山勢西南缺湖光左右通
引將絲竹卻洗耳聽松風

荅仲肅梅

巡簷索笑爲踈花便未開
花亦自佳帶月折歸香
在手開觀塞破路三丫

鄱江樓晚望

暮雨纔收未炙燈蒼鷺掠破岸
陰澄頃臾認得舡
頭竹始信漁人掛起罾

有感

一蝗東方來孕子九十九
未出焚酣肚已辦饒饒
口漫天自成幕掃地不用帚
一朝霜風寒何處弄百醜

取涼二絕

六月冷官還解熱解衣盤礴坐
蒼苔微風只在松梢頂
着意招呼不下來
平湖水則減三分尚欠紅蕖一段雲
萬斛波光自吞吐月明亦足張吾軍

敞雲樓二絕

江天雲作黑山頽上到樓頭手
快開水墨枕屏三

百里斜陽屬玉一雙來

草樹成行整復斜江頭白處定蘆花夜深更著無
邊月好箇樓居處士家

正月三日同莫幹祝法遊東西園

探得行春第一籌南梢花事半將休斷雲不礙遠
山碧新月自隨江水流金谷主人真已矣玉堂老
子尚來不丁寧留取蒲城酒更約東風汗漫遊

擬古送莊郎中歸朝二首

西北有高樓長眺起我思我思非今人古人莫見
之孟軻尊仁義妾婦秦與儀孔明抱禮樂鬼域操
及丕已物孰重輕徇道不徇時富貴一餉樂名節

百世師居今而行古豈無若人斯迥迥從之游洵
盤濯雙綾

涉江採芙蓉露華不盈筐雜之蘭爲佩申之蕙爲
纓持此孰與贈美人天一方駟虬乘蒼鷺御風朝
虛皇袖中治安書琅琅奏明光探囊出刀圭爲民
起膏肓臨流不可渡與世爲津梁玉池浸雞舌薰
作青史香

林同年被檄來體訪民租寓僧舍有詩

因次韻二絕

河水清兮有縣特東方作矣未解襦寄聲卿自用
卿法我獨舉酒留詩臞

我雖不飽尚二簋人則何幸無一襦官儂早下減
租筆天下可肥身寧臞

送陳倅

泊然無營如子雲撓之不濁如黃憲清靜勿擾如
曹參躬行不言如石建古人與稽今人居外若不
足中有餘治中別駕寄途耳用則天下皆華胥東
風昨夜收雨脚楊柳亭前小盤礴楚江君去定思
君有酒一杯傾滿酌

陪郡侯出郊勸農 六絕

勸農可蓋出江干馬上東風鬪栗寒珍重春衫唾
花雪

眉狼籍道傍看

山青未了曉光開鳩喚鳩應雨又催消得犢車泥
滑滑此行不爲杏花來

茅屋人家蓐食烟相呼趁雨好翻田去年下麥泥
如鐵一寸春膏直幾錢

爭問官儂子謂誰看來似不是農師向人羞道閑
陪涉說與幽風七月詩

煉丹人去屋蕭蕭脚底羣山走翠蛟長嘯一聲空

響荅若然隻鶴起松梢

王仙壇勸農乃馬蹄福地晉王遙仙去之所丹爐猶

存

半落梅花雪透明不妨把酒當春行光風有意相
料理楊柳青邊約畧晴

夜讀夷堅放卷偶成

歛卷驚嗟語幻咤搔頭危坐對明缸梧桐細語秋
傳信絡緯長鳴月上窓濁酒不多雙耳熱妙香無
盡寸心降家山未得平安報飛夢東歸拜老龐

秋夜

一日一番雨三更三昧涼桐邊青弄影荷底靜留
香俗物刺人眼世情冰我腸關山何處笛落月照
胡床

次韻曹提管楚東之作

蕭騷兩岸落秋蓬楚水西流不肯東好酒但須知
婦有涼莫問與誰同片心置向羈塵外萬事留

將醉眼中喜得建安標洛在何曾詩解使人窮

中秋楚東對月次曹提管韻

西風一笑話綢繆白露橫江滴滴秋天收遮欄金
餅上水無邊際玉繩收扶將太白酣方適喚起馮
夷舞未休今夕明年應更好夜潮來處倚危樓

和黃宰木犀

春風花事數河陽又見玲瓏糝綴黃萬斛香添秋
醞藉十分涼借月容光熏奩拾取留長挹湯鼎煎
來得細嘗須信小山標致別從渠塗額學宮粧

冷解面挹重湖結樓以收逸放之景扁
以清斯諸友移酒落其成分韻得里字

寧飲三斗水不揖襜褕子寧食三斗葱不踏龍斷
市伯夷聖之清餓死不受俸死猶清可爲況乃未
必死幾人濁惡海雞鳴爲利起魏其武安門西削
胃脯氏椰榆首陽山自伐我計是使清能死人濁
者亦死耳官居寂寞濱不墮闌闌裏器塵一關隔
死在水中吐樓居得未有鑒影時自喜天空塔戴
角湖斂沙脫莆烏相生晴陰芙蓉淡秋藥鷺點橫
烟稠鴈掠斷雲駛山缺女牆轉林斜僧屋倚江流
在何許危檣出半指長堤苔痕平盡日無步履有
人爲我來寒冰照人只鷗盟以要之相對弄清此
明月不滿掬一漱霜入齒蔬菜資盈室爲君種蘭
菰戶照艾盈腰爲君攬荃芷吾非好獨清濁亦君
所耻千丈一寸渾清恐不如此出門歌濯纓聲節
中宮徵西風騎兩鵠碧落絕萬里

次韻曹提管梅

凌寒峭立向庭除晉宋淵明漢二疎面冷不堪相
斌媚心清聊爲一軒渠月來月去香仍在春少春
多意自如皎潔孤芳誰與共作詩我欲寄東徐

次黃宰早春韻

勝裏春來早遲君秉燭遊煖如三月暮香老百花
頭心事付桑落風光催栗留人生行樂耳任命不
負

分岐四絕呈及甫

草色半有無梅花間開落還家正自好柰此抱離索

送君一程歸別我數里隔定非愛雞黍前例無此客

大兒長如竹小兒秀如柳迎爺拜新年領髭白八九

客裏有底忙申且不成夢遠歸勝新昏還君春睡重

白鹿書院

萬綠園陰町疇場倚涼弦誦玉琅琅溪山涵毓中

和氣草木薰蒸正大香陋巷顏淵何所樂舞雩曾點若爲狂懦夫百世聞風起此去濂溪更有莊

和黃幾叔墨梅二絕

月暗雲迷竹外枝寒香未動便能奇面如坡老南歸後骨似溫公獨樂時

六月夜窻留取看霜風蕭颯墮林端問渠底事青青晚耻上尋常桃李盤

和黃宰招飲

大都春色三分耳能得眉頭幾度開見說東家酒初熟不論今雨也須來

幕官相約觀芳草於法曹之亭黃宰病

不至以詩來因次韻

似無細雨還應有欲落餘花更復留
草際水邊青未了可禁杯酒爲扶頭

古意謝崔揚州辟

七首

突兀誰家樓風雨歲薄之大梁危欲壓
小柱亦半欹匠斧睨其旁搏手難獨支
南山有奇材細鉅不可遺

拒霜著秋紅夸詡顏色好五更青女勁
顚顚一何早深林蘭自芳寒節耿獨抱
識此知見香鼻觀不草草

山深闔無人夜半迷黑月魑魅乘其昏
光恠互出

沒獨行欲何之十步八九兀隔林炬火
明命向虎口脫

汾陰有古鼎金景歆浮雲幹棄不知愛
瓦豆薦苾芬提携向中庭拂拭蒼蘚紋
雖非大籀篆彷彿猶八分

擿擿兒女手申旦軋機杼織成遍地錦
翠鳳濕花露三年卷篋中背立泣不遇
持歸付刀尺畫線金針度

江頭客子舡盡日卧沙尾維楫非不具
潮弱未能跬秋風雪浪高長年絕叫起
舡行莫倚柁難得此汎水

梧桐生高岡上有朝陽枝鳳從南方來覽輝而下
之一鳴寒暑平再鳴風雨時秋秋百鳥羣振翼長
追隨

送潜同年敷調官歸

以君一年長爲我異姓兄衡從玄圃玉出入武庫
兵急手搏蒼兕雋氣鞭長鯨議論到千古慷慨吐
不平漢以初元衰唐以天寶傾附勢妾媚嫵避事
兒嚶嚶頽靡浸成俗忠良竟吞聲自謂倚南山不
知壞長城君子勇於義小人罔而生儻不餓采薇
遠可死結纓每聞壯其語亦嘗用吾情有餘不必
盡尺渾勝丈清六經源岷嶓百家派渭涇歸求性
內學莫計身外名春風兩鬢綠秋月雙眼明通德
擁高髻勤勤剔寒檠

嚴陵道上雜詠七首

江上送行潮汛小舡頭回首夕陽多人生有幾柳
如此客思不禁花柰何
半江雲濕欲成雨兩岸水渾初退潮短短竹籬花
朶壓深深麥塢雉媒嬌

玄英范老聞風起俱爲羊裘一釣絲堂扁三賢非
本意何如只號子陵祠

石壇千尺薜蘿古沙徑百盤苔蘚香不是先生求
矯世懶將日月趁人忙

闌巢搏黍待晨餉投岸春鉏尋暮樓揔是心爲形
所役搔頭獨立渡橋西
高高下下客行路整整斜斜人住家端的今年蠶
較晚石榴花下響繅車
細草護沙連不斷踈風畧雨散還收山田麥熟不
歸去三百里江都是愁

爲清隱打化僧說偈

雲山幸不求吾是魚鳥依然笑我頑自欲入城持
鉢去扣門可煞老僧閑

丁東泉

渴鳥滴盡三更雨鐵鳳敲寒六月風湯餅困來茶
未熟爲師搖夢作丁東

昭君行

紅嫣翠濕平陽里輾轉遊車汎流水蒼頭擁騎知
謂誰草草人家寄生子君王神武重邊功不愛穠
華勝桃李青鸞扶下五雲車顛倒衣裳冠薦履賞
功未了說和親又墮蛾眉芳夢裏平章三十六宮
春遣似天驕買驩喜朔風吹雪胡馬嘶獵歸月淡
龍城西重旂穹窿壓斗帳泛盎快攬金留犁細調
弦索爲郎鼓手未推卻眉先低林深人靜孤啄木
春盡樹暗雙黃鸝大居次吹梅花老小居次舞楊
花迷暑牙勃窣起爲壽一粲相對酣如泥子卿海

上亦良苦牧羝未乳兒先乳信道天涯共此情誰
謂姬姜必齊魯妾身不爲漢婕妤下嫁猶獲當單
于從來蕃漢等昆弟得婿渠不如家奴君不見冢
象廬山誰比數青塚名傳千萬古

春日山行 二首

一晴一雨柳添碧半落半開梅着酸不被東風相
鼓弄春山只有老蒼官
兩點眼光牛背上一窩春色落花邊世緣不到山
深處只恐深山起世緣

挽中書俞侍郎 二首

器重千鈞鼎胃涵萬斛舟文章歐六一政事富

州偃月知誰在靈光獨我留貂蟬雖未着不作汗
青羞

銓省承新渥詞垣訪舊陰頽波回萬折斷岸立千
尋祇謂人猶已那思昔異今時清猶憤死天地是
知心

贈希聲居士

汗漫騎鯨去西風髮半簪安心元是藥得趣不妨
琴人靜蛩鳴夜天寒月出林爲君重洗耳別酒不
須斟

江頭寄致遠 二首

箕斗光移析木津踏霜扶醉不驚塵夜寒應是梅

花覺半斂愁容婉待春
客窓翻遍竹爐香樓外更聲作許長解事燈花相
報似擁爐兒女說荒唐

寄崔帥卿

歸鴻隻影宿汀洲夢繞蘆花不柰愁潁谷杯羹無
日遺翳桑橐飯有時酬功名曠世來斯受議論驚
人合則留此事大關天下望殷勤爲報古揚州

贈趙同年別

買田招隱落星灣採盡詩材始放還逆境自安天
理順鬧籃誰識道心閑兩窮覲面塵埃裏一笑論
情醉夢間爲說斯文有宗主春風楊柳滿平山

壽崔帥卿七絕

嶺右山川間出賢開元宰相最居先中間不數余
安道恰到于今五百年

連蜺雌霓墮晴空光照書樓卷紙紅天爲斯文開
瑞應海南海北一宗工

塞下人家盎盎春又推餘澤及流民慶州小范青
州富合作先生社稷身

弄兵瀕洞射陽秋一紙招呼殺氣收十萬蒼生驚
魄定活人陰德過賓州

夕烽旁午徹甘泉獨有淮東一臂全若使盡從持
重計廟謨底用更憂邊

紛紛傳檄方言戰，狎狎囊金又說和。誰信規摹須早定，計然半策不須多。

垂弧節過便春風，入侍猩袍一點紅。殿上獸樽誰得飲，漢廷諸老定輸公。

續洗兵馬上李制置

太白過午芒角獐，蚩尤亘天鉤尾獺。淮東千里正勦寢，夜半洶湧傳邊聲。王師北渡衄泗口，胡馬南牧搖青平。擁城敗將死蝸縮，護堡羸卒飛猱驚。詩書元帥戒夙駕，往試百萬胷中兵。幾人險語挽衣斷，甚至涕泗交縱橫。李晟爲國不虛出，裴度與賊難俱生。兩軍相持以氣勝，督戰火急開行營。長江

漲綠，馮夷舞擊揖，東來親一鼓。威靈閃閃動牛斗，精采軒軒起貔虎。金牌銀牌膽爲冷，千戶萬戶色如土。尺兵寸鏃不待施，已覺目中無此虜。四旬頽頽聞困獸，一夕倉皇竄飢鼠。不聞令狐憂刀斗，但見龜山撐窄堵。麥畦黃裏粟留風，秧畦青邊勃姑雨。老農想見太平年，買酒煮茶相勞苦。黃旗紫蓋祥光開，宮柳飛絮公歸來。平淮勒碑字如斗，饒歌奏曲聲如雷。奉觴再拜白壽母，兒輩破賊邊州回。歡然一笑春滿面，婆娑起舞斑衣萊。還觀先正紹興日，立朝清節高崔嵬。獨於和議植赤幟，坐令火德然寒灰。家傳此意石不轉，事業自許圖雲臺。從

今着手快經理一洗河洛無纖埃君不見武侯用
西蜀誅賞大明人自服又不見叔子鎮襄陽恩信
一孚江漢皆金湯

送興元聶帥

泛觀天地間一氣如爨鼎半鼎沸正急半豈獨爾
靜從旁更益薪既往漫不省疇當起沃之轆轤轉
脩綆長空墮旄頭胡命懸漏頃不戢方自焚餘焰
燎吾境倣從淮漢擾馴至褻斜警勢欲合南北事
須得要領和固不可爲戰亦未易逞中興關人謀
而可倚天幸君侯富經綸頗牧在禁省憂國如憂
家申旦抱耿耿袖中平戎策直欲繫其頸王斧下

青冥上游建巨屏秋高馬正肥慨慷沂巴郢鏌旗
凜太一福星映參井蜀從更化來舊痛甫甦醒風
寒不善護遂與勞復等內勢旣踈韞外兵且贅癭
但嗟車麟麟未見旗整整曾中百萬兵氣壓貔虎
猛涼飈送先聲鬼蜮已匿影自昔樹勲業莫先拔
翹穎共功非衆材殆類無麵餅孔明駐漢中欲翦
漢賊梗委心任費禕屈膝拜許靖笑談扼姦雄老
死不得
至今出師表日月光炯炯惜哉會潼關
不從魏延請公才幾倍亮謀略濟忠鯁機會有可
乘臨事勿吹冷秦隴咳唾定歸袞顓國秉頌磨浯
水濱銘勒燕然頂諸生筆如椽須公一笑肯

送新婺州汪總領歸歛

天驕運去如隕墜橫決燕涿流青齊斬竿揭旗扣
並塞被髮左衽稱遺黎膾肝山前走肉語確骨塞
囊飢魂啼盡籠虎兕淮南北期獵狐兔山東西常
人喜功首例肯智士察變眉先低危言不顧犯衆
忌設難直欲開羣迷近嗟唐禍兆回紇遠述晉亂
基羗氏積薪未然不着手曲突已驗空筮臍賊帆
方落射湖去胡騎已闖滁山嘶正須籌幄坐月觀
却卷郡紱尋黔谿帶泥燒筍薦晨餉踏雨剪韭供
春壘心安便是上池藥眼淨何用黃金篋蜀公早
嘗着野服君實晚始持相圭方來事業推不去還
踏曉鼓聽朝雞窮邊殺氣貫矛戟嚴城酸風吹鼓
鼙化雲相隨不可得矯望玉宇橫蒼鷲

送崔少蓬南歸

五首

美官誰不愛所貴以道得道足以得之有底去尤
力祥麟快掣鎖玄鶴不受弋此意關重輕當有識
者識

欽永早患失光禹晚志得飄風一鴻毛何能益人
國已重物乃輕此理要深識方寸浩然氣天地吾
其塞

富貴紛探驪功名競騎虎眉端萬國愁公意良獨
苦五年安邊功絕口不自語仙帆去蓬萊急浪一

砥柱

出江梅未花過嶺青着枝解裝書蒲床自課應門
兒獨樂非不好民瘼將疇醫詔來不俟駕世事猶
可爲

楊州傾城出作遠事追送諸生更依依瘦馬踏朝
凍冥鴻去何許水落霜宇空鬢短心緒長危檣曳
清夢

平山

放脚氛埃表搔頭廣莫間淮分三代水江護六朝
山落日蒼烟起秋風白鳥還歐韓呼不起髀滿鬢
毛斑

勸農呈丘帥

劭耕好語落西疇父老逢迎笑點頭銷甲事農官
有術賣薪沽酒我何憂黃金深椀頻傾倒白布長
衫迭獻酬颯颯雨華隨後乘安排麥隴十分秋
南樓健目畧江皋浙蔌風沙響鬢毛草色不隨壕
岸斷柳梢恰與女牆高碧幢紅旆三邊帥羽扇綸
巾一世豪坐上捷書來獵獵官軍破賊戰方鏖

挽孫謙伯二首

文妙生花筆名成映雪書處家貧似富應物密如
疎薦墨交黃綬榮光照板輿出門車折軸天理竟
何如

日月無多子鄉邦失兩賢直爲吾黨慟不作世情
憐握手春風醉論心夜雨眠耳言猶歷歷何忍表
君阡

次繆仲右韻二首

心緒千絲結年華一鳥過可人元自少知己不須
多咄咄君休恠嗚嗚我亦歌將軍渾健在醉尉莫
誰何
窻暖楊花撲庭空燕子過年侵歡易減春惱病宜
多攪涕論兵事扶頭讀凱歌日來能飲未正好醉
亡何

用胡衛道贈姚居士韻

牢落淮南賦小山霜風容易老人顏揚瀾去盡天
垂碧夢與盟鷗共往還

孫推內子挽詩

王立金閨客家人亦許清共聽秋塞柝細剔夜窻
檠娣袂從渠好兒孺得我平西風吹落葉不盡夕
陽明

李致遠母夫人挽詩二首

有子何蕃似懸知母訓賢市賒留客酒隣貸買書
錢苦過蓮心後甜回蔗境邊一朝風木憾誰與問
蒼天

日與夫人子相隨若弟兄羨渠猶有母使我欲無

生未病思求藥方餐念遺羹此情今已矣淚雨待
同傾

送商總郎三首

鶴唳風聲肥水捷馬騰士飽蔡州平笑談定取中
興策莫道司存只餉兵
霜遲斷隴蕎花白水足平田稻子紅剩把豐年供
祖帳送將王節過江東
百尋浮玉三更月萬里長江一色秋照映此心須
此水不妨小泊讀書舟

挽伯父二首

白髮兒隨母蒼顏弟對兄四休元易足一笑日可

營論事絲弦直存心鏡面平德人今已矣誰其
鄉評

憶作行邊別相期到鶴州秋風驚過眼落日懶回
頭華屋空遺憾佳城足遠謀無從扶柩哭揮淚寄
江流

次張亞夫喜雨

亞夫從張林
自青州到楚

汴都黍離迷宮堧金鋪獸面秋風寒百年大義冷
於鐵西湖走馬絨絲鞍亡秦定必三戶楚況今南
北皆王土紫髯青鬚祖豫州威如迅雷惠如雨山
東井落回生意收召驚魂高枕睡中有堽將來青
州馬蹄欲踏狼胥碎邦人聚觀開塞塗和氣釀雪

蘇焦枯銀城萬里軋坤軸燭龍一色燁天衢殷殷
好語傳田間雪晴又雨直幾錢翠蕤漲天士宿飽
踴躍一鼓空兩甄中原宿愁無地愬歡呼從此歸
王度更煩老筆爲草檄讀之會使頭風愈

挽李漕 二首

翰墨多推轂功名早著鞭風行青草外春到白鹽
邊老去心猶壯歸來意正便如何天不憖烟雨閔
新阡

百折溪山裏佳哉有此翁名方隨政起命已坐文
窮蒲眼棠陰在回頭橘隱空詩髯無復磔萬象自
春風

次洪漕韻 二首

塞垣擁雪髑髏寒多少將軍博美官莫恨知心今
世鮮須知行道古來難時窮地狹何能舞命好天
高亦可鑽此理乘除應會得梅邊索酒笑相看
和月梅花共一寒堯年未必盡簪官醉來抱膝吟
梁父睡起搔頭著說難富貴冰山何用倚功名盤
石自須鑽朔風衰草腥狐兔獵火歸鞭夾市看

寄趙景周撫幹 二首

罨畫春樹碧逢迎繫行舟酒盡可以起更作須臾
留我方鶴投籠君已鷹脫鞲相期在歲晏贈之珊
瑚鉤

楊柳一川絮芍藥紅方葩詩隨去帆東春風隨
家音疎日月駛目短天宇賒小德最憐渠丹頰三
髻

贈洪子需 二首

莫恃青春兩頰紅年來我已鬢如蓬盤洲野處源
流在早挹文名尉若翁
樓倚晴空月蒲湖一塵飛不到庭除虞初九百渾
高閣且讀人間本分書

口占

秋風已颯梧猶碧宿雨纔收稗亦花天著工夫供
醉眼東鄰有酒不堪賒

贈相者

援臂老不侯鵠肩騰上速婁羅千丈長不博一寸
福

送丘都承

藝祖立鰲極腹心趙書記披圖指幽燕翰死誰可
繼異時拾空城中國坐自弊伊吾紛抵掌須作根
本計 仁皇柔北夷富公效表餌終身耻言功力
辭樞密使況今百年間未洗新亭淚平涼急尋盟
正恐廢大義中朝兩說分各植漢趙幟詔書趣公
歸渴欲斷羣議矯矯鸞鳳姿鼎鼎廊廟器持心水
鏡平料事著蔡智天道方好還上策先自治

和戰間守乃萬金利西關碎其有東壘掇所
狀朝暮殊守亦豈易事醫國得和扁神聖工巧備
囊中黃昏湯着手須早試外禦幾邊將中權一聞
制當思擇時髦不在變局勢時欲分道置制間忠貞乃
脉公道實元氣精神以此彊可卻十萬騎淮南畏
汲黯奉天倚陸贄中興在公手一語澤百世太山
重名節鴻毛等富貴不惟天下望是亦文定志紫
樞摩斗極青藜照中祕江風駕檣烏天闊秋雨霽
諸生笑牽衣狂語出半醉勿作醉語看嚼蠟或有
味

平齋文集卷第二

平齋文集卷第三

詩二

呈同行諸丈

秋風俱白髮萬里錦城官箭貫雙鵬易琴隨一鶴
難國寬同是福民病獨何安前見乖崖老煩君舉
似看

遇風出陸金陵道中次程及甫韻

留滯周南命使然莫疑上水逆風舡鄉山故故隨
人後客月依依墮我前半夜索樽同決計五更回
施不成眠筍輿吹面新涼入須信封姨正自賢
次及甫韻送致遠別

塞塵沒沒馬蕭蕭世事今朝異昨朝爲羨白頭
浩蕩却思斤鷄亦逍遙平沙露磧江波斂遠樹明
堤野霧銷快着扁舟歸教子勝渠蒲屋貯胡椒

九日復口

涼邊未放菊花斑莫作重陽節物看就網買魚風
露重推蓬舉酒水天寬箭頭歲月離弦易局面功
名下着難慙媿竟陵江上叟採菰搗黍鬢毛寒

荅程及甫徐少望

客程欠舞綵衣斑懶把茱萸對酒看涼思着人窮
脚健豐年到手老懷寬有風不怕江流逆無媿何
憂蜀道難但願浣花花好在免教杜曲日長寒

宿施頭次及甫入沌韻

手遮西日望褒斜百折舟行尚玉沙風趁港回帆
落柱草迷路斷牽收車長烟漠漠非吾土老樹離
離似我家今夜宿頭應更好月明四面盡蘆花

又荅孫正叔

萬里西風鴈影斜平安書到魯家沙遣愁白墮湏
行甕報喜烏邪又蒲車老屋打頭思釣隱健驢銜
尾認詩家道旁啁哳兒童說有脚陽春向浣花

祖母哀挽 二首

我祖當家始零丁隻影存根芽惟大母枝葉又曾
孫觸少心猶惕慈多語易溫德尊年亦稱消

花恩

疊綵春風裏含飴愛獨深卷卷行已訓歷歷讀書
箴長憶違離語難酬侍養心微官稽執紼東望淚
盈襟

九月十八日夜泊劉郎浦二絕

甥館劉郎舅仲謀並緣瓜葛借荊州人生一藉裙
襦力卒世如何得舉頭

平生意氣壓曹瞞却爲夫人

石首縣有孫夫人臺鬢作斑堂

上橫刀何足問五兵只在畫屏間

風定舡開夜泊柳子口上到荊州尚三

程

山遠江

辰爲開楚樓西畔即陽臺金釵短笠風

聲接蒸裹焦糟節物來雞喚客程三老起鴈將歸
夢五更回白雲飛處西湖近應買霜螯試潑醅

荊州江浮水燈作佛事

誰把銀河徹底傾倒翻星斗著行明又疑籠道紅
桅子隱隱鳴鞘出五更

江陵

三海先聲壯重城大勢連竹爲人世界燈結水因
緣風物詩囊裏英雄淚眼邊江平洲露碧沙市穩
開舡

渚宮

孤城銅斗匝枉渚玉環連柳老蟲穿蝕花殘蝶撲
緣功名棊腹角勢利蜜中邊落日興亡裏誰同藥
玉舡

又次及甫渚宮

南樓風物遠西郭市聲連蠅虎寒窓搏蝸牛敗壁
緣懷人喬木外吊古折荷邊富貴今安在樵歸喚
渡舡

艤舡

地與人相習天於水欲連施迎斜岸轉筴避斷崖
緣龜殼蹢躅底羊腸詰曲邊幾年西蜀路無此鶴
琴舡

次及甫即事

萬里西征路同君汗漫期吳歛花裏曲楚些菊邊
詞問學千雞跣功名五穀皮目前姑置此多辨峽
江詩

白羊同行五六登無盡墓入義方傳慶
寺讀鍾離公所書兩句贈八瓊張子高
碑及呂公來訪事程教有詩次其韻

鍾離權約同燒永呂洞賓呼共屑瓊便合身隨笙
鶴去底須冠劍葬空塋
墓前蒼榦直能奇勾引先生讀斷碑見說嘉禾曾
有頌平生行止不須疑

次及甫覺寒

霜勒衾如水寒於客有期不成神女夢空賦外孫
詞甕暖宜桑落冠涼怯竹皮懸知鄱水上冷落廢
度詩

程鄱陽人

舟中望南山次及甫韻

水羸牽路漫水縮灘磧多涉世正如許忠信平風
波寒肩擁楫櫂灰裏尋陰何舉頭見南山白雲生
薜蘿

青草夢詩後兩句早作足之

乾馬坤牛放手騎縱橫上下盡通達杖頭挑起東
風海峽向東邊若木枝

次及甫入峽雜詠

峽口

山隘留天少江迂占地多風梢猿自掛露草虎曾
過坐客猶吳語行人盡楚歌川妃瀾浪甚著語試
誰何

十二培

舍車不涉猢猻愁行舟未過蝦蟆培咸池樂部十
二鍾六丁挈置巫山背鼉頭鼉頭方壺裂鯨腹膨
脰海門碎鑿開混沌尸者誰事逐浮雲墮茫昧

平善埧

水風靜處拋舡易山雨晴時著句難便向箇中占

好識一程平善過雲安

至喜亭

巴峽頭邊第一州竹枝歌裏水東流蓋亭老柳今
如此六一先生幾繫舟

三游洞二絕

寥陽殿古瓊關啓祇樹園深寶蓋張長嘯一聲空
響谷只疑驚起橘中商
披苔覓字雙明健倚樹商詩兩鬢皤地劃天開今
幾世往來人物盡消磨

釣魚石翁

刀耕火種皆丘甲背負腰纏盡筭絳獨有石翁魚
得計至今疑是避秦人

蝦蟆培泉

丹墀萬字中興策西蜀人材待細掄好把玉蜍留
水去直言莫問近前嗔

聖節日望拜黃牛祠前退讀衆碑感而
有作

蜀在八極間卦位西南坤萬里泝天險三峽爲坤
門巨靈擘太華飛出黃河源餘刃落巴山巉絕雷
斧痕衆崖束長江水石相吐吞轟豕九鼇戰洶湧
萬馬奔高低建瓴峻上下竹節繁操舟失毫釐壑
粉千丈渾灘名鼎無義造物疑少恩黃牛壓其湍

坐睨驚濤翻入門兩石馬耳缺蹄噉存行人紛乞
靈熏燎迷旂旛摩挲幾豐碑颺香簏應墳醉翁事
已恠無盡語不投黃能羽淵魄蒼牛離堆魂逞奇
角異說終莫探厥原或指峽名揭或取山形蹲狼
頭與鹿角胡不登脈膳五行土勝水似識丁壬婚
爾牛何來思此義欠討論黃裳正坤色爲牛亦坤
元坤維闢其戶職之廟貌尊叱咤遁蛟蜃麾訶走
鼉鼉駛湍危就夷怒石厲即溫神以順治險抑以
靜制喧萬命脫谿飭神手司平反長年送迎神牲
瘠漓酒酸歸舡詫靈賜意氣殊軒軒心安盡鷁穩
目送征鴻騫哦詩記行役霜風耿黃昏

荅及甫和

束髮讀連山端倪識乾坤欲辨南北戒須窺越胡
門藏書探禹穴乘槎窮靈源平生蓬矢志到處履
齒痕脚方西湖脫眼已青丘吞長風一葦航急浪
萬里奔易艤沂月峽訊程拍新繁江行大王篆星
垂小銅渾風俗異東吳氣候如南恩青壁拔地起
黃流從天翻身隨五兩動命恃百丈存山靈迎我
來林影羅旌旛川妃導我去濤聲合鐘墳蛟龍蟄
淵底虎豹潛崖根間逢偓期語盡辟夔魍罔有祠
扁汶川倚山坐平原已絕白狗渡尚望黃牛尊要
神楚懷糈賚福魯致膳力護重險濟北應匪冠婚

歐以異夢紀蘇以定分論君詩班其間壓倒白與
元短窻箬葉蓬濁酒椰子尊肯來共吸鯨有味過
解龜磴蘚挹曉潤巖葩借春溫郊丁趁虛集灘戶
射利喧巢雲屋鱗鱗鉏月坡反反櫻花薦甘芳竹
枝寫辛酸是中有佳趣所在留行軒曾次飫壯觀
筆端快孤騫一朝簿書來能令目眊昏

又用韻

雲漢應地紀尾艮首起坤直坤導岷江畧艮赴海
門我家海之角我行江之源秋月幾改弦落漲頻
移痕金山手可挈牛渚氣欲吞追前趣倍道殿後
虞策奔主賓會面適兒女問事繁舡燈半悲喜村

醪雜清渾王陽正懷親石洪未報恩颺帆鵬翼飽
浪拖鷹尾翻姑熟人物遠秋浦風景存彭郎飫牲
酒小姑豔幢幡兩磯峭植柱萬壑譁吹埧潯陽蕩
波光赤壁盤雲根莫追白傳夢空招老坡魂黃鶴
蠡河漢南樓頰川原劉郎別浦橫孫媛荒臺蹲雄
心漫衷甲餒魄誰薦膳吊古君雅志懷人兒新婚
等爲身名謀難以世俗論沌口出百盤水府迷三
元沙市俗更凋渚宮名徒尊樓艦卻長鯨艤舟進
伏鼃夷陵曉未霜秭歸冬猶溫玉虛想竒崛蓮碕
辭囂喧楚些風骨變巴歌舌齟反屈平坐落寞昭
君苦悲酸懸知鳳鍛翻不如鶴乘軒巫峯又鬱

赤甲方橫竊直登黃牛堡極目秦關昏

十月晦過巫山 二首

巫峽逢初度平生一段奇江山襟抱寫歲月鬚毛知神女翻旗下馮夷疊鼓隨直須豪舉酒桼施不妨遲

客裏年華老舡頭日色曛天寒催雨雪地遠隔飛雲爲吏徒三尺於民未一分重慙豪傑士度外立奇勲

峽中

清猿遺響落三巴樹老霜遲葉未霞大抵近南春易早梅花開盡又桃花

八陣圖

負卦龜藏尾鳴臯鶴引吭縱橫中左右奇正銳圓方石挾孤忠在江輸宿恨長無人同領會搔首立斜陽

益昌次費伯矩贈行韻 五首

浯水欲磨元結頌聊城未下魯連書靜中好與高擡眼恐有英豪在草廬
掎角中原二百州熟知彼已是良籌時賢所及都能幾清渭黃河祇自流

朝氣風生暮氣歸將材零落事功微酸風斜谷祁山路眼底何人插羽飛

幕下精神清似水門前責望重於山君家文律自
奉在事業全歸靜定間

快須滌硯入承明爛熳飛章拂太清富貴功名元
素定莫隨人後頌升平

崔綿谷共賦亭次韻

風度崔秋浦聲名鄭子真爲便官事少不厭客來
頻竹裏觥籌密花邊屐齒新拍欄誰得句喚起主
林神

詩告至李漢州

驛奴莫問客爲誰但報房湖水石知象鼻卷簫和
月吸鳳膺橫玉倚風吹江淮消息愁端壓關洛功
名老色欺陶寫此情須會得行厨催喚莫教遲

。叅政李公以勤謹和緩勵後學江憲益
以公廉忠信爲八箴因賦詩贈別

百工聚一車百行根一誠反身物皆備動與誠俱
行勤如轂下轉謹如軾前橫和緩以將之轡舞錫
鸞鳴廉者慾之軫公者事之衡更當主忠信軸正
箱自平是理誰獨無旦晝昏其明不誠故無物器
窳轍易傾公材如大車致遠不計程八物攻且良
悉由一誠生玉節天西南三峨軋崢嶸志雖屈乎
位身已榮於名紹興博士翁四十辭簪纓慶鍾侍
御史勇與雷霆爭清風激百廿須公亢家聲拔此

八字箴東歸侍廷英

次同年王火井

晞鴻

不遇之韻

題遍慈恩最上層青雲塗轍幾人升一經秋雨未
方穩未到春風海亦冰鬧裏功名多目論淡中氣
味獨心明蒼苔不掃芙蓉老有客敲門自出簷

九日閱武預觀軍容退而紀事

遨頭不管菊花寒簇隊晨登上將壇戲馬臺前千
古事籌邊樓下萬人看弓聲瀏亮秋風勁旗采精
明宿雨乾後部饒歌歸較晚雪西烽火報平安

酬吳教程丞

六花結陣護輕寒緩帶西風夾谷壇破竹正期多

筭勝把萸何暇半酣看聲驅黑祲千山卷氣攝黃
河一夜乾識得天津裴度面人心已作太山安

送高才卿守永康

二首

同社紛紛早上坡一麾獨愛晚婆娑矜春桃李好
能幾飽雨稻梁收更多管攝三才還正大陶鎔萬
象是中和西風未用輕分手尚欲從君細切磋
岷峨悽愴未全蘇急要諸公着力扶政似刈葵難
放手民如種樹莫搔膚雪山西去三邊靜沫水東
來萬井腴小隊還家聊上冢天寒早與問無襦

贈相士郭少僊

崇蘭生深林澹泊一點芳江梅倚脩竹醞藉蘄

香氣骨抱金玉精神貯冰霜若以色見我照
海棠

水僊

萬卉淨如掃風霜猶典刑睥容閑整整嬌節矯亭
亭几滑銅熏鼎窻明石硯屏窈窕深人不到香觸夢
魂醒

鏡月酒後戲呈及甫

判取琅璫醉羸教糊塗眠參橫梅下客月淡菊中

僊

成都學官有
菊花仙

舌在君何患尻高我自憐岷峨如

許碧強欲爲人妍

偶成

有口只飲酒有眼只看書看書知古今治亂能愁
予不如一味飲醉眼昏遽遽

梅

兩絕

玉佩瓊裾萼綠華銅瓶清浸廣寒家客懷無着春
風處醉向梢頭嚼盡花

蒼枝老去蘚痕乾喚起東風點暮寒會得生生無
盡意雪花零亂月欄干

荅吳叔永叔長

二絕

刮霜面目澹無華落落孤山處士家若使世間
蝶覺光風縱好不成花

瓶笙吹徹硯蛛乾獨有梅花伴夜寒萬竟空

一點世塵元自不相干

荅家朝南二絕

竹光水色近宣華彷彿江南萬里家可是老諳春寂寞夜深無夢到梅花

角聲悽惋笛聲乾獨立黃昏不柰寒未省半山梅在否東風歸路憶長干

度劍有日高永康以詩送行次韻

紫巖護川陝號令賊膽寒客有屏山劉萬甲曾中蟠石湖牧參井遨頭黃金鞍亦有山陰陸春風迸詩肝主翁西清老羽扇元戎壇莫府若而人眼底缺未定顧予書生耳外強苦中乾從軍十年事未

有半策干征笳蘆葉脆戍角梅花殘淒涼郾城月想像李與韓獨鶴發深省連雞激長嘆中原氣猶愴眉作醉裏攢君詩遠寄似語出秀可餐論事極痛快得之夢魂安御蜀知有法水曲鳴和鸞

重過劍門

衆水東瞿峽連山北劍門地非甘習坎天欲護全坤直上雲千尺中間月一痕客懷無柰惡索酒自招魂

荅程教見和梅詩二絕

一段清冰浸月華短籬疎竹是誰家春光元下吳蜀驚見江南半樹花

春陰欲雪凍雲乾索笑踈枝共一寒靜裏聞香
自覺怕人饒舌似豐干

和虞仲易送行二首

霜曉滄江路梅花對此君清明涵止水變滅送浮
雲論事強人意揮毫張我軍雍公衣鉢在好策後
來勲

歲月雙蓬鬢風沙一老兵氣惟憑義養命不與窮
爭鼎正中邊沸舡須左右平半籌無可畫空賦洗
兵行

次李閬州稟議三首

訓狐

蒼溪驛聞其聲甚妖厲五更忽轉如鈴鐸音是日立春矣

頑民遷洛風隨改佞士歸唐操立更勿怪訓狐知
氣轉銅丸落落落便春聲

立春日風

千騎行春雪未消早乘羊角問逍遙明年好與供
春帖淑景祥飈近九霄

益昌

長恨詩人挽不來東風無賴又帆開城南城北佳
山水多少甘棠手自栽

夢中得蕎粥詩覺而記其景聯

墨雲吹雨落霜空蒲地珊瑚樹樹紅老磨踏因
浙款鈍鐺奏火沸蒙茸寒江浪起雪飛外古樟

鳴雲攪中識破太官羊氣味故山好處夢先通

和程教元日韻

曉雲三素過天東早送韶華入萬紅
朽訥霜寒遲景轉昆明太液薄
澌融愁癡官事龜生手泰定天
光添點瞳栢葉更須隨酒進醉鄉
有地爵無功

春風堂左偏鄭宣撫詩刻猶存程季允
次韻亦賦

寶峯翠壓小房攏簾映平安候火紅
寒送落梅吹雪外春隨細柳入雲中
人情鬱處多思治天道還時只願豐
騰辦從軍詩幾解爲君管勾杏花風

酬黎倅元夕

淡黃巴月護簾櫳隨分芙蓉數點紅
茶鼎擅場文武火酒杯爭道聖賢中小
游退舍三邊靜甲子占晴二麥豐樂事
賞心無過此不關花信幾番風

春日即事

楊柳黃黃燕子來梅花落盡已青梅
一年春事閉門過萬里客懷呼酒開
西土遯哉鴻鴈斷東方明矣子規催
海棠多買燕宮本歸去家山手自栽

再用韻

黃妳扶春夢覺來禪心已墮老黃梅
沾沾桃葉相先發寂寂梨花未肯開
抱案併無鉗紙請索有打門催人生
消得韶華幾兩鬢霜根不待栽

春行

野荼蘼發牡丹開
欵欵楊花墮酒杯
過盡韶華
一出祇應喚作探春來

次程岳州廷邁春行昨訪天梯佛龕今約烏奴

汗血嘶風草正青
眼中萬馬歛春垌
檄書縱不煩
師魯薦藁猶當出古靈
杜若扶疏明遠渚
荼蘼猗靡馥中庭
天梯行遍烏奴去
到手深杯莫暫停

送王萬里赴闕

安西老元戎再出護全蜀
檠檠大幕府賓從如立
竹猶者多調娛狂者間振觸
誰與得中行有美萬

里獨正大一根氣義利兩就復信人樂正子
君子遽伯玉春風半蕭艾
秋雨幾蕢菜劃然心眼明
見此霜曉菊何人誦子虛
燕說得舉燭平沙起孤鴻
太液下黃鵠雲深閭闔啓
天近觚稜矗牖明易納
約井渫終受福楊柳細吹
絮海棠豔成屋買酒塵
東風嘉陵江水綠

再和廷邁

步障晴絲夾道青
土橋石磴向西垌
李烏奴宅空懷古武阿婆
祠懶乞靈杜宇一聲猶客
路白雲萬里是親庭
只應江水知人意
東下何曾半息

草堂

嚴武能詩甫亦詩詩名相軋便相疑思量世上交
游事大似詩名更可知

次虞憲日近即事

五絕

風落虛簷燕子聲屋頭屋尾菜花明
爐熏燕坐參消息理本無虧莫望盈

丙中甲上奇章石水底山巔杜預碑
矻矻一生圖不朽光風好處幾曾知

衾寒更著癡兒踏背痒時令醜婦搔
骨肉團圞窮亦好誰能膏火自煎熬

急雨蕭蕭撼瓦溝夢隨潮落浙江頭
倚門白髮遲歸信不爲蓴絲爛熯秋

梅桃結子綠陰濃饒與葵榴自在紅
只有道根須猛進未甘四下二之中

垂去

鳳凰知細德鷗鳥識機心物理固如
此世情非特今足纓清與濁厲揭淺
和深覺破從前夢長歌月蒲襟

送崔吉甫倅安康分韻得舍字

孤松鬱澗底老栢生石罅斗州漢水
曲着此健別駕審固外體直爲仁正
如射萬事春冰融所貴過者化雷園
陽關酒葵藥紛姪姹加餐時寄書相
望無幾舍

次李叅政晚春湖上口占十絕

襤褸瘦鶴耻乘軒踏遍莓苔十畝園欲下橫塘還
決去漲痕一尺晚來渾
藉地殘花五色茵東風來去寂無痕餘香不肯汗
塵土留得蜂房活計溫
一簾風雨攪黃昏歸思無邊客倚門烏鵲江魚潮
後市龍山漁浦渡頭村
雨過桃花盡處源庭前新綠長芳蓀目前點檢燕
支篆手汲清泉洗着樽
屋角春聲幾樣翻勾牽春夢遶丘樊三桃二李成
陰早恨不安仁老灌園

濡需附勢幾崩奔獨抱離騷細討論萬事只憑寸
去剛風元不隔天關

近山氣候易涼溫雲爲陰晴半吐吞草木趨新千
萬態芸芸何者是歸根

綠陰幕定蔚藍天庭戶蕭然有漏仙麥飯熟時蠶
百箔山中啼鳥識豐年

燕子將雛鹿養茸年華冉冉鬢成翁拂開萬古瞢
騰眼多少英豪老彀中

僮關殺氣渺春陰渭水泱泱柳色深爲問草廬人
起否漢家遺老尚謳吟

朝南以詩送巴石研屏香几用韻

天上何人修月斧巧將餘刃斲巴山玉蜍清浸婆
娑影正在微雲點綴間
首鼠年來困兩端石屏空照鬢絲斑歸舟莫道全
無物分得蓬婆小雪山

右研屏

玉版橫陳醉眼邊尚餘金鴨水沉烟客窻寂寂那
消得祇有南豐一瓣緣
竹風吹酒未全醒夢入香爐五老雲好句得君青
玉案起來盥手炷清熏

右香几

同孫子直和李叅政東園韻 十絕

扶持吾黨誰爲地保護斯文賴有天鼎欲大亨須
玉鉉并於列食定寒泉

治國宜將治圃看墾除容易整齊難沼泉莫放源
頭濁種竹先教地步寬

破艦已風方洶洶積薪未火又悠悠天公解管人
間事甲子占晴穩有秋

狂蝶正便春從吏好花猶怯冷禁持從渠歌徹鐵
如意輸我興來金屈卮

辦得蕭蕭水竹居閉門足了一生娛坐忘老子慵
開眼強聒癡兒任挽鬚

食肉玉關徒自苦然臍郿塢太生癡人心候壺元

無底富貴功名十二時

院落深沉燕子歸應時納祐試春衣海棠過雨精
神索楊柳無風力氣微

大渡畫河餘玉斧祁山破賊只綸巾聖賢深意誰
能會蒲徑挑梅又著人

孔明遜世吟梁甫范蠡遭時策計然鍾鼎山林非
二物莫隨窮達較蚩妍

露下三更月蒲林鶴眠未警獨長吟芭蕉身世都
來幾天地中間要立心

程廣文季允得崔西清薦詩來用韻

古人輕國重一士士皆大呂黃鍾器道於天運主

消長身爲民生管榮悴五羊老僊用心古清不受
塵如止水一肩直欲荷斯文兩眼從前識英偉歡
然得士如得金甚矣愛賢猶愛己高山流水甫點
頭急電驚雷即燒尾天南天西各一握未見名流
早傾意聲光蔚起摩日月氣類相求如鑒燧春風
姪姹吹筆端毛嬙西施無粉膩咄哉婢子磨青銅
雙頰晞紅欠才思珊瑚琢鉤珠結網錦署玉堂相
望咫尺崔羣美莊居第一推轂好言良有味樂莫樂
乎遇合新憂莫憂乎輾轉始拄撐大厦必衆木扶
植太平須善類君不見黃河以北函關東無數赤
子號悲風

高俸送糟蟹破故紙芽口占以謝
無腸公子醉鄉徒風味元來蜀似吳便好掛門驅
瘡鬼不須詩詠血模糊
蒲筍新芽補骨脂雨痕照眼碧離離功於枸杞菴
蓐似不是山人底得知

荅高才卿二絕

煙波隻艇着吾徒蓴鱸秋風早憶吳左蟹右杯東
計決醉來萬事付含糊
脆勝芎苗軟勝脂雅宜碧椀貯流離渠渠地主恩
何在骨裏黃金祇自知

劉後溪和雁湖即事詩十絕見示次韻

誰家柳繫夜郎舟半月風顛估客愁起候五更風
脚定安排篙楫放中流
斷煙落日護林丘三數人家屋打頭見說春來寒
更甚補窓塞戶勝防秋

巴山深處一江流好着藏書百尺樓根闌樽檻渾
易得杏梁柱柱若爲求

去年竈婦飽而腴今歲啼飢眼欲枯麥飯熟時猶
遠在不多元氣急須扶

夔人壁柵未曾修好事癡兒只浪遊草樹低迷風
淅瀝於菟又在屋山頭

金谷人家大謬悠春江自理送窮舟漁人拍手從

旁笑淡飯簾衣過即休

桔栢津頭訪昔遊夕陽衰草幾番秋人心誰向忙
中覺天理須從定處求

雪花白盡汚山頭咽咽冰嘶汚水流不見將軍闕
如虎行人猶拍定功樓

槿花朝發夕而萎得失興亡揔一機古往今來磨
不盡人間公是與公非

中原離合數由天百戰關河血滿川日日赤雲占
勝氣掛弓何處是祁連

四月壬午發利州

十里迎春地名水面開櫓聲不動柁聲催春山轉

處疑江盡白鳥迎人曲折來

兩岸騷騷麥尾黃茅簷半瓦蔭垂楊牧兒吹笛隨
歸犢淺草平沙暝色蒼

漩口

禿山束紆江寸土無平田麥登粟事起竟歲相周
旋扶犁犂确間竝驅從兩犍兩犍力不齊手胼後
者鞭日暮鞭更急輒促肩領穿歸來茅屋下撫牛
涕泗漣一飽弗易得柰此官租錢

帽子簷水宿

聚石樁長纜依沙插短艫日昏山虎下風急水鷁
呼道豈隨時變人須出力扶仲由兒女見謂欲梁

乘桴

發閬州二絕

錦屏山後十二渡一渡一回商淺深前行戒後謹
毋忽淺處着脚深寒心

木奴

鎮山名

天矯二十里大似盤龍趨桂林中人薄
暑遽如許覓樹依涼無好陰

回龍寺松

環蜀多宜栢回龍獨見松似驚前輩落忽與故人
逢水石清高骨風霜老退容更須堅晚節莫灣大
夫封

龜勝寺枸杞大如椽陳日華發其根而

枯堂猶以地仙名

地僊蛻骨歸何許獨有椶花三四樹鹿頭風月夜
三更老厖吠入青雲去

伏中宿富樂山賞泉

喚舡絕芙蓉夾道森古栢碧天倚熏籠烈日發蘄
澤清涼奏水觀熱惱脫火宅石虬漱潺湲銀竹墮
格磔林密天早昏巖擁地少窄坐久萬想定虛浸
一奩白螢行露炯炯蛩語風策策胡床笛三弄所
欠可人客

還自益昌道得張伯脩詩次韻

劔外風煙老鬢華歸心更切獨孤遐明知東郭非

吾土苦認西樓是我家萬古聲名供敝帚九淵意
氣付浮查同來蓬沓於潛女一笑長歌陌上花

六月六日宿觀音寺次朝南韻 二絕

微管仲其左衽矣捨安石如蒼生何須君快草三
秦檄盡爲先生祛宿痼

煮餅無奚徒自苦護篝有妾未爲非爲言示病維
摩室也解天花散亂飛 時崔制使頭風甚

青渠追和宋金部壁間韻

短亭放脚小軒渠從險趨平本一塗掌上煙川三
百里蜀都風物似吳都

汗青孰與老黃間能爲君王把蜀山懊惱秋風吹

客鬢一年三過劔門關

幽芳晚涼倚窓觀稼 魏城四十里

晚風不動稻苗平葉葉頭邊沆瀣明并養不窮功
用在誰將易象細推評

飛明一點上苗端難作尋常露雨看碧眼道人參
解得黃河夜半沂崑崙

龍尾 綿州西二十里

淺磧茗花紫平畦芋梗紅暝收漁筏雨涼入酒帘
風客路三年夢官身兩鬢蓬誰知龍尾道却在鹿

頭東

關名

食菜

清晨薄采采風露拍蒲篲漢中信可王新都亦宜

侯

王侯蜀以名菜

甕菹氏諸葛籠炊字元脩駢頭束翠鳳

碎甲屑蒼虬下筋萬錢直轅金千戶謀暑寒久不

厭暮蚤急易求相與共甘苦傾蓋成白頭厚味五

兵媒文字葷羶仇移文東郭生母作肉食羞

成都

名東郭先生

讀楞嚴

人人有路證無還一念纔差隔萬山識得吾儒無
妄卦筏城長語盡湏刪

生朝前一日過隆慶十里得老人書

中詩因用尊韻

劍棧高寒瀑水空兒心片片趨歸鴻喜聞禪觀如
黃蘗想見仙風過赤松利慾無厭騎鶴客功名有
定賦狙翁萬鐘不博斑衣樂已判身為邴曼容
燈花太喜酒樽空客路真成印雪鴻出塞曲中迷
灞漣籌邊圖裏認維松汗鞅虱胷心猶壯蓬矢桑
弧鬢已翁東望只知歸計是輕舸茗雪采夫容

次徐隆慶壽詩韻二首

牛奮箕張小丙申熟知命駁不能純年來頗恠刀
頭蜜老去難供席上珍闔霽千章森戟纛塵風萬
壑繹韶鈞劍山拾得商山橘醉共仙翁脯白麟
史君筆幹萬牛回脚底春風舌底雷一夜劇談蓬

野閣百年高誼見歐梅客心衮衮江流去老色翩翩
翻歲事來墮地渠儂天已定酒邊贏得笑顏開

平齋文集卷第三



平家文集

四二六

内閣文庫			
番 號	漢	10277	
冊 数		12	3
品 類	書	3	1



国立公文書館
National Archives of Japan

糊などで貼り付けられている部分がめくれない個所があります。

原本の文字など不明瞭な個所があります。

平齋文集

五之九

平齋文集卷第四

詩三

壽崔西清二首

武侯王佐材有膽大如屋愛之莫助之隻手挈全
蜀淋漓出師表所舉良且淑孔鸞非不佳健翮欠
鴻鵠先生能休休用衆不用獨何止福蜀人爲作
天下福

幾年生一賢大任天所授三光五嶽氣半點無缺
漏胷中老規摹超出造化囿靜爲動之機燕坐運
宇宙良居冬春間初度恰先後用心得良體所以
仁者壽

試院口占 二絕

燕隨社去鴈初來黃蜀葵花隔岸開
萬里江湖秋思動擣橙和蟹薦新醅
追懷三五少年時歲月堂堂兩鬢絲
茅屋秋風歸未決障泥能費幾熊皮

隨筆

歸州多癭生昭君郢州多癭生
莫愁造物何如等教癭盡令尤物不成尤

林氏著存亭

有銘於鼎未爲著無忝所生方是存
篠下若人元不死春風吹雨着寒根

馬城詩寄趙藉令

馬城在北關外

馬城去天咫雨露足芳澤萬菲主
園丁造物乃其客秋能握而春紅可幻
以白枝葉隨手變根蒂若爲索達人一
笑粲曾寬斗杯窄

挽李貫之郎中二首

剛大平生氣誠明問學功不爲官所餌
寧以道而窮論事馮唐力憂時賈誼忠
朝陽無此鳳何止哭江東

天定何能待西風杳去槎斯人嗟已矣
吾道信非耶石劬名猶在江空恨更賒
濂溪應配食杯水薦寒花

次張義立登九頂三絕

大像

坐斷江山現法身大光明裏萬波旬東風歸棹
頭過同是慈航得度人

清音亭

漚生漚滅負苓易雲去雲來摩詰詩莫道賞音
今古少江山新亦受人知

烏尤

酒壯千林如欲舞詩豪萬景不容驕山中肯着如
斯客來聽春風婆餅焦

萬景樓次韻六絕

扶疎巖桂拒霜開蒼莽鷓鴣屬玉來想見山陰秋
色裏一聲欸乃暮潮回

金谷白頭誰石友香山青眼幾殷兄三峨九頂知
人意長與江樓酒面平

秋入徐熙水墨山荻花吹雪渺江干樓頭未用催
行酒待到三更月上看

木落川空亦大奇坐中亡酒客須追非渠江漢孟
東野孤我南山韓退之

霜磧蕭蕭落漲痕西風吹日墮金盆馮高送目何
渾外萬里戎情屬柳渾

過鴈聲中歲月侵東流江水識歸心峨眉天目高

相似多買青山尚及今

壽鄒茶使二首

鶴鴈旌旗導紫輶方瞳秋水照人明泰山可碎膽
常定滄海自渾心轉清萬事至公如正獻片言不
妄即元城擎天正要堅牢柱長與皇家植太平
手挈蓬弧掛井參籌邊樓下瑞雲深傳將絕學聖
賢脉會得初陽天地心議論文章魯萬甲功名富
貴腹三壬春風禁柳東華路扈駕催行荔子金

辛巳夏四月行西山欲賦未能也得曹

瀘南壬午冬留題上清詩因次韻

三首

窈深青城路逢僊不知名悠然拾瑶草天風颭雙

纓進予語之道誠者非思誠谷神以虛應萬物同
一靈是謂衆妙門古今未嘗局

僊人愛樓居梯空銜靈赫下有煉丹井光怪不容
羃凌晨酌井花御風謝塵迹飄搖芙蓉旆三十六
峯碧欲扣讀易翁蒼苔洞門閑

朝陽生危岑委光皂江壩江妃舞倒景老木奔驚
猿羣僊亦戲劇挹袂來聯翩笑倒天地間誰虧復
誰全手携昭文琴一曲三千年

大雲寺同王翬父晚歸

春風拍天梯夕春墮寒浦潭潭水晶宮滌滌赤金
柱汞爐煮丹砂釀作九霞醕陽侯醉而狂喚起燭

龍舞濕紅照白髮客子有酒所舉鞭問同來扶桑
在何許同來狂更甚攜手作虜語上流屠鯨鯢流
血一川雨

用伯脩韻迂虞提刑

從來圖易必思艱運甓工夫莫放閑萬里功名終
竟在百年元氣早須還安危着眼棋枰外中否留
心弩括間寄似匆匆無幾語華陽東去是潼關

嘉陵江舟中

三絕

柳色黃黃草色微一川新綠兩紅衣老天也信還
家好淡日柔風送客歸

辛夷零落水生漪睡暖沙鳬蔭酒旗不是歸帆相
料理春光如許底能知

東風吹老地棠花燕子歸來認得家茅屋石田渾
好在白頭何苦尚天涯

落棗

楊柳天機淺櫻桃世態深空山鳩問荅肥水鷺停
沉格物知窮理觀時會省心最憐誰氏女沙裏日
淘金

岸行

少年血氣暗消磨盎盎陽春保大和已放杏花風
味短未酸梅子典刑多一官蒲去魚無餌萬里歸
來燕有窠但願時平蠶麥好免教人問蜀如何

新井道間

飲澗思浮白行山當踏青栢邊榴葉長麥裏豆花
零清晞愁腸伴踈香勸眼醒牛頭應不遠三舍即
鹽亭

安泰

不是官身是客身下車隨意踏芳塵空濛山色雨
非雨冷淡花梢春自春裘弊黑貂猶耐老褐移紫
鳳未全貧青帘垂脚遊絲外到處東風似故人

徒然萬里行所得惟一莊王翬父泥溪
別時語也戲足成四十字以寄

徒然萬里行所得惟一莊莊中果何有麴赤蘘藪
黃豐歲誰可口凶年或充腸旦旦勤擲擲謹勿令
莊荒

和黎德升贈別

朱弦無繁聲大羹有至味人惟不苟同終亦不苟
異咸戒咸其腓賁取賁其趾出處進退間當思古
人齒嗟予何爲者涉世聊復爾來從吳盡頭直到
蜀築底赫日青石裂淒風黃葉委道旁幾擲掄得
已猶不已君如細柳軍堅壁閱兒戲又如渥洼馬
超軼不受繫客窓日相從肝膽瑩彼已偏校紛已
侯憐我尚猿臂曾藏數萬甲智絕三十里清談對
夜分常恨世少洽酒酣或怒罵天下無真是佞夫

戴弼體請劍倅越砥長亭楊柳黃妙語鮑謝體不
作兒女別相期青雲器深沉老元戎夢寐古輿地
視師薄郾城受甲高熊耳相與善籌之塞草春無
際

應提刑招飲北山

萬綠梢頭眼雙江合處城山如人有立水與市俱
橫啼鳥春風暖飛花晚照明笙歌推使去緩屨當
車行

伯矩同登牛頭

兩翼城包險三分寺占奇市囂芳草隔古意落花
知歲熟人情樂時清物態熙江山輸眼底盡是太

平詩

過三鶴山 二絕

造物工夫拙剪裁羣芳各自得春開梨花嫁與東
風去隨後荼蘼作媵來

客路浪成千里繳老懷虛過一春遨落紅剛被風
扶起恰與連雲石棧高

入少城

嚴城槌鼓暝陰催劍棧歸來第幾回喘汗老兵迎
馬報燕王宮裏海棠開

題李叅政范殿撰大散關詩後

秦關老月幾虧盈長照詩人白髮明一死一生漚

起滅未應於此見交情

次李公謹美人行見寄

梨花深寂楊花閑雨鳩晴鳩兩關關越王樓下春
事繁有美一人心獨丹欲往從之厚我顏無繡段
兮爲君懼子規夜啼斗闌干江草碧色江波浸芙
蓉城頭芳露乾有美一人擁朝寒欲往從之髀肉
酸無桂棹兮揚君欄牛頭撥雲尋懶殘牛背落日
人空還短筇尚點湘妃斑好春未必天能慳東風
到處如家山白髮相對母永歎荼蘼結架三百間
爲君醉倒驕旁觀

後溪挽詩二首

玉珮華裾翠霜髯睟頰紅四朝天下老百世後溪
翁綠竹倚重較黃裳美在中平生涵養力於道有
全功
氣象融三極規摹隘九州天津朝發軔野渡晚橫
舟衛道身何愛憂時死未休落花春寂寂萬古蜀
江流

柳絮二絕

造化勿忘還勿助精神非色亦非空殘雲初雪雍
容甚高下東風點亂紅
風標清白難諧俗氣候中和易得朋招不肯來麾
不去若無才思渠應能

追和及甫雪

胚腴造化妙天家趁得辛夷未着花濁水淤泥還
絮白枯株朽樹亦芳華長空光眩鳴皋鶴厚地寒
侵入宇蛇鉅竹南牆清絕甚一編孟子一甌茶
三月十四日送燾東下至龍爪灘過虞
開國墳庵見壁間虞仲易觀棊詩有天
上人間元一氣如何頃刻爛樵柯之句
雁湖甚賞之因用韻反騷
周天日月何曾住大地山河祇自磨不死者存人
獨耳會令芥亦爛如柯

拜和 老人見寄韻

阿翁瑩徹八窓冰獨愛春郊畫有聲正鰲魚肥桃
漲暖欲河鮑上荻芽生驚雷破柱眠逾穩明月中
庭酌屢更應待兒歸相從吏萬紅堆裏禦齊橫

彌牟觀土八陣寄程嘉定

房公堂是蓋公堂漏下無聲日正長應念常山蛇
陣處有人搔首立斜陽

楊漢州見和荅之二首

西樓伴食老西堂折鞬渾無半線長推向萬山深
處去沉犀橋北望龍陽
春隨落絮去堂堂白髮相看作許長人物如公猶
未節諸生何敢薄淮陽

荅程嘉定 二首

練袂蒿簪不下堂肯隨時世畫眉長旁人莫解東風意只道花梢合向陽

鈴索閑閑靜冶堂

漢州東堂

槐陰匝匝柳絲長東君五

日如京兆早及殘紅醉豔陽

隆慶徐守作堂名蜀固一夕夢與余賦詩堂上有何時首歸塗樽酒逢故人之句未幾過其堂爲賦之

蜀踞國上流蜀固天下固欲爲天下謀護蜀風寒處極邊植藩籬黃牛白環戍中間屹垣墉武休河地路近襄古劔關峭絕鳥莫度屏蔽益梓夔堂奧有門戶天險以德強地險以勢阻王公設人險頗牧與羊杜前茅元戎崔當道卧老虎後距付君侯萬卷作干櫓坤維鞏金湯國勢重鼎呂子曰有疏附子曰有禦侮我聞大劔旁小劔可馳騖雙軌來蘇坡半葦白水渡徹桑徧綢繆迨此未陰雨毋謂天下壯而恃一夫怒高堂挹橫山雲木叫杜宇樽酒逢故人重圓夢中語

送王崇慶得樽字

白苧籠輕暑紅榴照別樽兩帆先後去一水古今存玉札須多蓄金甌莫點痕相期黃卷裏培植太平根

昭化

梅子收霖雨
榆花斷瘴煙
濃雲明白鳥
深草暗烏犍
歲月灘聲裏
家山客枕邊
老來圭角盡
戒得是韋弦

送交代王公輔

興州乳臭腥
紅袍萬馬夾
擁橫磨刀奴
顏婢舌競
勸進羅拜狗
魂謹優猱
漢家衣冠餘
兩豪同楊却
立渠肯汙腥
臊傳呼趣拜
聲色厲一已
俛首昂其尻
獨君此膝竟
不屈男兒等
死輕鴻毛
群儉相顧重
太息我輩天
地焉能逃
安西樓碑字
如斗勲名爛
熳官稱高若
爲龍州易萬
州雙鬢如雪
風騷

君不見義不帝秦魯仲連
何曾黃金橫帶後部鼓
吹前驛旄

行三盤墓頤棧道 三首

棧險涎魚蛤
梯危嘯虎羆
室人交謫我
客子倍愁予
後殿推腰上
前行掉臂呼
龍眠如得見
寫作赴州圖
息女頰相問
危途骨欲摧
兒知緣底去
耶自爲官來
野圃榴多子
山田芋有魁
乞歸吾計決
一粲且傳杯

虎爪灘頭棹
墓頤閣上車
危機知略似
薄命聽何如
鷓鴣笳陵飛
景鳩巢架太
虛乾坤真一
穿着眼芒

躊躇

赤崖

老箐深藏洞嵌崖峭夾谿雙扉三峽似半壁竇圖
山名在低落日人煙絕孤雲客路迷紅旗穿石去
青兕隔林啼

讀史 三絕

泗水飛沉周寶鼎霸城遏住漢銅人人心不似無
情物多少英豪入魏秦

晉將屈乘餌來虞越送西施買斷吳馬齒雖高人
未老五湖風月禮陶朱

黃門常侍禱明堂竇武陳蕃橫被殃料得天公方
睡著不應受囑變官方

用蜀行送徐隆慶守金州

兵家如弈棋局局勢不同漢王引兵故道出襲雍
武侯率師祁山搖關中何曾踏陳迹乃欲收新功
中興用蜀九十秋咄哉求劍空刻舟今年出秦州
明年出鞏州了無一鏃飛到商虢州但諉險絕不
可度豈識竒道須竒謀漢水陰洵水陽左房襄右
梁洋中間詩書禮樂帥手提招搖麾天狼以人材
爲武庫以人心爲金湯於斯二者有足恃出奇度
險如康莊君不見紹興間虜從鶻嶺窺蜀山彼旣
能來我能往疾驅風雨過潼關

毀鄧艾廟

蜀庸無與守魏吃浪成名血已滂砧机魂猶饕酒
牲柏溪融雪瀉玉案倚雲橫渚薤莫留跡山川方
氣平

西龍道院

溪影山光浸曉寒空庭人馬報平安夢回非想天
中界身是無懷國裏官桑甚青紅鳩頃洞麥花開
落雉蹢躅好班嘉定中興詔盡與蓬婆滴博看

龍州麩金丹砂到官後民告所得倍於
他時喜爲賦詩

乳到零陵竭珠辭合浦行地非慳所產人自晦於
征砂粒層層長金麩點點明盛衰非自爾利莫與
民爭

七夕

黃姑織女萬古心脉脉欲渡銀河深有齊季女起
拜月綠髮一縷蒙金針眼明志針如志鵠針髮相
投如破鏃回身拍手笑廼翁字大行踈燒燐燭

夜坐

公退不妨飲夜涼猶未眠瓦檠鳴落燼鐵鼎濕霏
煙露葉悄相煦候蟲謹自煎白頭行萬里轉眼過
三年

雨

夥頤秋後雨暝些晚來涼夾市崩崖赤環城漲潦
黃隨宜梨栗熟蒲葦意黍蕎香白鷺追紅鶴歸飛作
箇忙

○范漕仲武季克雲坡

西來一鶴山澤臞春風六轡閑且都公餘鏡月晝
陰寂睡起手校羣芳圖海棠酣透燕王邸豹血深
染重氍毹昌南別派更奇絕豐容靚飾香生膚牡
丹鼎盛漢川譜行輩近許天彭俱翠微盞葉光照
路馬上秦號湏人扶鳳州楊柳足佳思苒苒百尺
青流蘇黎州菊華抱勁節濯濯一丈黃檐榆老成
典刑哉茵桂晚出姓字聞珊瑚石蟬風味更清烈
比屋梓益梁夔巫豐年樂事與民共浣花尋勝時
騎驢珍葩異卉價如玉爛買西產歸東吳雲坡手
種五色錦徧地步障金谷無花光深處澹容與碧
瞳如水霜髯湏公家鷗夷老僊伯功成始去浮江
湖中原赤子未莫枕而忍獨樂盟鷗鳬湘江之西
勒浯石瀚海之北封狼胥歸來岸幘坐想雪太白
萬里峨眉孤氣平德全紀渚子宇定光發南榮趨
不隨造物共流轉玉立堂下松千株

○官舍見月三首

山如天目高水如天目急明月如鄉人不速推戶
入問月從何來天梯幾何級辛勤度參井萬里遠

相及碧透銀河乾清浸玉宇濕穆金無限彼微塵
手可吸螢駕風葉遷蛩枕露梗位邊秋徂年悲匣
古銅華澁稻畦抱甕灌茅屋索綯茸月芳隨我歸
買酒共君吸

叢山拆一罅碧天大如甌更遲蹇予月涼速老我
秋常娥八月去歲往應白頭縱得大年藥能禁古
今愁廣寒正愁絕更照雪外州些招肯來否赤酒
和糟菊庭下雙梧桐露重風颼颼採實當剥茨蟪
珠麗瓊舟頽然徑奏床不問月去留夢中識歸路
戲綵兒伊優

月行鬱羅天終古同此輪死魄復生魄一點存者

神我來萬山底舉眼無似人惟月獨知我寂歷常
相親而我亦知月愛其日日新今夕自今夕不踏
昨夜陳涼邊蔗境佳靜裏大羹真卻書對月坐掃
空翳根塵絡緯無寸絲軋軋夜向晨路晞胡不歸
貂裘弊蘇秦

酬程嘉定楊漢州見和 三首

詩禮椎徐徐律令符急急脩然世紛遠愛此山斗
入政無勸課條功茂捕虜級尺清蓋丈渾過眼秋
已及濁暑怯中乾積潦窘下濕脫雲得佳月如渴
快新汲湓浦琵琶語赤壁洞蕭泣斯人不可見庭
空漏聲澁我榻夕欲下我堂日已葺儻有謫仙來

三
倍江和月吸

六州鐵鑄錯四海金爲甌興亡幾變滅明月長清
秋憶從黨禍起中原墮旄頭月行九霄上安知下
民愁年來月食昴坐復山東州洗眼看太平典衣
辦芳芻流光濕沆瀣散影涼颼颼老子興不淺倒
盡藥玉舟爲言漢太史甘心周南留不願臯朔間
蓄之類俳優

揚侯坐方丈手轉大法輪程侯客西堂機鋒圓而
神兩峯峙寒玉出語驚天人如彼水中月可望不
可親春從鴈橋別幾見半破新魁磊孰與吐欲就
重華陳攬篋貫薜荔初服修吾真木蘭飲朝露洗
盡胷中塵誦君明月詩逸氣凌玉晨可能坐天祿
辛苦著劇秦

又次程嘉定 三首

鼎戒少汁熬琴忌大絃急人惟廣斯胖道亦巽者
入身行棧百折目送塔九級今是覺昨非與過寧
不及我池魚洋洋我牧牛濕濕何能苗助長但勿
井多汲硯蛛清曉冰瓶笙永宵泣炊晏兒謹嗽釀
惡婢羞澁家山薄言歸田舍隨意葺君看十八侯
誰數達與吸

車騎空朔庭樓船下東甌風雪開撓驚壯士得志
秋青萍玉櫺具白馬金絡頭賦君古戰場鬼哭燐

火愁元戎得君來如得范慶州厨酒不待熟夜半
呼兵寫君言蜀赤子風雨寒颼颼願爲大茆屋莫
作偏重舟元戎一笑領君更三日留吾聞喜不寐
好善天下優

弈秋善爲弈輪扁工斲輪技惟進乎道志乃疑於
神渺渺誰之思彼美西方人襟度傾蓋舊風味千
里親世熟血氣老年移鬢髭新謂我尚可教語言
去其陳雲開巖石面月寫梅花真竚立望弗及僊
凡幾何塵相從雞黍約尚及桃李晨我舟亦欲東
贈行爲歌秦

次及甫見寄 二首

文采晁無咎襟期李伯時昔爲鉤直釣今是刼忙
棋弩谷深無路盤堤薄有基程辟武階廣文如我冷
兩地四愁詩

燕頤非無相鳬肩會有時三薰珍敝帚一笑玩征
棋松菊吾家物衡茅廐父基青峯簾獨捲細和式
微詩

次費伯矩護印道中韻

合着絲絢侍建章却隨靴袴踏蒼涼燈前針線爲
誰好鏡裏黛鈿如許忙野水無心鷗等伍秋風有
味菊顏行到頭靈運終成佛妙境須聞戒定香

生日口占

霜露剛氏道侵尋五十翁相逢多野癯自笑亦龍
聾同官黍甕新醅綠丹爐宿火紅斗杓明建子芸
荔又春風

王火井見過先以詩寄用韻二首

自期東里先生似恰與西龍道院宜
擱葉蕭騷秋入畫梅花的皦月供詩盟
鷗誰是知機早歎鶴吾猶決計遲歸去
來芳松菊在故山毋用費文移
故人寒踏龍門路來聽深山唱竹枝
半世向人長落落幾回於我獨竒竒
淡交似水有餘味薄俗如雲無定姿
一點青燈俱白髮相看不語只心知

送曹瀘南赴闕

聞之善治水不與水爭勢順流導漢漾
徐當過三滋又聞善登山不與山爭力
緩步出朝陽晚亦到崧極展也曹瀘南
所學見所履致身以登山應物以治水
幾年蠶叢州歸問長安道巴船五百料
太半外省草白駒在彼谷桑扈驚其領
人物方眇然惜此尺璧景踈梅耿絕碕
飛夢隨去槳索著爲占之聖功得蒙養

薺餽飽

嫩斲苔邊綠甘包雪裏春
蕭家湯是祖束叟餅爲鄰
混沌函三極冲和貯一真
日斜摩腹睡自謂葛天民

羅浮高壽崔制置

羅浮高哉四百四十有二峯三峯最高拔起金芙蓉
輝真洞天鎖溟濛鰲背咫尺蓬萊通璿房瑤室
深玲瓏霞袿霓紛丰茸中有老僊擾白龍藕花
冠巾九節筇招邀茅盈挾赤松麾訶列缺鞭靈霍
天雞未叫萬籟空夜半喚出扶桑紅下照萬象方
屯蒙起踏斗柄呼東風夫胥雲氣低葱蘢海若吐
蜃天投虹前旌招搖導祝融從以五色騎羊翁蒼
舒檣戴伯虎熊風后力牧常先鴻日用大學心中
庸暗室屋漏十目同夏璜薦縹緲旅大弓太族爲角
諧函鐘日星宗彝映華蟲江河健帆轉蒙衝慶曆
元祐諸儒宗立朝直聲摩穹窿真卿長孺誰爲容
白頭萬里行蠶叢清獻清節乖崖忠太平盛時適
其逢事有至難莫如公表裏壞證阻且訐參苓溫
平匪砭攻瘠瘳膏肓夷疽癰三邊按堵九扈豐祥
飈甘雨天爲功趯趯和樂躍阜螽沾沾啁哳瘖寒
蛩雪山不隔薙纈聰袞衣繡裳遄歸東天津疋馬
兩玉童袖䟽入奏明光宮中興規模舊提封直北
燕薊西崆峒功成跨鶴追葛洪神光炯炯方雙瞳
金丹寶訣傳枕中負薪汲水長相從

張太博亨泉

古人以木爲井
義立發而得之

公家老博望手斲扶桑根騎之泛溟渤飄然沂崑

崙直到析木津細問黃河源王繩澹碧落機杼閑
天孫北斗可用挹槎腹窪爲樽獨携天一水從乾
納諸坤梧桐九秋影苔蘚千年痕媼神發深閨泉
冽槎猶存爾泉以亨字是亨本於元世人重通塞
祇就利處論習坎維心亨中有真胚臍木上有水
井何嘗以亨言泉於性中汲畫向象外吞安得跨
黃鵠往款君平門

廷邁留少城和初入西龍道院詩來用韻荅之

雪錦樓高眼易寒春風朶朶似長安終年避事寧
爲客到處尋詩勝覓官金鑿落邊櫓蹀躞玉女臺

裏舞蹀躞華燈變盡歸來晚回首西倍可忍看燈
夕有變燈

送范漕赴召 八絕

太平宰相范堯夫曾駕西州使者車雅操清規公
更勝委蛇退食一編書

淮頭蜀口幾虺隤百戰山川入眼來行伍姓名傳
歷歷定知水鏡不遺材

急符喚出雅州丁刀染紅巾血雨腥定蜀論功誰
第一茗山合着後溪銘

走卒兒童口是碑百年幾見好監司浣花鏡月經
行處草木江山亦去思

嘉州過盡又涪州到處須判十日留
汲媪畚翁遮道拜東風未定莫行舟
匹馬西征歲月多蒼頭引鶴共婆娑
傳聞虛佇如清獻益漕歸來徑上坡
天道頻年說好還到今胡塹沒天山
延英爲奏平戎策只在人心國勢間
紅絲步障海棠開底似西湖半樹梅
要試平生調鼎手安排青子待公來

被檄出城

引卻東風鬢栗聲竹輿如斗作春行
山中祇恠天能窄棧外方知地本平
黔袂煉薊斜屋小貧惡困
曠亂砂明終年一飽難如許愧爾爐熏管立正

次李綿州和丁興元韻二首

燕寢深凝自在香蒼髯扶病玩流光
桃符曆日又新歲粗糲焦糟非故鄉
燈影參差棋滅燭酒行雜還劍橫霜
武侯遺憾誰當洗夜半銜枚入鳳翔
梅花已是隔年香投老何能面復光
求則得之青糲飯歸斯受矣白雲鄉
果柑微似溫生乳閩柿多於處着霜
扶起東南風物夢舉觴目送去鴻翔

劍外驢

苦甚淮南馱嗟哉蜀口驂護身機結鞵防口竹編
籠遠近關梁接高低閣棧通琅璫鳴鐸裏誰識木

牛功

潭毒關

倚天翠壁夾黃流，偃僂嘔啞輓上舟。今古英雄愁絕處，夕陽籌筆驛東頭。

○送崔先生東歸

嘉定甲戌冬，掃門古揚州。一見握手歎飛黃，厄鹽轉士憂不聞道。勿以窮故憂爲聖，爲賢人所貴。天爵修萬卷，我有莊子肯從我。游良農，不輟耕。嘉穀終有秋，動心得曾益。雪案三年留一朝，推使出西風。着堯年莽蒼淮月冷，低迷汴雲愁。正抱虎兕寢，孰脫鷹隼韝。越在歲，執徐公來殿西頭。廷王翠

從喚起驂玉虬，暑發采石磯。寒登籌邊松，孤燈中夕民瘼何當瘳。明年護全蜀，後車旅故鄉。熟聆老規模，矧湏鑄知收中間界一麾，牢關控西涪。相望幾何驛，時許聞成謀。積誠泮羣疑，實踐激衆偷。風濤澎湃中，竟濟師德舟。主人永終譽，客亦無窮休。見謂汾陽門走卒，皆王侯。騎火明桃林，詔催告辰猶仍挈舊司馬入詹翠雲裘。裏江水齊穩一葉，隨沙鷗道重富貴。輕目光送羅浮竿頭要猛進，壺尾毋浪投此意造物知。筮得素履幽十年，甘苦客從我。宜如由可歸，猶未歸。魂斷揚花洲，六經孔孟學其用爲伊周。天方昌斯文，敢告司鼎籌。

次仲禹迂叔禹西歸韻二首

坡穎風流幾許年依然夜雨落花邊白頭故媪金
志轅紅頰諸孫衣解牽聚鴈沙平江百折養鵝水
暖柳三眠行厨洗玉更爲壽父老來看許近前
萬里春風一札書錦幢繡旆二難俱殷紅荔子武
侯渡深碧藕花房相湖家慶盛於羣王府身名榮
過執金吾人生信是團樂好我亦歸謀種芋區

○壽鄭制置

昆丘侍郎南霍僊身騎於菟雪毛羈芙蓉結旌紫
雲導望舒參乘豐隆鞭晨朝東華天帝所班在玉
斧茅盈前帝矜下土沸蜺垤往哉爲洗

祭五色枝拂日蔚藍一碧壺藏天祥飈

下輪囷旁薄煙非煙泰山喬嶽氣轟轟長江大河
胷淵淵五三六經濟世學盡得慶曆諸公傳絲綯
勸踏龍尾道王轡直上羊腸巔印方趣視已走敵
擔耒及弛先行邊黃牛皂郊撤戍堡左洋右沔明
屯田規摹了了入眼底奠而後發矢脫弦長安可
到只十日祁山不出今幾年甲申有讖爲公設席
卷關洛趨幽燕命珪相印明騎火碧瞳黑鬚宜貂
蟬槐龍不動晝陰永瑤草無際春風妍蒼生元氣
秋葉薄善類命脉遊絲懸保茲天子屬山甫願獻
大雅丞民篇

讀書樓二首

流水青山一榻深
銅柯石榦半窗陰
公餘點校七分易
老去服行三字箴
消長乘除觀物理
存亡操舍驗人心
日長大得官閑力
乳燕鳴鳩盡好音
引卻蜂衙一事無
求師尚友聖賢俱
激昂意氣空與頌
收斂身心太極圖
畬火明邊飢虎過
渡船聲外老鷓呼
江南雲水寬多少
萬里深山著此臞

發龍州

六月十六日

涪山信有靈
送客六月雨
曉行如深秋
午憩無點暑

泥溪

兩首

沙路緣江曲
斜陽塞轎明
晚花酣暈淺
平水

大寺

輕喜蔭時休
駕疑昏屢問
程誰家剛齊
餅味過八珍烹

左計來行險
強名爲愛奇
一家川荔枝
三頓豆羹其
壓架龍門石
撐囊劒閣詩
扁舟歸計足
不問鰓和龜

荅及甫見和二首

喚晴山鳥滑
辟暑水花明
蜀隸綿猶重
吳儂葛自輕
交情潘接魏
師法尹從程
鵝鴨堪供客
多煩掬項烹

我愛湖南客
從橫正復奇
短裳甘製芰
破釜懶炊

其憤世惟堪飲憂邊不到詩最憐孤寂甚欲爲喚
羅龜

唐何循吏廟

阿姉雲鬢融翠翹主翁縞髮明金貂軍功告身博
一粲嬖奴銅綬華臀腰有民有社桔栢渚腥風怪
電騰炎燄望青採木起生廟奴主分席城狐驕延
年國釗怙女寵無此土木丹青妖居人側目路人
拍把炬睥睨桓宮焦維唐益昌有循吏身代挽
寬科徭婆娑棠芾滿江潯不與霜後菰蒲凋邦人
扣縣合詞請撤彼祔此安羣竄青袍角帶儼如在
雲車風馬手可招前榮後寢曼且碩庭容百馬
虎簫龜蛇琢鋪闕煙燎衛卒拔劍垂彤詔去

火幾百祀叢廬風雨寒蕭蕭眼前突兀忽見此天
實假手金屋嬌吁嗟勢來不足恃秋雲變滅春冰
消桐鄉丞嘗麟閣盡未省隨手遭人祧君不見江
原清獻楠新繁衛公栢蒼榦合抱干雲霄萬牛拽
倒斫廟柱售諛薦佞喘獨獠只今還有楮錢肯向
荒庭燒

楠栢皆託言大風所拔採爲成都生祠

先妣忌日發昭化

短棹橫秋桔栢磯青山無盡白雲飛官三年矣母
安在天一方兮兒欲歸拱木陰陰閉墓隧背萱寂
寂老庭闈呼兒掃驛陳遺像杯酒爐香淚蒲衣

荅贈劉交代 二首

危棧摩千仞牢關護一窩山巔閑地少溪面白雲
多畫永琴書樂年豐鼓角和官清誰得似祇欠客
經過

番上松扶塞逢迎桔栢碕高風挹元祐遺事說開
禧丹鳳崗頭味蒼龍洞口粲秋光無限好管勾費
新詩

僊鶴樓避暑

孤塔山光寂危樓岸影斜秋聲來木末客思滿天
涯離列高低樹滄茫隱見沙夜凉人被酒乘月快
亭家

次韻張提刑方送行 六絕

着破征衫欠再逢三峨九頂夢遊從也知造物函
深意未放西南易道東

伊川去後幾多年道在離堆沫水邊身任茲文酒
着力莫將人事屬之天



扁舟觸熱下涪忠肩聳無人肯拍洪詩送凉風天
外至魚龍起舞浪花中

太白嘗嗟蜀道難少陵欲鏤劒門山何如推起蓬
窓看萬里江天碧鳥還

了無蕙苾可囊珠解事家人氣甚都日試西川煎
茗法半投白堊半雞蘇

雲邊江樹作離聲
回首秋光滿渭城
蜀水吳山無間斷
只應明月識人情

平齋文集卷第四



平齋文集卷第五

詩四

次楊瀘南以前區字韻送行

水穩風涼快長年
歸帆東指白雲邊
落花款段兒能御
薦草烏犍手自牽
蜀口戍兵誰飽飯
淮頭編戶幾安眠
野人只願羣賢進
輻湊良籌到上前
萬里來鴻未有書
社前歸燕與人俱
漲痕落後杭巫峽
風力高時畧太湖
深愧平生嗟靖節
一斥天下望夷吾
延英入定中興業
早震天聲到鬼區

岑公洞

洞從開闢有翁獨
擅真清磴古蒼苔
崑巖空細溜

明誰刊新即事盡剔舊題名太息今猶古江山不
世情

開濟堂

魚復平沙漲夕陰紅旗影底老蛟吟窮今亘古三
分恨托地撐天一寸心過雨斷雲閑絕壁涼風歸
鳥急平林江山難著醒時眼有酒如澠放手斟

東屯

竿確嶽岑轉百盤峽天深處得平寬秋風策策藤
花老暮雨蕭蕭稻子寒仁者樂山心本靜碩人在
澗體俱胖農家不解詩翁趣只道豐年了納官

高齋

江許行厨轉關頭細路過手摩如象石目送臥龍
坡骭麟雲端栢鬚鬢雨後莎晚來晴更好舟發亂
山阿

中秋秭歸岸下

出蜀趨吳第一州夕涼隨意繫扁舟十分人鮓甕
頭月一片水晶宮裏秋夜氣長存號老鶴天機自
動舞潛虬得歸到處皆佳思不問西風解白頭

懷程及甫二絕

撇瀆梢渦穩下舟狼牙鹿角又黃牛兒曹脫險謹
嗽甚數到家山十二州

石馬門前萬里迴向人似亦笑顏開獨尋舊日題

詩處却恨騷翁不共來

獨醒亭

今來古往江山老地盡天窮草木愁爲問大夫能
飲否芙蓉落盡菊花秋

溫泉院 二絕

老火欺人客路長艤舟取次浴溫泉犬鳴三峽夜
逾靜月上四更天始涼

神虎護泉寒翠壁靈虬吐沫暖冰壺玉環不碎征
塵裏更引三郎到古渝

劉家江阻風 二首

動地千牛力行天萬馬聲溟濛迷太極浩蕩送平
生夢與屏幃元心隨簋缶傾黃頭多着纜作止住

三更

歲月孤槎轉風波斷梗隨謝三元自慣巽二莫相
欺沙岸往來拍蘆林開闔吹欠伸呼斗酒一笑酹
馮夷

千竿夾

方雨江流紅未霜蘆花紫寂寂遠帆來拍拍晴鷗
起

包港風濤 二首

蒲百丈幾牽掣斷鐵三脚已撼搖浮陽侯戲劇何
須爾身世從來等一漚

顛風立海雷轟訖駭浪翻天雪壓蓬夜半乖龍酣
戰退一奩冰鑑本來空

寧宗皇帝挽詩二首

虛己堯黃屋清心漢弋綈乾符開太一坤軫拓全
齊鎮國天球在賓空寶仗迷歷年施澤久四海哭
遺黎
德粹三靈接功成萬國雍方培豐水芭忽跨鼎湖
龍廟號追文考陵名冠世宗微臣趨覲晚灑涕續
車攻

送章君範之湖南幕

天門孔鸞起江晴荃若春親榮知有子主勝信軍
賓嶽麓盛古學衡山多秀民平生金玉質更看濯
磨新

寄題成都張宰壓雲樓二絕

清霜戒曉日將出急雨報晴雲乍開庭下簿書渾
引卻獨揩雙眼上樓來
氣如軻也生於義道似參乎任以仁乾蓋坤輿猶
塞破何難壓倒玉嶙峋

送杜陽安奉親還蜀二首

訪落方勤止而翁苦掉頭立幾遺世獨行盍爲王
留日月馳雙轂乾坤寄一舟勿緣歸計得忘却緯
邊憂

買我歸吳棹揚君沂蜀旃雖在萬里別端有一家
綠臘雪添新漲春風減舊綿江山隨處好橫槩小
留連

和高續古省中雪

升平見一斑未臘得三雪天開銀色界人立水晶
闌小團醉後煮清夢梅邊說莫道石渠春不似山
陰月

省中和何子溫見寄

東風婉婉燕來雙禁漏無聲萬綠香寶鴨炷雲朝
太紫玉蜍挹露校鈆黃聖賢不斷千年脉宇宙長
存一點光老鶴也知虛靜好夜深踏月上脩廊

和何特夫見寄

人從萬里蜀天歸御柳藏鴉絮又飛風細爐熏活
穗直日長漏箭出花稀九重旰食圖無逸四塞宵
征賦采薇愛國書生心更苦夜占列象候璿璣

送秦祕監還蜀二首

岷峨人物古淮海姓名香識面歲華晚論心春晝
長有懷胡去國無媿好還鄉呼酒犒三老柁樓天
正涼

蜀產班行幾分符又去之氣宇吞落日心定發涼
颼蠅虎攫何壯蝸牛升更癡見幾能許早別思渺
江蘼

送張行父守贛二首

覺是聖賢脉復爲天地根典刑諸老盡文獻幾家
存露下鶴先警風高鴻獨騫一時京洛價知有魏
公孫

南斗一帆外西風千騎頭莫嗟中落落須臾上休
休賈誼詞林曉陳蕃墓草秋經行拚斗酒爲浣古
今愁

○送客一首送真侍郎

風雨寂歷蘆荻秋梧桐落盡斜陽收孤鴻影斷蒼
莽外愁絕送客濤江頭客心恰似濤江水夾岸
沙潮不起海門一線拱觚稜無聲夜到龍山尾

雲壓江秋陰陰千古送客非斯今有酒可別不
斟天乎天乎知客心天乎天乎知客心

和續古蜜木

參桂齊名骨自香百花釀醑助甘涼含金咀玉風
標別消得肩吾爲發揚

○贈小兒醫

忍飢覓句孟東野守寂草玄楊子雲囊有遺書無
與讀兩家恨不早逢君

和續古謝送墨

黑月黧雲脫太清海風吹上筆頭輕瑣窓冷透芙
蕖碧定有新銘到九成

題鍾春伯所示周昉明皇對弈圖

寶欄十二午陰移思入雲霄落子遲當局早知提
醒着危機應不墮蛾眉

乙酉六月十九日應 詔言事九月一

日去國一首

黑風吹雨出長安破帽騷騷怯暮寒不得之乎成
一事却因而已失三官人心天理推詳易世路交
情點檢難白髮老人經事慣教兒只作博投看

丙戌天基節自至道宮趨寶福院寒甚
朝謁千秋節攀援萬歲藤山明松戴雪澗澁石懷
冰清壯髯還戟酸癯面亦稜暖寒能破戒珍重

溪僧

大人用韻再一首

靜裏栽梨棗閑邊話葛藤緣塵還我雪世態任渠
冰宿卉芽渾脫新禽語摸稜年華催鑷白自笑禿
於僧

乙酉歲暮有感 三絕

罷參歸趁日高眠隨意繙書不計編歲事從教催
白髮春風元只在丹田

精神收召入腔來水色山光面目開可惜行窩新
失伴雪晴未忍說尋梅

樽酒團圞里社情眼中忽不見公榮祇應天體如

雞子地下人間共月明

時疇甫
初逝

敬和 大人新年韻

井深得泉終必食
睽弧遇雨更奚疑
毋庸伊尹要三聘
且學顏淵克四非
勢去鐵鞋無處覓
志亨金印有時累
梅花結子桃花發
爛熳春風醉典衣

梅

寒瓶虛插一枝斜
留待春風放霽華
已信不冰方着水
可憐欲槁更開花

繁芳玉立夾胡床
勾引春韶午夢長
有眼盡迷空裏色
無心方識定中香

又

竹屋茅簷一樹斜
冰霜意氣蓋韶華
有餘不盡
知道半已青青半尚花

桃花紅豔照銀床
黃入金明柳線長
欲與晚梅相輩行
同時到底不同香

挽禮上人

盤屈虹蜺氣空山
老白雲酒因陶令買
芋爲鄴侯分甘露
門知味毗耶藏著勲
南軒無復見巖卉自清芬

和開之社日

久要來新燕簷花
泣曉霏治顰愁
舅醉廢讀情孫
歸鶻突輸羸局
醒鬆脫着衣
一簾春寂寂誰解識

吾機

春事

莫爲春愁兩鬢翁
管愁元不屬春風
深黃楊柳夕陽外
淡白杏花明月中
大自在身天地並
妙光明性聖愚同
鳴鳩乳燕相料理
融得從前萬慮空

寒暄不齊 二絕

社後歸來燕兩三
門前細柳綠摻摻
乞將蝴蝶蜻蜒扇
與試搗黃水碧衫
次第新烟欲試茶
錚錚飛霰響簷牙
惜春苦欲春長在
且得輕寒約住花

敬次 老人即事

韶華九十恰平分
過化中存一點神
草脫燒痕悲故色
梅收花事又新人
正襟危坐三靈會
擁鼻長謠萬象賓
酬荅風光惟辦此
可能春夢到天津

清明 二絕

梨花匝匝不見葉
柳穠玲瓏初欲綿
寒食清明等閑過
日長翻覆壓書眠
風將好夢到蘭亭
驚覺虛簷九子鈴
老眼醒來無着處
倚樓檢校樹頭青

次韻西塢道庵

芳蹊幾曲重行行
塢裏曾陰塢外晴
秧馬鬚鬢和雨種
犂龍齒齏帶煙烹
黑風動地前程暗
白日行

天內景明却愛道民無別解一杯春茗雪花輕

雪歎 二絕

唐時三月十八雪况復今年多一旬萬紫千紅渾
過盡荼蘼蒲架與爭春

桑穎騷騷麥又萎雪花如挽雨如絲老天只解苦
黔首快活貴人那得知

桂子次韻贈阮甥

一樹青青桂子榮廣寒宮殿玉爲楹不知天上何
年墮故使人間有種生風影碎搖籤帙爽露華倒
洗筆頭清寸田更與加培植收取天香染姓名

次韻雙桂

物理無枯底有榮一雙玉樹倚脩楹長如拱壁天
球在元共交梨火棗生卜築地連盤谷勝賦歸人
占小山清晝陰最喜添新綠時有佳禽自薦名

閑居

暑設青練幕晴更皂葛巾家貧猶氣象人老亦精
神蜂鬧花生計蛾顰繭化身靜中觀物變同是一
天真

鍾惠叔轉示趙臨安兩山堂諸公詩刻
隨喜二首

兩峯高峙玉五畝秀含滋細柳未眠種脩篁方醉
移雨將雲出谷水引月歸池動靜天機密何人共

一卮

采頤常逐逐觀復自休休靜畫青竹笋深春黃栗
留覺圓熏穗直夢破茗華浮爲問連山易床頭好
在不

燕巢

華堂橫架晴虹壯來鳳結巢長一丈中間鼎足燕
樓勢兩旁坡陀翼城樣相攸爾居莫此樂得意鳴
聲相下上同時啐啄三四雛盡日往來千百餉欲
飛未飛翅羞澁似定不定跂搖漾施施引趣女墻
行戢戢教升危堞望黃金鑄印分裏有何用芹泥
呈瑞象時見主人長健燕長歸但願春風不相放

浮溪周居士挽詩

野水崗頭屋春風竹裏厨所安仁者靜其樂道之
腴遺逸盍徵詔耆英空畫圖詩書根氣遠叢桂蔚
相扶

次韻子有賦著圖書所

富兒種卮敵封君貧翁結柳呼奴星物理虧盈蛇
雙螭惟有讀書可以逃天刑守玄老死天祿閣巧
宦三入承明庭人生得失雉臬盧惟有知道可以
垂芳馨嗟子鈍甚爐底鑛陶寫淬濯誰爲研買書
充屋手點勘杞菊門巷槐花零九流七略宗六經
大川小澮趨東溟騷人墨客幾汗青秦姬趙女爭

娉婷聖賢氣脉眇如綫義理門戶元無扃圓冠方
屨弗見道金貂玉櫺空圖形君年正壯眼如漆一
過萬字披不停借書一瓿走赤脚燈前急雨鳴高
瓠扶輿磅礴天兩目渟蓄雲氣藏風霆鈎深造極
猛着力會挿八翼搏青冥

九日

老無擘畫笑柴桑兩眼惺惺菊自黃渠更笑人無
菊把拒霜相對過重陽

荅子有

裹飯無人過子桑拒霜一徑雨昏黃花根記縛西
湖纜紅淺紅深醉夕陽

夫容

向背有深態纖穠無定姿最憐花脫後全似蕊包
時

荆公

君臣一德盛熙寧厭故趨新用六經但怪畫圖來
鄭俠何期奏議出唐堦掌中大地山河舞舌底中
原草木腥養就禍胎身始去依然鍾阜向人青

冬雷行

三月廿八雪十月十九雷日官起歷失氣朔深春
爲臘冬爲梅衣巾暄淑糝白醖研席昏濕凝青埃
堦頭蠹腮上未已陣陣送雨千峯來水鄉種早場

已築山鄉種晚鎌方催漏天未信解晴否低田芽
茁高田摧老農一飽不自保愁面百摺何當開君
不見太史局申十月雷麥成堆

送郎丞

文炳之桐城

江北江南雪意催半酣椎鼓起征旆銳從猿鶴歸
休去剛被功名引調來破虜檄傳肥水定屯田疏
上皖陂開筆端矍鑠精神在莫只清吟伴老槐

奚左藏

士達挽詩二首

理學不遠復躬行毋自欺志雖千萬往材僅二三
施花竹觥籌密雲山步履遲眇然人物裏公竟止
於斯

諸老定交早羣兒驚見稀功名身身韞櫝翰墨世傳
衣龜壽前占夢鷗盟晚息機吳頭耆舊盡搔首送
斜暉

次韻可庵梅

點雪非耶果是耶紫千紅萬未曾芽蒼苔有暈龍
鍾樹幽谷無人自在花地暖孤鴻來索伴天空雙
鷺下通家詩翁快整春風脚山路霜泥踏馬牙

叩杖次韻

槎使携歸餉老人高稜踈節屈中伸撥開豺虎憑
陵氣攝取蛟龍變化身訪洗頭盆還喜健伴行脚
並未嫌貧一般仙骨清如鶴倚看滄溟解起塵

疇甫叔挽詩二首

南渡幾年裏深山誰力書獨君酣百戰許我丐三
餘參斗明燈燼湖江渴硯蜍斯人猶不第天理竟
何如

撰屨西山路尋春得重陪那知分手去不作轉頭
來寂寂雙溪雪依依半樹梅經行陳迹在橫涕濕
蒼苔

夢中和人梅詩山礬韻

溪路槎牙木葉乾角聲吹動五更寒踈踈梅蘂踈
踈雪一段生綃不用礬

又用韻

竹外橫梢半欲乾透香肌骨不勝寒定知天上梅
花腦不比人間柳絮礬

聞山陽夏全之變

洮湟私牘舊開邊淮楚依然樣子傳抱虎寢蛟心
不保護疽諱蠱禍相挺河流三舍盡人血城闔四
門無竈烟昨夜洗兵盈尺雪華夷齊賀太平年

丁亥歲朝把筆

雞喚璇杓一夜東長天紺碧靜無風年華老子懽
娛裏春事兒曹翰墨中脫雪薺芽盤飮綠晞陽椒
薑酒行紅赭袍親上慈明冊正想千官會漢宮

三日兄弟侍老人展墓歸和尊韻

雲淡風柔霽色輕
瀧岡阡上氣和明
莫思舊日遨頭出
且試新年便面行
飽飯即爲君子泰
濁醪不失聖人清
一翁二季春無盡
更願諸孫向老成

次韻梅影

白玉堂前絕世容
水晶簾薄透重重
非僊非鬼樹明滅
似夢似真花淡濃
鞭照暗波添縹緲
佩搖寒月欠玲瓏
一番青子成陰後
却笑癡兒認舊蹤

春雪

甲子乾飛雨元宵
濕隕星風柔行陣
陣月淡下亭亭木
筆侵凌碧來半掩
映青東皇收拾急
暖漲赴

滄溟

招隱三章贈李洋

自號同初子

雲氣歛兮天目之顛
濤江綫橫兮海門濺
濺扶桑子半兮陽鳥
翩可俯而掬兮嚙以
天井無聲之泉子其
隱乎吾與子兮拾荃

雲氣冒兮天目之趾
疊湫歎薄兮洞石齒
齒列缺正晝兮睡蛟
起可仰而擾兮浴以
天河倒流之水子其
隱乎吾與子兮采芷

雲氣吐吞兮天目之腹
乳潭沉沉兮鴨潭煜
煜徐伍朝往而暮來
兮雙碧鹿可挽而舞
兮侑以天風步虛之
曲子其隱乎吾與子
兮蒔菊

次韻遊龍門十絕

石木扶桑莫苦攀芙蓉薜荔不妨閑封三萬戶煙
雲裏化百千身水石間

欲訪天池水發源倒騎北斗挾飛僊高低八節灘
頭路俛仰三生石上緣

拍手東風喚白猿劃開元蓋洞天門可能路指虛
無去兩脚湏留點地跟

蒼崖斗立兩扉開行雨龍歸尚殷雷嫋嫋天風瑤
草碧神清依舊鎖樓臺

武陵溪上迷津處衡嶽峯頭失道時珍重牧兒相
拍似隔林招手不吾欺

飛泉澣雪林華濕盤石生雲古蘚乾早着些詞招

隱去泰山有賊膾人肝

稻花秋晚蟹洗手薺菜春初錫膠牙築底空山誰
辦此留君只有石邊茶

不提長劍斬江蛟便揭脩竿釣海鰲縱老無成猶
自許一溪流水兩山桃

不知我者謂何哉布韞青鞋日日催長嘯一聲啼
鳥外朶頤有象著山雷

平明出去日斜回小立巖花澗草隈光景留連非
我事此心曾點漆雕開

挽阮開之

窮達皆歸命虧成不掛心醉餘便腹睡棋罷掉頭

吟孔雀門闌舊驪駒院落深
可堪重剝啄寂寂杏花陰

柳

天機日與物華新
嫵綠柔黃觸撥人
精采只消些子雨
腰肢無着許多春
興亡螢苑迷樓夢
榮辱孤山麴院塵
醒眼年來渾看破
萬緣分定不須顰

杏

萬山築底作春妍
一樹繁紅直幾錢
深院日長來燕後
平池水暖浴鵝天
弦歌禮樂詩書地
榜帖功名富貴天
兒輩對花須自勉
莫教空惱少陵顛

柳用前韻

苑彼烟絲一樣新
依然面目我陳人
只疑大造元無物
豈料深山亦有春
盡日三眠渾得意
隨風萬舞不驚塵
長長短短亭前路
肯與渠儂管笑顰

上巳呈子有

隔水梨花豪放盡
安排鼠耳到庭槐
十分春事杜門過
百色老懷中酒來
聞麗人行頭輒掉
見蘭亭帖眼還開
碧衫玉唾醑醪晚
更倩詩翁着句催

顏延年三月三日率爾成詩前詩重韻

太率可笑

過盡風波滯瀕堆
一閑無夢到宮槐
迎頭寒食清明近
入手櫻桃芍藥來
率爾成詩聊意達
快然自

人亦顏開期君曲水芳林序花裏傳宣火急催

百舌

飛上三足鳥喚起百舌鳥鼓弄林杪春瀾翻屋頭
曉氣吞黃粟留勢挾秦吉了向人售嘈雜司物窘
煎炒轉頭芳意歇噤喙青陰悄

晚食

從來此腹負將軍淡飯投壑現報身三月不曾知
笋蕨夢魂敢到水晶鱗

次韻茶藤二絕

瓔珞垂垂萼綠華光明淡竚自成家枕幃醞藉風
流足甘放朝來被底衙

愛春留得瓊英在添竹扶將翠蔓高更著金沙相
間種主人四壁錦周遭

官採木

深山風雨幾百秋直干雲漢大蔽牛輪困離奇中
尺度一旦出應天家搜山摧浪壓斧斤下橫亘十
畝眠蒼虬白頭地主坐歎息物固於數吾何尤爲
言此殆有天幸如拔萃渭歸商周棟梁未央坐萬
乘柱石明堂朝諸侯老翁聞語驟然起致祝切莫
去作昭陽梳洗樓

楊花

舊雨人無半迹來惺惺獨坐眼慵開却嫌飛絮猶

多事點破門前一徑苔

春禽雜言

倉庚倉庚集谷之苕謂汝也幽而豈其喬勃鳩勃
鳩有安斯巢矜婦之功不念鵲勞決決杜鵑念歸
何悲豈知汝歸不如未歸翩翩元鳥羣雛相依羽
毛浹矣同乳異飛負陰抱陽均此一氣孰使然哉
淒其永懷

次徐雲叟賦桃源無腳橋

經始西風八月秋桃花春漲已無憂橫飛閣道虛
空度直放銀河自在流倚岸斜看疑是洞循坎壈
上認爲樓遍行吳蜀今纔識却笑浮橋設造舟

次韻映山紅

燧人鑽榆出新烟烟光濕雨山蒼然黃鸝怯寒啼
未語有喙三尺惟啼鵲血流染花不知數赤霞爛
熳橫丹天前山後山列錦障上澗下澗敷金蓮海
棠無香許流亞石榴有豔疑姻連目光遠送空翠
表勝處正在繁芳邊七香寶車果安在東風老去
空華顛

送監丞家同年守簡池三十韻

去年爲君來明廷峙鸞鵠今年爲親歸蠶市苦思
蜀扶輿出脩門萬里宛在目大江六月寒風飽帆
帆幅金山如幽人杜蘅繚荷屋采石如壯士鐵騎

明鑒續五老烟光開九華雲氣矗如王公大人冠
冕而佩玉大孤狷介甚赤壁清曠足黃鶴俠者流
雋放不容束英雄古荊州霜月耿喬木寂寞三閭
亭風露落秋菊陽臺峰十二森拱峽江曲高標聳
赤松絕槩凜孤竹或如漢汲黯抗直敢振觸又如
唐真卿峻絜不受辱瞿唐滌瀨堆一柱乾坤軸潰
城睢陽孤鉤黨林宗獨水石明邊酌蘋蓼佳處宿
寬作幾月程迎面峨眉綠世道淡有味人生平爲
福江山無愧容草木有餘馥試劍信雄拔易簡更
清沃虎蛇方橫道有此廉平牧相如駟馬貴長孺
一翁亮明河隔黃姑碧落杳飛鷺獨復即無妄多
識通大畜歲晏以爲期仁亦在乎熟木末老芙蓉
闌干深首荷瑯籤莫厭婁瑟憊尉淇奧

浮玉道士琴

老蟾亭午潭澄陰雄虬怒吼雌虬吟空巖納息耳
應心寫之以神寓之音大音激越風振林細音窈
眇雲起岑天機不動天和深非虧非成非古今博
山一點蓬萊沉

山中吟

幽居多暇隳括黃庭內篇賦山中吟
俾善琴者倚操而歌之

葉珠閑居方作七言琴心三疊方舞胎僊呼吸日

月下上雲烟兮回紫抱黃入丹田一面宗泥丸六
府主丹元七蕤應兩扉九微徹三關明堂闕虎章
玄闕森龍幡素衣翠重裏朱帶綠華裙上有黃裳
子丹兮常在兩眉端欲求泥丸滿直須丹元存靈
臺貯清明太極涵胚臍并坎降離凝正一而融三
五方付之靈堅童子玉池太和宮重樓十二環兮
蘭玕朱鳥白石源兮潺湲專閑御景而握固兮嗽
咽金液漑靈根胎津溢而琅英飽兮積精累氣而
成真高研恬淡兮道之園物物不干兮泰而平身
披鳳衣銜虎符兮控駕三素躡飛霞而升廣寒東
西兩目兮倚天木陰陰兮泉涓涓一唱三歎兮玄
鶴下其蹁躚八景二十四真兮吾亦不知其然而
然

損戒 二首

河純行水底志在全其生縋綆激使怒拍浮拾彭
亨觸來不自制天君失和平懲忿當如山一靜弭
百爭
野虞雉爲媒穀穀雌召雄陰機發翳綠碎迸錦纈
紅耳目誘於物顛倒不有躬窒慾當如澤涵渟清
鏡空

引鏡

水白深還黑山黃遠自青紛然無定色何者是真

形不壞只太極長存惟六經莫疑晨鏡裏驚慘換
星星

苦筭

臨軒解褐賜湯沐一節兩節水蒼玉氣嚴慣嘗志
士膽格高厭食太官肉此君可人如西湖荷邊冰
簟三更鋪心知爽快不宜過柰此風月人間無

丁謂

鶴相專朝巧萬般中書位子太山安沂公冷眼旁
邊看機會來時隻脚翻

欽若獎丁丁陷若謂之厚演演擠丁勢交利合皆
如此說與金陵老子聽

食糟行

龍州石林七斗醪百錢半升官價高村民無分酒
到吻清晨荷薪爭博糟得糟還家喜欲舞遠汲淡
煮燃松毛都養麥餅澁難下藉此嚙送如葷臊我
時作守輒自愧每飯釜有羹堪輟罷官兩夏肉入
務食糟却如住百牢紛綸玉縷芼葱涑晃漾珠滴
霑麻膏多從未破甌頭餽間入半折鐙中爇王瓜
未甲蒿苣老芬美獨擅盤殮豪饒奴停匕朶予餒
一舖七八譏何饗太平無事稱意飽竹床大鼾枕
離騷客來闔戶口尚臭錯疑被酒醺陶陶我亦爲
言恰夢金絲帳底斟羊羔

五月庚申夢人相拍爲馬周且誦詩兩句覺而足之

伸縮一雙手去來三世身新豐驚昨夢斗酒蒲懷春

苦笋用前韻

林谷迎梅新雨沐和綳熟煮琅玕玉籜龍別種富風味攫魚同科少肌肉吾廬兩山介宣湖綠陰門徑楊花鋪攻苦食淡父子俱笑看兩孫拍之無人

和曾

天象

白氣一抹蚩尤旗南斗北斗天兩垂西方熒惑耀

芒角初月吐魄來食之去年天象已可駭今年天象更可疑春王正月暨三月黑氣幾度摩晨曦銅盤亭亭慘且淡鐵鉞拍拍合復離沙盆貯水靜照影眼亂兩日謹童兒移時妖氛漸引卻赤光如血鋪庭墀家無占書瞠休咎但効嫠婦顰雙眉昨朝忽見邸狀報詔荅丞相辭公師首言金烏効祥瑞變我愁蹙成愉怡玉堂學士天下選王治有象非吾欺東淮西蜀狗鼠賊看折尺箠從頭答

用虞提刑

剛簡

見寄詩韻荅之

有美人兮古錦官落花芳草幾憑欄紛紛世故肱三折忽忽年華指一彈詩到考槃湏熟講易於未

濟莫輕看門前尺雪清燈夜尚欲從公扣兩端
雞鳴而起一般時舜跖殊途覺與迷此理天無分
厚薄乃心久自眩東西柴門風雨榴花老草巷烟
霏燕子低玉汝有書來萬里聖賢不泰不栖栖

次韻夏日

乍晴雲更黑頓冷日如青飽飯真成蠹幽居又見
螢燈光翻露柱琴疊舞黃庭猛作逃儒去沉酣幾
箇醒

瀑布

白龍飛出翠雲堆不見源頭只見來勢有盛衰
視雨聲無高下盡成雷誰教河鼓翻將落我欲問
侯挽取回東陌西阡分港去盡年入眼稻花開

狐鼠

狐鼠擅一窟虎蛇行九達不論天有眼但管地無
皮吏驚肥如瓠民魚爛欲糜交征誰敢問空想素
絲詩

次韻高夢

隰蒞照眼似舡窓只欠沙頭野鴨雙花引穠垂丹
作佩葉扶節起翠爲幢婦收滋味歸羹鼎兒挹馨
香赴酒缸老我爲渠牽牛夢白蘋風冷釣煙江

示諸兒

徂徠古君子涇渭何太明一姦衆稷契詩作奇禍

萌姦人擠之死既死氣未平銳欲剖其棺謂北走
猶生妻子坐凍餒不斷啼號聲富韓各分俸買田
活其嬰吾疏視彼詩歷數羣公卿觸怒非一竦舉
朝眼瞠瞠所賴天子聖不死五鼎烹斥歸天目
下石田力躬耕田少食拍多讀書飢鳶鳴此身不
足憂憂我身後惇富韓不常有勉哉自玉成忍貧
知好脩道在困亦亨

續夢

造化有真機寒暑不停軸秋風促絡緯春雨鳴播
穀一氣臂屈伸萬事手翻覆得牛或貽災失馬
非福七侯梁冀誅三妹國中族鼎貴正酣養旁窺
己魚肉自古聖賢徒不耻貧賤辱忠信以爲寶
第而干祿但信命行藏不計得遲速泰極必有一
剝爛乃爲復一理無間斷九卦要精熟夢起獨忘
言窻前數叢菊

淨梵僧願蒙堂

山下有雷願山下出泉蒙主靜山之體養正靜之
功閑閑六窻明寂寂萬籟空坐觀鼻端白巖花自
春風

讀漢書

漢衰元帝爲優游成帝荒淫更可憂論說金華風
過耳山河大柄醉中休

六月二十八日入朱陀山寺

决决下泉脩脩竹間路破寂孤蛩吟送暝疎鐘
度箇裏欲求心應生無所住

促織

一點光分草際螢繰車未了緯車鳴催科知要先
期辦風露飢腸織到明

水碧衫裙透骨鮮飄搖機杼夜涼邊隔林恐有人
得報縣來拘土產錢

荅子有

高吟梁甫卧隆中眼底驚心不足空清白自將
五月涼涼不定六時風交梨火棗根苗長翠竹

花信息通樓外秋鶯強饒舌口筆人遲却黑頭公

用韻荅游司直見寄

道在皇王帝霸間古今同是一人寰不愁垂白三
千丈獨喜飛黃十二閑晚桂薦花熏鼎古寒松瘿
子茗甌斑山中風味無人會賴得新詩起老頑

龍池沙漲

龍徙三湫宅山飛百道洪雲車風馬去福地洞天
空蒼莽渾沙積崎嶇沒徑通等閑陵谷變驚倒白
頭翁

二齋文集卷第六

詩五

秋半聞鶯

木葉青黃幾栗留盡情啼破兩山幽怕人冷落
秋思故作春聲爲遣愁

夕陽

百丈崗頭路滄涼步夕陽石芒輕放屨草莢緊牽
裳深紫猴榼熟疎紅馬蓼荒牧兒良得意吹笛下
牛羊

讀書蠖室

扁爲攷禪作侵尋二十年屈伸聊復爾俛仰故依

然直榻無餘地橫窓不欠一
焚香長誦罷風雨響
山川

秋山即事

避俗鹿挺走依僧龜深藏淡中般若味定後摩尼
光壞垣被雜卉爛熳野媪裝叢薄鳴幽禽淒抑怨
女吭桂謝紅不墜菊繁青已香瘖蟬怯露葉忙蜂
急寒芳魁芋鶩護乳拳栗蜩脫芒菰蒔蘼蕪綠粟
登釀藟黃田父時泥飲樵夫間談王意適兩鬢屏
神王三仇攘龍耶老聃化風方接輿狂翠壁千仞
表西風吹我裳

方氏棟華桂叢亭各一首

一忽來百順寸私生萬殊能思根共出自愛鄂相
扶夜雨平生約春風盡日娛幾家燃豆泣知冤脊
令無

天上廣寒種人間方寸栽田三和氣溢竇十慶源
開色閱風霜在香包月露來八窓秋競爽堪覆掌
中杯

送黎德升出守眉州

伯登

霜隼健毛骨冥鴻高羽翰來遲懷去速退易挽留
難文物聲明郡中和孝友官大馮棠蔭在多放一
分寬

同是郾城客對床如弟兄秋風雙鬢改落日寸心

明終古方書在隨時局面更公餘經濟學講貫不
嫌精

晨起

入夜風收雨遲明暖釀霜人窮髭易白地瘦葉先
黃繡眼語叢竹畫眉啼斷崗炊烟猶未動吾亦起
歌商

敬和 老人秋日山行

湍險中回棹寬平處整驂雲峯環六六禪板占三
三地冷梅枝北天空鴈影南真觀觀自性危坐讀
書龕

和子有雨中述懷

畏塗險如峽中州蝮蛇倒退猢猻愁熟將義理自
陶寫簾衣淡飯過即休邇來陽侯橫造業兩淡莫
辨馬與牛高原低隰半爲壑下潦上霧昏人眸西
風滯穗可能幾尚作饅粥餘冬謀如麻兩脚未肯
斷便有餓死儒冠憂惟窮益堅老益壯更式相好
無相猶縱爲溝瘠亦何憾多少華屋皆山丘環堵
短褐陶靖節款段下澤馬少游平生耻作稻粱計
好還渠不桑榆收東家夫子共此約一醉斷送黃
花爍

尋梅

搖落園林一再霜梅梢葉剩兩三黃蕾紅包裹春

猶密隔墉枇杷得擅香

會心

不是非心佛還疑有漏仙朝聞馳鼓起夜候定鍾
眠浴少衣偏垢遊多屨易穿祇將母不敬推倒野
狐禪

清虛堂六言爲淨梵僧作

石澗寒泉霜曉竹崗霽月涼秋一炷銅爐栢子老
禪破衲蒙頭

挽萬登仕

種德諫議竇處心承事黃池園花竹老庭戶簾編
香四廿環疊絲百年酣累觴紫微身不到丹墨付

諸郎

寄題真相寺遙月堂仍簡禮上人

四持遮盈闕八還齊闇明須從心觀覓莫認指標
生地僻人聲遠山空夜氣清何時煨芋火相與聽
瓶笙

烏息隱山堂覓詩

未出爲遠志出則爲小草請看耆闇窟幾年黃面
老

米積外科僧照源堂

潛山盡頭孤峯薛嶧布寶鬘雲雨玉珂雪中有醫
禪碧眼電掣人以病求一歲幾闌開方便門出席

長舌病從心起當從心滅方起於心洶洶烈烈不
冰而寒不火而熱寒熱交戰內外癥結瘰癧疽瘤
疔瘻癰癤湯熨箴砭色察脉切不如治心心氣
悅如凝斯泮如壅斯決勿藥有喜匪渙其血凡濁
惡海萬病一轍大摩尼珠一照萬徹是珠在祇無
有差別名九轉丹字千金訣爲安心竟寒水秋月
維摩無病文殊無說

至節前一日遊汪茫田

聖主親郊盼蠶通風恬日霽作春容好從輦路聽
清蹕却向深山把瘦筇樵子徑隨蘿薜上道人屋
借竹茅封一杯旋煮山泉盪浣盡平生磊砢曾

至日歡喜口號

太平寶慶第三年萬乘初郊大報天恰應漢家辛
巳日八觚泰時立甘泉

青城矗矗紫壇深碧宇無風掛斗參億萬蒼生齊
合爪 聖明天子得天心

獨夜

兩窻明月一庭霜佛屋風鈴語夜長孤酌不多人
易醒九回腸付篆盤香

雪留董景揚

一色凝雲合大和定知宜瑞不宜多飢餐烏昧出
皆是飽進羊羔人幾何捨地折腰紛岸篠撐天

項獨庭柯留君待放晴光出同步春風十二窻

立雪

立雪窮蘭若侵寒破驢驢雲迷山糊塗冰壓樹琅璫甕底茅柴熟爐頭楮拙香樂天隨分足吾欲老田莊

高壺隱挽詩

種德黃芽鼎陶心碧玉壺多交天下士幾喚竹間厨秋雨涼催讀春風醉索扶忽成觀化去冷落輞川圖

山房藏書萬三千卷子有賦詩用韻

門巷蕭然雀可羅藏山萬卷自研磨懶尋玉女餐西岳甘伴金僊坐補陀書帶草長塵慮少鉢曇花放道緣多酒肴問字如相遇引道松間不用呵

又荅景揚

朝家久設禮爲羅小寄禪窻共講磨紅錦障泥飛騾裏黃金寶校琢盤陀冰壘薦飯鄉風古雪汁烹茶雅道多領取單傳心法去會將佛祖一時呵

挽章冠叟

卷却青雲靶書來意轉平於斯觀所養知不失其亨梧竹自師友梅菊皆弟兄悲風吹夢遠不朽是鄉評

再用陀字韻

煙霏深處萬山羅，閑裏工夫歲月磨。上采緯書，
鑿度下搜雜志，薛延陀手披不厭薰沉水。心悟何
妨涉貝多，若問尊經閣中事，南豐作記也須呵。

斲葛行

晨雞未號霜塞塗，前村後村遞招呼。長鑱短篝采
葛去，冰蒲髯鬚風無襦。頻年米賤置不問，高藤稠
葉青扶疎。但聞酒渴欲吞海，一片兩片甘於酥。山
深土厚雨露足，造物巧爲凶年儲。紙錢掛樹跪致
祝，地媪發閤何其都。初疑大澤龍蛇蟄，又疑京觀
鯨鯢屠。防風氏骨碩且大，毋陀羅臂脩而腴。不
下山日未晡，候門迎路謹妻孥。松明燃火博土，

且削且搗，投冰壺。細如桄榔滑如菰，白如人面赤
如膚。和以粉米隨所湏，餅餌其精飯其麤。潦田不
收野草枯，飢虎藉此猶能驅。蔽其札耳皆可楮，征
自葛始功莫逾。小兒媚竈愁眉舒，大兒捧盞還嗟
吁。青青之麥何時鬚，長葛盡矣吾誰哺。嗚呼富青
州黃承事，古人有今人無。醉摩便腹視餓夫，以腹
揣腹心安乎。

卒歲

山雲披披日翳翳，澗冰衷甲風擁篲。紙窗透明竹
扉閉，蒲團坐穩栢烟細。於羊去智魚得計，優哉游
哉聊卒歲。

疥癢

疥癢悲志鬢髮涼慨年但人特自苦耳天竟可恃
夫忘憂草良嫵蠲忿花更姝多渠有酒醕寬我無
錢沽阿芝亦解事低眉薦吳歆

和雪

肅容盛氣下璇霄不作投壺玉女嬌坡老堂前微
撲面伊川門外驟齊腰得風還解掀天起帶雨纔
能控地飄無限陳根生意動早看綠長後園蕉

寶雲庵戒師

鍾山好住苦弗住馱嶺難居真欲居出地入天湏
任我來今去古不關渠萬由旬上起膚寸一剎那

問彌太虛識得曼華雲體段妙高高處坐如如

戊子新元 老人七十有詩自述敬和

松鶴昂昂省見稀獨游汗漫友佺期光風霽日安
排好秀水佳山閩釘奇嘉慶圖中身最貴耆英會
上爵猶卑縱心境界天和聚一笑花開蝶滿枝

用韻荅子有

舊雨來人眼底稀春風獨許共襟期斜川追古年
年早曲水從今事事奇爛熳和詩齊少長淋漓被
酒略崇卑驚回蜀道芳時夢花亞銀釵舞竹枝

歲事

山居歲事似羗村注瓦傾瓷酒半渾微麝和

拒妝芳先夾薜斫餽飽阮生朱老情懷密張
兄笑語溫簾外東風花信早更煩吹綠鬢毛根

羅察院父瑞桂堂

老僊方寸長黃芽百順薰蒸到物華移得廣寒宮
裏種開將后土廟中花詩書根蒂聖賢脉忠孝馨
香今古牙富貴儻來餘事耳化工深意屬君家

治平寺清音堂

普門以眼聽觀音以耳觀謂得觀聽真竟被耳眼
瞞瞎却觀音耳聾却普門眼萬法本來空蒙頭都
不管君不見大藏五千四十八卷第一句如是我
聞無著處

春行

百舌梢頭一半春日長無處着閑心推枰競欲投
機早結昵誰知用意深梅子胚胎鹽裏味桐花擺
布蜜邊陰東臯西崦行幾遍軟脚跟躑索酒斟

田家以二月二日晴雨占穀價枕上口
占

葛根已盡麥方青延頸東來米價平怕聽三更三
點雨要占二月二朝晴

敬和 老人青梅

雪水迎風細作鱗青青又是故園春只知和鼎非
凡子豈料升盤有苦人還我核來機轉熟寄

去意猶新側生底事搖車頗空作漁陽一點驚

社前一日點檢山房用呵字韻

不論塌板與婁羅判却風光展齒磨老柳強顏翻
拓跋新禽滿意奏娑陀山如欲雨何妨住僧不能
禪亦足多須信斯文天未喪龍蛇虎豹底煩呵

同日次韻可庵

夢破巫峯十二鬟家山逸駕尚容攀桃花見面東
風裏應笑陳人老上顏

長寧高守定子見寄用韻奉酬

呼吸東風養姹嬰翰林非主墨非卿吾身元與三
才並此性須存一點明盤谷釣鮮深復窈羗村頃

榼濁還清久要誰似長寧守尚記慈恩惡姓名

陳尉信伯括水傷冒雨下朱陀出示兩

詩次韻

娑竭寶藏移列缺雲氣從平地決爲壑殲人銳於
鋒豐年變菜色樂土生愁容須煩霹靂手左耳剝
乖龍

陳編貯山房故事追康廬欲共天下士讀盡人間
書多君弓刀來發我金壁儲山靈似不分震雨翻
河魚

中春中澣後一日老人挈累下西市寓
舍越三日某行感而賦詩呈友人二首

血氣危頻復頭顱老數奇家如緣角鼠身是脫筒
龜草樹春離列雲山晚蔽虧意行隨所到不必問
何之
吐氣韶華裏關心曉哢邊鷓鴣天性在杜宇世情
然怒笋和泥煮殷花蘸乳煎湏君來共此已辦杖
頭錢

族叔疇甫老死於場屋人共惜之其子
得瑞梅於園實三而花一花十二瓣碧
色其遺文發祥歟老人爲賦詩敬用韻
乃翁抱璞售無媒去作修文地下魁換骨法從青
子得返魂香自綠陰來詩書根氣表無盡清曰源

流慶有開十二循環花瓣異信知天理有時回

鍾太君挽詩

護額錦裁帕扶腰珠絡衣幾回呼使進盡日醉言
歸徑古梅成蔭堂深桂合圍重來無復拜春色黯
斜暉

鍾雲叔挽詩

秋隼風神聳春雲筆勢奇人情方共屬天理竟難
窺哭子零丁母啼耶姪姪兒落花飛絮急行道亦
傷悲

羅解元震龍母胡氏挽詩

三世不異爨一明皆力書此風今所少他行特其

餘藻錡明疏牖萱窩護碧除春光元自在遺夢香
安輿

水牡丹

都人呼為雙魚花禁中呼為紫袍玉帶花

魏紫潛緋真正紅天公不管老東風紫袍玉帶雙
魚掛猶把闌珊造化功

東山塔影

相輪高插碧霄寒好是如如不動山弄影翻光顛
倒轉微權只在隙窻間

東西山二首

西山許邁無人問只說東山有謝安富貴光明
賤晦世清從古兩般看

折屐碁邊情少矯指鬚竿畔淚難乾何如拍手招
元放玉室金堂深更深

敬和老人寓舍

鄒不辭三徙滕何愛一廛典衣寬酒債乞米續炊
烟勝敗供飛電虧成付響泉東山時撰屨花底弄
潺湲

午困

故人書斷故山離義重惟窮到處隨無米留中元
自杵不蠶鬢底却能絲消梅乞與嘲鹽貴苦筍烹
來惟暫遲亡可柰何安若命午窻羸得睡便宜

并賦二首

誰爲風光管合離綠陰芳草日相隨此身百丈竿
三峽吾道千鈞繫一絲力戒盪舟君子适志期
圃小人遲平生客氣消磨盡醉固佳哉醒亦宜
一出俄經震巽離盈虛消息取諸隨盆栽齒何
時藕簷掛蜘蛛盡日絲左城右平塊夢遼東
崦杖藜遲稜稜瘦骨蕭蕭髮恰與黃冠野服宜

題李杜蘇黃像

金鑾天子如天大九萬里鵬容幾箇尋常溝瀆蝦
蟬過紅錦宮袍空着破故書收拾歸去來倚杖斜
陽唱誰和

右太白

風雲慘澹豺虎鳴日憂無飯仍無酒秋來東屯熟
八九舉家歡呼拍銅斗老夫欲釀兒欲炊老夫
醒兒怕飢商量不下撚斷髭歸與汝母折衷之

右少陵

黑風撼海晨烏青海恠出沒雲濤腥矯首獨立天
冥冥保一以靜吾清寧椰冠野服雙鬢星抱書自
隨妙娉婷眼寒海南蜃家丁

右東坡

神爲駢駢氣爲車秋雲扶踈春風腴湯餅睡起茗
椀須意往獨與奚奴俱奴低頭笑公放懶不著書

右山谷

普照僧生雲軒雲閑閣

巖芳歛空華谷響答虛牝坐看白雲生會得無生
忍

雨來山出雲雨過雲歸海悠然天地間得此大自在

夏至過東市 二絕

插遍秧疇雨恰晴牧兒頂踵是升平
禿穿犢鼻迎風去橫坐牛腰趁草行
漲落平溪水見沙綠陰兩岸市人家
晚風來去吹香遠款款冬青幾樹花

和黃伯淵 閩人見寄 二首

流轉風光不暫違等無地角與天涯故人書到幾
青孖生面客來時紫芝窮裏埋頭傾啞酒涼溽
手應盲棋寂寥簡短君應笑郎罷吟詩因和詩
錦柱西頭始識君便期聖鼻着風斤餘甘到底有
遺味蒼蘆本來無異芬忽忽又弦涼榭月亭亭還
合暮山雲玉泉道士窮於我也買新鵝約右軍

敬和 老人覽鏡

西谷柴車手自巾風吹不到庾郎塵回光返照千
江月復命歸根一點春永晝同窓陶處士涼宵專
席竹夫人徐公好醜渾休問認取青銅鏡裏真
又和憶可庵

耐翁流慶徧仍來隨處承嘗薦筍苔但認白雲飛
一點便勝黃犢走千回屋山早露相梨熟墓道秋
風菊桂開父子相從歸展省豈無野水爲添杯

次韻夏日

秧青水白四郊同召雨無煩訪守宮槐葉煮青
市俗蓮花搗麴稱家風過從久謝三千客嬉戲長
娛七十翁已是太平農圃老更揩兩眼看升中

敬和 老人荷花

紅紅白白兩般栽淺淺深深一氣催但愛透從清
水出不辭脫自淤泥來隨花着蓋相依立聚菊爲
房忍壁開妙潔色香無間斷床頭更撥洗兒醅

鎮越堂辭

仲舉建

氣佳哉兮鬱葱文五色兮虎龍江胥杵沙爲馳道
兮海若歛潮其下風前羲舒而後翳隱兮軫獵來
自東孕泰和兮諸馮煽炎暉兮沛豐於平秦望禹
會其宇內之鎮兮詎伊越之雄堂兮堂兮宜其眇
翠閭而羞丹蓬

西庵晚步

荷披菰折似秋嚴萑草叢中菊露尖只有木犀荒
不得嬾蹢躅窳上亭簷

次韻七夕

弄巧拙逾甚合歡愁轉多擘金盟似海搔玉

河天運真旋磨人生特擲梭身閑涼月好且與醉
無何

蜘蛛

已迫斜陽欲墜時謀身只怕脚行遲縱橫籠罩大
為網首尾經綸渾是絲腹飽飛蟲肥似瓠喙二毒
螫利於錐朝來猛被兒童掃不放簷牙一點遺

晚徑六言

促織聲來竹裏凌霄花上松梢清泉白石心領野
鶴孤雲手招

中秋

要看中秋月須交夜半時當中朗朗直下淨
離地只餘風露天何有斗箕虛靈昭徹性開眼終
人知

敬和 老人石菖蒲

西風擺脫絡頭絲蓀壁爲家不問著分得九華煙
雨壑種將五老水雲芝戟髯灑灑精神健劍脊稜
稜氣骨奇窓外幾多凡草木爲誰張王爲誰衰

又敬和還家自喜

溪山魚鳥識車塵風日溫明試小春黃帽青鞋安
樂法芋魁豆莢太平人接籬倒著情懷放蓬沓逢
迎氣味真兒亦夢牽潭上菊和香細嚼勝猩唇

又敬和還家

衰家知似狗三子望如狼過盡燈花影空餘汁竹
看菊肥人自瘦髮短慮何長霜蟹新筍酒由來苦
易忘

次韻臨安趙丞時承讀紹運圖

燧農以前疑傳疑理耶亂耶難盡知唐虞三代號
極治說着已是令人悲古來神器付有德人心天
命何容私使朱與均不豚犬亦家天下如啓時乾
尊坤卑大分定孰陽爲耦陰爲奇南巢牧野可自
誘爲民噓寒濯其瘼後來龍虎戰劉李大氏鷗獺
驅秦隋杯羹分我弗暇顧肯與兒女同車馳晉陽
宮監計可劫機穽不管爲天窺中老翁虬髯

冷看世變從旁嗤當塗典午夜負耳南北五代
攫之螳螂黃雀迺相視誰肯帖耳甘伏雌日月出
矣燭火熄此殆天意非人爲所嗟患失長樂老東
家浙米西家炊榮華富貴風雨過但見金椎控人
頤君侯讀書眼如月坐閱滄岸隨舟移詩成索酒
洗磊砢通德裙帶紅榴垂

洗研

自洗洮州綠閑題柿葉紅一塵空水月百念老霜
風鈍菊淒猶蕾顛桃艷已叢幹流千萬變誰實主
鴻濛

贈俞次孟

古屋無過客新涼得可人爲回黃轂棘同飯紫輪
困杜雨初華稻秋風未老蘋扁舟茗雪去詩料正
橫陳

己丑新年

幾度椒花頌歲朝今年心事最蕭條官雖有路猶
窮轍住豈無家却寄巢金盡床頭顏易改樽空座
上客難招一般獨得便宜處病裏逢人免折腰
猶未平

病起獨步

病將春到眼慵開只爲梅花猛一來何處琵琶推
卻手舉頭啄木起林隈

荅請事簡

臘雪如席麥苗肥春雨如膏菜薹賤寧令前壁打
後壁不將熱面塌冷面

寓事六言

飽驚避弓橫渚驚鱗透網平波一段春光搖曳幾
雙靜眼摩挲

次韻西山

山深莫道得春遲雲漏晴光已大奇夾徑幽香吹
艾納隔林絕豔點燕支一川遠近迷漁屋兩市東
西認酒旗錦野着亭坡老後曾來可惜獨無詩

次韻遣懷

不用憂春雨時來百草芳
貓頭肥可甬雀舌嫩堪
雲鄉
囊舊酒聞香烈新詩索味長
櫻桃空落去吾老白

挽元寂王道士

盤隱早具眼栗齋仍點頭
豐碑俱好在爛醉更何
求院靜桃開落林深鶴去留
條然風露表無處覓
青牛

古意

條風從東來習習振枯槁
美人倚窓閨別思忽已
早兩句夢中得昔爲連理枝
今爲斷腸草雞號天五更
髮白不待老

中春望後一日登玲瓏

出郭暄欲暑涉林清自秋
步隨目力高身與山氣
浮飛來辛夷花拾得蓮葉舟
一聲提壺盧四顧叢
薄幽詰屈九曲屏突兀十二樓
泉流澗級峻雲起
峯陰稠左摩紫髯兒右拂蒼鱗虬
牽衣憇更好擁
策登三休上呼笙簫侶下瞰錦繡州
豁落不平事
消融無涯憂太極浩初判此山鬱相繆
幾人記曾
來老苔蝕凋鏤玲瓏聽我歌
歌徹玲瓏愁有酒且
湑我羲娥雪人頭

夢語

塵尾御憤轅竹枝招羊車
意足各人眼心合無天

涯寶扇閑草蟲碧衫涼暗花茶蘼金沙底清歌按
紅牙醒疑不是夢夢到故自佳

次韻安羅花

摩耶樹老無多子天女花妍有許般莫把東邊枝
便斫堂堂留與碧霄干

讀漢事

病禹逢沈鰲酣參事懦盈陰陽眠燹理天地醉財
成河嶽瞞騰立義娥斃楚行無人能喚醒作意造
升平

粥罷

昨朝隣家飯疊俎肉暨魚今晨自家粥單簋筍與
蒲不爲昨而膾不爲今而臞面前有豐殺此腹只
自如所以顏氏子簞瓢靡求餘

識字行

識字不用多識多反爲累結交何用深交深或中
棄紫微有君房郎將得賓王曾無半點墨七襄亦
成草粟姚新賓客文園舊婦翁雖非平生驩冰雪
生春容勸君五車不須讀瞑坐蒲團養雙目作雲
作雨手翻覆有時爲好丈人屋

散策

窈窕薜荔徑勃窣瞻蔔林六出無他香御此衆綠
陰低頭拾探梅齒老酸不禁仰看栗鼠度危梢與

雲侵百舌巧，膝煩時過聲。自沉搏黍晚，得意睨睨。
流好音，水旁兩三家。煮繭矮屋深，午忙不暇饁。荷
鉏歸，藁砧夾橋女。蘿密趨塢孫，竹森仙人左。元放
拍手東西岑，一氣地依天。萬事古猶今，溪山豈不
好。感槩霜蒲簪，前乎千百年。有人獲我心，後乎千
百年。知誰同此襟。

花獅

雪氍毹，五侯家。飈知親翰墨，妍渴來趨研。飲飽去枕書，
眠弄影窺清鏡。收聲聽素絃，最能持大體。鼠輩任
便儼。

老人賦鄭賢芝隱樓敬次韻

鵲經心，談在鴻寶肘。方全爲問春，稍首何如夏。疊
肩樓居高，進月園涉細。疏泉學得種，芝法疑君少。
稚川

又敬和寓舍

借得盧仝屋，數間不爲太窄。不爲寬，曾中鵬背三
千里。膜外羊腸百八盤，薜荔水中標本遠。菖蒲石
上見花難，麗茶糲飯隨緣過。等作湏彌芥子看。

除妄

酒泉能醉麼，飯顆免飢不。萬事得如願，一生應莫
愁。涼風高放鶴，落日倒騎牛。諸妄冰消盡，吾師馬
少游。

晚涼

樛枝陰合翠重籠曲曲斜斜石徑通窈眇蟬聲綠
獨繭爲渠立盡晚來風

迎秋

熱不能堪又便秋天公底暇與人謀形容如許馬
非馬氣力幾何牛戴牛勃勃松梢雲片起琤琤藕
葉雨聲留新涼收拾歸歌板鈿合金釵萬古愁

敬和 老人盆池

埋盆作沼野人家數斛山泉拍兩涯人立晚風涼
似水荷浮香氣勝於花蛙聲恰恰宜飛雨驚影依
依欠落霞齊物逍遙無大小不須煩惱髮生丫

喜雨一絕簡趙丞

龍公有眼識英材好雨隨聲喚得來酒面添如日
水蒲眉頭放與稻花開

古樂府用禮禪滅翁韻四

黃金絡頭五花馬櫛葉無風雪蜚野仰看飛鳥命
中之好芳儼芳誰似若上蔡門望夷宮往事了不
省引白春蒲容嘯笙坎鼓踏雪歸馬蹄不記來時
蹤

右公子遊獵

河水湯湯公母渡爲妾言嗟未力公渡竟不疑雲
昏風雨寒波深蛟鰐飢二十三絃悲復悲黃鸝不

雙鸞獨飛

右公母渡河

桐春華竹秋霏蒼梧雲深人未歸烏八九子恣飛
啄夜半飽啼山月落鸞驚引孤雛腸空羽毛薄爲
言增擊勿作遙吹參差兮共飄飄

右鳳引雛

羽蕭蕭鳴雛雛江南江北秋思同秋思中人無避
處風酸月冷江流去鴈奴亦良苦群鴈不我馮夜
深炬火滅復明舉網拚盡蘆花翎

右鴻鴈行

槿花

生啖蔗何妨晚栽槐恰待榮偈成投筆去天闕暮
雲橫

挽銅里葉提點

養性居士白用心承事黃春風花竹墅秋雨鱸蓴
鄉簡淡超真諦廉平絜義方誌幽無長語手墨粲
琳琅

徽州葉司理送冬笋

凍雪晴邊白柄鐙浴泥扶出錦綳衫定知王謝家
苗裔風味生來便不凡

挽俞景梁

億計橋門士輸君第一籌文爲天下樣行與古人

謀磨鐵素心在注金蒼鬚休梅邊清絕夢誰更酒
扶頭

用韻答厲輔卿二首

坐窮無過客失喜得吾儕
材逸類淮海詩清如簡
齋山明知玉氣水涸見霜涯
期子進此道爲親生
好懷

南北錦一住東西巖屢登
報春梅有信送酒鵲無
憑之子能相過詩名不浪稱
漉冰烹小鳳爽思爲
渠增

敬用 老人功臣淨土院韻

髓腦供祠寺膏肓倒井閭
岸隤猶畧約塔禿只夫

章外伯妻孺人挽詩

婉孌從君子青雲遠大謀
樂羊燈火夜李侃鼓臺
秋露烏鳬迎喜星機鵲送愁
誥花紛五色光動九
原頭

東山懷謝傳用禮滅翁韻

金堂石室舊徜徉被髮依然下大荒
月送嬋娟華落藥雲移縹緲濕踈篁
栢伊箏外深情酒幼度棋邊定力香
往古來今開闔眼樓頭吹面朔風涼

山中菰生米父老謂豐年之祥用子有韻

秋風菰黍黑山崦罕聞之產瑞
搖銀海占豐麗王

池苑荒穠合穗裊裊糝分枝却憶官張望嘗新薦
一匙

初霜

庭下曉來霜
孤頸芭蕉折
絡石瘦
菖蒲獨抱青青
節

九州山僧房

路突亭依石林凹
渚見沙嶽危幾岫
巉深蔚似琅玕
客勸驚寒思僧閑
忘歲華兩窻風露
影一樹枇杷花

挽俞致政

德藻父

涉世萬緣薄
愛書雙眼明
身從平處立
首向拙中

露徑風籬取次芳
朝榮暮悴付流光
一秒朶朶江相續
比着人情大段長

用王司理

垠韻送別二首

耳衢方四十
滿謂乃翁如
爲底澣洗藥
依然城旦書
光塵風物裏
消息事情初
東起東西玉
功名富貴餘

蘆花秋撼撼
征思旆悠悠
歌吹莫愁國
鼓鏡熊繹州
胷竒空盾鼻
膽雋落旄頭
儻有西風鴈
頻書老故俟

挽鍾孺人

夫安姑嫜老年芳
鑑珥新孤峯
晴後雪頭果剝中

春命義生無媿言容死未陳西風吹拱木雙劍合
龍津

挽阮宣義 逢原父

夜氣精神飽春風笑語酣脩篁森道北叢桂郁城南
雨露榮三釜煙雲老一龕龍岡阡上路秋思薄
晴嵐

獎菊 二絕

木犀蒲送第三香交割秋光與後行細雨斜風籬
下菊安排青藥做重陽


菰葉離披藕葉欹精神得以未秋時西風坐斷
芳路不屬黃花更屬


須窈窕先燕夷猶帶不魚醉歸天欲雪好箇招
梅圖

石斛

蚱蜢髀多節蜜蜂脾有香蘚痕分磔何蘭穎聚珠
琅藥譜知曾有詩題得未嘗瓦盆風弄晚披拂一
襟涼

平齋文集卷第六






平山文集

七之九

内 閣 文 庫			
番 號	漢	10277	
冊 數		12	4
図 號		3	1



国立公文書館
National Archives of Japan

原本の文字など不明瞭な個所があります。

綴じ部(喉部分)の文字など不鮮明な個所があります。

平齋文集卷第七

詩六

庚寅元日甲子晴

聖君元命是元正三素雲開甲子晴不識姓名農
圃老相逢便與賀升平

元夕

輕陰不隔團團月遺俗猶傳緩緩歌踏雪看燈知
不惡宜春釀酒恨無多

水仙蘭

水仙瀟灑伴梅寒鴻鴈行中合數蘭七里香花陪
隸耳涪翁醉眼被寵瞞

燈歎

坐久燈欲乾倒檠巧餘瀝點滴能幾多燼滅在漏
刻可以觀養生精洞神氣蝕豈伊半圭茸能續踵
後息可以觀爲政歟苦生理迫豈伊數匙糜能起
溝中瘠嗟哉秋晨禾葉葉含露液毋使曠就槁而
望一溉益

對門

兩絕

對門三日罷晨炊無處傭身老畫師安得化山爲
飯顆大家鼓腹太平時
一簾霏雨暗花朝焙藥爐邊擁破貂深坐不知生
麥信喜看黃液上瓶焦

禽語

脫却布袴博米歸崗泥滑滑行苦遲打麥作飯知
何時阿婆餅焦涎蒲顚更願春蠶一百箔賣新得
價絲貴樂葫蘆沽酒和家酌免教竈婦嘲姑惡

讀元公輔傳有感

公輔溪壑慾胡椒八百斛若比梁冀大是廉幾甬
珠璣幾車玉三十萬萬無厭足我 宋從來相用
儒國肥民飽却家臞田園圖史論貧富鼎鼐樓臺
辨有無嗚呼哉鄙夫嗚呼哉貪夫

示諸兒

老人四十年前示兒長詩豫章實佳

木尋丈早異衆匠石雖未顧終解作
梁棟社櫟大蔽牛不資世所用棄置
成散材歲久即空洞誠由天所產亦
在德者種吾兒豫章流卅角不好弄
經訓雖未通數過輒成誦只今十五
六舉止頗持重仰賴師友功綴緝成
賦頌積絲未盈尺粗喜入機綜胡爲
不自量將使應鄉貢文場倍千數仁
者豈待中而子於其間燕雀雜鸞鳳
鉞刀未易割庶可供一闕造物果何
如往往形吉夢天其勗我心勿徒

放縱業貴精于勤耐取曉慙凍文章
實公器妙語世人共歲朝哦此詩洗
酸揭春甕吾家有陰德行矣光炎宋
某今五十五矣敬用 尊韻示諸兒

道大兩儀小身寡萬物衆此心能砥柱斯文即隆
棟書從羲孔來字字濟世用愈窮理愈邃如探無
底洞有書不勤讀惰農失春種如何望秋成箕杵
日簸弄一經勝贏金萬帙供洛誦所願器業進增
益門戶重兒童悟易玄奴婢曉詩頌而況以士名
經史懶條綜古來天目下誰識三歲貢吾翁破天
荒教子期命中顧我肋已雞望汝毛猶鳳詩書氣

脉續聲價天壤閔母學韓家符燈火照睡夢母學
陶家雍文術付遊縱光明發勤苦奇雋出餓凍四
壁瓢腹空一檠鰲脚共人情易喘筒世事難弄甕
努力須青春三陳與二宋

春行

花信雨擔閣睡魔茶破除朗吟搖矮屋徐步逸輕
車鳥語向人密交情隨事踈紛紛何足問天地一
蘧廬

次趙保之清明即事五絕

餅喫紅綾空復憶錢分白打底曾知推排風雨清
明過只有梨花三兩枝

草草携家去踏青舊阡新冢紙錢輕觸懷易作中
年惡羨殺兒童笑語聲

花信東風第幾回蕭條門巷老蒼苔漢宮儘有新
鑽火無分傳將一點來

看花何必只長安到處韶華總一般可是家貧風
物晚郎當蒿筍闢春盤

擅春正是海棠時賸爲新晴準備詩潑火雨來還
有信崗南崗北竹雞啼

九華葉子真賦汴吳兩都極陳治亂之

原仍有詩用杜遣懷韻見寄因和酬之

於皇永昌陵食龜大梁都坐控天下樞卜世周

鼎俱聖賢六七作
夷夏同康衢
懷煇玩積安厝少
忘細娛
黼京相與樂興亡
視如無元氣付一錮膏
血供百瀕但知羨富貴
金珠潤黃壚
豈料醉夢中
蠱瘵生華腴
淒風暗離黍
斜陽渺煙蕪
空令老忠
簡渡河死猶呼南來吳
會雄北望汴水枯
迂續赤
帝脉羈縻黃頭胡
楚蜀壯襟帶江淮
豐灌輸以此
圖中原所嗟欠謀夫
平園舊賓客清燈耿寒
爐搔首宿感集拊髀流
光徂理亂有成鑒天高
不容呼擬古賦二京舉
一通三隅謂墮狗監舌
寧老瓜芋區誰能齒臯
朔俳優雜星巫芙蓉歸
去來月落長庚孤

暮春即事

溫明好天氣
猛憶湖山遨
平堤到處柳流水
誰家桃搏竿
選勝檻笙歌
喚輕舸百需不移具
一醉何庸逃
膜鼓着日緊
紙寫得風高
買歸不論價
矜詡相爲豪
迅畧畧兩眼柔
颼搖三毛
鬧裏夢已破
閑邊趣方牢
摘桑暮西崦
浸穀朝東臯
病來飯即藥
客至茶當醪
雲煙面目稔
荀蕨氣勢麇
腰頑渠稱鶴
脚硬難爲鰲
吾非東山謝
亦非華陽陶
泊乎潛溪
潛萬事隨所遭

次韻閔飢

兩絕

貴人生長不知田
絲竹聲中醉飽眠
渠信春山青

草盡排門三日未炊煙

巷頭巷尾幾夷齊日爲飢腸不肯西只願天公多
雨粟便教米價賤如泥

茶笋病

蓄金初出焙板玉又登厨爲愛頗車雋做成風骨
臞黃婆幾倒盡姹女得安無快意宜知悔清標不
忍孤五兵生厚味寧作病浮屠

口占酬俞端叔牡丹

沉香亭北夢魂賒驚見祥雲七寶車窮孟嘗君空
好客病維摩老不禁花

次韻何伯溫三首

庭前木蘭花皦皦扶春陽鶴鳴夜漏午步花獨歌
商低迷露濕衣浩蕩月滿梁深省渺誰語中心空
自藏

出門夾徑松春盡花滿林氍毹塵尾黃裊裊雲氣
深仙人左元放騎龍夜相尋飯我花杪露實腹虛
其心

銅瓶一穗蕙芳潔以自旌相看色轉睟未言意先
傾脩如鄭子真聲名豈其卿明窓細披挹心空氣
和平

山鄉

石田礲确萬山隈逢着荒年更可哀盡日幾人擔

米上長年何處得錢來扣門強貸刑難追閉戶清
飢死又催不是乾坤芻狗汝要令箇箇學顏回

錢德成山水

亦有黃金埒非無瑞錦窠養蒙知趣早觀復用功
多嘉客賁場谷碩人槃澗阿時平風日好花竹幾
行窩

壽程宰 三首

作縣如弄潮莫吸半呷水紅旗上岸來喝采沙河
市拈取第一籌細柳天風裏

愛民如緣竿百尺頭進步未到百尺頭努力笑回
顧當場萬人看亭亭碧霄住

回翁十日前先脫老鶴胎拍手浮玉頂君騎鳳凰
來相逢說長生一笑榴花開

曉出

一雙杜宇青天月兩點烏捷白水陂不爲好山勾
引出那知已是插秧時

行臨安縣圃

縣勢坡陀樹老蒼山光明潤客荒唐木蘭多露不
能濕蒼筤匪風還自香萬事婦姑鳴好醜百年翁
仲領興亡九龍堂裏隨宜酒盧橘來禽日正長

寄題永嘉林氏真意堂

萱草逕庭寂橘花窻戶明我惟天地性物自古今

情元酒無窮味朱弦不盡聲道從涵泳得寬作讀書程

荅隆慶李守稿

萬里一天碧百懷雙鬢秋淒其占後會展也企前脩風露昂藏鶴煙波浩蕩鷗書來如覲面香蒲藕花洲

東山次俞紫微止止堂韻

佛法元無法人謀盡過謀說空猶是着領妙更何求徑滑松杉古窻虛水石幽琤琤鳴鐵裏安處一時休

繡觀音酬郢州王知錄丹青美人之贈

兩絕

楚人不識女湏面只畫昭君并莫愁贏得江南窮相眼自嗟空白一生頭

十相端嚴具足身一團楊柳淨瓶春石城莫與蛾眉看羞不如人却妬人

乍涼

一雨添一涼秋近暑已遠菰荷響騷颯忽其歲年晚悄悄我所思室而偏其反燕乳巢未空蛩吟枕先蒲涉非忘淺深飲自知冷暖黃姑與織女隔河送悽惋南金英瓊瑤不換霜鬢短

好箇牽牛織女天。淒其獨夜不成眠。柳家細婢何
能問。太尉麗人祇自憐。比翼難磨終古恨。嫵眉未
了宿生緣。新涼如水誰消得。平等天公也解偏。

秋思

一曲玉連環。十分金屈卮。故新相代謝。底用爲秋
悲。

寓興

巨口松江鱸縮頸。槎頭鱖一醺。聊復爾百懷。故依
然林靜。橫沆瀣。庭空澹。嬋娟鳴蜩識人意。切切悲
流年。最憐重開桂。抱寒爲人妍。

阮亭甫壽樂堂澹庵各一首

孤塔明橫嶺。短橋華枉渚。結堂水石邊。奉此清節
母。菊能駐顏景。松下蔚可數。豈能忘百憂。竹間粲
欲語。日淡迎春風。雲薄謝秋暑。板輿穿蔭來。綵袂
踏花舞。點頭每一笑。彈指忽千古。盡將栢舟淚。灑
作蓼莪雨。倏然其若存。青山照庭戶。

右壽樂

江西老澹庵。高節湛秋水。君庵亦澹名。聞其風興
起。一徑窈栢竹。八窓秀荃芷。意行襲幽芳。燕坐鑑
碧沚。銅爐古鍾磬。瓦研素屏几。玄根息芸芸。泰宇
安止止。大羹及元酒。不入世人齒。床頭周易在。更
與參妙理。

右澹庵

秋懷二首

素節垂垂杪衰懷拍拍叢風乾梧葉白霜老菊花
紅理曲多添瘦停詩不減窮出尋空闊處揩眼送
飛鴻

鸚鵡琵琶恨融歸十四弦撥寒紅玉笋拍暖繡金
蓮梅影春風裏茶聲雪水邊自憐還自笑星髮照
嬋娟

記夢

青天一朵雲起東斗黑怒雨驟玉龍江頭共子十
七八喚出八十老龍翁龍翁擲珠引龍舞女子竹

蒲雙頰紅天風吹動翡翠佩騎龍直入蓬萊宮

山行紀事

至節後兩日侍 老人訪岳林精舍
晚過真君觀小飲還宿澄維那房廡
明登九僊山晚取道陌上花里而歸
徐雲叟鍾冠之崇之偕行男延勲侍

扉開日華早路轉霜花鮮遊鴻得嘉客健鶴隨老
僊舩艣野渡淺畧竹孤村連紆餘盤龍外杳靄烏
猿邊麥畦破凍剗稻架烘晴懸萬鴉暗瀕洞隻鷺
明嬾娟寺古繚虛嶂房深貯澄漣珍鱗紫金眸秀
石蒼玉孿住僧自縛律愛客能逃禪老帖不容塌

枯琴尚堪弦出訪文舉碣還息維摩檀窓暉梅枝
月帳鬱栢子煙吸清飽蟬腹擁薄攢龜肩忍寒如
忍艾望曉猶望年報明翠鯨壯送暖紅麟妍讀易
坐方穩搜詩去俄翩行行晉縣壘歷歷吳墓田森
峭徑絕壁嵌空派危泉飛墮雪珂境撼動冰輪閣
天憇寂小養雋挾酣急凌巔閣摧失傑詠巖在餘
竒鏘夕氣生遠嶼勸懷寄平川路旁柳如此陌上
花依然數年束強項一日舒聯拳大千自鵬鷃方
寸皆魚鳶東風染芳碧更着尋春鞭

和何伯溫見寄二首

問字無人過草堂昨非今是兩俱忘鶴何翫麟寒
方警梅許淒涼靜更香萬古江山窮太白一簾風
月老張蒼多君不作炎涼語識我平生鐵石腸
青山流水曉葱朧讀遍黃庭萬境空羔甕無緣澆
舌本獮屏有分護頭風人謀歷歷既未濟民力班
班大小東陶寫此懷湏好句殷勤時與寄來鴻

和子有感時

八州都督新推轂兩紀中書舊覆甌郿塢然齊如
有策聊城飛笥便無憂

時逆全作過

歲杪用韻二首

日月磨心緒風霜染鬢華曆看新歲草梅憶舊年
花濁酒供僛舞清歌應摻撾阿咸多事在猶問老

生涯

黃麾春簇仗夢不到東華瓦研磨冰葉埽爐煮雪花窮甘猿帳卧老勸犢轅撾凍解光風轉晴波拍兩涯

元宵前三日侍 老人遊雙林

大徑山高寺山巔小徑山深寺山趾辛夷花開數點雨艾納香空半泓水新新故故自樓閣下下高
高各窻凡二三名公詩一束八十老衲畫幾紙雲
岑滅沒野屋浮草樹離列渡舟橫露橫斷浦月已
高日落平沙風欲起直疑着我江湖間安得半
巖壑裏魚肥尚恨絲蓴晚酒酣苦愛菹筍
有句隨杳靄更上迎暉亭徙倚

謹和 老人明朝中春 二首

田夫野老布長衫郊外相逢與共譚一把年華將
望六九分春色又過三竹雞絕叫茶生笋梅子微
酸酒熟藍流轉風光無間斷此身元與化功參
淡黃深碧上春衫無限春懷豈易譚隨手去來拈
放一到頭得失暮朝三日烘花氣通玄牝雨洗山
光漲蔚藍熟聽五更晴哢好不須多恨罷朝參

春行次韻

拂開芳草碧坐斷落花紅世味觥籌外年華帶眼
中六州空鑄鐵萬物任爲銅有嘯桑疇雉邊時會

長雄

病齒

吾母苦蚤衰髮霜齒存幾小兒得其髮大兒得其
齒予方四十時上齲右車毀從茲白石源歲歲費
經理軟疑梅着酸踈類榴墀子根浮觸易元力弱
遇輒靡懷核忌堅栗設齒便脆美爛包故自佳急
嚥聊復爾刺肥劇鉏茲剔纖難拔壘屢搜風屢入
一快勢一圯撼搖腫貫顙焦蠹痛徹髓外雖編貝
然中實空齧似赤龍攪沆瀣玉池漲清泚天鼓弗
能扣金鼎亦徒舐乳媪老不羞機女少自喜風流
久已絕血氣安足恃磨治朝辛鹽漱漑夕莎茫庶
幾尚扶危不至遽乏使太官羊何腴五侯鯖更旨
雖無棘金嗔未免媚竈吐菽腐柔赴挾栗糜滑流
匕不愁餒在中却笑飽欲死舌以柔故存此語未
敢唯

春思 三絕

柳汁何能染鬢根柳絲只解絆愁魂年光有底催
人急水牡丹花又上盆

細草荒煙古墓田知經寒食幾年天雪條花下翻
翩紙疑是曾分白打錢

蝴蝶深深淺淺黃被春惱得一般狂打團飛入菜
花去自信世間無別香

偶成

沂水春風弄夕暉舞雩意得詠而歸爲何與點狂
曾哲箇裏須參最上機

三月晦東山

太皞明朝禪祝融杖藜能送幾東風兩崖蘿蔓因
綠一樹桐華自在紅
聒聒竊脂農即事悄悄搏
黍女趨功細思舉世誰閑得一笑浮圖倒景中

續夢

琉璃庭釵水晶欄寶樹婆娑玉斧閑只恐姮娥嬾
冷落却隨飛月下人間

作茶行

磨斲女媧補天不盡石磅礴輪囷凝紺碧曰刻
桑掛日最上枝嬾蹢躅宰生紋漪吳豎小君贈我
杵阿香葉砧授我斧斧開蒼壁粲磊磊杵碎玄璣
紛楚楚出曰入磨光吐吞危坐隻手旋乾坤碧瑤
宮殿几塵墮蕊珠樓閣粧鈿翻慢流乳泉活火鼎
浙瑟微波開溟滓花風進入毛骨香雪月浸澈湏
眉影太一真人走上蓮花航維摩居士驚起獅子
床不交半談共細啜山河日月俱清涼桑苧翁玉
川子欵門未暇相倒屣予方抱易坐虛明參到洗
心玄妙旨

送程於潛

內首

溪山民物古政理器記寬平易見眉睫明清生肺
肝春風簾影暖霜月研聲寒野老自相語元豐崔
長官

溯紫催飛鳥攢紅簇去鞍吾邦傾市送旁邑塞塗
看清廟登犧象明庭峙孔鸞野翁麋鹿友時與訊
平安

新月

天面如人面昏昏鎮是愁晚來雲色解新月放眉
頭

百合花

日月飛雙轂如何駐黑頭纔看敷薜友又見折
仇葉聚稜稜峭花垂娜娜稠晚涼芬烈甚欲睡雨
遲留

雨中次韻

兩絕

積多雲鶴巖前雨種遍長松墓上田豐歉相乘天
有數今年管取斗三錢
提壺勸飲元無秫促織催機未有絲葉底蟬螀尤
更苦吸風飲露伴人飢

送徐顯道尉無錫

握手不禁別庭梧聲欲秋雲霄生脚底田里付眉
頭敬是提身柱和爲應物舟卷旗蒲柳市茶鼎雨
颼颼

二花

粲粲金錢映玉簪榮華能得幾光陰
李倫歌妓春申客零落秋風沒處尋

理菖蒲

朝刪石上青之黃暮摘鏡裏黑之蒼
胃中多少冗荆棘不翦不芸空過日
君不見顏子一克已曾參三省身
每日低頭矻矻自點檢何曾浪把外物勞
精神嗟乎我猶未免爲鄉人

閑居二首

一覺湯餅睡幾轉庭花陰不作八翼夢
以無富貴心東家朝鳴玉西家暮橫金
芭蕉大蔽牛不奈霜風侵何如老忘得
曲肱滋味深

出門聞鳩語秋思生春妍豆苗深沒腰
稻花高出肩路旁兩三叟合爪感謝天
老身幸不死得見穰穰田眼中多少人
不能待豐年

雙林志廉得元暉筆法作此七十三矣
爲賦六言兩首

近浦霏開略約遠山雲沒招提樹底人家
欲曉隔籬彷彿雞啼

潮退寒洲聚沫雨收春嶂蒸雲歷歷舊經行處
江村曙色初分

送阮深甫
桂東兩首

秋陰疎梧桐暮寒生
蒹葭病鶴臥空谷
遊鴻起平沙
飄搖征衣單
寂歷津堠賒
中年不禁別
湘江渺天涯

一靜鎮百紛
一怒生百順
所居欲官大
此道貴坐進
塗平鞭影疾
風壯帆力迅
臯蘭拾秋芳
好寄南來信

九月一日侍 老人遊洞霄宿超然館
聞鐘

太一相過燭未銷
朝元鐘動鬱羅蕭
身輕不怕瓊臺滑
蹴踏青霞上斗杓

翠蛟亭兩絕

壯杉老檜護嵌空
飛墮蜿蜒白玉虹
莫道隔凡有柱胡
麻流出石砭東

晴雷碾破白雲窩
無數林華袞下坡
好把轆轤翻轉着
崑崙頂上卷黃河

贈石室朱修行兩絕

響泉一派落天風
人在浮雲柳絮中
亭午柴關猶未啓
碧玲瓏底拒霜紅

落葉堆中折脚鐺
白雲煮盡又還生
洞門黃鶴婆娑舞
留得松風待月明

送趙處士遊方

道家何荒唐
釋氏思千漫
君胡欲逃儒
結入揚墨

案時文窘枘鑿俗好厭冰炭起尋出頭路去覓行
脚飯左携仙君茅右挾佛祖粲隨身絕長物到處
得奇觀江山枯桐寫風月老筆判識透心轉空養
足骨自換長生不可獨分寄石髓半

何正言母安人挽詩

鳳采生丹穴螢光聚絳幃兩登黃甲去一佩皂囊
歸萱老悲方切蘭枯夢又非青山秋寂歷安淚不
勝揮

初釀

手曰登新秫頭缸試嫩醪蒲城寒信早栗里曠懷
高重熟魚沾麵微生蟹帶糟老儂元不飲隨處一

陶陶

贈前京東王制屬

赤葉風欲盡黃花霜未乾病添予許老窮迫子能
寒劍蝕蛟還吼袍塵鶻尚盤山東河北事欲語淚
沈瀾

翁媪行

翁頭白如銀媪頭黃如金抵足搔癢昏到明羞殺
敗布多年衾晴窓蟬子懸瀾瀾翁媪相看顏色啓
門前人送撰碑錢半贖冬衣半糴米

哭都城火 辛卯

九月丙戌夜未中況蝨漲焰通天紅曾樓傑觀舞

燧象綺峯繡陌奔蠟龍始從李博士橋起三面分
風十五里崩摧洶洶海潮翻填咽紛紛釜魚死開
禧回祿前未聞今更五分多二分大塗小撤噤不
講拱手坐視連宵焚殿前將軍猛如虎救得汾陽
令公府 祖宗神靈飛上天痛哉九廟成焦土
仲冬二日還自谷川道中 兩絕
晴烟杳靄似春山踈柳啼鴉意度閑溪上麥田翻
未過故遲牛帶夕陽還
蒲天返照醉紅殷未到生明月已彎好是蛾眉無
點恨盈盈淡掃有無間

至節前十日遊勝因寺

霜霽午曦暖潦收沙路晞東山知寺古避客恹恹
稀籜滑涉危屐藤鉤穿密衣月黃風不動燈火虹
去聲 橋歸

謹次 老人至節韻

但見陰陽遞幹流誰知陽本未嘗休善端繼繼無
窮脉元化生生不盡頭杜牧浪將箱勸讀少陵空
爲線添愁何如靜坐觀其復一點靈臺造物遊

至節出謁回 二絕

一脉陽從地底回人情物意便春臺鮮衣稚子面
紅醉知向外家參節來
巧笑聲搖六博盆纖纖人在綠窻根隔紗想見春

風面雲滑金釵欲切痕

病目

日過學不力年催名未芳心期雖皦皦目視已茫
茫燈疊青紅暈書紛黑白行蒲團深瞑坐禪味覺
偏長

椒菊枕

矮檠矻初年細字窘晚節天憐蠹書障神授鴻寶
訣金葩涼而嚴丹寶溫以烈兩囊貯風露半簪藉
霜雪芬透頂顙爽清祛腦脂熱夢魂寥廓遠宇觀
沉瀟澈雲開月更朗電掣巖欲裂術妙刮膜金功
適剗墓鐵聾牙讀楚詛瑣尾窺越絕不憂幻景侵
且喜翳根滅頌花醉春溫餐英飽秋潔塗屋冰
碩飲潭進耆耄況茲芳澤聚盡洗空華結夜氣存
虛明天光發昭晰浪彌能微塵渤澥或丘垤不直
一笑粲已判雙背決

俞提舉挽詩二首

展也萬夫特脩然山澤臞朔風空汴泗春水渺淮
湖籌驛尹師魯詩壇梅聖俞繡衣歸老去有韞不
輕沽

蒼鶴孤山曉黃花栗里秋一身雖物外萬國尚眉
頭遺老幾何在耆英只麼休問天天不語江闊莫
雲愁

奚知縣換詩

敏銳霹靂手寬平雲夢曾雄臺高幕盡劇邑富民
庸帆掛風方駛戈揮日又春炊梁剪春韭無復奉
從容

臈中步月 二絕

平山堂下解圍去天水堡前經戰來天地無情一
般月照人霜骨白皚皚

賣妻鬻子年饑後索母求爺賊亂餘對月椎胸幾
家哭更堪蕭索歲將除

何正言挽詩

蒿手芥拾紫忠肝蒲伏青嬰龍雲氣直縛虎雷三

腥炊枕夢何短書棺名更馨眇然人物幾墓草深
交零

謹和 老人惠山泉 二首

取水驛符到喊山旗信通碾分花底月爐受竹間
風金谷正覓醉玉川誰道窮頂門甘露入喚醒主
人公

第二水泉動斜三封印通愛奇親煮雪得雋細生
風酒肺蘇將渴詩情洗盡窮娉婷須好買供奉讀
書公

歲暮山中記事 三首

南山大小空橫行無常時蓄狗豕豕盡澤吻樵

兒翁嫗起譟逐安屏
竹愈遲力窮哭且罵天網不
汝遺

里巷負暄翁墮然支離
疏鬢虱緣緼袍點綴頷下
須旁人勸翁捫搖手一任渠虱多轉不癢何庸事
驅除

鄉風臘廿五比户然爆竹窮陰挾黃昏霹靂起空
屋梁間鬼拍手笑人未免俗罔兩白晝行渠爾一
爆逐

除夜

市兒數十百挾炬相追奔爭唱賣歌祈以昭易
惜我欲亡如屋幾臘擁敗垣群雛勸我賣急信頭

莫論弄巧或成拙太清不如渾老鐵無孔鎚甘寸
鈍性根

新年

欲識新年課都非舊日圖詞分詩料帳酒奪飯工
夫鍛息柳邊手鑷閑花裏鬚寒消芳草綠打急辦
行厨

謹和 老人欲還故廬

颼颼破屋小青桐客枕頻年寄道周行止非人真
可笑窮通有命尚何愁春風舊壘雙飛燕宿雨新
巢百拙鳩信是還家貧亦好德人何處不天遊

謹和 老人春行

抗疏明時効伏伽一歸七度試春紗柔風綠遍庭
前草細雨紅催陌上花惠遠買來猶濁酒趙州喫
去只麗茶回頭恰恰鶯啼處黃四娘今尚有家

又塔院

僧伽傳法處阿育放光時到頂直無縫透心橫有
枝梅間詩鳳味竹裏酒鷗夷醉上危層去空明渺
所思

燈夕獨酌 二絕

銅車羅帕禁街夜珂傘炬城沙路春少不自強今
老矣落梅風暖酒生鱗

海濤風之卯枝曲江檝波明挑葉歌前獨停車
宛轉不_上白雪映青蛾

送游考功將漕夔門 七絕

溫公一傳諫議劉菊坡一傳吏部游長庚伴月天
欲曉西照太白南羅浮

神鼎一鑄魑魅怖法鼓四震波旬悲祖宗涵養天
下氣留得此脉扶顛危

欲鳴不鳴銜口馬欲去不去羸角羝排天絕叫河
漢裂隻舸飛上岷江西

古來刀鋸鼎鑊具用待誹謗妖言人振觸不怒予
節去惟天爲大知堯仁

金湯棄去七百里珠玉走盡六十州誰生厲階不

可問桔栢江上風颼颼
燒畬壤外竹枝瘦踏磧灘上桃花肥繡衣故鄉豈
不好爲天下計毋庸歸
四肢誰謂可無骨五臟自信難留寒跂子望之不
得語但願萬里書平安

正月二十四日早夢乞聰明於東坡
東來一舸橫天上御風而行無點浪有人野服帽
高簷宛如赤壁圖中樣舉手疾聲呼先生爲我心
孔開聰明鯨然一笑若相語乞得聰明不如魯

老人晚得女真真又曾孫女金華皆再
周而殤葬塔院後今春焚化用前韻

詩謹和

寧波影裏誦陀伽古佛燈籠護絳紗智慧竭羅雖
正果慈悲妙善亦空花怕寒婉孌初奉蔭望雨醒
鬆細舌茶節物感人還自解有兒何用女當家

送澄維那訪舊湖山

梅子酸猶淺桃花豔已饒春風開口吸明月換肩
挑鶴向平湖放猿從古洞招出門天地闊何處不
逍遙

葉主簿挽詩

生理鴟夷子心期桑苧翁行厨脩竹月坐艦落花
風雛好纔孤鳳行疎忽斷鴻吳松明遠目一點欠

陽紅

謹和 老人古硯韻

破壞憨僧衲四歌漫叟窪吐雲頭縮蜃啖月口呿
墓宮嫠愁難捧堂胥怒可撾莫貪濡筆利浪草侍
中麻

路逢徽州送牡丹入都

飛絮遊絲弄霽華出門芳草渺天涯太平莫道全
無象脫繡鳴鈴傳送花

首夏一絕示徐錦囊

金丸未熟櫻桃過錦幄俱空芍藥來共坐晚涼觀
物化末真真酒爲君開

合王仲鈞 兩首

無言安止止不動妙如如暴虎未聞道汗牛空讀
書赤窮遑恤後白坐且求初寂歷野花晚嫣然風
雨餘

老鏡風霜飽離觴歲月悠曲多傳郢水

前郢州司理

詩

亦到蘇州拽轉撩天鼻抽將鬧市頭投林母用急
時至會封侯

次子有下第韻

東風換骨立成僊五色終迷自古然龍變未符今
舉讖鶴來當驗後科緣情如中酒宜親酒命合腰
錢會有錢許買娉婷供半不妨渾

荅駱肖秦

過我葵榴巷留君筍薤厨襟懷新雨快面目故山
癯自笑孤飛鶴誰憐返哺烏未應埋沒得囊有萬
驪珠

初夏即事一首謝俞德遠惠茶

病眼昏花懶讀書閉門恬養冉溪愚一簾草色蛤
呼伴四壁樹陰雞護雛已是歸來何用引本無太
極不須圖小團自汲新泉試涼蒲松風石鉋爐

重午山蹊獨步

扶病索清蔭循林步幽霏花拈勃姑飯草拾蝦蟆
衣良藥何手是壯容轉頭非易補天上漏難駐人
間暉寒暑遞流幹悲樂相因依功名少終吉富貴
多危機李泌語欲咽屈平志空違不如蒲引酒舉
世知我希

平齋文集卷第七

平齋文集卷第八

詩七

觀物二首

飽飯茶甌罷閑觀萬物情
狗加獅立號猫冒虎爲
名故沼慈姑王新畦腐婢榮蟬從何許
變忽送出林聲

薄命天元定深居日轉長
塔鈴空洛度車鐸慣琅
瑤筍長竹還老蓮遲荷自香
羨他雛又乳雙燕勝春忙

抹利

翡翠簾_生雪透肌纖風不動
閑香吹裊回顧影精

神發省得京華識面時

晚蓮

颯然秋入井梧嘶
窓下紅蕖始脫泥
但有意開何
論晚縱無力上不嫌低
魚貪芳影機還熟
蝶怕深
香路自迷更把閑情堅耐着
明年花與屋簷齊

涼月二絕

蓮房折盡只留荷
露蓋班班一丈過
高下橫斜無
定影聚涼着得月明多

金粟安排雨後黃
定知花亦愛新涼
夜深月透玲瓏影
花自光明月自香

挽阮倅

膠庠推博洽
州縣著廉平
人物萬夫特
山川千古英
虬髯橫意氣
猿臂鬱功名
一掬同年淚
西風浩蕩情

挽李丞

篤敬古君子
公平賢大夫
筆端知己有
券外得心無
落日搖牆竹
淒風墮井梧
蓄深施不盡
留與讀書符

和子有催歸

卜廬必擇地
買鄰不論金
出機與入機
去心即來心
拘性臨川翁
罷相老境侵
霜竹鍾山寺
雅寄金玉音
強負峨眉僊
渡海憂患深
把酒陽羨田
歡言

飽甘霖
山月在眼
客屋風蒲襟
欲歸欠生業
隨寓如家
林瓦榷適閑趣
借竹供清吟
俛仰一逆旅
乾坤古猶今

謹和 老人蓮桂 二絕

點破秋光數葉荷
水清時見小魚過
渟涵風露三更足
收拾江湖萬頃多

搗成一百八丸黃
入手能令熱惱涼
金粟如來身已化
蕊珠僊子骨猶香

移居西郭重樓 閏九十八

欲歸未辦買山資
東寄西存漫一枝
樓上起樓渠自巧
客中作客我何癡
崎嶇溪步通虛市
鬱屈山

蹊護短籬不用子猷親
種竹屋頭元有綠猗猗

自和

得寮便住似西資
誰暇安巢更擇枝
閤密不妨中酒聖
樓明大好養書癡
誌公分料存刀尺
龐老家風欠策籬
大厦千間宵八尺
傍人莫笑太窮猗

小雪前三日鍾冠之約余侍 老人行
山舟發後洪入杜塢自鄭蓋庵過閭山
趨翔鳳山菁山徧覽楊墳秀園遂至何
山道場山乘輿薄吳興訪玉湖書院水
晶境界而歸自戊子至庚子陰晴相半
勝處輒徘徊賦詩飲酒俾哉觀也數詩

見後

溪流轉處兩三家落落疎林淺淺沙可是小春風
物早擔頭一束杜鵑花

右長橋渡

止水攪不動好山邀輒來松間寒月晚似欠兩翁
催

右閬山妙嚴院松月堂讀張汪二公
詩有感用無垢韻

鉤輈格磔鳥呼晚勃窣嬾人試寒野水不流山
四合寶華雲裏着欄干

一徑白雲明似雪蒲山紅葉豔於花過溪買酒等
閑事只恐客來非當家

右宿妙勝閣

無雨又無日此行天相之荒園遺木老古隧得峯
奇霜晚蔬猶劒風溫茗已旗行厨何用許勝處可
忘飢

右出閬山

狂暖釀成雨逆風搖斷橈寂談王舍衛悶想鬱寥
蕭遊興孤芒屨歸期數翠翹推蓬占霽色木末散
聲招

右謹和 老人鳳口遇雨

聽雨客無寐放晴山有靈禪關深染翠勳朝書丹

青鼇負摩雲碣龍扶拱日屏真如無盡意石澗水
泠泠

右翔鳳山資福寺

古木陰陰兀老蒼月於疎處弄昏黃巡簷不見梅
花面認得東風句子香
小窓無欠亦無餘一榻脩然雪透膚收拾故書藏
恰好怕人寫入鳳山圖

右宿資福小閣次梁間韻

生前圖形耀凌煙死後起冢高祁連塚樓陰合蒼
官立輦路苔生石翁泣吳人最重十月朝紙錢掛
冢風飄飄積金至斗命可買玉帶貂冠真長在

右楊墳

日高裹飯看何山山缺東南水遶關松檜不搖風
自度讀書聲在白雲間

右何山書堂

何山如幽人道場如大家穰穰衲子脚刺刺騷翁
牙挾雋控寒飈搜光躡晨霞危顛矯窄堵平疇畧
汗邪巖泉跑虎湧徑松髯龍拏鍾梵破深寂金碧
開紛葩脩廊步履峻傑閣望眼賒山勢珮玦轟湖
光鏡奩訝清茗香靄入古弁空濛遮列翠軒名不
可唾群籟無敢譁坐我旃檀林酌之槍旗茶宇定
岫出雲語妙天雨華吾生久墮甌昔遊慣乘差夷

猶廬阜陽宿留岷江涯高曾凌嶠棧卑或搜崖窪
昨夢難磨省此行足雄誇老親八十健閑儔二三
嘉拍浮一葉眇收攬萬景奢富貴上蔡大貧賤東
陵瓜未湏笑落鐸誰能苦鰭沙候門占噪鵲旋橈
趁歸鴉奇事恐沒沒舉詩屬僧伽

右道場山

茗雲超太湖地少天宇寬高低寶樓閣盛之水晶
盤中有讀書廬八窓頻晴瀾衡弁儼相望不受湖
光吞彼美金王人伊吾斗闌干騎鯨渺何許衰柳
風露寒

右玉湖書院懷二倪

繫艇官柳根闌闌得深密日落遠水明雲收好山
出天開有聲盡人立無價壁酒行不湏多鷺下菰
蒲夕

右葉推官無盡景

梅兩絕

風霜搖落都廬盡一點春回造化家萬物成終又
成始湏將良體看梅花
寒根不與物俱陳髀髀梢頭寂寂春却月凌風誰
會得不沾一葉是真身

和樓前梅兩絕

飛香漲艷拍簷牙暖熱樓居郭陸家寶髻盤鴉冰

柱曉倚闌平折北梢花
樓高夜靜月華陳冷浸含章一段春人影花光相
上下定知梅亦解分身

送李致遠安遠簿二首

四海幾青眼五車今白頭信天投矮屋覓地起岑
樓山迥風煙合江平潦霧收誰歟人物計留取備
枚鄒
與我迭知己喜君初得官時來寧論晚身健莫辭
難訪雪牽魂夢停雲寄肺肝斯文元氣在努力好
加餐

夜坐

夜永難爲睡群兒坐伴翁漉蘆冰甕碧撚豆雪爐
紅清誦聽還雋閑談笑又烘安排明蚤供薺長後
園叢

大人和云樓底雪千峯樓頭着寓翁梅
方開萼綠桃已亞枝紅斟淺偏勞勸眠
遲不受烘錦城春在眼何暇問蠶叢時
四川李制置以榮州見辟辭之也某因
用前韻

寄榻高寒地收心懶散翁雞鳴虛室白鴉起小窓
紅古操塵絃拂新詩凍研烘桃梅芳意覺不是去
年叢

洪崖圖行

葉知錄序
龍眠本見清

脩髯危肩老僊人布袍革帶烏靴巾曾中不着半
點塵天地萬象胚暉春扇者橘書者栗瓢者木韁
而掣者葛笠而鞭者拙中間庀然大者雪從我兩
髯三髧一蹙蹙驢何鈍奴何癡前掣後鞭趣使馳
麾鞭愈急行愈遲掣韁欲斷人驢疲但見尻禿禿
蹄局局欲墜不墜止鳴木本無伎倆能噴玉正可
吞聲春草綠先生御氣存其神下驢步行意更真
從渠蹇行拘莫馴超然目送八極轡鳳驂麒麟

歲晏

兩絕

得路隻輪車易上失時獨幅被難眠淡黃蘂飯茅
柴酒東掩西遮也過年

百想卧輪翻伎倆三生圓澤弄精魂何如靜對梅
花坐春滿江南雪後村

謹和 老人賦梅

寄得江南驛信來窺林映水幾枝開形容綺語空
能絮酬荅芳心揔已灰厭舊趨新和粉染奪真弄
假點酥裁紛紛兒女春風惱却笑詩翁醉打隈

和趙保之青田即事

寶犀壓帳春風入渴烏傳箭寒澌滴砉然推枕起
放衙霜月滿庭鳬鴈集簿書顛倒六作五文移縱
橫一取十精神坐照吏姦破政事充從儒術出墨

池霹靂送飛雨積案如山笑譚畢逢迎合爪迎相
賀戒石亭前見天日公餘琴疊舞胎僊客退爐熏
齋繡佛芳蹊桃李不自言舊燕新鶯沸消息詩筒
入手如見面金井新泉生玉色汗青不朽須早計
過眼年華征羽急

臘月二十五夜

角玉懷雪狸膾銀憶冰鱗異哉山澤荒坐我窮鬼
祟兒頭似耶白相對玩殘歲爐寒灰熒熒檠涸燈
翳翳擘柑老赤脚煖酒小青髻一酌佳入蔗再酌
甘勝薺陶然會道妙嗒然司德契吾身與乾坤共
此小關候三百六十節一節一節繫四萬八千息
二息一息繼日月有往來陰陽有開閉太和行其
間周流無邊際膈盡梅紛披春回柳搖曳非時難
強握有命莫過計顏回簞瓢空季路緼袍弊只恐
非大賢公不待後世

送程宗武遊峯嶠

驟暖握芳意薄遊烘軟塵亂山雲氣曉啼鳥杏花
春人物少催老物華新換陳一聲鏗爾瑟沂水綠
鱗鱗

謹和 老人雪晴

雲屏九折跨三休公欲行春雪不愁逗暖流漸鳴
暗谷送晴倒景漾層樓似無似有草痕動半落半

開花氣浮婆餅焦聲林外起便從野渡喚橫舟

元寂宮生祠行上元庚申

間臺珍館嚴鶴林老桂鉅竹籠春陰騎鶴僊翁杳
莫尋適從何來貂插金裳珮丹青雜瑤琳旗旛繡
綵薰甲沉蕊函三洞羅森森雲璈九奏鏘悒悒擁
爐步虛搖箕參稽首寥陽祈博臨庭下朝謁紛冠
簪願言福壽高於岑問子爲誰對輒瘖以目代口
手拊襟伊民豺虎國蠹蟬細大敲剥無遺針凜虞
膏血供几砧巧諛曲媚求回心天乎少戢湯火燖
庶幾沸魚逃釜鬻上帝福善禍必淫高目下耳一
監歆察此頌壽皆呻吟革彼飛鴉懷好音嗚呼愛
而祠者古畏而祠者今安得醇醇相忘武城弦歌
單父琴

婆餅焦

萬斛精神一握身清吭宛轉欲飛塵雞纔唱後便
知曉燕未來前先得春驚覺海棠休苦睡提醒楊
柳莫空顰最憐吉語能相報麥熟同爲鼓腹人

孫教授挽詩

手織天孫錦曾吞海若洋官卑材不盡年往慮空
長啼鳥呼春夢飛花餞夕陽唯餘君子澤挿架簡
編香

筭蔽

小兒握固骨何弱稚子着綳肌尚寒豈不愛渠風味好只應催我鬢毛殘

浴罷氣體和

浴罷氣體和坐睡便胡床首款如汲瓶數俯輒一昂瞢騰復瞢騰慾泯想亦忘乾坤孰高下今古誰興亡矍然瞳兩眼踈窓半斜陽窓下櫻桃花無風自吹香

金不換歌

東家鼎貴萬戶侯西家是富十谷牛喚絲呼竹進玉舟把酒已作明朝愁中間人家賤貧慣既得未得兩無患晏眠起喫齋菜飯飯罷亂拈書冊看此樂名為金不換

酬東風引

魏鄭公田舍翁陸敬輿老獠奴斯人斯人尚如許薄命蛾眉何足數野桃溪杏次第紅脫袴博酒酬東風

溪行

却掃晝陰永意行溪上汀鬢華年減黑草暈日添青魚舞新磨鏡鷗飛小畫屏梨花寒食近誰與管飄零

用吳祕書正月晦韻

攬春群玉寫芳懷次第安排到寒食旦得斯文留

脉在須教我輩放眉開疎風細雨桃花過竹屋柴
門燕子來老去湖山無復夢荷鋤西崦覓萱莛栽

禮滅翁退天台能仁院歸梁渚一絕寄
之

倒剗枯藤立晚風山光不與水俱東蘋花落盡蘆
花老地闊天高一箇鴻

樓閣

舊脫敗蓑亂新添華節高肅容春尚靜俠氣夏方
豪黃孕子魚腹青披孔雀尻豐撞知可製雷動景
鍾號

碧桃曲

草平不斷瑤池路樓礙東風花滿樹綠眉素頰澹
裙裳月華暖透三更露雙成飛瓊妬高妍引梢搖
月分嬋娟雲璈一曲迸空碧青鸞驚起花翩翩

燭下次海棠

紅深翠淺浣花春投老相逢過所欣有許精神宜
半睡無多醞藉莫全醺涵渟芳露湏饒月籠護晴
暉不礙雲成就化工真富貴天香更與牡丹分

送李微之倅成都

鳳生丹山西來爲太平符矯立青琅玕祥雲蔚相
扶一鳴合簫韶再鳴應騶虞散爲清明風萬象皆
專與色舉抑何決矢脫金僕姑憂摩參旗高可望

不可呼穿花迷嬌雉
唼藻戲乳鳬搔首重太息
春陰渺江湖

次叔厚韻

夢斷紅塵踏九衢
雲山佳處借樓居
採將瓠葉隨宜煮
拾得榴皮信意書
未問我今忘我世
須知吾本愛吾廬
黃公壚在花陰裏
磊砢從君一破除

二佳

佳筍如佳人柔指飽風致
佳醕如佳士醇明負骨氣
此筍配此醕可愛不可醉
得醉豈不好醉恐不知味
蔚如王謝家文雅將富貴

二月二十七遊僊洞次壁間韻

點脚地維絕舉頭天語聞
瀑泉飛響雪洞石湧清
雲縹緲追元放低回揖郭文
神清知好在煙鎖綠苔侵

用韻荅趙主簿

逸氣蓋三謝英詞參二班
飛綏宜北闕枉駕忽東山
花妥晝陰寂絮吹春思閑
光風知幾轉盡付酒杯間

謹和 老人羅山

自鑄鐵成錯誰吹灰使然俗情床上下野趣蜜中邊
花豔明光錦苔痕白打錢醉翁詩板在山莫放童顛

寄題辛氏塵外樓

羅浮三十里樓對玉崔嵬風卷軟紅去雲扶飛翠
來會心須盡快適性莫多杯除得翳根盡靈光生
鏡臺

初夏

鶴帳華纓絕牛蹊老屐穿薄晴生晚弄深綠護餘
妍萬卷不堪煮百懷空自煎朱櫻黃苦笋小酌便
陶然

里人送芍藥用韻

詩墨淋漓似小王殷勤炮贈暖紅香楊州金繫腰
何在隨分留春共一觴

寄高子厚

因讀東坡馬生木
窮士詩有感而作

盤隱門下客流落餘兩箇我故稔子窮子亦諒我
懦穉松高未尺早望屋脊過小蓮出纔寸便譽車
輪大急灘倒撐舡狹路錯推磨不謂材無堪祇嘆
命未作去聲沽酒勞閒寂累飯問寒餓爲分猢猻
愁相對橐駝坐有無共甘苦休戚先吊賀綢繆平
生期荏苒歲月蹉人情少耐久卅事難預課欲尋
買山盟恐踏筭甕破

憫農

時邑令
建長橋

麥黃蠶登簇秧青雨催耕農家竭作時無工搏蚊
蟲短杠鴈鷺進脩綵螻蟻行謨蓋溪壑痛名言輿

梁成吞聲不敢怨但願天長晴

和禮滅翁感錢氏舊事

民不知兵物自華表忠消得老碑誇虎符龍節故
王國鳳舞鸞飛今帝家遺廟斷垣低榭葉荒村舊
井濕桐花馮夷尚怕潮頭弩一望西興渡口沙

滅翁爲日者求詩

大撓甲子一串穿東州西州走諸禪芭蕉虛實果
何物橄欖苦甜猶問天華光佛壽十二劫瞿曇像
法一千年兩翁見子肯倒屣好爲推到無生前

用鍾侍郎韻贈懶谷

蒲團竹几妙高臺瞑坐何能放眼開門外白雲多
事在又將飛雨出山來

暑夕

樓高收晚照野迥送宵陰鷺下汀沙靜螢行岸竹
深櫻寧和順氣緣督正平心轉物天機妙昭文不
在琴

王章

皂囊盟手自封題忘却牛衣忍凍啼一點丹心通
碧落歲寒寧負白頭妻

暑坐

隔簾草樹隔溪山密密深深洞啓關水色山光無
障礙南風送入亂書間

謹和 老人夏日東山即事 二首

剗草根須盡傳花葉未多明波撐窄堵老石卧盤陀煨美甘分芋蒸肥欠裹荷醒然下山去明月滿林阿

菜把野園送花枝隣巷賒搗蟾和絳雪騎斗弄青霞古帖臨禽李新詩續稻瓜晚涼隨杖履携酒訪魚槎

田家建除體

建鼓勸竭作除田綠紛披蒲築沮澤岸平流綺塋陂定約欲水均執熱願雨隨破柱雷電合危簷溜紳垂成功一天瓢收穫萬京坻開元正觀盛閉關

更休師

和趙青田燕坐

青田鶴翁杜德機天根月窟手探之嬰兒姤女熟搏弄妙處不許旁人知渠家庭院紛花藥啄木黃鸝幾推卻流蘇百子卧春風萬慾難供無底壑生門死户一線間内丹走盡求外丹明朝赤黃裂大山護鼎龍虎方閑閑

新秋藥名 兩首

老色蒼蒼耳向聾秋聲欺得白頭翁已甘草詔元無分只苦耽詩久欠功引興從容風月足放懷浪宕水雲空雨餘涼意生庭户夜半天可鵲信通

兩眼旋花雪點鬢鑽頭故紙枉工夫勸懷懶附子
公憤閑性熟諳摩詰園枝拂雲香行到桂葉隨風
舞又催梧葉槎欲到空青問織女牽牛事有無

謹和 老人官山看高子厚修墓

秋風問訊老芙蓉靖節前行後阿舒緩策穩過金
絡馬小烹佳勝蔗漿厨何榮何辱人千古誰是誰
非冢一區遇着好花隨處醉莫論他屋與吾廬

用子有述懷韻爲壽

筆力強於二石弓文場早合擅元戎東西塗抹未
爲老左右圖書那得窮三日窺牛酬壯志十年到
鳳策奇功更須傳取長生訣蜜炬高燒不受風

俞成大送新芋

謝三郎女敗蓑衣縵縷中藏玉雪肌柱下莫愁無
乳媪秋風得此可忘飢

范待制子長挽詩二首

太白曉燄燄飛鴻秋冥冥氣節蚤已勁勲名晚逾
馨冰霜蜀棧寒風雨秦關腥一范不可作岷峨干
古青

生不餌栢寺死纔跨松階浮雲忽易滅明月終難
埋宇宙卓有立江山渺無涯掩卷獨搔首西風知
此懷

和俞成大八月梅花

秋光深處送春來青葉扶疎數點梅料是知君新
釀熟攪先九月菊花開

謹和 老人秋日遣懷

鬱鬱年來亦欲東窮魔揮斥欠天蓬得甜自喜皆
花蜜與苦相忘獨蓼蟲張望紅杭新作業柴桑青
菊舊家風隣翁強解人間事數問朱轡甚日熊

月下用鄭大參和沾維那圓覺韻

無縫冰輪萬古同御風飛到碧天中四方上下無
遮礙一點清光處處通

東山即事

西風卷宿侵天高近重陽閣虛自沆瀣塔靜能琅

瑤幽花多素英穠香奪春芳老木未黃落繁陰生
夏涼棋雋決楚漢杯壯迷彭殤醉帽信孟嘉歸鞭
忘葛強萬事貴適意誰能扣蒼蒼

九月四日過增口道中

秋光拍塞小村墟高下人家意自如屋底四蟄抽
蛹細牆頭三桂着花疎握兒早秫酒無限杓子晚
菰蘼有餘大似元豐年界好天應容我老樵漁

謹和 老人九日

樓頭獨立夕陽西搖落高風萬木嘶人自官芻行
馬口我方社酒薦豚蹄一塵不着青銅鏡萬法皆
空黑漆筓節後龍山應更好秋光拍滿錦障泥

謹和 老人賦牛尾狸二首

踏白霜明夜牽黃木葉秋爛斑文未豹轂齮齒先
牛壓玉開三面蒸酥讓一頭酒邊纖手削醉倒老
浮丘

北雪佛狸種西風金狗秋謀生貪過鼠逃死喘如
牛糟熟涎奴舌藟芳點客頭何時明獵火吞盡楚
青丘

趙忠簡孫壁見過有詩用韻

薄命窘震凌餘生颯糞朽閑閑飽欵竹寂寂老鍛
柳溪空漁爭隈野熟飲被肘有隣晨致薤無客夜
剪韭忽來闔戶屢自挈問字酒初見了冒曉餘語

應心口顧子果誰與恐子不我友維昔燕夾攻坐
使汴失守應奉固亂階新法實禍首療危非庸醫
救敗須國手豐魏兩翁奮關洛孤憤久人謀密相
濟天意斷非偶攻守豈必同勝負亦常有誰推姦
人出竟墮黠虜誘包將復讎戈付與掃愁帚風雲
激矢脫日月峻輪走殘羶汚北雪遺憾掛南斗功
名本同舟學術迺各牖一時策得失千古史妍醜
忠簡杜稷臣尚起九京否

謹和 老人初冬即事

莫怒狙公賦芋慳萬緣一定不容干老便窓下迷
離暖醉愛尊前郭索寒肩玉晨光明沆瀣流珠泛

氣鬱蘭玕但能飽喫長年飯射虎南山有分看

謹和 老人初冬寓筆十絕

平泉草木須臾夢金谷鶯花一撮塵富貴若生根
到底兩家占斷別無人

是非不驗道應壞禍福無憑天也荒便使曹瞞生
賣履已賒王衍死排牆

何人地下管天條不是臯陶即是蕭金埒謾誇錢
過斗鐵圍寧問玉垂腰

當場弄出百般奇傀儡棚中老偃師蒲眼機關無
着處到頭線索有收時

兩儀亦有盈虧數萬物難逃出入機一把牙籌空
自苦蓋棺着得幾通衣

避風臺上深情寵偃月堂中盡意謀爭柰天公無
面目滿林黃葉一番秋

煮茗燒香雙赤脚檢書洗研一蒼頭斯文興喪由
天在未用安排地起樓

元子掃空桓氏業窟郎蕩盡李家風前人留得兒
孫立何患鸞枝不長桐

方窮蔡澤問唐舉未遇鄴侯逢懶殘觸石起雲能
沛雨不應長作旱雷看

命有窮通分虎鼠事無得失盡雞蟲東籬獨有黃
花在絕取寒香壽阿翁

又和

青女籠晴試小春門前沙路淨無塵平洲水竹因
依好白鷺飛來不避人

往來魚虎澗流淺出沒鼠狼庭草荒宅近市傍人
不到獨迎西日上東墻

柳亞溪橋幾換條鬢根添得雪飄蕭清臞自信堪
騎鶴最喜無錢絆住腰

爾雅蟲魚已熟知更將埤雅訪農師投糟赤蟹真
無價薦餅黃雞正及時

終朝聒得耳神飛東舍西隣盡販機百樣攀花無
我分慣將簾作後堂衣

架上亂書兒自整床頭濁酒婦能謀只將翹足垂
蓮勢靜對書窓課弈秋

風裏行雲不自由低眉重整玉搔頭桃根縱有飛
花渡燕子寧無接翅樓

寒燈芳燼發春紅讀到幽詩繼匪風吾道有消還
有長欲將此意寫絲桐

蟹正肥時秋色老鴉爭噪處夕陽殘未湏多進玻
瓈盃蒲樹霜紅正好看

天時人事共流通何用將冰語夏蟲判爲梅花多
釀酒春風裏着蜜翁翁

仲冬九日還可庵謁葛逸入都

未放梅梢一箇春。枇杷花已玉嶙峋。霜靴帶取苔痕去，應被孤猿野鶴嗔。

臺中聽雪

浙瀝松廳夜空山。一樣聲冰霜元自勁。水月更添清衾薄。難留夢窻虛。易得明庭烏催奏墨未曉已先鳴。

太一宮齋祭呈司封吳舍人

立春前一日

寶鑰轟霄啓玉晨。風恬雪霽淨無塵。東皇太一紫壇曉。世界大千青陸春。藜杖流光環珮集。鏐旗歛影豆邊陳。樂歌須仗甘泉筆。斧藻天家泰道新。

謹和

老人除日

吾道何通塞。人情自寂喧。無羔還可茗。有鶴不須錢。議論追嘉祐。聲名續正元。壽親惟此爾。一笑栢椒邊。

清涼院僧房致齋

花片墻陰晚禽聲。屋角晴東風猶峭。在煨芋坐深明。

銓闈董試上巳二絕

天氣年年只麼新。官忙不似舊閑身。油車盡舫西湖闊。可惜埋頭典却春。

柳暗鴉嬌日正長。筆頭風雨響脩廊。一簾芳碧雙胡蝶也解尋人。姓字香。

除夜哭內

密雪踈風客屋穿幾回除夕伴憂煎團藥方索日
邊飯契闊已成松底眠晝火何堪思舊事理衣誰
與管新年平時戒汝無多酌爭得屠蘇到汝前

省闈試士

東風蓆帽快行催渾爲天家造士來捧詔九霄雲
氣濕分題五色日華開揀金沙裏須精鑒脫穎囊
中盡異材容受直言天子聖好聽臚唱響春雷

六月五日集英殿策士從官待宣于內
軍器庫廊

漢廷與目策英豪投釣知誰首掣鰲百日紅連綸

迴萬年枝拂禁城高內廊坐永風生席聲路遠

遙月映袍西抹東塗渾忘却一絢短雪不堪搔

書季允度侍郎周卿趙侍郎
履常趙侍郎適道同待宣

六月十六日宣鎖

禁門深鑰寂無譁濃墨淋漓兩相麻唱徹五更天
未曉一池月侵紫薇花

恭和 御製賜吳叔告已下聞喜宴詩

致主唐虞澤兆民賢才端是國精神作人欲返皇
風古拔士先隨聖化新收歛文章歸獻替安排事
業到彌綸宸章屬望丁寧甚上荅天恩莫愛身

謹和 老人寥字韻

本其洗眼看伊周到此華胥只夢遊爛熳蒼苔心
事晚婆娑紅槿鬢華秋藏頭欲効鑽沙鷃捫舌空
成噍草牛飯豆芋魁渾好在得歸不藥病還瘳

謹和 大人喜晴

雨脚如麻日日然垂成生恐壞豐年九重盼蠻通
方寸一點光明徧大千喜動朝行花底散愁銷野
次葦間綠奄觀銍艾霜風晚重壓牛車倍費鞭

閏月廿六日奉 御香祈天竺觀音於

昭慶寺是日得霽

大士慈悲出補陀掃除陰翳作人和武康芋子鹽
果遇着豐年也倍多

謹和 老人賦上朝

世事鵬斤鷄人情燕伯勞心頃腔放闊眼要孔提
高陳力惟求健承恩敢恃牢熟思歸計是春酒薦
萋蒿

下元節後省試進奏院吏

推雲不動雨聲苦醞雪未成風力乾瘖驚一庭淘
墨汁也煩老子坐深寒

十一月五日鎖學士院

樓頭禁鼓試初撾催草江淮督使麻落紙一簾風
雨疾不知斜墨陣翻鴉

直玉堂和李參政絕句

曲折宮牆日影方
堂深人靜似山梁
梭擱葉底梅花老
次第風光到海棠

老人生朝爲壽

迎侍京華又見春
天時人事一番新
丙申兒遇丙申歲
已卯爺逢已卯辰
本分法門行得熟
長生樣子學來真
斑衣奉酒多爲壽
滿眼光風正可人

正月十九日孟享從駕

黃繖中間一點紅
繡雲鹵簿海棠風
鈞容聲出雲霄外
馬上誰憐有老聾

新將給事換前銜
班被真除法從攬
道是緊頭人
不信回看壓得兩
排衫

游景

二

吳叔

太廟致齋

風雨殘春晚作晴
寶山深靜勃鳩鳴
雲收翠戟龍文潤
日透金鋪獸面明
蠶出火時桑正沃
秧抽穎處麥還成
在天列聖孫謀遠
流福人間釀太平

平齋文集卷第八

記

饒州州學新田記

弁峯葉公司臬江左之明年某來庀楚泮一夕漏
過午曳屣脩廊齋廬燈半明滅聞有扣庭竹而歌
曰月連娟兮露垂木蘭厭浥兮蟬飲之朶頤兮疇
屬饜不如東海洋洋兮可樂飢又歌曰露函月兮
相輝鶴鳴九臯兮止復飛屋漏兮尚不愧羗三月
不肉兮吾亦肥其思深而不迫其音悄而不怨甚
異之明發謁臺下爲公誦所聞公笑謂予得無與
廣文飯俱不足耶因問歲入之日予謝不與知獨

數慶曆元祐以來幾豐碑以對而終以罪歲公又太息屈亡幾以番水下鄉在官之田歸于學最五頃有奇山稱是僦廬數十楹已而攝郡組且還續食之布意尤末艾也夫教與刑同出而異用出教則入刑皆以約人心歸諸善公亭刑一道聽訟以平鎮俗以靜格姦暴以誠惻然念民力之窮而甘苦同之民隱然恃爲太山而心不搖簿書期會時方蠶午獨汲汲學官之是崇壽名教之命脉扶風俗之元氣其深識輕重緩急之權度者歟饒學居臺府鼎峙之地刺史二千石士皆能皁白之每爲一言三山李公珏握憲節名凜乎動人唐山唐腴十頃舉以加惠于學

而敘吾所有以肥杞者賢否何如也今李公平反西道與公實共長江聲明風采彪炳交映詩曰矯矯虎臣在泮獻馘江右以是期李公淑問如臯陶在泮獻囚江左以是頌葉公公名簣字景山嘗任太府少卿今直寶謨閣嘉定三年四月朔旦洪某記

重築采芹堤記

城東數百武爲泮宮貢士之闡冷官之廬附庸而翼之督軍湖匪其右貫湖爲堤徑于學湖裂爲東西西湖在堤北倚山瀦水植以蓮菱隄無濤撼

觸故不壞東湖在其南瞰湖有亭曰采芹亭
明莎蕪彌望潦水時至挾風塵岸拍拍作聲不少
息日朧月圯闊不能半尋歲大比縣編竹貯土補
葺以苟目前事已輒頽折如是妻矣余來分教每
出擇地而履或夜會風雨寸跬不前毛髮磔立因
念士與民同出是塗可拱睨不問命索石爲趾每
五尺捷以石筭東爲層六西益一開級道以便下
上者三覆石甃以草壑根盤結不可動鱗次而上
以殺水勢廣十有七尺崇十有五尺脩一千二百
尺植楊護其趾且爲舉子繫纜地烏相合抱垂蔭
下接景益深秀作門于西扁以泮水役始於去年

十月甲子訖二月壬戌凡靡錢二百萬嗟夫物之
成壞也有時時之難易也有數堤昉於文正范公
再築於元祐之庚午余之增築又適當庚午之冬
周兩甲子所成僅爾謂之非數可乎更兩甲子陵
耶谷耶嘉定四年春社前五日錢塘洪某記

東圃記

余旣結樓解西偏以受兩湖之勝東偏有隙地數
百步畦蔬灌莽爭長遂規以爲圃買梅數十本手
自扶植少長有序寒香冷蘂綠陰青子人所共愛
秋後木葉脫盡若枯不枯欲蕾未蕾更自佳耳
有君子之德臭味同者必愛之或不好事析之不

中薪斲之不中楠亦足自壽旁種竹數十箇忍者
成饒者懼其不能與梅俱久梅下薔薇整整就
列可編以爲屏萱菊成窩隱映陸續水仙芍藥必
火于秋分培其根使豐碩乃能多華金沙酴醾上
蔭惡木援昌條而升之萎蕤下飾庶幾惡者亦轉
而良因窪䟽沼輦淖毓蓮隨種即葩蒔殊快人意
久不雨則躬抱甕之勞壇有新安牡丹方苞須籠
護以防鵲啖有庶蘂則搔去毋使分正氣巖桂初
移更數年乃盛小松高不能尋丈又當期之百餘
年後桃杏之繁葵榴之豔海棠之姝麗風日佳時
若有矜色特未知松桂肯之否築亭其中表以百

花頭上獨主梅而言者春秋書盟會之例也客笑
余名亭有舉子習氣余夜夢游場屋觀榜帖則躍
然以喜習氣未除安敢諱異時士友藏脩之暇婆
娑梅陰采華撫實必有能爲我誦角弓之詩者嘉
定壬申仲春望日記

揚州重修城壕記

廣陵負淮挾海前頰大江槃槃爲一都會古燕城
昉吳王濞而拓於隋俯仰千古岸移谷遷坡陀瀾
迤隱起蒼莽間後周顯德中韓令坤相攸東南陬
別城以亢治所周二十里一百五十步崇二十六
尺是爲今州城 國朝盛時南轅北轡走集旁午

如莫枕堂皇無所事乎金湯之險六飛南駐郡為
北門重鎮形勢控帶繕防日嚴培塿葺陋萬雉鬱
起矗如長雲望不可極而壕河堙陜日甚稍不雨
則褰裳可涉嘉定甲戌春金部郎崔公出鎮是邦
厥初視事登陴臨眺進父老而問故謂役費夥繁
民壤綺錯且城東高邱平行虜嘗頓兵浚下增高
守禦非宜坐是噤不敢輕議公慨然念天下事患
不為耳度遠近準高下程廣狹量淺深圖成而鎮
江都統馮榘實來聯請于朝尋報可屬時晏清弓
韞矢箠戍兵湏暇售力相先植表作旗萬市競奮
行行伍伍一無敢譁單車巡勞塢給有度蒐簡勤

惰勸懲有章日出而作未昃戒休嘯篳坎鼓歸營
騶動其施功自東徂西而終於南因地相宜河面
闊至十有六丈底殺其半深五分廣之一環繚三
千五百四十一丈壕外餘三丈護以旱溝又外三
丈封積土以限淋淤又展地七丈以受土使與危
堞不相陵民地眡歲入庾其直事已俾復作業城
五門為月河總百十七丈而南為裏河又八十七
丈呀然而淵沛然而川波光柳陰下上交映實墉
實壑深與高稱賈航饒艘並帆疾馳萬目驚盱前
所未睹西北曰堡寨城周九里十六步相去餘二
里屬以夾城勢如蜂腰地所必守左右尤淺隘濬

之槩如州城壕以丈計者七百三十有一且甃女
墻以壯其勢郡倚三塘爲固有邊遠則疏陳公句
城塘水灌州城壕支河引水入九曲池合雷塘水
灌西城壕公先是封築閘柵斥大隄岸渚水益潏
漾兩壕告功試決而注之水僅落數寸而河流四
溢矣經始于八年八月訖于九年九月工一百一
十五萬四百二十五費 朝家緡錢三十四萬八
千七百五十六米石二萬一千八百四十七州家
激犒爲緡錢五萬一千六百市河貫城即古邳溝
南距北五里六十步外壕旣深水勢趨下市河涸
不可舟就加深廣三分廣一新輿梁五又費緡錢
四萬有奇公以正大學問發爲政事所至聲迹章
灼擊楫東來恩信孚浹軍民歸命恃爲長城識者
以經濟事業望之斯役特細耳客謂孱虜垂亡機
會方集何規規守是爲公曰不然古人設險如弈
棋置子雖踈取勢欲廣楊爲根本要地控海沂而
引汴泗取勢爲獨多吾試與子馮高而望中原故
壤一目千里強本折衝顧不在茲乎客領之去是
役也參議陳師文機宜何處禮提督通判高惟月
鈐轄劉誼節度推官鮑克正受給統制孟顯仁總
轄統制王明元真統領韓亮王孝忠張健李進李
琮莊安國夏榮部役敢勇精銳武鋒神勇左軍強

勇鎮淮則其役兵也公名與之字正子南海人

利州通判廳記

上更化十有三年南海崔公以名灋從出殿成都東其屬得宣城孫君若蒙正叔爲成都宰與俱西明年公盡護全蜀開幕府于劍外緝忠哀益正叔參焉又明年辟通判利州利以寧武冠其軍介梁益拓表撐裏自昔號重鎮中興後臺閫鼎立又重郡太守印綰以部刺史丞貳非它郡比也舊有廨郡治東歲庚辰合爲大行臺郡治麗于漕郡丞偃偃無與歸濡需而游宴藪而泊吾腹果矣它不暇問正叔以爲大愧一日過南門綿谷故驛掖仆碑

摩杪讀之皇祐中規置也秦蜀同軌利當孔道故崇大其館以羸客使其後郡將兵鈐迭嘗區薄近復釐爲四五以廬僑士叢猥族紛左陵右壓庭下老木數章突兀輪囷猶有百年文獻在正叔喜曰可矣退而咨諸長長曰可哉翼衡以從張故以新迪晦以明堂序有嚴官府具體旣表舊扁諸大夫相與落之三邊無塵野無遺秉可信眉一醵矣書來屬余以記余謂天壤間孰非傳舍閱人之地况毀室於鴟取巢於鵲抑有甚不獲已者未足爲正叔書也憶疇昔過正叔抵掌劇談世故節節中窾卻其言利者怨之殖也名者忌之的也忿與慾填

之棘也氣壹動志者壯之蹶而得者老之蝕也天下所謂磨之不磷灼之不焦震之不碎者惟一誠實而已身不行道不行於妻子苟誠其身則可以順乎親信乎朋友而獲乎上真者不可矯昭者不可匿也余聞而惕然向知正叔之老於才今知正叔之老於學故書嘉定十六年六月朔洪某記

清約堂記

參天地而立者人包天地而運者心同是心也而有人心道心之別道心性之存也人心情之動也情動而百欲生故危之危而難安未至於亡也故猶可及反反則危者平矣顏之復曾之省反身之謂也然省在復先能省而後能復顏子有不善未嘗不知知之未嘗復行隨省而復也曾子則用力於省者顏色之正容貌之動辭氣之出戰兢惕厲警察精密無一息之間斷而夫子之道竟以是得三省之積一貫之入歟晉人張君承祖伯脩學博而材偉氣明而膽壯舉天下禍福利害莫能壓之試劇成都期年政成作堂以休扁以清約殆老於世故落其華而取實將以是志所省乎夫養心莫善於寡欲其爲人也寡欲雖有不存焉者寡矣其爲人也多欲雖有存焉者寡矣此心具清明之全體人欲一萌清明隨蝕去其所以蝕清明者而清

明還則本然之心得矣故天下之損莫大於欲人心之所當損亦莫急於欲邑大夫公餘退食燕坐深省曰夜氣之存其不爲旦晝汨乎雞鳴而起其於利與善之間已辨乎宮室之美妻妾之奉所識窮乏之得我其不爲之動乎口之於味耳之於聲目之於色四體之於安逸其知有命而委順乎內以敬而直外以義而方敬義充塞於內外物慾無自而入則民被學道之澤矣董幼宰不足進也詩云蒹葭蒼蒼白露爲霜所謂伊人在水一方西鄉舉酒爲伯脩賦之寶慶初元八月旦日古潛洪某記

洞霄宮施田記

洞霄距行闕三舍而近翠華臨幸舊德典領廷綏寺韶榮禱旁午望出璇臺珍館之右星冠羽衣來游來處常不翅數百千拍九霞八景晴霏濕翠朝攬夕挹充然有得而主其徒者每皇皇懼無缺數衆之弗克澹唐中葉嘗賜觀庄田一所國初錢氏籍以歸有司祥符中賜仁和田十有五頃除其租政和中易賜膏田千畝逮紹興牒通明殿于宮之東偏又歲有常餼以給齋祭列聖涵育之恩至矣賜田中更多故僅存硤瘠歲入不足支數月都監宮事龔大明語其徒王思明王大年前是住

山潘君三華尚能斤橐裝買曹橋田以繼粟吾待
可坐睨寬鄉上腴大家腐陳丐彼有餘輔吾不足
庶幾我疇我耕我庾我積以裕我後之人怡聲勸
相堅力經度其志卒以酬畏壘旣攘姑射且熟鼓
腹升平稽首萬壽欲與是山相爲無窮來諗子爲
記夫道行乎天地之間日用飲食何者非道先王
以是生養天下一夫授田百畝于耜築場有其時
糾笠趙罇有其具堅好穎粟舂揄釋烝有其成墻
屋有桑疆畎有果蓏柵有雞豚沼有魚鱉身勤於
所養心安於所止一毫無待於人此王道所以爲
盛也世降道裂始有食非其力者浮屠氏幻而辯
能據人以禍福騰陌綺錯鉢巾雲趨所至皆是而
爲老氏之學者大氏以清淨無爲爲宗湏於人者
狹故其廬聚不能十佛之一雖名山藏室大洞殊
庭號稱海內之望亦往往微常產以自殖其教然
也於其教清淨無爲之中而能謀長以殖其衆可
不謂難乎雖然樂與餌過客止道澹乎其無味視
之不可見聽之不可聞而用之不可旣爾師之說
然也繼今不以口體爲心害宜有進乎澹而無味
者余家天目之陽去天柱爲近間當分半席叩之
施者生有祈死有薦其姓氏畝石附見碑陰云

於潛丞廳續題名記

吳門葉君芭丞吾潛諸臺交薦其材垂滿過余以
題名更端屬之記且曰官無庠崇職無簡繁事無
易難惟敬則行居是官而罔其思非敬也居是官
而出其思亦非敬也上不侵官以僭下不怠官以
曠心止於事靡他其適如農有畔行無越思其斯
爲執事敬乎芭不佞何足以及此惟是常平義倉
之賦受丁口力役之簡稽暨上官所以奔走使令
之悉惟謹土膏脉奮凍解泉動出入阡陌程督坊
渚日與臺笠襪襖相爾汝過此不問也有堂述六
面山而俯沼嘉卉美竹參伍布列暇時玩游鱗之
溶曳聽幽吭之啁晰弄柔芳而坐密蔭以休其心
負丞不負丞不敢知也余愛其言知敬於職業因
筆而畀之石且告來者

奚疑堂記

爲楊尚書
洪明作

太極運而陰陽生陰陽分而剛柔斷人具陰陽剛
柔之體而性太極者也氣稟則有不齊得陽剛之
粹者爲正直爲平易爲靜定爲勇決得陰柔之偏
者爲便曲爲險躁爲多愛爲不果自昔聖賢所以
擇精而守一與道俱出與義俱入進不泰驕退不
吝屈動以天而不牽於物剛實爲之夫剛者疑之
斧慾者疑之蘖慾則不能剛矣剛而無慾然後能
知天知天之所以命我者不容毫忽人力於其間

則能安乎天九利害禍福榮辱得喪錯立乎吾前
不將不迎不掣不撓躍如脫矢若如奏刀沛如決
千仞之隄而赴平川疑何有哉今寶章閣學士瀘
南帥尚書公表和而裏也剛其立朝不沽激以爲
異亦不媿阿以爲同惟時之中締知茂陵廩廩枋
用一日幡然請蜀麾而去築堂家山顯爽靚深志
將老焉間斯燕斯謂歸去來一詞拍在末章先君
嘗欲以奚疑扁所居未暇也遂名之易之遯曰肥
遯無不利無所疑也見於上九之剛坤之六二不
疑其所行則動而剛也有是剛信道而踐實任運
而養胖颺貧賤無患得之心處富貴無患失之心
遯與坤所以均於群疑之泮然見幾以用遯違世
者之事故其剛著於外敬直義方而德不孤用世
者之事故其剛動於中靖節違世者也公用世者
也違世固安乎天用世抑何往非天哉昔伯起傳
秉及彪四世德業蟬聯相輝爲東京名族清白之
遺也公以安乎天者上承考下以詔子若孫德業
庸可旣乎敢爲楊氏賀且爲楊氏勸

著圖書所記

余誦天隨子杞菊賦愛之因取著圖書所名閑居
之室菊坡爲灑其扁廉頑立懦之風可挹也嘗言
曰結繩以前未有書有書自易三畫始易在天地

之先而畫顯於一陰一陽之後陽奇爲乾陰耦爲坤陰陽奇耦之畫交而文生焉故易者文之太極也詩書禮樂春秋論語文之兩儀也諸子之有見於道有補於世教者文之四時五行三辰也太史之紀錄先儒之訓詁文人才士之撰著騷人墨客之賦詠公卿大夫之論奏百家異端稗官小說各求自表於世其融爲江河峙爲山嶽散爲風雲雨露磔裂爲草木之華昆蟲之鳴不知其幾也而總之爲圖書其出於河洛者蓋其元也前代書皆褚素傳抄至五季始有六經墨版國初又刊司馬遷班固范曄諸史以幸學者猶未盡然也今則靡

書不版矣手抄之得難版傳之聚易得之難則讀之力聚之易則有書不讀如前輩之慮蓋多然亦有由也士未一命晨窓向白執編而長哦夜膏欲涸掩卷而紬繹莫非所謂科舉之文書非不讀也而讀非其書及旣一命矣日以司空城旦從事神疲力瘁於簿書文墨中書不暇讀矣爲士而讀非其書爲吏而書不暇讀勇於學問者顧不爾而力與心違類不能不爾故惟不士不吏而後可以力於書余家合新故書亡慮萬餘帙放斥還山無場屋之冗無官府之勞書於此而不讀真不讀矣卻萬紛以保靜措雙眇而就明日課一編心領大義

老退雖不能彊記如苗得漑生意亦新易曰君子多識前言往行以蓄其德厚其入而不輕其出是之謂蓄蓄之極而至於何天之衢亨則上達矣未蓋棺之日月尚勉之

於潛登科續題名記

上科詔再頒之歲冬十月己未邑令池陽程君燾修鹿鳴故事于宣化堂諸生作而言曰潛士登科有題名自慶元 龍飛始閱三十年石且溢矣表先達以厲後進盍續諸令曰唯唯鳳凰鳴矣于彼高岡地之得也梧桐生矣于彼朝陽時之得也時與地莫難乎兼得士生王國得其地矣雲風感召得其時矣其地得其時又得觀光利賓策名奉常以階顯庸顧不謂榮乎抑涵負穹博擇精守固出可以爲邦家之光萬民之望然後榮名氏之書志榮也鄉校群居藏脩餘隙相與摩挲題刻歷訂平生非其研席之游從則家庭之詔語疇賢疇不若類荃茅而品椒櫞其榮也可不懼乎知所以懼則榮至矣此賢大夫期屬方來之意也邑人洪某記

浮溪橋記

浮溪吳蜀往來之津始以略約渡繼維以舟前令邵紫微梁而亭之山潤川明彷彿垂虹宣雪分派南注潦水時匯雷轟電射橋莫克支久趙帥卿來

索以石且屋其上規制堅密而勢益雄前年秋洪發諸山平疇廣隰潏爲一壑縱放橫軼洶如濤江直北之橋盡決順濟亦壞方令垂滿綿蕞艤度暴漲斷綆涉者仍病焉池陽程君燾至之逾年間與客行溪上愛風物之勝思策隊立壞如帥卿而重於煩民遂一用紫微成摹醜水爲十三道巨植駢峙脩闌旁翼袤三百尺廣三尋有二尺東西石梁各一星兩亭壓岸猶舊先是紫微中橋着亭塵于北坐挹兩天目以便遊息迎湍受激亭仆而橋隨之改着于南勢相屬而不相麗異時亭或不力橋庶幾保無恙市材僦工直與時平手畫日授匠與心謀不累朔而告功疊嶂危瞰漪漣涵碧霏開煙合人冉冉行圖畫中潦無停輪冰無留履相與夸誦前邵後程不容口而君意猶若欲然者謂凡物廢興必革相循無窮壞必有由成必有漸橋凡幾變矣今揆時度力所僅就爾他山可斷安知來者之不復石乎士大夫之患莫大於吝與驕吝者拔一毛利其民不肯爲驕者毫髮及其民則施施有德色蓋無學問義理以養其心而氣爲之羸縮也君廉平有精力得敬事愛人之意視可以興利除害者不慮費而橋役其大橋成不矜爲已惠而以圖堅惠遠卷卷後之人加於人一等矣紹定己丑

十月日里人記

知心堂記

昔在孝宗皇帝以盛德大業紹開中興仁不異遠視坤維戚休如在陛桓間廼淳熙丙申秋七月制詔晉原李公蔡以倉部員外郎總蜀賦望選也未上首奏利路和糴爲民害假臣三數月可永除五十年病根爲國爲民之慮目無全牛矣尋奏易之哀多益寡書之懋遷有無皆深寓理財至計臣願於經費中揆盈虛歛散之宜酌緩急先後之序通融排幹劑量取予盡變抑配舊法官自與農爲市不虧豪忽之價不取圭撮之贏而軍不乏興民不加賦其條凡數十其大節目十有一反覆熟究皆經久實利惟少寬轡策俾得盡其愚上大奇之詔制置范公成大同詳度又詔度支郎周嗣武就覈利害悉奏所請可施行公以聖主難逢時幾易失亦連上奏願任責辦集其議三閱歲而堅定案全蜀餉道歲大約以石計者一百五十餘萬中六十餘萬科之邊氓量家業以定均敷之數名和糴實強取民不堪命怨咨轉聞皇明洞燭萬里一意任公以寬西顧奏始上非惟九重難之公卿大夫皆難之蜀人之切於解倒垂者亦莫不難之而公見定守篤慷慨論列不少折累書與同列辨難

尤力汔如始議官糴民槩價與時爲低昂遠邇謹
趨輦負繼屬聲氣不動而軍餉給九州數十萬戶
踴躍呼舞始知有生之樂家祠人祝之迨范公入
參機密上問蜀罷糴可久行否范公奏以身保之
上悅曰是大不易得繇倉部郎再進太府卿且嚮
用遽以不起聞當宁悼惜特予遺表恩庶官所未
有也前是倉部綸言有心乎愛民朕實知之之語
越五十年其子昌州守瑀掇知心名所居堂侈聖
賢際遇之盛示世世萬子孫以無忘先烈書曰亦
越文王武王克知三有宅心灼見三有俊心以敬
事上帝立民長伯又曰文王惟克宅厥心乃克立

茲常事司牧人以克俊有德夫知人以知其心爲
難人主之心存乎民而後能知人臣愛民之心知
人安民所以爲一事也方公領餉事上未嘗識其
面朝虛相位中莫有主之者蜀世將怙勢各權兵
竈虛實不容問而制閫初亦未即孚是議章前後
上者十有三璽書下尚書報可者八變而通之以
盡利至于今嘉賴公獨特上之明上獨知公之誠
也此誠感動豈一日之積哉自爲小官所至以惠
利著西憲邊防十事之奏權牧馬政七害之奏興
元歲早免糴關隘守兵之奏康濟一念動切諸身
指陳利病明白洞達上夙已心屬至此簡知益深

雖媚將詭辭沮撓而宸翰勞問至再洞然不疑
臣之際毫髮無遺憾矣趙充國奏屯田便宜每上
輒下公卿議臣初是其計者什三中什五最後什
八宣帝既報將軍計是猶兩從破羌彊弩之畫未
爲深知其心也上之知公曠千古而一遇者歟然
公之遇合天也非人也初建議罷糴關內梁洋諸
郡旱而雨關外階成西和鳳皆大有年糴價大減
天知公之心矣此心上通於天而天知之君其有
不知者乎人臣患乎此心之不盡不患君門之遠
天之高也某日宦于蜀賢士大夫多爲誦資政黃
公裳漢中行及罷糴行謂雪山可磨汶江可竭
陵之德公之功不可謏且感今懷往未有已也昌
州以廉寬守家法進進爲時用嘗寮有雅好輒爲
粹所聞以詔丞彝鼎吁王之蓋臣無念爾祖世光
顯且矣夙興夜寐毋忝爾所生尚益懋之哉

於潛縣廳題名記

六飛都吳邑加重令加選題名昉於隆興甲申續
於嘉泰癸亥前後著見者四十有二人石近燬紹
定戊子續記自見大夫始舊聞放失矣九華程君
燾至精敏而峻絜大不弛網細不漏目民隱吏隱
蒐獵幾無遺治行疊疊逼前獻垂蒲討諸故府合
題名三爲一以存往而詔來且追書唐及國朝

全盛時賢令十一人于首高山景行不以耳目所接爲僅足也然著記未免於闕文遺風或得於慨想東晉虞府君嘗爲吾長吏甚有遺愛志逸其名託錢武肅乾山濟安廟碑以傳邑自漢隸丹陽以來爲令者知幾人傳者能幾否固幸其不傳藏而不幸不傳者可勝道耶夫士君子立於世豈以傳而爲善不傳而遂已也未有爲善而必其傳也亦未有善積而名不傳也其亦爲所可傳勿爲所不可傳而自幸於無傳也雖自幸於無傳而根窳相形其溢於邦之耆老俊秀牙頰間者未嘗不並傳也書曰康乃心顧乃德遠乃猷裕乃以民寧司民社者尚監茲哉

臨安真相院修造記

佛以大圓覺爲伽藍非劫火所能壞也而麗於有爲之迹者則有壞有興東天目之蘿山翼若翥鳳其下爲白佛院治平中賜今額開禧丙寅牘殿廬堂廡院額僧牒俱火唯門閤存主僧清皎與其徒智月收合餘燼集諸弟子詔之曰魔事至矣吾徒能以佛事處魔事何不濟汝文禮禪學而儒行名在諸公其往復吾額汝宗會銳於世故其往復吾宇汝蘊湘其相會出世間法不離世間法一念精進勝妙現前因相與信受而退明年冬禮部給頒

據嘉定庚午春僧堂及廊廡成已卯春二月己未
佛殿成紹定戊子冬佛像成門閣鍾簾尋一新近
者倡其役遠者勸其功亡慮爲錢三十萬會行乞
于兩淮者士湘亦再披攘經營奮空起有堅忍彊
濟越二紀廼迄于成而智淵募建善法堂亦就緒
佛氏願力歷三生如一日閱累世如一人名山勝
壤塔廟之崇閣樓觀之傑麗切雲漢亘崖谷人力
窮矣猶以爲未足大抵非一手足之爲也皎之徒
五世相承人人以飭壞植仆爲已責志念之烈不
爲飢渴寒暑變穹如奧如繚如闢如燁如卒不愆
于素世之貴家大室或不一再傳而臺傾地荒弗
支弗治沈沈渠渠境變主移何肯堂之難耶會謁
余誌興造顛末因著所感如此若夫三十二相孰
相爲真孰相非真以是因緣而爲說法有汝師滅
翁廣長舌相在余不能也癸巳春正月甲子於潛
洪某記

竹洲記

盤洲野處之族子天成士龍蚤力學從予游頃因
肄業之舊治竹洲以寄其志洲與崧君山拱揖一
水縈紆琅玕萬箇著亭其中曰令寒曰吟風弄月
怪石森植効竒表其尤曰雲根曰倚天曰華山孫
洲之外曰樵谿曰碧澗循澗而北行百許步直在

子峯之麓有泉甘冽曰石盆衡從可七八尋泉
小山橫陳斷厓絕壁勢敵千仞飛玉泉漱其左松
風巖敞其右高槐老桂參錯蔽虧風雨晦明姿度
百出每藏脩之暇坐清陰以數息頽寒泉而照影
春綠晴哢機觸神會無一不可人意而洲獨以竹
著右竹也竹之得於天者與君子同其直壓之顛
顛而不折也其剛暴之栗烈而不移也其虛飽之
風露而不盈也苞之寸茁而有干雲之勢則其氣
之不可遏叢之衆卉而無徇世之容則其德之不
可狎也而於水石爲最宜因依映帶魚魚翼翼如
家人拂髦櫛綻端鞞佩紛林立於嚴君之側如冠
者童子試春服於舞雩如子大夫射策于廷如百
辟鳴玉而朝御史執法之在旁屏氣若不息如三
軍衿甲而陳大將軍旗鼓中立坐作進退唯其令
也故有志於久大者取焉淇奧之竹以猗猗言識
者謂即淇園之竹其詩曰有斐君子如切如磋如
琢如磨夫如切如磋道學也如琢如磨自脩也自
脩之與道學何取於竹士龍家有老斲盍以是質
之寶慶初元中和節古潛洪某記

此君軒記

軒舊麗寂照精舍東坡以倅行縣爲賦不可居無
竹之詩隆興初徙于縣治袞繡堂之東開禧間

重建寶慶初元避 上嫌名令桐江方侯熙易以
此君仍用坡詩晉王徽之語也君者有德位之尊
稱自萬乘至子男百里之國皆稱君以君名縣齋
之竹其尊與君百里等然竹之君以德言百里之
君以位言知君之所以爲德則優於君百里矣易
之震爲虜爲蕃鮮爲蒼筤竹其於時爲春春物之
生虜而蕃鮮莫竹若孤根峭植不數歲被山而雲
戴角爾粟曾幾崇朝已干霄而槩生意勃勃乎其
不可禦故觀造物生生之德亦莫竹若也侯政成
心休日與君對念吾民生齒之數能如君之蕃乎
生養之具能如君之阜乎襁褓鞠育能如君以夜
所息與沆瀣俱升黃髮婆娑能如君什伍相佚少
長相扶老歲月飽風霜而無蕉萃之色乎以君之
生觀民之生侯於此不徒名也吁人未哺吾不可
以獨飫人方臞吾不可以獨腴對此大嚼奚心哉
說詩者以意逆志可也紹定元年正月日里人洪
某記

善圃記

余官太少時被檄行青城道上夏氣淑清空無點
雲西望群巘嶢碧雪山出其顛霽霏留滋朝陽映
明濯濯如白夫渠擢立萬葉間可攬也入山秀蔚
而邃古與廬阜琅琊相上下宿丈人觀規犂明

儲福挹三十六峯之勝雨不果迄今旁午于懷
夕新崇寧丞楊君平叔過余玉泉山麓自言先吏
部墓距峯七八里而近現真馬溪兩山夾峙小溪
中貫竝溪原谷曠平宜耕鑿因廬焉屋後竹可二
十畝左右臯壤鱗屬葺爲小圃樓溪山爲我有入
園畦蔬環小莊曰壠畝世田可耕也稍行結屋三
間曰讀書處世書可讀也又稍行循淪漪爲蓮沼
亭其中曰君子讀書求爲君子也又稍行桃李與
梅錯植小亭曰託根耻獨爲君子也出與世接和
則易流屋簷簷深處曰節堂直哉清矣清易至於
隘必輔以通循曲水闢徑曰通蹊蹊盡海棠

本堂曰天富貴修其天爵非以要人爵也少翁
亭柳陰曰早歸來達當知止窮亦不失歸根復命
之理也能如是然後不遺臭於世築臺叢桂旁曰
垂芳以厚終也最而名之曰善圃志獨善兼善之
義巧爲我發之余方夢想西山聞君占勝其下喜
如從步屨於煙畦露徑間回簷衆峯之倚寒碧燭
向跋不覺膝之促因爲言易九卦示所以善其身
十三卦示所以善天下天下者身之推也善天下
之難未若善其身之難故於九卦反覆致意尤深
君躬耕力書汲汲君子之歸羣而思立介而思通
進而思反一朝夕而思百世知嚮乎明善誠身之

學矣然非名之求之貴而實之踐之貴非修之終身之爲多而敗之斯湏之爲不少日用飲食之細家人唯諾之常暗室屋漏之密所謂獨善者在是而兼善者亦在是夫豈可以異言哉吏部公蚤以文墨表西南入爲名郎權臣曲意鉤致正色卻之其於善身善天下之要體認熟矣而推行未究也君能於著存之頃循而進之使充實輝光衣被丘園花竹魚鳥生意相續九原之眉信矣平叔竦然拱立曰敢不勉請書以爲圖記歸而刻諸石紹定四年春正月甲午錢唐洪某記

東山婆娑巖壑記

婆娑巖壑者何鄉先生吏部俞公讀書處也一下趨于臨安穹爲雙徑奧爲大滌洞崛竒明邃爲九僊玲瓏及東西永安山其鍾爲人物唐季光啓中錢武肅始以功名著越百二十餘年有郎工部出又百七十餘年有公卓犖相望爲名法從山川英靈之氣大氏屯固蒙鬱蓄極而後發夫豈易然也哉公家西市距東山里所少時屏人事窮年藏脩山中學成一舉冠天下後每解官還里輒抱書山房繹其業講索益精詣益深論著益雄古四方秀艾樞請屨滿緇徒可與語亦泊然與爲莫逆交軒宇佳處丐一語品題未嘗不笑領也公即世忽

忽二十年僧老死且盡獨主塔了仁應門業淨趣
明澹寂如止水撫風物之蕭疏愴耆舊之凋落以
公平生最愛環翠之勝因葺閣下爲堂以祠公擷
疇昔所賦名之且悉疏詩文于壁林巘蔽虧花竹
深映與窳堵相近遠儼猶昔也公儻騎雲馭風挾
僊人左元放之徒忽去倏來乎夫出處之義大矣
靜者常得之艮爲山主靜而動靜不失其時其道
光明雖動未嘗不靜也公方昌羊空谷燕坐而山
月上長嘯而林華墮閉風霆閣雲雨人莫窺其涖
及出而施之詩書仁義之澤滂葩淋漓而春萬象
風節所存殆有駭濤怒風日夜春_{所不能}

身_在禁闥乃心清泉白石間蓋處亦靜出亦靜也
綸巾一壑目擊道存山顧不重耶晉謝太傅高卧
是山石室濬谷之趣自謂伯夷何遠悠悠千古此
意惟公識之故併圖其像以慰山靈之思云門人
洪某記

餘杭重建縣治記

餘杭茗雪之津會故冬予奉老親行雪上諸山扁
舟循茗谿而下間登岸從牧翁漁媪語人人夸誦
吾今年方壯而識老政出清靜民曾不省有官府
也因以野服謁訂所聞令肅客于承舍起訊之故
曰縣治舊占溪南後徙于北宣和焚於睦寇江今

表重建建災焚於金寇張令永嗣又建閱年百餘
浸淫穿蠹凜乎欲壓圖撤而新之治寺吏民之耳
目非他役比故不敢不勉予退而心念是邑近在
畿內地望非不枵然大也而土薄水淺十日晴則
告乾三日雨已相戒爲溢備民以故亡蓋藏而令
以負租督過者十七八彼茆于是豈漠無壓焉之
懼哉所壓有急於屋者也見大夫以朝士來寧久
此苟可撐扶以了歲月何新爲新之寧不勤其民
而自爲紛紜耶未信潰于成也越數月若人過予
門曰縣寺成矣治事之廳退食之堂宴息之室崇
樞邃闥表裏中燮發地得中雷遺跡位置面勢且

還其初矣屋後惡太冗莽鴟梟狐狸嘯醜舞泣之
地薙翦不留餘拓圍結亭松竹伍伍氣象一新矣
而田里晏然罔聞知嗟夫縣無劇易視令爲劇易
弱者以苟偷爲安皇恤我後強者惟力是矜一役
之興萬感之乘也於此能於政休俗暇儲材庸力
以植壤起仆使吏治尊民詹聳而一毫不以勤其
民至斤圭田再歲之入以食功可表也已惟昔聖
賢道化之盛有本末而無內外其用力自相在爾
室始蓋萬室之治不如一室之難也言偃宰武城
澹臺滅明非公事未嘗至其室是室之嚴所親必
直諒所講必正大所踐必誠敬詖辭詭行姦聲

色無一得以搖吾之清明而弦歌之化行矣令其
進於是乎役起正月己未訖五月癸丑大尹詳定
戶部侍郎余公佐其費爲多令公族名希磐以進
士試刑法中其科嘗爲大理評事云紹定癸巳秋
七月甲子潛山洪景記

鎮江府學田記

三代學校與井田相表裏量地以制邑度地以居
民食足事時安居而樂業然後興學養在教先也
然比閭族黨聯合保受而教與養已並行五家之
比積而至於二十五家之間門側必有塾衆庶所
聚以里居之有道德者爲之師是入於塾而學也


秦將出民里胥坐於右塾隣長坐於左塾畢出然
後歸是出於塾而耕也出於塾而耕則周旋乎同
井之田入於塾而學則薰浹乎同門之訓養之所
至教亦至焉初未嘗去里巷違父兄以爲學而人
人有士君子之器自塾升之黨庠遂序國學官而
祿之不勝用矣王道衰井田壞學校日廢漢除秦
禁士始散出以求師自是經生學士傳業寢蕃大
師衆至千餘人博士弟子貢之外未知何以爲養
東漢儒學益盛精廬所建羸糧動以千百者名高
義開門受徒著錄每不下萬人蓋人自養而自學
矣士生三代之時教且養一出於上生三代之後

廼自養而自學是後世之爲一古無恠乎人
材道化之不古也 國朝以崇儒右文爲一道德
同風俗之本上自太學下至郡縣學莫不教且養
田不井授而庠序之盛不減三代故其養爲難京
口郡學之田在金壇湖澤間爲多經界行於潦浸
之後以茭葑地定租晦出錢僅二十餘歲久茭葑
爲膏腴而租猶故官沙諸莊在江渚者又日腴於
潮以故食常患於不續歲己丑今兵部侍郎趙公
范爲守有以金壇田告者檄官核其入每晦俾量
出斗租以澹士事未竟會邊遽移鎮維揚而軍器
監丞韓公大倫實來視校官墜地首經葺之民聞

風欣然願輸大約山土田以晦計一畝五千一百
有奇歲增米以石計九百二十錢以緡計九百五
十四於是廩有繼粟而寢處有筦簞几席之安沙
田之可捍築者亦次第集事郡文學羅君聞慮異
時勢攘力劫乾沒詆譖之無以爲父請記之孟子
曰無常產而有常心唯士爲然士之異於凡民者
以是心不爲飢渴害也然非講學不足以窮理非
窮理不足以知命非知命不足以養心夫繫於天
而無所用吾力者命也循乎天而無往不惟天之
聽者所以致其命也吾知脩吾身行吾義而死生
禍福之在天者一不與知命自我而立也以此觀

貧賤雖祿萬鍾食方丈不足以易吾簞瓢之樂所
養豈不浩然矣乎而職於養人者不當以是論羣
吾民之秀於學欲使鳶飛魚躍於作成之下以長
治其民而壽吾國顧未免養之有不澹焉而曰士
有常心不爲飢渴害也其可哉然則二公封植學
校之意學者不可不承來者不可不嗣也

平齋文集卷第九



平家文集

十二十二

漢	一〇二七七	一七四	六二
冊	七	二	六
冊	七	二	六

別-58-8

平家文集
八

内閣文庫		
番號漢	10277	
冊數	12	5
品號	3	1



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



Kodak, 2007 TM, Kodak



国立公文書館
National Archives of Japan

糊などで貼り付けられている部分がめくれない個所があります。

原本の文字など不明瞭な個所があります。

綴じ部(喉部分)の文字など不鮮明な個所があります。

平齋文集

卷第十

平齋文集卷第十

序

楚伴榮登義約序

禮賓周制續食漢法士未嘗爲春糧之謀科舉設而待士之意衰薦名春官至有貧不能行者亦有婁上而索其家者遠方皆病之番江去武林餘千里歲當大比相與哀金俟同盟薦送之多寡均以給費嗟乎床頭金盡壯士失色囊無一錢羞饑萬態彼蓋未知道者吾儒讀書萬卷可敵猗頓之富何至預以行橐不充爲憂是舉以義爲勸亦唯相期於功名之會而已然義利相去不能以寸焉

漢章文庫

舍有舜跖之分平時燈窓議論務以道義相磨礱
至利害迫之小則賣友大則賣國視所學爲芻狗
者多矣諸君聯翩青雲致身富貴其毋忘齏鹽時
後車十乘從者數百其毋忘聚糧時一貴一賤升
沉不齊其毋忘同盟時能守是約斯可謂義皆曰
能遂輟萬錢爲之倡嘉定三年正月望日錢塘洪
某序

送何龔父序

夏至後三日龔父歸閩訪予以別飲之酒且告之
曰君子之學進於靜爲難靜者誠之復性之貞也
聖人定之以中正仁義而主靜學聖人者必以靜

養夫中正仁義之所自出蓋人生本靜物交物引
之則靜者動動而無以制之愛惡情僞互相感觸
則橫流而忘返靜所以制夫動也而靜之功非可
以驟進朝省夕察日磨月鍊用力於惟危之地如
馭駢馬如防潰隄如治百萬之師使志足以帥氣
而氣不爲非義餒在我者立在物者靡慾心平而
躁心釋靜之功進矣靜進則內體純固而清明廣
大生焉清明則天地萬物之理皆會於吾誠廣大
則方寸之運天地萬物皆爲吾用而道在是矣易
六十四卦乾坤之外其本體以道言者惟復與艮
復之動隱於至靜之中故曰反復其道艮之靜立

於羣動之表故曰其道光明道末有不自靜之者也參之魯艮顏子之如愚復聖門之正傳以此龔父資簡茂近於靜其入道爲易澄心以觀我平心以觀物一敬主內萬想不搖山光凝而白雲度野水空而庭草碧悠然意得表裏俱融所到詎可尋尺計哉予方習矣弗察乃以告吾子它山之石可以爲錯朋友講切之義也龔父勉之異日將於是乎觀所進

於潛洪氏譜系圖序

洪姓有兩出一避唐孝敬帝及本朝宣祖諱易弘爲洪一伏羲神農間共工以冰德伯九州其子勾龍爲后土後裔封於共爲共氏漢末避仇益永爲洪吾宗共伯之胄也聚族天目下以東洪名其村無慮六七十家耆舊相傳始祖自四明挈家奉母來今西莊下擔墓猶亡恙每歲除家祀所謂渡江祖席地用古禮而所徙歲月漫不可考然自始祖至于今不翅十五六世一世三十年當是唐中葉徙居於潛谷口矣洪望熈煌郡其散見於纂記多占籍東南吳廬江太守矩宣城人唐集賢學士孝昌舒城人翰林學士侃仕南漢參知政事昌果仕南唐昇元宗譜一侍御三尚書則鄱陽三洪之遠祖也得姓以來鄱陽爲鼎盛而在潛之洪四五

百年間種德執善源深流長曾未有顯者豈聞崖
僊之風以肥遯爲高歟抑名山大川英淑之氣有
待而發蓄雲閉霆然後大沛厥施歟紹興己酉裔
孫珏首考世系派別爲圖藏于家其後斌又采之
爲祖宗諱第圖訖于己卯去今六十八年支葉益
蕃不可無紀余自郎曹罷歸地偏日永因彙粹而
續之凡力田以肥家從戎以世宦讀書爲文以名
場屋皆倉監公長子仁朗之傳吾所祖也故詳仁
蘊之後數傳而遂微故老不存舊聞放失未免間
闕文以俟質訪夫能言其祖郊子見師不識其先
籍談取誚肖貌于兩間者不可不知世繫之所自
出知所自出則知根幹華葉同此一氣自葉流根
不容間斷春秋烝嘗以序昭穆而謹終追遠之意
存歲時會聚以親族黨而乖爭陵犯之風息朝夕
講磨修飭求爲善人君子之歸而無忝於爾祖此
圖蓋亦風教之助云寶慶丙戌六月庚寅十五世
孫某序

豫章外集詩注序

天降時雨山川出雲故嵩高烝民之詠不于人物
之盛而于其生我列聖以人文陶天下學問議
論文章之士莫盛於熙豐元紹間其生也類在
神文朝如詩家曰蘇黃曰黃陳蘇公生於景祐陳

公生於皇祐而豫章生於慶曆天地清寧日月正明稟於氣者全也公得清寧正明之全氣氣全而神王挾豐隆騎倒景飄飄乎與造物者游放爲篇章超軼絕塵獨立萬物之表坡翁蓋心服之而後山師焉其集嘗擬莊子分內外篇外集如韓淮陰驅市人背水而戰暗與兵法合內集如諸葛武侯八陣奇正相生鬼神莫窺其奧彙分之意嚴矣君子之學日進而日新日新而日化進則人新則道化則天逝者如斯不舍晝夜正以是也文與詩亦然論詩者不泝其始無以知其進而新不極其終無以知其新而化內集斷自入館以後極其終矣

外集起初年溪上吟泝其始也眉山任處士騷天成擺落科舉之累真積於學書無不覽愛公詩若嗜欲然以內集有任子淵注因注外集十二卷攷年譜以推出處用事必求其意用字必探其原勤且博至矣或以詩嘗經公手刪而疑其多愛然使學者盡見前輩少壯至老之作以觀日新日化之功雖多不厭也子逢博習有家法方注詩時兩髦耽耽檢書捧研領退而學詩之意今以名卿守蜀白首矣懼父書無傳力自讎校鋟而公諸世萬里信來俾序之某晚出未闢其樊何敢贅樓攻媿謂宋宗儒摘阮歌戴道士彈琴詩不知何以分內外

當有能辨之者余聞李衛公好惠山泉置驛取水
有僧言長安昊天觀井水與惠山泉通雜它水十
餘年試之僧指其二曰此惠山泉也文饒爲罷水
驛欲知內外之辨者請以是觀之

桂巖雙蓮圖序

西風入簷涼蒲巾席紫水何君器之以嘉蓮圖來
示云大兒自任舍桂巖沼中所產也前是庭砌嘗
長異篁今復有此鄉之耆耄雋艾相與夸詠以爲
瑞懼弗克當也子以爲何如余撫圖太息言曰深
哉造物之意也鳴鳩在桑其子七兮淑人君子其
儀一兮鳴鳩之哺其子朝從上而下暮從下而上
均平如一君以義方名家以厚德燕後男子子四
叔仲季連著聲科級而伯末也伯有子亦復蘄然
露穎於場屋派義方之澤蔓厚德之慶猶鳴鳩晚
哺已徧於下方進而上及固有開必先乎夫英華
者和順之發也馨香者忠信之達也充實輝光者
善美之形見呈露不可遏者也君觀是華根培而
榦擢歧芳而趾榮天理人事之相爲符昭昭也惟
無必其在天而後知天之可必也年月日序

春秋說序

帝王誥命訖於平王國風變於黍離聖人傷王者
之不作因魯史修春秋以奉天命而立人極夫天

命流行於人極之中無一息間斷人惟不知吾心
有天而外求天謂吉凶禍福天未嘗定往往無天
而動於惡然天雖有時而未定終必有時而定天
者定則人者屈此人極之所由立也此春秋成亂
臣賊子所以懼也彼亂臣賊子惟利是計豈懼夫
空言之貶身後之辱哉懼夫天者定而人者屈失
其所以爲利也故凡犯天下之清議冒天下之大
罪能逭諸一時不能逭諸異日能逭諸其身不能
逭諸其子若孫人誰無愛身愛子孫之念知天定
有不可逭則欲動於惡將有所懼而戢此撥亂反
正之筆所以有功於人極也且易春秋在魯皆所
以司天人之契人欲窮而天理滅其卦爲剥春秋
二百四十二年純乎剥者也以齊威霸天下始末
求之每四十年當一交陰愈進則亂愈甚盟宋之
後晉以天下之權授之楚而大夫專盟諸侯皆廩
廩乎贅旂之危五陰之剥成矣其末又以天下之
權授之吳吳楚與越參立而交橫大夫各朶頤其
國禍亂及矣而獲麟於西狩亂極必治安知無王
者作此碩果不食剥所以不終於剥也春秋以傷
王者不作而始以幸王者復作而終以魯聖賢之
澤未泯一變可至道而託之以詔萬世天道至教
聖人至德備見於行事斷斷乎循之則治違之則

亂得之則生失之則死信人極非春秋不立也余
自考功罷歸杜門深省有感於聖人以天治人之
意作春秋說

兩漢詔令序

天道不言而四時行聖人不言而萬化成言非感
人悟物之本也審矣二帝之典三王之誥猶不能
已於言誠在言前也言出於誠雖言而忘言漢世
至誠之學不講皇極之訓茂聞而一人志慮形爲
播告大抵出於手製天下猶得以因其言知其意
夫言之不文行之不遠渾渾灝灝王言之體也漢
上接三代統緒其文猶有爾雅之遺人主天資有
高下躬行有純駁識量有廣狹政事有得失固不
容槩論而以仁立國之意丁寧懇惻四百年猶一
日至先主孔明之用蜀一時詔勅亦能使聞者爲
之興起豈非兩漢之澤未斬歟孟子曰誦其詩讀
其書不知其人可乎是以論其世也此書爲尚論
其世作嘉定癸未冬甲子於潛洪某序

送程叔運掌之湖南序

秋風動容木葉欲下眉新進士叔運程君過我東
山將歷沅湘而南征愀然買酒酌之曰香草佳木
隨地皆產而莫盛於湘之南湘南衆芳所在杜衡
江薜夫容薜荔木蘭若芷荃蓀椒桂不可一二名

而莫盛於蘭蘭有國香人服媚之初不以進而榮
其生深林無人自芳亦不以退而辱騷人所以反
覆深致其意以其似道也故紉之爲佩折瓊枝以
繼之而求襲其芳澤是芳發於身達於家漸於國
以及乎天下薰蒸乎兩間流被乎百世曾何負於
人哉而服艾者謂不可佩人心嗜好不同乃爾於
蘭庸何悲委厥美以從俗而與惡草俱化則蘭之
悲也然蕪沒於蕭艾之中可蔽其芳不可奪其芳
故曰佩繽紛其繁飾兮芳菲菲其彌章又曰惟茲
佩之可貴兮芳菲菲其難虧其根於天者蓋終始
未嘗爲時俗流從所轉也蘭有數種有澤蘭有石
蘭有一幹一花之蘭或秀於春或粲於夏而發榮
沅湘者紫而尤馥見於秋爲正秋方僚慄慘悽萬
卉溘然如戰敗無人色綠葉紫莖表表獨芳其可
敬也夫坎維心亨困而不失其所亨此蘭之所以
似道也君欲進乎道盍於蘭乎訪之且爲我歷訊
衆芳無恙攬涕延佇未知九畹百畹之誰屬也

嬾窟詩藁序

錢積

祕丞樵李錢君子正與余好嘗從容論詩喜稱仲
氏慶善賦詠得回谿老人之傳恨不及識也子正
即世十有五六年其猶子巖友以嬾窟一編來曰
願徵福于祕丞叔丐爲先君子發之余愴然追往

不能已因念詩亡而離騷作騷之憤世疾邪蓋出於小雅之變後世之詩又以出於騷爲近雅時觸乎所感事拂乎所遇託物引興以寄永慨紆餘竊眇激揚頓挫有不盡之思而詩工矣然皆變小雅流風之遺也知大雅廣哉熙熙乎之體幾何人哉慶善嘗爲長樂宰施不盡學其見於詩凡騷人感槩不平之氣憤鬱無聊之情一無有陶寫性分惟澹然樂易之歸江山之平遠風月之清明草木魚鳥之幽閒自適皆其神氣之動德符之充也廣大而靜疏達而信者宜歌大雅其必有會乎

題跋

龍州免運糧夫碑跋

蜀自開禧佳兵以來調役婁矣龍之民獨共其二平時家出丁壯畚上十關五寨以扼氐隴有警則以賦授役霜飭雷腹腐奔魚貫飛輓于關表間顧更厚征之其民重困有懟而無告制置南海崔公都運合陽趙公聞而惻然曰不堪命矣嚴爾戍寬爾轉饒自今其勿與山窮水盡之邦刀耕火種之俗始有生意誠求之也詩曰民亦勞止汔可小息毋縱詭隨以謹罔極敢告諸來者嘉定甲申五月旦日

易齋詩藁跋

詩無定鵠會心是的仲可謫居二十年自放於詩多警策其賦梅有天不能寒獨有梅一涉春風不足奇之句讀之至此悵然久之曰其有分寒餓也耶余於此有會其亦有分寒餓也耶因書卷末

崔文昌書翰跋

爲黎監丞伯登作

蜀輿鬼分野多鬼術辛巳

瑞慶節有日者自益

昌過少城竊詹菊坡老先生於大慈寺蒲散所退而謂某曰帥嶺南古佛西蜀福星也至節前後度劍即辭過崇寧謁德升曰賢大夫旦夕入益昌幕時宣間猶無恙甚疑之已而至節後果度劍德升

尋入幕以縝栗緯恢博以簡靜翼方嚴從容論議如正志審固之鏃劃然而破的如躊躇四顧之刃然然而中窅如鳴和鸞逐水曲之馭安然王良造父之手而六轡如舞也用能起久憊之俗弭紛集之變而遂與同升賓主遇合固有數行乎其間乎夫以朝廷信臣由一路帥四路若可億揣其府初開求士於叢英旅雋之中而數已先定人其可萌一毫券外之想乎因觀菊坡手帖有感敬書其後

俞拙庵偈語跋

士君子平生學力最可驗於啓手足之頃曳梢搖之杖易華眈之簣蓋安之以爲常而不以爲異也

拙庵居士業儒好脩以拙自喜拙則靜靜則平平則澄而明理明志定不爲氣所動故能無怛化病革家人環泣撫勿泣命子德藻條研濡筆手書四句偈以訣神宇凝正鉤畫勁峭實踐素履絃攝呈露坦然以方寸遺子孫非學力之驗耶至此然後知斂弄精光於百巧者之不如拙

陶同年崇詩卷跋

某與宗山同壬戌進士甲申冬同除祕書郎迓之江上投分日密乙酉秋某去脩門未幾宗山亦去時上方鄉用舊學何落落獨爾耶宋廣平賦梅花疑非鐵石心腸人海棠詩近之矣九原莫起撫

卷潛然

彭忠毅謚勅跋

爲董景揚作

紹興間顏邵以其祖魯公所自書告進上曰人皆有一死或輕於鴻毛或重於太山處死爲難耳忠毅彭公亦善處死者也守衢日方臘陷歙睦杭衢介于三郡賊勢張甚獨與郡僚段處約守城城陷罵賊以死有殺身以成仁公之謂矣公伯氏尚書元祐紹聖正人壻余御史亦以直聲聞天下一門氣節相尚輝映千古景揚公曾孫壻得吳傳朋所書謚勅於其家故篋猥釀中寶之如天球珙璧其知所尚哉年月日某敬觀于朱陀聞復閣

家朝南避僞回任微跋

開禧丁卯之變蜀士有死之以爲忠者有去之以爲義者各行其志也吾朝南其去之以爲義者歟夫死生命也去就義也惟其委死生於天而後能全去就於人易曰君子以致命遂志朝南以之

徽廟草書千文跋

臣恭惟 徽宗皇帝聖學天縱粃糠姚姒萬幾餘閑遊戲翰墨元氣淋漓不擇地而施梁周興嗣所次千文遂被異世非常之遇 高宗皇帝中興江左志在復古 列聖雲章奎畫厚募歸之東序每得宣和宸藻輒悲不自勝以故左璫慮傷 一意

多抑不進此文其一也龍騰電掣出入造化躡繚轡義前無千古甲丁護持劫燼不壞凡十有六紙悉以交龍篆章券其縫臣子述博古識真恭禱而寶襲之一日出以示臣臣聞紹興間 上知懷素千文藏董弁家命朱勝非諭指投進使此書得陳乙覽豈復求驚於野乎感歎之餘謹拜手稽首志其末寶慶初元寒食日臣洪某

高廟千文跋

經乾緯坤者典學之全功出聖入神者游藝之餘事臣恭惟 高宗皇帝斷鰲立極息馬論道緝熙光明之學追姬三五倬彼雲漢敷賁石經龍畫螺

書旁分編刻莫不大關造化細及庶務垂則于億萬世千文特凡將下陳何與大學姍姍餘閑亦復肆筆及之臣子述所藏臨智永書識以彭城瑤暉奉華印章劉望彭城或謂當時劉貴妃所得好賜楷法道潤草聖妍力神動天隨超絕衆妙視永所書可謂集厥大成金聲而玉振之矣我太宗皇帝嘗行草千文賜李至至請鑒諸石以詔方家上曰梁武得鍾繇破碑俾周興嗣次韻非也立教之道孝經百行之本朕當親書觀思陵奎藻者當以熙陵之意參之寶慶改元清明後一日臣洪某九頓首謹記

程剛愍死事跋

死生命也處死生義也義所當死直死耳君子不苟免而生也身不苟免而生乃所以生社稷也天寶之禍唐以顏李張許之死而生靖康之禍吾宋以傳李梅陳程安諸賢之死而生皆功在社稷者也嗚呼安有功在社稷如剛愍而其後莫之錄乎端平初元立夏後兩日古潛洪某

題洪崖圖

洪崖三皇時有道之士其見於隋唐間者曰張氲或曰蘊自號洪崖先生出入以髯髻五雪驢一自隨此圖是也吳興葉子淵得晁氏所藏龍眠本手

臨以見遺老人戲題云先生固清高弄拙反成巧
一人御六子終被雪兒炒此畫此詩俱有眼也猶
子穠弦誦之暇取所畫臨之一發輒破的老睫爲
明因識其末紹定癸巳立秋日

題西岳降獵圖

君玉以宮車遊獵圖二寄示共七紙張簾前驅嬪
御紛從來輿去馬蹴踏雲氣其精妙瑰恠縱橫變
化出天入神嘆非龍眠莫能作而不能名之轉似
都官隆山李成之曰西岳降獵圖也吾家絹本得
之康節孫邵公濟家人物部分與此無一不合獨
第七節前多馬上美人四因合二圖爲一次第其
先後以復得非兩家所藏同出一時之筆紙其創
絹其成歟絹壽止五百年紙壽千年君玉倒黃河
以洗研挹玉井以濡翰醉攬風露吸金天之晶而
賦之必有與此畫相爲壽者紹定癸巳立秋日於
潛洪某舜俞書于繡山堂

題天台聲聞十八尊者像

余庚午初夏與會稽王仲鈞同遊廬山旬餘一夕
仲鈞先還南康城余獨宿開元寺軒窓靜深毛骨
灑然夜半夢至佛殿前遇長身僧握余手而言堯
曰數句已斷於篇章之末參乎一唯獨得於言意
之外孔子子思相傳者如是吾佛亦如之孟子不

足與語此言訖而覺林月滿庭水泠泠如琴筑因
起坐不復寐晨粥舉似衲子無能會但以山中古
佛示現爲對轉首二紀矣臨安東山淨空出天台
聲聞十八尊者像乞一轉語恍然有感追前夢書
之聲聞領此必有超悟於文字語言之表者

范丞相謝表跋

慶曆中 仁宗以中外人望用韓范富共政責治
於期月間遇合之盛如此一朝欲止僥倖退不肖
而小人始側目相繼去位高平公受知 高廟前
無與比至重惜名器裁抑苟得亦罷相於紹興初
直道之難行雖盛世猶不免可勝歎哉端平丙申

正月十一日於潛洪某書

劉忠肅尚書右丞告跋

挫士氣者沽激之名壞國是者調亭之論忠肅公
在元祐初以呂正獻薦爲侍御史進御史中丞又
以正獻薦擢尚書右丞方在臺時彈奏蔡確章亨
呂惠卿安燾等靡遺餘力第知去大姦大佞以扶
植更化之盛不暇計它日之禍也使公計它日之
禍則必以無所是非可否避沽激之名開調亭之
論局面隨手變更奚待閱八年而後爲紹聖哉雖
然無鮑叔則無管仲無子皮則無子產無正獻則
安有忠肅觀此告者當有感丙申春社日於潛洪

某敬題于搗文堂

劉忠肅冗費官制擬草跋

前兩項寶元嘉祐詳定減省冗費似是進故事之類後兩項元豐頒行官制拍揮必公爲右司郎中時代宰臣擬進續通鑑於覈正吏治條曰詔於創被差命條曰上批其間頗有刪改處大意皆如所擬年月與此合 神宗聖訓左右司湏是學爲宰相良有以夫

劉忠肅遺龔輔之手啓跋

公時爲校書郎

公用韓魏公薦自江陵府觀察推官除祕閣校勘初入朝時帖也尊諫院以先生丈丈首番用名印於月次番用於名皆近世所罕見

觀劉忠肅手簡

嘉定甲申某與公曾孫爲龍州交承端平乙未丙申又獲與公元孫今太常寺主簿同朝常簿論事挺挺有祖風烈可敬也出示此軸敬書其後

題劉忠肅和洗竹詩帖

洗竹和篇與白樂天養竹記同意闢邪衛正嚴矣異時罷相乃出於所善之楊畏何蒼翳託根之深耶

觀劉忠肅所書金剛經

此必非在臺省時所書閑退中移心法耳

書諸公贈鍼醫李立之十全堂詩文後
真西山病革吳義夫自江西犇致立之視之曰鍼
有起死功未至之數日西山隕嗚呼天胡奪斯人
之亟耶豈二賢畏立之之至迫之殆耶抑立之有
天幸鍼不及施於決不可起之疾得以全其術耶
余得竒疾於上齟逾年累更醫不効立之視之曰
鍼艾所不及也知其不可治而不治是亦全已江
湖間恐有異人竒士能以竒方治竒疾試爲訪之
幸得其方以寄是又不自居其全而能進於全歟
古潛洪某舜俞

書天竺果古鏡住持歲

此古鏡磨鏡法也久後光明透徹自無待磨諸禪
莫被老行者熱瞞道不須拂拭古潛洪舜俞

平齋文集卷第十

平齋文集卷第十一

箴

緝熙箴 并序

臣恭觀月正元日 皇帝陛下御大慶殿受朝朝

退中出奎畫詔增補講讀官夫天下之務衆矣而

學爲大故二典莫先於若稽古 陛下襟道佩德

軌堯矩舜履端於始典學是崇豈特漢世重席於

正旦以華觀聽哉虚心遜志日再御緝熙延見儒

臣我冠垂紳魚雅就列九皇王帝霸之所以治天

地民物之所以立莫不聚辨居行以進乎罔覺臣

寡陋不足以望日月之末光躡升勸誦榮燭繡簡

退惟恭在責難敬在陳善輒効虞人官箴王闕謹
拜手稽首裁減一篇昧死塵獻于進讀之始文詞
骯髒而翬翬寸忠日以高明光大望 陛下伏惟
聖慈特垂采擇其辭曰

灝穹生民作之君師中立一身宗主兩儀仁在自
弘敬在自約剛在自克明在自覺蓋尊莫尊於德
性微莫微於道心正能養於蒙則如泉之始達慾
不窒於損則如澤之彌深是以大學止於至善中
庸必謹其獨準繩矩檢百爲於將動盤杆几杖
收一念於未逐惟定可以澄萬化之源惟虛可以
來萬善之益惟博易可以培人材之氣惟寬淨可
以裕民生之力五事乃饗帝之本九經實用世之
則關睢麟趾之意存則王政舉常棣葛藟之義明
則天彝植此帝王所以正心而脩身齊家而治國
彼惠而狡臨春昭陽豈不爾思伐德之鉉彼醲而
郁糟隄肉林豈不爾思傷生之鐔况淫樂者志必
荒沈湎者氣必昏前靡顧乎太華之壓後遑恤乎
滄溟之翻以四海大命供方寸之侈以百世惡名
易一息之懽胡不思天命之不易王業之至艱欽
哉毋謂天高厥鑒匪近相在爾室莫見乎隱毋謂
民卑其聽易欺鼓鍾于宮莫顯乎微故清燕而居
必如駿奔在廟之頃嚮晦而息必如辨色抵朝之

時所觀貴大母枯於隘所慮貴遠母局於淺母功
之微維秀驕驕母利之涸維木濯濯母名之慕而
實之棄母才之尚而德之遺母任賢而貳母去邪
而疑母愛直而疏母喜正而違事母輕於舉而中
畫令母易於出而遽移優游則威權遷姑息則紀
綱壞牽親故之私恩則虧人心之公玩左右之小
慧則累君德之大以至丹偏重則失平藥泛試則
徒快朝不和何以和於野內未治何以治乎外是
皆有國者之通患願治者之深戒於戲道自學而
入治自學而出思王度於祈招知稼穡於無逸惡
旨酒好善言三王四事之樞要放鄭聲遠佞人四
代禮樂之根極行必力行積必真積小臣詔謹敢
告執戟

好軒箴

典午稱好不與物忤其園外方中者歟稽之三代
直道則未也子斐名軒之意不可不箴

人心如面醜妍異姿譽醜爲妍嫫突西施世道如
樂雅淫異曲指淫爲雅韶遜桑濮離婁師曠惟明
以聰阿邑莫辨塗耳目同如好好色大學所貴懷
我好音詩人取義理有攸當孰謂其誣而或反之
非欺則諛以言餌人君子不予隱惡揚善聖人所
許侯魯男子善學展禽欲師德操斯軒斯箴

銘

可齋銘

子斐佳公子篤學好脩詞葩而履方以可名齋玉
堂老仙記之某贅爲作銘

仕止久速始終條理中清中權我則異是繫聖之
時天地相似賢希乎聖考祥視履諂驕不作端木
所喜簡以自將子桑伯子事稽厥宜不啻足矣欲
進乎道尼母以杞樂而好禮如金就砥敬以行簡
如弓矯矢任重致遠其謂斯士盤洲有孫玉雪蘭
芷垂髫拱立一語提耳挾山超海不可則止我與
聖賢相去半跬爲所可爲如詘伸指勿謂僅足稅
駕旋軌光昭前聞銘在齋凡

三研銘

瓦得之梓潼令端得之五羊醫子石得之天目黃
冠參銘之

艮其埴坤其闕坎其洫蔡而墨之離其食

金聲而方玉紉而章洸洸乎泱泱乎三代禮樂之
藏

割黥龍之膽剖玄鵬之卵霆耶風耶此其筦

螻室銘

室在閨復閣衡維摩方丈五去一從半之三面楮
屏闢左牖以受朝陽之光攷禪作也余爲名以螻

今二十餘年矣而閑居讀書其中似非偶然者不可不銘銘曰

天地四維八尺之機日月兩耀八尺之表中立吾身宇宙而人心統元識胚暉太極有室衡尋此身此心如璣之幹如表之甬屏密牖明體舒氣平其處也眇其運也杳萬古在前後千億年六合爲大微一塵芥悉受以虛不欠不餘溥通妙用縱橫錯綜屈必有伸所致者神伸必有屈所養者德屈伸相生天命流行維欽厥止青山在几

端齋銘

王孫保之丞臨安有陳靜梅與余篤相好也蒲別爲言先大夫蚤以端人爲過庭訓荏苒四十餘年矣心之所存身之所履未嘗不準於端日營一室皮父書其中將歸而熟讀益求所謂端者子盍爲我發焉余懷然有感於切磋之義遂爲之銘曰
猗君子兮身端行莊以端爲符詔子直方義以方外內主乎敬敬勝百邪何適非正容色辭氣所貴者三日省厥身居與道參視聽言動所勿者四日用其力欲仁斯至富貴利達孰無是心所不可爲枉尺直尋貧賤困苦夫豈其願所不可悔任重道遠無餒則大無欲則剛萬鍾一瓢緼袍繡裳太山積雪蒼松鐵色黃河怒濤孤峯斗立維古端人悠

悠我思惟今端人尚其似之聖賢參前一室環堵
毋貳爾心受天之祜

阮逢時澹庵銘

人統氣形中涵太冲不將不迎虛靜明通物誘而
遷逐外忘內天理人慾彼進此退有醴其醴勢利
之酣有飴其美聲色之甘飽心生疾快意起競能
寡其欲自還所性盎乎春融寥乎秋清靚乎深淵
汨乎大羹脫機削械未散之樸卻紛屏華可久之
約朋來斯孚匪密匪疎事至斯應匪亟匪徐左圖
右書前槐後竹明月在池白雲蒲谷琴入希微詩
造和平神怡體舒赫胥大庭以此事先以此燕後
鄙聞而寬薄見而厚嘖委命則恬任理則真收歛
則敬警省則仁方寸寧極萬象化醇味此無味名
其實賓

龔時輔庸齋銘

顥穹生民秉彝好德本體明清實用平直耳目口
鼻此性形色仁義禮智此心知識父止父道子共
子職鄉黨恂恂閨門翼翼是爲天常亦曰帝則無
哲無愚無今無昔雞鳴而起向晦而息夏葛冬裘
渴飲飢食順而循之如水就濕背而反之如木倒
植夙夜匪懈如穎斯栗旦晝或汨如皦斯蝕秩叙
諏謨信謹稽易學爲入門敬是居域無事而擾凡

夫摘埴與時而中君子安宅體認要精踐守貴力行著習察有舜無跖經名而廬慈湖名其母大庸人墓廬曰天經名而室允蹈斯義勿問元吉

鶴巖銘

東天目支峯曰雲鶴巖雲冒其顛輒雨鶴未嘗見也壬戌春群鶴見某叨奉常第己卯秋再見子有翁冠鄉選夫豈偶然哉翁所居與巖直因以鶴巖自命昂昂中林奮爲時瑞巖瑞翁耶翁瑞巖耶銘曰

天作高山東西兩目虬潛西淵鶴盤東谷枕西之宅宅東之阿與虬委蛇與鶴婆娑鶴稟平陽維君子性清哉伯夷浩然鄒孟鶴遊乎陰維君子居顏氏陋巷孔明草廬導陽而鳴九霄咫尺脫陰而升萬里瞬息在易後天尻坎頂離葆此純白觀象玩辭

贊

老人壽容贊

徹也禪葆也僊靜也淵全也天

崔先生壽容贊

清獻之清忠定之定杭海健帆燭天老鏡

白李韓柳贊

壬午春行劒利萬山中乞漿野人家小憇見壁間

唐人像四頗有思致扣所從來主人謂探籌得之
遂售于我四君子聲名俱震燿一世俱以事貶香
山昌黎還爲名法從柳州竟爲蕉荔留太白且騎
鯨不返矣中苟無媿讎我者豈能終病之少餒焉
好我者不能翼而奮也人耶天耶戊子夏五西市
暴梅因太息爲之贊

忠南夜郎零陵潮陽地何凉凉人何堂堂如星在
天垂精耀芒隕而爲石桀立不僵如水行地茫乎
望洋激而之山歎薄淋浪不縮不張不軋不揚繫
人之鬱斯天之昌理有消息時有通塞禍同福殊
剛柔異則柔必有麗剛能自植剛窮斯返柔窮愈
窒否終則傾屯終則泣永終碩果坎終叢棘土寧
剛躋毋坐柔踣吾以四子占終於易

東山渡水布袋贊

半進半退是腎是礙且請老師放下布袋

蜀繡轉經觀音贊

觀世間音非世間音非世間音觀世間音唵一卷
旁行雙點漆無人識得老婆心

昭君贊

彼姝者子丰方變方懷我好音邦之媛方今夕何
夕而恍此見方雖然賢賢易色可也

莫愁贊

美目盼兮清揚婉兮悠悠我思室而遠兮還子授
子之粲兮雖然好德如好色可也

鍾冠之出山佛贊

聞何法來爲何事出放妙光明作大饒益

題子馨弟寄容

髯星星而氣腴眉垂垂而意舒易足而寡求危坐
而深居此吾家之少游幼輿也聽風雨於對床約
雲山之卜廬朝奉親而撰履夕課兒而讀書吾其
歸乎

雜文

兩漢詔令總論

自典謨訓誥誓命之書不作兩漢之制最爲近古
一曰策書其文曰維某年月日二曰制書其文曰
制詔三公三曰詔書其文曰告某官如故事四曰
誡勅其文曰有詔勅某官此其凡也策有制策詔
策親策勅有詔勅璽勅密勅書有策書璽書手書
權書赫蹠書詔有制詔親詔密詔特詔優詔中詔
清詔手筆下詔遺詔令有下令著令挈令及令甲
令乙令丙諭有口諭風諭譙諭宥罪有赦訓諸王
有誥召天下兵有羽檄要誥有誓約延拜有贊以
致有報有賜有問有詰又有手迹手記詔記其曰
恩澤詔書寬大詔書一切詔書及哀痛之詔隨事

名之此其目也策命簡長二尺短者半之以篆書
罷免用尺一木兩行以隸書遺單于書牘以尺一
寸選舉召拜亦書之尺一板古今篆隸文體曰鶴
頭書與偃波書俱詔板所用在漢則謂之尺一簡
詔書有真草又有案案者寫詔之文一扎十行細
書以賜方國扎牒也孟康曰漢初有三璽蔡邕獨
斷曰天子六璽皆白玉螭虎紐與地志曰漢封詔
璽用武都紫泥故制詔皆璽封尚書令印重封唯
赦贖令司徒印露布州郡詔記綠綈方底用御史
中丞印通官文書不著姓司隸詣尚書封胡降檄
著姓非故事詔書皂囊施檢報書綠囊密詔或衣
帶間丹書藏之石室策書藏之金匱此其制也漢
世代言未設官王言作命厥意猶古而討論潤色
亦間有其人高后令大謁者張澤報單于嫚書淮
南王安善文辭武帝每爲報書及賜常召司馬相
如視草光武荅北匈奴藁草司徒掾班彪所上至
永寧中陳忠謂尚書出納帝命爲王喉舌諸郎鮮
有雅材每爲詔文轉相求訪且辭多鄙固遂薦周
興爲尚書郎秦少府吏四人在殿中主發書謂之
尚書漢因之武昭以後稍重張安世以善書給事
尚書囊簪筆事武帝數十年後漢始置尚書郎三
十六人主作文書起草月賜赤管大筆隃麋墨此

其造命之原也詔御史大夫下相國相國下諸侯
王御史中執法下郡守制下御史御史大夫下丞
相丞相下中二千石二千石下郡太守諸侯丞相
從事下當用者如律令郡國長史上計丞相御史
記室大音讀勅畢遣以詔書部刺史奉詔條察州
所察毋過六條守令則承流宣化使田里咸知上
意此其奉行之序也君能制命爲義臣能承命爲
信君不能以義制命則無以使人人心不應惟命之
承故夫夜下詔書決之亟也甲寅書報應之疾也
毋下所賜書幾事密也封還詔書渙號不容於輕
出也更報單于書辭六嫌於修飾也六月甲子

詔書非赦令皆蠲除之雖反汗猶愈於遂非而稔
惑也有司毋得言赦前事所以示民信也策書泰
深痛切君子作文爲賢者諱所貴乎體之識也昧
死奏故事詔書二十三事所重乎祖宗良法美意
之得也璽書封小詔書獨下抑不可不慮其質疑
而召激也案尚書大行無遺詔詔書獨臧嬰家及
安得詔書封三子事姦隱於倉卒詐售於危疑尤
有國者所當謹察而不可忽也知此則知所以造
命知所以造命則知所以奉行矣然有不敢奉詔
者有期期不奉詔者有以死爭不奉詔者有詔數
彊予然後奉詔者猶或許之蓋所以養士氣也若

其奉行不虔則有常刑故廉問不如吾詔者以重
論敢有議詔不如詔者皆腰斬詐詔者當棄市格
詔者亦當棄市矯制者腰斬誤宣詔者應罰金令
下腹誅者論死誹謗聖制者當族謂詔書不可用
者丞相御史劾之無承用詔書意者御史奏之而
奉詔不謹者皆坐以不敬丞相被策書則步出司
農發詔書則鳴鼓其嚴如此當時猶不能盡然始
而奉詔不勤終而過絕詔命始而矯虔終而擅詔
以至詐下詔書詐作詔板僞作璽書假爲策自書
詔以授廉級陵夷紀綱板蕩而國命之柄移大抵
外戚宦官之禍闔閭稱制實胚胎之有天下者可
不鑒哉按藝文志儒家高祖傳十三篇高帝與大
臣述古諭及詔策文帝傳十一篇文帝所稱及詔
策當時會粹蓋有其書遷固必采取諸此先漢詔
遷多以上曰書固間因之一詔或二三出詳略及
用字亦有不同疑不能無刪潤高帝未即位遷不
書詔惟重祠敬祭詔見封禪書景帝紀遷不書詔
其議太宗廟樂舞制詔附見文帝紀文帝於陳武
等議謂且無議軍見於律書當亦是詔固不書後
漢詔有以東觀漢記漢名臣奏等書見於注其政
詔爲制爲誥或謂避武后諱世祖官王閔子詔附
見董賢傳曄書逸之大氏史遷所筆皆有深意固

文贍而意不逮曄則文亦不逮平固矣其假守龍陽俗古事簡因得縱觀三史哀其所謂詔制書策令勅諭報誓約之成章者凡若干通事著其略每帝以臆見繫之釐爲若干卷揔曰兩漢詔令以補續書之亡欲觀漢治者當有考於斯文

八陣圖說

庚辰秋余以太少贅丞入蜀天台許才甫偕行小至後維舟魚復灘下散策同訪武侯之遺跡霜風凜晴寒浦縮潦平沙壘石歷歷可數知其原信出於易八陣魁六十有四重易之卦也却月魁二十有四作易之畫也畫起於圓而神故却月之形圓卦定於方以知故八陣之體方方居前而圓居後卦自畫始方自圓生也壁門直表曲折翼其旁則陰陽二物握奇則有虛一之象焉世之言風后握奇經者徒知四爲正四爲奇餘奇爲握奇又徒知數有九中心零者大將握之而不知握之在何地余記步入八陣深處細視魁間平沙之上沙隱起如兩大帶直表曲折具壁門之體而微竚立環睨正居衆魁之心而虛其中餘奇所握其在茲乎況壁門東向歸峽此則其門西向涪萬出機入機又有不可測識之妙江流湯湯歲月浩渺彼石所壘不爲衝波怒濤轉移已非人力所及此持微沙相

屬亦爾儼然如新抑異矣武侯之忠上貫三極下洞萬古山靈川祇所以護存至此正欲後世即其虛實向背推見至隱而知侯之用心談古者按圖而不及睹訪古者撫境而不及察往往能言八陣之異同而大將中握遊軍外布曾莫得其指要余每爲之太息才甫出蜀今十年考訂圖說用力久而功深天機地軸搜抉呈露莫不精確而有據依其於壁門之設先出遊軍定兩端尤得諸賢未發之蘊展卷熟覽恍然如對鹽甲因發握奇居中之義以表裏之且謂吾賓主西征之不爲徒行也

漢磚考

三代墓中款識用銅偃師比干墓銅槃是也漢銅禁嚴始易以磚至晉唐亦間用磚潛人耕鑿多獲晉磚紹定己丑秋校長謝濟叔源治墓東塢得漢磚七十六面撫脫螭虎文隱起上下爲字十有四曰元康元年太歲在丙辰何適貞立墓去今千二百九十四年矣案史記歷書用太初曆太初元年歲在焉逢攝提格甲寅也元康元年尚章大荒落則癸巳漢律歷志用三統曆太初元年歲在星紀癸丑名困敦乃丙子也推至元康元年則丁巳惟通監舉要曆與磚合磚其年造志後來追書以磚證志當是元封六年冬改元用夏正建亥以後猶

丙子建寅即丁丑越四十年至元康初元爲丙辰也或疑道爲漕貞爲正謂漢仍周官置酒正周禮酒正注漕音糟又子由反固不爲無據然周漢官名有酒正宮正軍正宗正皆爲正不爲貞若月令大酋是秦官正避政爲貞則秦紀注正月爲征不爲貞漢隸之遶或從三點兼道字下畫稍長非漕明甚隸法用筆上出下鈎故與從炒類其實名道字貞立也道與貞立義頗相關以漕貞爲酒正鑿矣埤徑一尺五寸廣五寸半高二寸叔源以二見餉因考之

勸農文

龍陽萬山環合控引氐隴去 朝廷無慮七千里聖天子仁不異遠俾太守自東南來牧是邦太守山中也熟知爾父老安於山爲可樂然地勢峭隘土脉磽瘠非刀莫耕非火莫種細民終歲勤動不得一飽至煉薊以續朝夕亦良苦矣故不患爾農之不力而患乎爾農之蠹夏熟秋成公租私債未暇問長于耆保者取之胥于邑里者取之雄于閭黨者取之隸于坊場河渡者取之召集有定期哀歛有定數怒攘笑攫不厭不止其獲登于爾瓦釜土鉏有幾此農所以重苦也太守以牧養細民爲職爾無患所以蠹爾者而益力于農冬至元正

晴和鴈未盡一日得雪立春開霽其占爲豐年于
耜舉趾母後爾時深耕易耨母愛爾力母徇小利
逐末母肆小忿啓爭以荒爾業天時旣順人事又
力宜爾百穀穰穰有秋雞豚燕社歡浹隣里仰事
俯育優游卒歲又家推其秀子弟使力于學孝悌
修明風俗淳古太守與爾父老同此樂也可不勉
諸

大人里居上梁文

天目山前兩乳拱帝王都玉川城裏數間占神仙
府規摹仍舊氣象增新谷隱老人萬事任緣一生
守分焚香讀易老去之意已消把酒賦詩醉來之
興不淺雖烟雲自足於別墅而風雨不堪於敝廬
久懷問舍之心忽有肯堂之請拔貧作富搜材杞
梓之林培下就高拓址蘭茝之圃門前流水屋上
青山可容高車駟馬之歸可受玉帶金魚之謁脩
梁肇舉好語謹傳

東家近祥雲香靄紅千古溪山鍾秀氣一庭梧竹
貯春風

南水轉山回護蔚藍客有可人來剝啄掃花藉草
共春酣

西天矯晴虹臥碧溪脚力好山俱不盡朝來佳氣
與雲齊

北飛簷正與璇杓直槐邊消息我先知橘裏風光
誰解識

上積善有根天所相黃庭誦徧晝陰閑十二行窩
春盎盎

下老來倦學樊遲稼大兒鉏耨小兒耘萬頃心田
收穢稂

伏願上梁之後上慈下順內肅外雍里社歡聲之
交暢門庭慶事之常逢丹桂孫枝不斷讀書之種
蒼松老榦長存好德之容

疏

普信院重建佛殿疏

錦繡名山鳳鸞拱揖旃檀古剎龍象莊嚴幾年安
住道場一旦幻成魔境無量華樓閣謂與法身化
身報身而俱存推落大火坑乃至牛車羊車鹿車
而莫救勢炎炙手禍烈焦頭固知我佛欲放大光
明其柰尔時自墮熱惱苦風幡安在露柱俱空給
孤園千二百五十人赤髁髁以相顧毗盧藏五千
四十八卷令鬼鬼而獨存幸死灰中餘生意在有
能出一臂力便可成七寶林堯率宮天上移來妙
勝殿人間示現證無漏果歸有福人

朱陀寶福院鍾樓疏

華鍾鯨吼欲喚醒不識曉夜人老簾螭拳尚掛在

莫庇風日處蘭若之規摹古矣蒲牢之氣象颯然
要令聲外求聲直須屋上架屋夜叉木硬立脚起
飛跂雲霄金剛杵輕着手撞震動山嶽勿道爲高
力士布施且請與朱頭陀結緣

寂照寺佛殿疏

菩薩福德智慧十種宮政自光明圓滿如來摩尼
清淨一切殿亦須殊勝莊嚴瞻我鳳凰山着此獅
子座星霜荏苒風雨侵凌左方撐而右歌東未補
而西漏瞿曇彌勒已是頂門撞破虛空迦葉阿難
未必脚跟踏着實地屢舉頭而太息欲奮臂以更
張伏衆福緣成妙法界古潛州三十六蘭若雄占
上游舍衛城千二百比丘同祝聖壽

正齋文集卷第十一

平齋文集卷第十二

奏狀

復官申省狀

辛卯

今月二十二日準尚書省劄子勘會某昨因臣僚
論列久掛責籍累經赦宥今又該遇慶壽霈恩合
議指揮七月十六日奉 聖旨洪某特與叙復元
官仍與宮觀伏念某曩以狂愚自速罪戾遭逢大
慶蒙被寬恩特還舊階仍賦優廩仰戴天地生成
之造所有省劄除已於當日望闕謝恩祇受外須
至申聞者

禮部郎官辭免申省狀

癸巳十月

今月十八日恭準尚書省劄子備奉 聖旨洪某
除禮部郎官成命肇頒危衷震惕伏念某曩以狂
瞽自干譴何去國已閱於九年奉祠且及於兩歲
委心丘壑絕望班行不圖大明昭揭之辰亦與衆
正彙征之會沉淪吐氣俛仰知榮第惟司馬位冢
宰之初蘇軾被儀曹之召詎容是選猥及非材欲
望朝廷特賜敷奏改畀在外合入小小差遣以養
偏親實出生成之造所有省劄見寄留臨安縣庫
未敢祇受謹具申尚書省乞賜敷奏伏候指揮

辭免除監察御史申省狀

右某今月二十九日準尚書省劄子三省同奉

御筆洪某除監察御史日下供職者恩榮自天兢
懼無地竊以公議國家之命脉人材朝廷之精神
方其未出則望之如景星如鳳凰及其既用則倚
之爲屈軼爲獬豸元祐王巖叟之召明道范仲淹
之來繫時所推皆此其選 皇上養晦於十年之
久天下望治於踰月之間轉機括以作新厲搢紳
而更始紀綱所繫風憲可輕如某者積困窮途甫
還舊著學問不足以窺王猷之遠議論不足以扶
國是之公首玷親除必速官謗况未嘗作縣難以
入臺欲望朝廷特賜敷奏收非常之誤渥畀有望
之時髦庶使危蹤少安微分所有省劄某未敢祇

受謹具申尚書省伏候指揮

辭免殿中侍御史申省狀

甲午四月

右某今月十五日準尚書省劄子節文三省同奉
御筆洪某除殿中侍御史日下供職者渙敷異渥
震惕危衷竊惟柱後惠文之官尤重殿中執法之
選職修明於國是用整肅於朝網粵從琴瑟之更
張類多矛盾之並立邊帥之或和或戰正值兩強
廷臣之孰是孰非必求一勝決治亂安危之勢觀
抑揚進退之機疇副臺端盍掄時望如某者誤蒙
蒐拔濫厠糾繩謂車當主於可行何人心之擾擾
而舟必無於偏重乃王道之平平方包不稱之羞
忽冒非常之擢周旋烏府供奉赤墀純仁之內出
姓名固誓圖於美報唐介之願解言職正恐負於
隆知欲望朝廷特賜敷奏光摩日月別求夔龍接
武之英威厲風霜庶折豺狼當道之氣所有省劄
某未敢祇受謹具申尚書省伏候指揮

第二次辭免

右某昨準尚書省劄子節文三省同奉 御筆洪
某除殿中侍御史日下供職於當日具狀辭免今
月十六日準尚書省劄子備奉 聖旨不允者聞
命知榮感恩思奮官卑不當再具辭免事有上關
國體難以黽勉供職蓋緣近者一再論奏邊事與

外間異同諸將方鳴劔鼓行而前少有疑必妨
大計欲望朝廷念中外相應之理力賜敷奏改昇
某閑慢差遣邊臣聞之亦將踴躍赴功而無後顧
一進退間足強國勢某下情不任懇切之至謹具
申尚書省伏候指揮

辭免中書舍人申省狀

右某今月二十八日準尚書省劄子三省同奉
御筆洪某除中書舍人挾日再遷寸衷積悸伏念
某賦資至陋遇事最疎甫叨赤墀供奉之官遽劾
烏臺分察之士宜加誅斥廼除矧討論欲貴
於皇猷而封駁亦關於國論詎容冒處自速煩言
欲望朝廷特賜敷奏收絲綸之新渥畀香火之舊
祠所有省劄某未敢祇受

第二辭免狀

右某昨準尚書省劄子三省同奉 御筆洪某除
中書舍人某於當日具狀辭免今月二十九日準
尚書省劄子備奉 聖旨不允者某控辭誤渥尚
闕俞音恩重命輕不當再具免橫重念某九年流
落一旦遭逢自郎分察執法殿中曾未踰旬忽塵
詞掖 聖上更新萬化收召衆正蒙被寵眷未有
某之比者况判花演誥儒生至榮豈不願發揚九
重厲精更始之意使百工砥礪以承休德而某輒

甕器溢潢潦源枯儻華要之冒居必顛隳之立息
欲望朝廷力賜敷奏亟收成命特賦叢祠或蒙矜
念係是徂徠一人之數改授斗壘以慰偏親實出
望表所有省劄未敢祇受

辭免兼同修國史實錄院同修撰奏

右臣今月二十六日準尚書省劄子三省同奉
聖旨洪某兼同修國史兼實錄院同修撰者專官
演誥甫玷討論分職紬書忽參譔次蒙恩賜奕揣
分屏營竊以典謨所以記言春秋所以斷事六經
不作三史相承馬遷辨而不華猶坐是非之謬班
固詳而有體尚譏仁義之輕迨其下之紛紛徒

傳之譚譚矧今脩明三館之制揚厲累朝之休
國史則紀傳表志之纂裁在實則日月時年之
編纂欲成萬世之典宜得三長之材豈臣斐狂可
贊筆削伏望 皇帝陛下亟收寵渥別畀譽髦必
漬墨之得人庶汗青之有日所有恩命臣未敢祇
受

乞祠奏

右臣藐然疎庸久坐罪斥 皇帝陛下更新萬化
登崇衆正誤蒙簡記首預收召爲郎甫旬而分察
分察數月而執法執法踰旬而代言尋兼史館仍
理還磨勘歷觀廷紳未有叨竊若臣之甚者遭時

遇主宜圖報稱而性稟狷介學術迂拙但知以竭
慮爲忠不計以直情爲激天涵地育未賜譴何揆
之進退之誼出臺便當引去貪戀芻豆黽勉至今
廉耻道喪朝夕芒負况當衆賢和於朝之時獨累
皇極之治隆寬不誅公議莫貸欲望聖慈特賜祠
廩俾歸求君子時中之學以備異時噐使實戴終
始生成之造謹錄奏聞伏候勅旨

再乞補外申省狀

照對某昨具狀奏陳乞賦祠廩今月十六日準尚
書省劄子備奉 聖旨不允其蒙恩優異揣分賤
微不當再有陳請兼區區肝臆已盡敷控前狀

敢更有陳述惟是某叨第三十有三年除奉祠外
未及十考四年蜀道父親以遠不克往前後就養
僅五六年閑居積久菽水不給遭逢聖朝錄用其
不肖子目睹恩榮踴躍自慶今春秋七十有六每
以足跡未到江湖爲不滿年當喜懼急於養志欲
望朝廷念人子事親之日短特賜敷奏陶鎔某一
小小合入差遣俾獲迎侍宦遊以娛晚景實爲孝
治錫類之仁須至申聞者

辭免兼權吏部侍郎申省狀

右某今月初九日準尚書省劄子三省同奉 聖
旨洪某兼權吏部侍郎蒙恩便蕃聞命兢惕竊以

詞垣四禁稽緩爲先選部三銓繁劇尤甚專掌尚
虞於弗暨兼官必至於多違伏念其學問空疎材
識謫陋領內史之職舉乎一而未能參小宰之聯
共其二以何有雖代庖而越俎將毀瓦而畫墁欲
望朝廷特賜敷奏念御馬不容於窮力而牧羊每
患於多岐俾塵舊官亟寢新命少安愚分實戴隆
私所有省劄某未敢祇受

病乞補外奏

右臣竊惟窮則呼天疾痛則呼父母方臣頻年擯
退窮莫之恤陛下更新萬化不待呼天首加蒐
拔自閑外爲禮部郎如蘇軾不作縣爲御史如周

必大以殿中執法出臺而陞詞掖如張震還久磨
之磨勘如胡銓又涉筆史館攝組銓曹曾未逾年
徧歷華要遭時遇主若此豈不願周旋衆正之會
少効千慮之愚而臣分量易盈災蹇踵至悼亡未
幾忽得奇疾癰生上齧數醫更療累旬未愈痛連
牙頰飲食減少形骸雖具氣液潛泄斯皆素餐無
補朶頤不節之所由致君父以體群臣爲心有疾
痛而不呼是爲欺隱欲望聖慈察臣知事君之誼
而非絜身有垂白之親而非輕祿俯憐實病初非
飾詞特畀在外待闕差遣還家將理或可痊愈實
戴天地父母生全之恩謹錄奏聞伏候勅旨

辭免兼直學士院奏 乙未

右臣今月十五日準尚書省劄子三省同奉 御
筆洪某兼直學士院自天渙寵控地包羞伏念臣
久困投閑適逢更化市駿骨以致千里馬方共興
於斯文剖大瓠以爲五石樽獨無補於當世越從
言責猥玷從班危蹤坐膝口之愆竒疾示朶頤之
戒精神銷鑠翰墨荒蕪屢懇請於一麾忽進兼於
兩制負且乘而知懼服不稱以貽譏伏望 皇帝
陛下察臣孤陋而寡聞憐臣早衰而多病俾從外
補免冒中除庶幾少安斗筭之分所有恩命臣未
敢祇受

辭免兼侍講奏

右臣準尚書省劄子今月十八日三省同奉 御
筆洪某兼侍講者疊被寵私彌深榮懼伏念臣力
耕有素涉獵無多文淪巫史之微道昧聖經之奧
頃叨召對拱聽訓辭首明宣光綜攬之方繼論義
文經綸之旨退深慙於謏聞難仰跂於清光政虞
汗王堂之廬忽俾侍金華之席丘學山而莫及蠡
測海以奚堪伏望 皇朝俯垂英鑒肆別求於鴻
碩容自蓋於空踈所有恩命臣未敢祇受

經筵乞祠奏

臣葢爾庸陋饗榮過分朶頤致疾經年不

控祠壘之請邇來病證轉劇又再控祠請天恩遂
邈未賜俞允臣非不知陛下待士之厚接下之
周當仰體眷遇力疾自効又非不知所領職事備
極清華有名儒終身企望而不得爲者印纍綬若
榮耀偏親豈應自取閑退維臣器量淺狹病根深
固若一意營進不思還家休養形骸神離溘先朝
露此身永負君親之恩矣扶僊經筵祈憐宸衷欲
望聖慈亟賜從欲俾收朝蹟歸佚叢祠息心將理
容可痊愈凡未正首丘之日皆駿奔王事之時中
庸九經曰體群臣陛下蓋深得之故敢籲天請
命臣下情無任迫切之至取進止

辭免除吏部侍郎兼給事中奏

右臣今月十日準尚書省劄子三省同奉御筆
洪某除吏部侍郎兼給事中日下供職者渙綸曷
奕震魄正營臣竊以銓省者人材之權衡瑣闥者
國是之綱紀裴行儉以知人之鑒顯張元素以回
天之力稱匪得譽髦曷當妙選如臣者背時滌辱
遇主光榮鳳掖代言兼徼鑒坡之直虎門勸講仍
紬石室之藏智井不可以汲深弊車尤難於任重
謫焉溢量竒甚纏痾屢退乞於叢祠忽進聯於法
從貳題才而旣重參批敕以尤嚴求閑獲遷以龍
知懼欲望皇帝陛下官必懋德器毋假人念其

頰欲穿莫稱論思之職而精神已索難居閱讀之司母拘反汗之嫌特徇祝釐之請用安愚分庶保危蹤所有恩命臣未敢祇

再辭免奏

右臣昨準尚書省劄子三省同奉 御筆洪某除吏部侍郎兼給事中日下供職臣具奏辭免拾肆日恭準詔不允者寵命便蕃嘗伸控避綸言溫厚未賜矜俞在微臣不當更有懇陳而公議詎容弗加祇畏靖惟弱質久苦沉痾期息影於一祠致瀝忱於九疏茲蒙誤渥更越常倫無清通之鑒而爲小宰之真無孤特之操而兼夕郎之重聯翩六組照映一時方退處之力祈乃進陞之狎至將疑矯僞必速顛危伏望 皇帝陛下俯矜病悴之深亟寢恩榮之茂俾叨閑廩免玷華塗緣給事中不容虛職除已權宜一面閱讀外所有恩命臣實未敢祇受

辭免除給事中奏

丙申正月

右臣今月初一日準尚書省劄子三省同奉 御筆洪某除給事中日下供職兼職依舊者自天錫命無地措躬臣竊惟朝廷命令之出在中書則許舍人封還在門下則許給事中審駁尚書旣奉行矣又許臺諫論列皆所以扶植紀綱而維國勢

皇帝陛下親政日勤責治日切方一新臺諫之選搢紳想望其風采給事中宜得漢魏相唐李藩者流以糾正違失顧以寵臣臣頃貳選部嘗攝承瑣闥批敕無夕郎之風論事乏回天之力正虞幽黜敢冒真除矧當元會之辰爵人於朝而使彼其之子不稱其服先之公議謂何伏望聖慈念左省實喉舌之司名器非假人之具博選一世豪雋有風力者俾專省閱容臣姑仍東銓徐丐閑廩以全陳力不能之誼所有恩命臣未敢祇受

再辭免奏

右臣昨準尚書省劄子三省同奉

御筆洪某除

給事中日下供職兼職依舊臣具奏辭免今月初五日恭準詔不允者訓辭溫厚德意丁寧螻蟻微臣所當即祇成命第自濫吹朝列以來蒙被隆知負無倫比而福薄器狹苦竒疾者一年有半寢食俱妨老形畢具方圖再理祠請久拜真除從天而下俯伏自揣榮懼交集蓋命令喉衿之地精神枯涸則省閱有違見志氣銷熈則封駁無彊力鸞臺廢職自臣養病始臣將何所逃罪欲望聖慈爲官擇人以振起朝廷之綱紀收還誤渥俾免顛隳實戴乾坤之造所有恩命臣未敢祇受

辭免兼侍讀奏

右臣今月初三日準尚書省劄子正月初一日三省同奉 御筆洪某兼侍讀者便蕃疏渥懾龍憂懷臣竊惟上聖以典學爲功諸儒以詔敕爲職執經並列勸讀尤嚴間嘗起舊弼於內祠今亦進耆英於書殿必深於道乃稱厥官如臣者猥繇法從之聯濫廁細氈之講懷鈇無得呻畢何裨屬月正元日之臨盛春王三朝之會首叨榮於瑣闥仍陟寵於金華四象八卦之陳未知源委五典三墳之誦曷効涓埃儻兼取於熊魚必重譏於鵠特伏望皇帝陛下充能自得師之妙廣佛時仔肩之公察臣潢潦之易除矜臣丘垤之難進俾安舊序別選名流所有恩命臣未敢祇受

乞叢祠奏

右臣竊惟體群臣者人君之大經尸寵利者人臣之大戒君體臣而閔其情臣事君而致其義斯合乎進退出處之宜矣臣恭遇 陛下親事法宮之始拔擢於留落之餘清塗要輒再歲幾徧廼正月初吉首叨宸筆進陞銀臺金華之峻至榮至耀群臣莫能跂及臣亦罔知上膺睿睠之繇序高而鬼瞰量盈而神害宿恙加進竒證迭出齒頰浮腫面目可憎雖包羞茹痛牽強應酬寢食俱妨形神不接反覆自揣詎容尚玷班綴臣非不知去歲以久

病宜去屢疏塵瀆面蒙 聖訓諭留如待鴻儒宿
德所當國爾忘身少圖報稱而災屯迫逐無一日
寧若更貪戀寵利尸素養疾則是進乏獻替之益
既仰負於殊獎退失廉耻之節復上累於隆知將
何所容身宇宙之間欲望聖慈念臣形證皆 陛
下之所目擊特推體群臣之意賦以叢祠還家將
理俟病少間容續次陳乞斗壘勉効民庸頂乾踵
坤不外覆育臣下情無任祈天請命之至謹錄奏
聞伏候勅旨

辭免除翰林學士知制誥奏

右臣今月二十四日準省劄三省同奉 御筆洪

某除翰林學士知制誥兼職依舊者內制疏榮中
襟襲懼伏念臣山林樸朽場屋腐陳出逢日月清
明之初進立雲漢昭回之下自濫竽於西掖仍越
俎於北扉狹量超踰竒病間作方祠櫝聯翩之上
徹忽除書煥爛之中敷蠲塗歸之煩陞徬直之峻
驚駘千里斥鷃九霄荒虛不稱於摘文羸頓尤難
於就職伏望 皇帝陛下察臣饕寵爲已劇祈閑
爲已多特詔大臣檢會前後奏申賦以香火之廩
博選歐蘇增重鼇禁庶幾詔令有古風烈而名器
不至假人所有恩命臣未敢祗受

再辭免奏

右臣昨準省劄三省同奉

御筆洪某除翰林學

士知制誥兼職依舊臣具奏辭免四月二十九日

恭準詔不允續準省劄備奉

聖旨陸兼修國史

兼實錄院修撰者臣竊惟正天下之動莫如給事中鼓天下之動莫如翰林學士繇唐以來俱號妙選學士尤爲貴重自非風裁峻潔文詞爾雅負王佐器略罕有疊踐二職之真者臣批救乏李藩之風力草詔無陸贄之法度誤蒙聖擢正序瑣闥甫閱十旬即專內命仍勸金華之誦讀進陞石室之纂修變化而嬗未有速於臣者天施地生榮被萬象蟲鳴蠡躍莫知稱塞兼自濫吹東曹以來苦病

疇祠䟽至六七今乃於委愒之中叨深嚴之選而扶病就職爲給事中則求去爲學士則留是舍魚而取熊掌也何以爲出處之義用是偃俯控陳不嫌再瀆伏望 皇帝陛下察已試之罔功矜不能之宜止俯從所欲特與祠廟差遣一次庶免以進爲退上玷公議所有恩命臣未敢祇受

第三次辭免申省狀

右某昨準省劄三省同奉

御筆洪某除翰林學

士知制誥兼職依舊某嘗再具奏辭免今月初三

日準省劄備奉

聖旨依已降詔不允不得再有

陳請者某重惟

神宗朝首擢司馬光翰林學士

以不能四六辭其後王安石除知制誥自此不復
辭官光非不能四六安石非慕官爵者辭受之間
各有深意某待罪夕拜驟領詞苑材不稱官病不
任事在義當去昭如白日累疏祈免非有他也而
俞音猶闕况今文詞之長不無其人趙汝談之古
潔吳泳之典麗真德秀無恙時甚推賞之內之陳
耆卿應繇外之吳潛李劉陳埴參合輿論皆可次
第而當妙選某老矣病矣皆井不可及矣欲望朝
廷特賜敷奏改畀香火之廩擁北門視草之名尋
西嶼投閑之迹雖即首丘百世有餘榮也所有恩
命某未敢祗受

乞檢會八次奏申特畀閑廩奏

右臣自歲旦蒙恩拔擢待罪瑣闥宿量全盈沉痾
日進連上五疏丐祠未蒙俞允間又叨詞苑之命
三控免橫天聽愈高旬日以來昏昏常如醉人四
肢浮腫百骸酸碎氣息迫促生意一綫欲望聖慈
詔有司檢會前後八次奏申特畀閑廩庶幾早還
故山杜門謝事或可攝理易曰拘係之乃從維之
詩曰繫之維之以永今朝 陛下方此襲天下之
賢而無容輕去者如臣竊陋亦在繫維之列命之
逢也貴賤有常天壽不貳臣之去也亦命之不可
過也謹錄奏聞伏候勅旨

辭免除端明殿學士在京宮觀奏

右臣今月十九日準尚書省劄子三省同奉 御
筆洪某除端明殿學士在京宮觀者臣聞名器者
君道之所甚重分量者臣道之所當安臣蒙被聖
眷超絕周行多病早衰屢嘗丐去俞音未報除目
又放天道虧盈眷愈厚除愈峻而病愈進病愈進
而留愈篤正序禁林一草未視叨華書殿且領京
祠非耆儒宿德而兼取之晉如鼯鼠正厲臣之謂
也欲望聖慈念猿鳥宜歸於山林之中鷗鷺徒多
於江湖之上收還成命俾返故廬銜戴天恩生死
肉骨以之所有恩命臣未敢祇受

再辭免奏

右臣昨準尚書省劄子三省同奉 御筆洪某除
端明殿學士在京宮觀臣具奏辭免今月二十五
日恭准詔不允又準尚書省劄子備奉 聖旨仍
舊兼修國史兼實錄院修撰兼侍讀者臣竊惟端
殿之穹崇內祠之優佚經筵史館之清顯望不輕
屬恩無妄施親覽政柄以來崔與之之難進易退
李壘之博物洽聞皆以耆儒當此殊禮臣實何人
病且死矣乃使接迹二賢之後續貂奚益諉鶴是
懼祠請屢陳俞音尚闕欲望聖慈憐臣久病不差
察臣真情不欺收還上件誤渥特畀在外一祠以

養殘喘以待驅馳所有恩命臣未敢祇受

乞將慶典一官改賜父親銀緋申省狀
準尚書省劄子洪某該遇昨來慶典赦文轉一官
並不曾陳乞轉行十月二十二日奉 聖旨特與
轉行伏念臣脫身淹滯遭世盛明已蒙優恩理還
積年閑廢磨勘官至正郎此來又蒙特旨轉行塵
竊過分莫遑寧處惟是父親錢甘貧無營教忠有
訓春秋今七十有七雖累經恩封見通直郎致仕
服綠纓及十一年該賜章服之日尚遠喜懼交至
人子至情照得紹興中太常博士張九成乞以磨
勘一官與父伸賜五品服朝廷從之某輒援上項
事例欲將慶典轉行一官恩命乞與父親某改賜
銀緋伏望朝廷敷奏特賜從欲用為就養之榮式
昭錫類之孝渙至申聞者

小貼子

照會某父親某昨以某在責降中不
敢陳乞慶典轉一官恩例欲乞朝廷併賜指揮





平家文集

十三之十五

内閣文庫			
番 號	漢	10277	
冊 數		12	6
函 號		3	1



国立公文書館
National Archives of Japan

原本の文字など不明瞭な個所があります。


綴じ部(喉部分)の文字など不鮮明な個所があります。

平齋文集卷第十三

表

龍州謝到任表

參井天高甫解佐州之組洮氏地迫猥分護塞之
符祗服詔條具宣德意中謝竊以蠶叢開國於千
古之上龍門置郡於萬山之間壤雖接於松維風
尚餘於綿劍諸關晏謐商通蓬婆滴博之郊兩縣
豐登民樂無懷大庭之俗相安清靜宜得循良伏
念臣濩落無庸輪囷有志溯淮堧以北慨祖述之
如存捫蜀道而西信武侯之可作繇治中之冗綴
從閬外之下陳跼足徒勞剗心何補不遑將父方



蒲秩以謀歸亡以瘡人廼蒙恩而出守靖惟恭冒
倍切凌兢茲蓋恭遇 皇帝陛下立賢無方用人
惟己格帝若伊陟臣扈內尊朝廷治民則黃霸翁
歸外布郡國況在坤維之表欲如天陛之前遂使
藹材亦叨煩使臣誓鞭駑駘仰荅鴻私七百里山
高谷深首嚴保鄣二千石政平訟理共樂耕桑臣
無任

謝曆日表

運承天統益綿卜世之休曆授人時特重歸奇之
閏民生知勸吏績用熙中謝恭惟 皇帝陛下紹
開中興昭受上帝齊璿璣之政旦復旦而有常推
神筮之元朔又朔而不息爰謹日官之課仍新
令之頒臣猥戍龍門恪循鳳紀刀耕火種俾陶一
氣之春椎髻卉裳同樂三登之俗臣無任

瑞慶聖節賀表

日宣重光久啓升平之運龍成五色仍標震夙之
辰懽動幅員和薰宇宙中賀恭惟 皇帝陛下天
大亦大日新又新世祖之三十年寢格清明之治
武王之八百國迄成耆定之勲屬電樞之發祥宜
旗翼之齊壽臣涪江領戍嵩嶽傳呼十月未央阻
効稱觴之慶千秋華萼願輸獻鑑之忠臣無任

功德疏

赤龍紀瑞聖人間生白狼獻詩天下同慶輒哀衆
妙之果仰介無疆之休 皇帝陛下共願福祿萬
年本支百世日所照露所墜盡復興圖天以清地
以寧永隆磐石

謝授中書舍人告仍賜紫章服表

臣某言恭奉告命授臣中書舍人仍賜紫章服者
南臺執法方虞妄發之愆西掖代言忽冒真除之
寵恩深語塞感激涕零中謝臣竊觀元祐之初欲
救熙寧之弊御史則劉摯傳堯俞王巖叟諫官則
孫覺鮮于侁朱光庭給事中則純仁知制誥則蘇
軾維當今之更化宜視昔之得人伏念某學

疎文氣卑沮無欲不欲蚤嘗慕於前賢時行身不
晚始遭於上聖甫玷粉闥之直趣陞烏府之班知
可爲於忠言期不負於所學竟陸丈夫去惡草以
未能莠田驕驕護良苗而徒切坐需汰斥誤被褒
遷踰旬觀象之門即日紫微之閣移桴彈於封駁
固脉絡之相關加修飾於討論柰精神之已奪戴
天垓北控地凌兢茲蓋恭遇 皇帝陛下煥文惟
堯好善如禹謂臣九年之謫困何意於求升念臣
一日之逢否不期而返泰俾効操觚之技驟參簪
筆之聯進之史職則望溢於元超錫之命服則事
同於李絳便蕃君寵洋溢親權至敢不砥礪風心

研磨素習雷一動而皆奮勉揚更化之風水萬折以必東誓竭徇公之節臣無任

謝特理磨勘授朝請郎告表

臣言恭奉告命特授朝請郎者課格三銓尚汗丹籍秩陞二等忽冒紫綸轉潔辱以光榮拔滯淹而奮厲中謝伏念臣學惟守僻志不量難明主樂忠雖嬰龍而不忤柄臣忌直竟編虎以奚迓投閑三禡之餘待盡百罹之外會恩不宥引咎誰憐元成玷缺之詩動心有益范滂黨錮之傳委命何辭浩日月之居諸歟乾坤之軒豁晨脫深穽夕趨要塗困據茨以雖危泰包荒而終吉鑒觀素履知無一

朝訛遇之心考覈踐更念有十年不調之歎仁官簿與進文階歷觀大化之更無若微生之幸茲蓋恭遇 皇帝陛下惟皇作極觀過知仁謂靜者無營臣之靜特安於拙而退者不競臣之退乃厄於窮過爲華袞之褒昭示緇衣之好疊䟽新渥一洗舊愆臣敢不懲迷復於前戒真升於後終身不理磨勘固慙淳熙勸講之官當制封還詞頭尚勉康定代言之職臣無任

謝授侍講告表

臣某言恭奉告命授臣兼侍講者五花疊組甫塵黿禁之除六畫專經仍玷虎門之選顓天莫避跡

地靡皇

中謝

臣竊以太極判而兩儀生聖人出而

八卦作取小過取大壯堯舜獨盡其神曰連山曰歸藏夏商參用其灋皆繇汲汲之學能進乾乾之功迨開物成務之教衰而崇德廣業之意泯第資誦說莫究推行武帝尊儒紊通變使民之理太宗慕古昧以蒙養正之方縱得其言何關於治蓋形而上者謂之道必神而明之存乎人恭惟皇帝陛下觀象洗心玩爻盡性悟泰之內健外順首賢路之宏開鑒蠱之上剛下柔急朝綱之復振有體則斯有用能知而必能行奚俟鯁生尚容蠡測況臣鈞深無得納約有慙朱雲之折充宗僅致忠

之辨京房之事延壽靡忘理亂之占雖燭火

乎日月之光然勺水猶觀乎江河之益探先天之妙蘊踐前聖之微言剛健中正粹精著在自彊之德聰明睿智神武形爲不殺之仁俾斯文之大興幸當世之親見臣無任

謝授給事中兼侍讀賜對衣金帶表

臣某言恭奉告命授臣試給事中兼直學士院兼同修國史兼實錄院同修撰兼侍讀仍賜臣對衣金帶者瑣闥邃嚴首玷塗歸之選經闡清閔仍塵勸誦之聯拜奎畫以欣榮佩身章而增惕中謝臣竊以月正元日虞朝闢四門以達聰每歲孟春夏

室徇百工而來諫蓋重履端之序用開進善之機矧銀臺乃國論網維之司而金華實君德涵養之地運適逢於道泰賢宜急於時升伏念臣質弱早衰器卑晚遇烏府詞垣之陟首破拘攣鰲廡銓省之登徑排膠葛念有君之忍負務非道之不陳薪未及然慮在上恬下嬉之表簒不恤緯憂形外阻內訌之間過蒙採擇之明荐被褒遷之寵禮成元會命出昕朝責之以論事回天期之以引君當道鵷梁不稱其服凜疊組之難安鴻陸可用爲儀貌濫巾之無補茲蓋恭遇 皇帝陛下至公廣被小善兼收謂臣猶有不爲靡徇暗韋之習嘉臣新

他技粗存骨鯁之風故於漢廷奪席之朝魏厲言樽之旦趣陞華要俾罄迂愚第臣術昧觀頤病深咸頰乞投閑而雖切蒙賜告以良優惟薄蹄之力已窮而倦翼之影宜息願解禁廬之直退從釐館之游飯糗扶羸儻遂山林之養羹芹效美敢忘畎畝之忠臣無任

遺表

臣某言竊以榮必有悴生必有死戀昌期而雖切撫頽景以難留中謝臣猥起窮途首塵要路志存冠鐵竟貽捫舌之差戒忽佩韋遂召采頤之疾廼若兩年而五擢甚至一月而屢遷拜宸翰於形神

凋落之中進華序於氣躰摧頽之日屢騰祠請終
闕俞音聖恩磅礴於兩儀遺忠幹困於九地息今
垂絕鳴固宜哀臣竊謂今日內訌外阻之勢已成
根深蒂固之計安出殆非人力之及尚幸天心之
回 皇帝陛下至敬無邪表裏靡間而後可以祈
天至公無私親踈如一而後可以祈天君子常進
不搖於儉壬而後可以祈天直言常用不移於讒
佞而後可以祈天省賦薄歛不以四海奉一人之
怒而後可以祈天賞功誅罪不以一人抑四海之
論而後可以祈天大臣叶心共治群臣絜已奉職
皆所以仰輔天德同迓天休守決不可玩視也
不可輕信事關存亡何止成敗臣奄謝明時永弘
聖造魂氣有知猶當上訴于帝蒙韃不可爲中原
主必佑助于有德猶是微臣區區報主之職分也
臣無任

御筆端明殿學士洪某鯁亮忠慤有助親政遽
覽遺表深用悼惜可特與執政恩例

簡劄

上廟堂劄子

某猥叨誤渥祗拜明綸靖惟僥逾莫稱拔擢不敢
僭控私謝謹熏沐拜手以毫毫之愚僭言之 聖
上更新萬化取端拱咸平建元改元欲還 太宗

真宗一統太平之盛其原必自近始秦王薨於端拱之前四年太宗聞之流涕即詔曰涪陵公廷美朕之同氣也宜追封涪王謚曰悼且封其子至真宗未改咸平之數月追復秦王尋改葬汝鄧間兩朝忠厚親睦之仁上通於天今紀元取法其有感於斯乎聖上本心之所發見必於首春自有處分股肱大臣從容開廣使早有定論以慰列聖在天之靈端拱咸平忠厚之脉延續於無窮矣某備數分察欲舉乙酉封事中語再有陳述退念事關大體必出於宸衷獨斷而後光明俊偉在大臣亦盡將順歸美之道與臺諫有言而後行萬矣因觀布衣諸葛符所上續生意書冒昧

為廟堂新元壽國獻伏丐鈞啓

與張司業劄子

某少稟適有經德劉齊長見過袖出上皇帝書錄本自言欲解職去退閱所上書殊有直氣學舍累年厄於鉗制今始得伸一喙於可言之日九重樂聞人言大臣不惡人言給舍臺諫而下人言所及聞之亦足以戒今何所忤而欲去耶敢望開諭前廊勿令解職以成朝廷培養士氣作成士風之美伏覲炳照

賀游景仁工部書

某承被郎潛之除私切贊懌正大明誠謂宜日夕
在上左右陳善閉邪以究中庸大學之功青綾入
直未足多賀數年來奏議警策如執事者有幾吾
君不以爲午而除目每在噤蟬暗馬之先搢紳可
知所勸矣論思精切尚盛氣以須之

荅游工部簡

伏讀奏篇如喧啾百鳥中之孤鳳如窮陰沍寒中
之霹靂如九鼎象物而鑄臆魅罔兩爲之膽栗神
悸如大光明鏡當空而懸大魔王無所遯形甚盛
甚偉司馬公門之有元城崔先生之有執事可以
名百世矣

荅葉子真書

某疇昔過九芙蓉下知有隱君子之廬在舟駛弗
能扣謁迄今不滿珥帖相先陳誼甚高凜然不敢
當兩都盛作雖用班張賦體發我宋之光明究治
亂之本末主文而諫國風之遺意也明主宜置一
通於座右以爲龜鑑惜無夜誦子虛者雖然得如
狗監誦之政恐牙頰汚君賦耳琴書何時過潛山
寓舍在臨安道旁弭節賜訪庶滿定交之願切幾
紆照

荅黃濟叔簡

某不聞問又許時東山桃柳觀玉泉筍蕨供未嘗

不撫景懷人寵示睡藤深习愛念養生者枕不欲
高以褚爲則日減一番其平以漸也前是有惠枕
者皆苦高拜賜獨便衰情釣天之想已斷遊仙之
夢可尋老去惟睡熟有味耳

與李微之校理書

某疇昔被飾子墨酬先施後山深林密病嬾相乘
賤姓氏無從徹風日不到處施芙蓉而弄斗柄駕
蓮葉而讀王書殊恨仙凡之隔也伏諗通金閨之
籍進紫宸之班上待特舉有禮矣公可以留矣多
賀多賀司馬遷史號實錄酷吏傳張湯在其中平
準書又謂湯死亡思湯平生大略可睹班固

推賢揚善拔之酷吏推賢揚善可進也而嬾居
毒不可泯也讀史至此每疑班氏以宮掖之故與
金張許史不能忘情特曲筆以出之世未有摘其
心者執事以良史材實錄以信後世於遷固必有
折衷敢請所以教

荅印松巖帖

道人出山去山色如死灰更下一轉脚作麼生驚
峯既能飛來何不飛去曰百動不如一靜松巖畢
竟何如

時印老再
住中天竺

荅楊平叔知丞簡

某正尔寂寂忽來楚然之音於萬里外猿鶴起舞

清燈相對澹有餘味哦新詩道舊游恍然置我太白我眉間而飽之風露也去不待明良用情結善圃記見屬極仞下采蜀名公巨筆如林何爲乃貴野鷺告更圖之庶不爲江山花竹羞

與俞提舉簡

某聞抱邁往英特之氣而不伸舒固易成疾湏得慷慨士共談古今盛衰治亂之故南北離合成敗之因奮髯頓足極其痛快以振宣精神否則秀眉清吭緩歌美成小晏得意詞更番進酒花信風散入骨髓經絡則病自霍然去矣公以爲何如

荅何正父簡

衲子有修水觀者湛然虛白在前童子投以石而心爲之痛瓦礫去心即安如初執事得無有隱然未快者乎又有叅黃梅禪者百雜碎還我核子來老夫不復作核子想也

荅沈簿餽歲簡

某今年至窮無錐可卓老色懽悰相爲消長可柰何風誼不替先春致餉脂賜銀罌柑傳紫帕不復作此夢烹鯉點酥而引大白亦窮臘盛事感甚感甚

荅葉子真書

三墳書見寄張燈細讀如登無懷赫胥之庭與鴻

濛汗漫語知易無起止太極無增減特今人自不
古耳連山歸藏方從館中傳抄俟至更當參合以
驗所造大比又近俛踏槐黃否篤志古學如此安
用追逐時好東塗西抹爲某歲裏殊乏好懷得袁
安太丘語不覺興起略此奉報時中彊飯以昌斯
文

荅高處州書

某每懷龜總之富騶牙之博玉連璣之奇古金背
鏡之明清一代能幾三十年前玉堂策天猶教管
一樓煙雨耶峯雲留鬱堦水溜潺挾此豐年歸報
天子某屏息萬山間不敢以隻字污人門高
俗銀鈎寶唾遠訪死生正是北關風雨中送客時
節可勝恨然異書如見異人它稱是裹飯問子桑
之意何可忘

荅魏鶴山書

某重午日忽得李校勘書轉示珽帖鈎畫爛然晃
漾心目竊知存養深固踐履堅實著書立言超然
自得不爲江山風景動搖喜劇而悲如見君子記
文錄似皆有益世教不爲徒文如入清廟觀武庫
一名一物皆足以使人起敬畏志定而氣盛也簡
州三賢閣記發明著於人心極有味百世之下猶
將聞風興起天目山房初無足道託高文以不朽

遂與廬山山房照映今古講學之方行己之要用
世之大法皆在焉切磋究之愧不獲朝扣夕請何
敢以爲過額篆竒古清壯與文稱崔菊坡結字老
蒼當稟浼書記二美具矣自有天目無此竒事老
人年七十有二菽水蕭然相與安之若命而獨學
無友孤陋寡聞求仁入德之本尚幸私淑之

荅吳叔永寺丞書

基山中人不取修履端賀頗聞除用袞袞可奪淮
南之氣蜀珍何尚遲之叔永四六時出一斑鹽鹽
追逐前輩似聞近頗推擇玉堂揮翰之手欲辭得
乎某一斤七年来頭惟有易在百穀草木皆田疇
焦穀不芽亦是天道栽培傾覆之常但願麥熟師
休與大千世界同此太平之樂長安城中燈火笙
歌徹曉湖山柳又黃矣過蒙紆念寂寞顓函勞訪
鮮醲交委窮悴亦春多感多感

又至節小簡

新陽方升天機在半夜子之初人事在五更三之
後觀復于此作如何薦取偶得雙魚二兔持獻求
筌蹄外一轉語莫只道萬物未生時芸生荔挺出
矣

荅張簿惠白魚帖

入夜辱雙玉尺之餉張燈舉酒恨無水晶盤行之

媿感媿感

荅程宗武書

某前辱見過清談殊欸鄙吝之意消矣讀書爲文皆以優游涵泳而得之優游涵泳之功非膠膠擾擾者所能爲也故必主之以靜外靜其形內靜其心危坐沉思始能會古人之意於糟粕之外不惟進於文且進於道矣世有形雖靜而心實馳者亦有心欲靜而牽於物交物不能靜者大約息形而後能收心形且不息心豈能收心不能收學於何有異端之子猶能以觀鼻端白數踵後息爲功吾儒乃不能歛方寸於環堵間顧欲求史記於名山大川如子長是爲大也是自恕也吾子年甚少天資甚高恃其天資之高而忘其年之不能以常少濡筆伸紙前無古人問其所以耐垂白倚門之望則未免老歲月於奔走吾爲子懼夫君子之於學藏焉脩焉息焉遊焉藏脩學也息遊亦學也非曰愜肢體以爲息縱耳目以爲遊也藏修之未加而假息遊以自放求夫文之進且不可得况道乎吾子往矣深居而衆籟寂寧極而萬境融以此讀書則書有味以此爲文則文有法以此立身則身有度優游涵泳之功日異而月不同矣若曰吾身雖動吾心未嘗不靜當思靜在動先可也相愛之深

不容不盡情幸勿罪

通崔菊坡書

某伏自閬州城南下違離之拜整整十年進不能
爲公朝趨事赴功以荅所主退不能從師門致德
問業以益所學一不成而萬有餘喪空老此生然
猶不敢自枉者寧以窮故負知己不以通負知己
也况今天下達尊誰出先生之右門人弟子之最
親孰如牛馬走造物深意安敢不使同退又同進
耶搢紳間謂凡任制閬莫有終譽獨吾菊坡不待
躡足之疑便引掉頭之興綽然餘裕久而愈安公
係頌膏德音不暇考察槃在澗頌人之寬詩取頌大
爲言蓋其胸中浩乎而淵盎乎而春貧賤富貴不
能移吾之所樂惟先生以之邇來頭風不作酒時
進而飯日加天所以壽吾道之脉也某骭骹之藁
近綴拾若干首繕錄仰塵宗匠郢人運斤成風斲
鼻端之壘斲者固難受斲者亦不易告痛賜斤削
暇時更告賜一序引以黼黻之使得託之不朽死
生榮幸

荅毛君玉簡

某正坐晝寂而高軒來氣甚明禮甚度浩乎吞鷗
夷五湖於胸中而無西子之累所見過所聞矣金
堂石室之勝俟霽同登判作半月期揚鞭索去銳

不可留目送征鴻立盡梧桐半軒之影

荅吳叔永司封書

某比承遣信暴下後勉出勞苦之聞其歸言鬚白容悴不類前時司封甚駭且疑非愛念之深不及此人生能幾寒暑六十到頭如何禁得老色不上面頻年窮阨以少知命而安誼不至以飢渴害其心猶能堅忍待盡於萬山間暇時緇書考觀古人行事體察諸身每竊笑韓退之不善處窮去國得州未至落寞嗟嗟戚戚日與死迫欲奏薄伎於從官之內紀太山鏤玉牒便作司馬相如垂死時語更其重固以窮無資飽之地又當如何彼宗元與錫爲富貴所引如嬰兒之慕乳其不能處貧賤却不足責辱愛念不翅骨肉輒發其狂言幸勿爲不知我者道

又荅借書帖

某宿拜還誨玩未脫手蠱尾又來閨寒中風誼孰如司封者携酒與魚以借書又是山中一奇事平生只據見在無力殺青數種皆未之收南宮北扉旦夕且出命直湏洗濯舊見以生新意使前無古人叔永肯効獺祭魚耶

荅葉子真書

某面壁窮山自分老死一旦蒙恩入爲禮部郎未

淡月忽叨分察之命夢想不到神魂爲飛高誼絕俗妙瀝臨存不作兒女子昵昵賀語而開以象筵第一誼拈槌豎拂喝佛罵祖平生無此伎倆所獨雖非甕中鱉亦直鱉耳憶昔行見寄嶠奇警切起敬不暇雪平地尺欲覓訪安道之舟無繇可得擁鼻清吟徒深悄想

荅真福州書

某疇昔端拜上記後兒曹得從阿戎於日邊獲知時止時行之槩大用尉愿鳳凰覽德輝而下千仞維日望之聖上遵養時晦之久剛明奮發風采立變大茲距脫來者始有安脚之地前因奏對嘗陳君子聚則爲泰今自外至者纔一二而大老未來真儒未召否泰之機猶未決私心憂之溫陵積蠹之餘不謂費支撐補緝如此陽春有脚又轉而南朝家不過爲潢池未清計國有仁賢則四海赤子莫不莫居奚一方之足慮新元發春或以登延君實爲第一義則上下之疑泮內外之泰成矣某爲郎纔旬日忽叨分察之命控辭弗獲甞勉就職來從久廢朝廷之事體人才之品級懵然莫識冒處非據夙夜針氈昨借樞臣開端連上三疏未報可平昔聲望不立致使官以人輕更遲數日不報則自作去就得從此脫去豈勝至幸况內藥外疽

未易直問耶珪帖下辱在爲郎時郎只官守察乃
言責一有曠敗必貽善類宗主羞不惜鉗鎚俾有
見趣郵置可數數也

荅張鹽官送無垢詩刻簡

見惠無垢詩帖石刻得窺前輩典刑凜凜起敬其
守永嘉以病目歸而字畫轉遒勁向每嘆無垢連
蹇十四年纔脫羈紲得一郡又以盲去疑老天大
無分曉今因字始知非目病雖病亦非盲也

荅趙南塘書

某近拜報翰之辱良尉尊嚮山中人備數周行饗
榮之至每思季子黑貂裘弊氣歌歌出裙襦下纔
得一飽竈婦亦爲之動色不知窮不失義達不離
道爲何如人也面前事推排且盡更一兩日即上
祠請杞天之憂固隨寓隨在朶頤宿疾庶幾可瘳
珪帖臨存備仞燕間之適曲肱飲水尚自託於下
風鍾鼓園林此生絕念矣

荅蘇上舍書

士君子立於斯世能處逆以順則無入而不自得
猶之水焉瀑於呂梁湍於龍門束於瞿唐灩澦或
搏或激或洄或狀或潛或潰所遇之勢不能皆如
長江大河一放千里之爲快而其順則自若此習
坎之險所以維心亨也足下得罪之初士友過者

皆扼腕裂眦以相告非其罪明矣非其罪而處非其地境之逆也聖賢觀人不觀其處順而觀其處逆貧賤則不去患難則係行空乏其身行拂亂其所爲則以之動心忍性其中休休焉安乎天而進乎道也某於足下無一日之雅賜之書如久要誦數過喜其無怨懟之辭春陵論著誦之半月喜其在貧賤患難空乏拂亂之中而有以養其心信其善處逆也易窮則變故否終有喜困終終吉剥終得輿如足下之學之文天豈終厄之哉占報草草伏惟亮察

荅豐城翁帖

承教帖獲知新正領衆安隱甚慰湖山作春雪供草木玉立聽說法這一句直是難道更須教衲子門嚼着冷冰冰地應心方好

回蔣祕書

伏審入超中祕候對外朝養齊明之誠以動凝嚴之聽造請可略也劄翰戒曉仰仍謙光進昌其言用邇所學不勝區區之望切覲台啓

荅淮東趙帥

葵書

某恭諗張碧油之幢眊黃金之印淮海澄晏青齊震驚慶愜慶愜張忠定在蜀五年工夫只一信字某官雍容籌邊慷慨敵愾淮民之不渝於左衽皆

一手拯拔之力威名惠利草木亦孚今又撫甘棠
婆娑之蔭而封植之足食足兵而民信宜無難者
袞袞未皇上記以賀首被珍蹟鈎畫淋漓猶帶平
山堂之雲氣尉浣以還恨不獲從公于邁周旋樽
俎細聽堂前楊柳之詞一洗磊砢寵示榜文切中
兵民之害還浮鹽通竹木規摹整暇懦志爲起邊
風不動以湏暇之日而圖堅久之功北顧寬矣

荅袁守甫書

某投閑時士友自番江來爲言新荆書院甚盛教
刑合爲一其淑人心甚大拳拳歸敬遂因名山四
大字之賜附記以自通浮湛不足計也九年擯廢

一旦推出失身聞簞真是寃事馬伏波謂聞人過
如聞父母之名今乃眈眈然揣量長短指摘是非
用心雖公亦壞心術朝夕凜凜抱負乘之懼而真
貳卿書來告之以當徐徐開導毋遽激烈以養人
主之善意使正論日伸正氣日長越兩日閣下書
亦來又告之以私情不克公義不昭以含糊依違
之意見而欲挽回積年已倒之瀾天下無是理於
是滌泓濯穎手錄二君子書粘置屋壁東西銘之
旁合以自警氣卑識陋恐終負期屬朝廷初意不
過禮隄以勸來者今諸賢漸集不能者當止少焉
力求一閑慢之祿以養偏親或未容遽去則群邪

窟穴巨蠹根株明以見飭向摩厲以須適者上
諭臺長以陰消潛化可謂天地之量帝王之言然
君子之進未盛小人無自消之理此萬目所以顯
顯望閣下與二三公之來相與成端平之治也臺
諫掾過於已著講讀格非於未形兼官信是確論
亦必待其人然後行樂只君子邦家之光某溯風
曷勝忱切

與余京尹 鑄書

某仰恃惻怛愛民之素輒有控稟昨因論寬民力
事遂及四郡仰給客米三縣民無藏錫乞除禁米
下江之令與免三分見錢 聖上親民如傷從善

如流聞已蒙報可推君之惠致之民則在大尹欲
望主盟嚴與行下遍榜曉示通知使久後貪吏黷
胥毋得容轉移之姦牟竝緣之利則家戴上恩人
被公賜與江山相爲無窮也前所白楮皮事已荷
矜從田里鼓舞謹此且謝且祈伏丐台察

通余尚書 天錫書

某九年坐廢一旦謂來擬時從賓尾矯望班頭攷
德問業之有地人事好乖勇去莫挽江空目斷情
焉下風疇昔閑居讀論語用舍行藏一段嘗妄論
不終於藏之學在用先故能用之則行不急於用
之志在舍先故能舍之則藏公於此理講貫素熟

善刀而藏之莫窺其際少焉天定以時止爲時行道更光明也太夫人下還里第不至帶芥否伯壘仲簾垂金佩玉以奉綵衣之樂魯侯燕喜何以過此某墮身閑簋直是窘事旦夕須謀脫去趨承淺而知遇深告時時警策開迪之

荅趙淮東書

某游拜珍帖之辱謙光爛然病瞽開明寵報漣水已還版圖之舊不折半戟坐收全功以嚴淮堧之屏蔽視窮力以堰瓦梁利害相萬前此有言屯田者某每謂屯於外壤而不爲盜資屯於內地而不奪民有積粟強兵隱然金湯之固自治之上策也前時但知移吾粟以養左衽故終於無成爲國謀長正倚忠略規模審重乃見良圖某曷勝欽嚮之至

荅真福帥書

某備員分察兩月間凡十二疏其論事一則中書積弊二求言求賢三講學急務四乞施行同列論疏五寬民力論人之疏首薛次袁又其次中外十餘輩而已外間所傳人數甚多皆非事實所陳亦未有不行但行之不盡如所乞尔 上嘗諭臺長

得放過且放過使之陰消潛化此天地之量也然
君子道長則小人道消進君子不勇小人無自消
之理此中外所以顒顒望公之來公果來天下何
患不泰前日講學疏中首及兄弟之好又以公劄
與廟堂言之意猶有待末及邊臣生事異日憂端
恐在此茲拜珪汗之辱蒙以靜定和平爲然靜定
易搖於喜功和平之過易入於弱又湏得舒卷闔
聞之權可也閩中想不至如泉南費力欲作三五
年規摹公計甚得天下計則未也去非筆力敏健
且記得人物本末甚富驚良不齊物論莫揜少焉
頁三 射去尚惟以主盟國是爲心適言此意

起情志使不爲公執差察官例以上下半年檢
三省樞密院簿書舊幕次都堂之右嘉定移就入
門客次近僅能正此一事餘無足言併乞台啓

荅趙揚州書

某坐想平山楊柳之盛東門芍藥之芳雅歌投壺
恨不獲爲席間小異客妙畫忽臨光風蒲把尉浣
不容聲日來苦目眚煥瘡腮頰醫者謂當於春宣
時大下之則風熱盡去昏眵可一洗自料元氣素
弱禁不得此下遂謝醫瞑坐數日而目眚愈保此
殘喘悉藉穹垞

荅吳總卿書

某方抱整緝之憂瑱墨以奏議來薰薌莊誦灑然
醒霍然汗下而愈其論起於好勝遂至以國爲戲
士無定見又相與怨通之洶洶如海濤之方生勢
不容禦朝廷處以王述遺意幸未大決忠忱體國
議論回天以守爲實以和爲形以戰爲應孰謂我
其冠者皆不知兵哉末引 高廟語 孝廟勝負
存亡之判最爲切當若曰 主上它日臨朝有無
一人爲朕言之嘆却恐有所見略同者未可謂盡
無也淮襄爲藩籬江面是門戶玉麟主人目今作
如何措置守禦徹桑末雨莫待臨期出打樁之策
老世折衝樽俎何公言邊拂天在布之求

答徐倅 普書

某叨竊過分病魔瞰之藥累未嘗離手親舊書率
是疎闊不特記府爲然圖上方略奏陳便宜慷慨
功名可勝起敬五福言富而不及貴足下富矣又
貴之求熊魚兼得豈不大佳然馳驅戎馬之場拮
据牛犁之役得不補失勞而無功孰如棹扁舟於
茗剡岸紅堤綠應接不暇酒後耳熱倚風而浩歌
足以洗胃中之磊砢子舍孫枝督之力學異時取
科第以興門戶志斯酬矣

內制一

戒飭將帥撫恤士卒詔

朕仰惟 藝祖皇帝立國以仁制國以義撫軍馭
軍恩威不相撝用能賦民養軍而民不憚整軍衛
民而軍不然經制一定國勢尊安慨慕風烈常懼
弗逮間者惠陽建安京口高沙之軍蠢爲不靜以
駭民聽雖怙終必戮迄伸邦憲而事非獲已痛切
朕躬夫三綱五常之理在人未始泯絕彼其忘平
時撫養之恩背理捐生而以衛民者厲民豈盡本
心哉有司奉令不虔故其病於掊剝而飢寒之不

免困於力役而休息之無期鬱悒於汨過而赴愬之無所殆非一日亦惟朕之不明有以致之詩不云乎祈父予王之爪牙胡轉予于恤內而三衙外而列閫暨諸軍主兵官其各體至意上下交飭訓禮示信威以儆其玩而恩以恤其私使人人自愛相安于紀律而國勢張時惟汝嘉狃故必罰朕不敢赦

四川安撫制置使趙彥呐堅守邊關將士用命獎諭詔

坤維國之上游我高宗皇帝暢威遠之略炳知人之鑒拔虎將介俾

振虜出奇制勝隱如長城蜀固而國勢定於祖烈朕甚慕之蠢茲新虜荐食亡厭廼者窺我蜀關諸將嘗奮前鏖卻矣茲又涉漢沔以逞卿儒而知兵忠於徇國用玠勝筭身爲金湯駐軍于原上馮高下臨熊卧虎視圍合累旬而氣不折將士感厲用命人百其勇虜有後顧逡巡不敢深入卿之力也朕自聞卿犯危難控險阻每飯意未嘗不在原忽檻吉奏且歎且喜彼曲我直彼竭我盈乘神人之共憤鼓吾貔貅滌氛塹而空之勞士輯民治堡繕塞使西陲安堵如故毋患有功之不見知也書曰汝多修扞我于艱若汝予嘉卿出勉之哉

新除吏部尚書李稹辭免陞兼修國史
兼實錄院修撰專一提領纂修

高宗皇帝正史恩命不允詔

自史策散逸於鬱攸之後 思陵大典正史迄今
猶未脫藁朕甚懼焉卿以開物成務之材通今博
古之識入儀于禁途國史實錄俾參撰次具有家
法茲旣正厥職掌而炎興之釀網懿渠所以維人
心而永天命者併屬卿鈞元提要亟緒成之用副
予思皇祖烈之意典銓批勅精明有餘毋以學槁
思昏爲解使太史公之業無傳也所辭宜不允

福州觀察使楊鳳孫除安德軍承宣使

依舊提舉依祁觀免奉朝請恩命不允
詔

朕躬御路朝永懷長樂旣推恩猶子又推恩猶子
之子所以隆罔極之報也矧卿文雅自將謙靜寡
過尤慈宸所鍾愛進之留務佚之祠館雍容家食
以奉其親可不謂榮乎昔陰馬氏以恂恂世厥家
用能龜紫傳襲與國同慶尚祗踐之奚辭爲所辭
宜不允

端明殿學士崔與之辭免除廣東經略
安撫使兼知廣州恩命不允詔

朕惟先朝以韓琦守相范仲淹守蘇德選也然擁

旄里第於安平無事之時孰與即家宅牧而分憂
寄卿風節在朝廷威名在夷狄朕之韓范也頃辭
聘召佚老海濱悍卒嘯兇薄番禺幅巾登陴赤心
諭曉衆狙屏氣宵遁賢者有益於人國如此就鎮
鄉粉全護海嶠家國一體孰如卿宜矧弭盜於淮
郤寇於蜀沉深有遠略爲我強起可也士君子行
乎蠻貊易行乎州里難愈近而愈不可欺卿忠信
篤敬積孚於州里推之可以孚蠻貊鴟音之革奚
難哉即日建牙四履驪舞朕方嘉卿勇義而識變
巽櫝非所樂聞也所辭宜不允

從臣李真等乞將所得俸給減半幫支

不允詔

朕承世治垢敝之極楮輕物重公私交瘡夙夜不
皇寧惟昔司馬光有言搏節用度宜自上始故裁
濫約冗興于眇躬而大臣祈歸賦祿之半蓋錢穀
之問方棘相與警勅貶損以圖其闕非以是爲可
裕吾國也卿等誼深體國援比有請其未諭朕志
乎夫損貴酌損節戒苦節惟時之中尔知厲羔羊
五紽之風予乃蹈權輿四簋之戒國雖未裕何至
是勉思大計之裨毋徇小廉之執所請宜不允

中大夫真德秀辭免資政殿學士在京
宮觀兼侍讀恩命不允詔

天之生賢不數其得時行道亦非偶然者朕以王
佐器卿於十年之前儀圖共政所以承天祐慰人
望也平治之機方開無妄之疾來諗當饋重歎天
豈虛生是賢哉惟大學一書卿推致知格物之理
啓沃甚悉而未竟其以祕殿內祠養疾闕下少間
則勸讀于邇英卿獲專意齋衛朕不失佛時仔肩
之益而大政易於諮訪是爲兼得天壽斯文何恙
不已股肱嘉哉毋輕於去朕所辭宜不允

光祿大夫右丞相兼樞密使鄭清之再
上奏劄乞從鐫罷居家待罪不允不得
再有陳請詔

國朝筦軍於三衙本兵於宥府務立上下相維之
制使知少長有禮之風故服事有階而犯法惟劔
是關國體可忽廟謨卿具守文應變之長得禁暴
和衆之略謂平陸失伍固訓齊之久隳曲梁亂行
抑驕驛之難制恩威並用紀律復張顧倚成之方
深胡引慝之荐至廼膳周公之輔克綏洛邑之頑
予以救寧武功每思艱而圖易我惟無戮康事迄
欲去而復留宜體朕心勉安厥位惟京師南北軍
之置必謹惟羽林左右衛之選必精益奮乃庸茂
躋于治尚奚罪之待所請宜不允不得再有陳請
知院喬行簡參政曾從龍樞密鄭性之

同僉書陳卓再上奏劄仰祈明罰居家待罪不允不得再有陳請詔

維國大勢如人一身病之受也有源證之發也有
候粵從債帥莫制驕兵但知畏不識之煩曾靡見
光弼之整適當其弊乃在于今卿宣弼諧之勞懋
綏靖之畫虎兕出於柙知干戈之可憂牛羊反諸
人念芻牧之有在抗章自劾陳義甚高維開寶川
班擊鼓之時與慶曆衛士踰垣之日股肱未嘗引
咎精神自能折衝勉殫訏謨奚事挹損所請宜不
允

賜宣奉大夫知樞密院事喬行簡辭免
除兼參知政事恩命不允詔

存養固則智識明閱歷深則謀慮遠此朕倚重黃
髮之意也睠留樞筦數日一朝帷幄大議瞭如著
蔡維我隆興淳熙軍國一體典宥密者必參大政
安有文武兼資之老猶未與聞萬微之務乎命從
中出既喻朕心何嫌何疑而欲引避况天下之弊
莫大於因循姑息朕寤寐治道茫乎涉川卿其與
丞相同心協力濟斯世于艱以副責治之切施置
罷行之得宜則轉移興起之有漸矍鑠是翁謹勿
憚煩也所辭宜不允

知院兼參政喬行簡辭免權監修國史

日曆恩命不允詔

春秋修魯史之舊以事繫日以日繫月而書法著
因書法以求聖人心法不在鉅儒乎卿學優柔而
饜飫文瞻直而詳核軍國訐謨之暇振挈綱領錯
綜注記襲六爲七而作一經蓋浩乎沛然也矧自
薛居正以來執政總統尚矣其母以兼三爲解而
曠大典所辭宜不允

光祿大夫右丞相兼樞密使鄭清之乞
解罷機政不允詔

朕永惟萬務之統在一相相安厥位然後可圖社
稷之安丞相蚤以天下爲己任弼予親政期底丕
乂謂宿弊沉痾勢難遽起而正氣寢還徐當自瘳
用能虛心無我聚衆賢於朝拔茅而泰盡簪而豫
朕日夜望之遽以孤危祈解機政中流捨濟川之
楫可乎天下之理一公可以勝衆私一敬可以勝
百邪益旣乃心終輔台德毋使國人謂朕任賢之
或貳也所請宜不允

光祿大夫右丞相兼樞密使鄭清之乞
俾還故里不允詔

迺六月庚寅召對宰執于便殿咨訪庶務漏過午
太史奏日有承氣其占爲臣承君其吾相開心布
公率同列以承弼厥辟之象歛諄切諭留旣還需

牘越四日癸巳仍以去請殊嗟朕懷周公聖人也
群情猶不能遽孚其欲去迄留輔成太平之業爲
文武申固天命也朕於卿一體無間而明農之志
浩不可遏縱不念公無困哉之訓獨不爲前寧人
付託之重奉幣供王以祈天永命禱慶曆之車主
必行元祐之舟戒偏重卿既得之推是心以往何
治不濟國步方艱而捨去天下其謂卿何其謂朕
何所請宜不允

光祿大夫右丞相兼樞密使鄭清之辭
免授特進左丞相兼樞密使恩命不允
詔

元祐更化一日制下命二相呂大防爲左范純仁
爲右而大防之宅左凡七年君臣之際盛矣哉朕
遵晦養蒙之久嘉與群生共躋新美得卿舊學相
我親政壅者迪之仆者植之憊者翼之大明當天
群陰盡伏靡容光之不照卿之力也左揆虛位有
年如人身之股肱何可偏舉故進卿以首相兼總
文武之柄且選於衆得耆俊以助之朝夕納誨夾
輔台德庶幾元祐之盛撫章來上乃以寵榮爲懼
而求歸老卿豈人爵所能榮哉得位與時憂責彌
重勉殫金礪之益迄成玉鉉之功獨善非所望也
所辭宜不允

宣奉大夫知樞密院事兼參知政事喬
行簡辭免特授金紫光祿大夫右丞相
兼樞密使恩命不允詔

帝王盛世左禹而右皋左周而右召用能濟登雍
熙泰和之治 本朝稽古建官並相非一權臣專
國則獨相如彼其久可不變而通之乎卿直大無
競心老成有遠慮方威柄未還他人所不敢言者
每雍容造膝歷言之簡在朕心知爲宰相器迨更
化共政而益信進升次輔仍幹樞極蔽自夙志倚
爲著龜謂宜亟展經綸之蘊副予望治之切顧猶
以衰病諉大廷朝會進趨檐如拜起翼如搢紳動
色相慶謂少壯有不逮精神折衝奚難哉書曰若
濟巨川用汝作舟楫其勿辭所辭宜不允

權禮部尚書魏了翁辭免兼直學士院
恩命不允詔

戊寅並命二相越翼日己卯便朝同班奏擬首以
卿進曰號令文章有國之精神禁林虛直非了翁
不可朕喜於得人亟俞之卿久困排根趣還禁近
學益老文益偉憂摩三光斧藻萬象沛乎有餘思
以是而草內命孰謂典誥之遠毋多遜也所辭宜
不允

喬行簡辭免提舉國史實錄院提舉會

要勅令經武要略恩命不允詔

房元齡之監修國史實錄崔鉉之進讀會要與蕭何之次律令魏相之知兵略皆宰相職也卿以名世鴻碩爰立作相內外萬務蓋無不統矧簡策之記兵律之志乎維是諸書事嚴體重設官分纂曠歲未就非老於經制述作之學總提其綱要諸儒將奚所折衷而收汗青之功哉國典有常巽章良過所辭宜不允

金紫光祿大夫參知政事兼同知樞密院事曾從龍辭免除知樞密院事兼參知政事恩命不允詔

乾坤以六子爲用而化功成朕同日命二相又同日命四執政六子備矣卿以凝重參大政以深沉贊廟筭履正奉公言可底績朕簡注蓋深進筦五兵之寄仍預萬微之務夫豈以序遷爲卿榮夫天下勢方厝火於積薪朝廷遠慮宜徹桑於未雨討諸軍國一日不可緩也抗章祈免欲別求文武全材而用之孰有加於卿者乎旣深多事之憂母徇一謙之執所辭宜不允

端明殿學士太中大夫簽書樞密院事鄭性之辭免除同知樞密院事恩命不允詔

慶曆以韓琦范仲淹爲樞密副使士大夫酌酒相賀朕思見其人若飢渴卿氣明而抗志遠見定而慮事精列在宥府隱憂更切指陳可否多中肯綮進參樞筦之嚴增壯精神之本待之優乃望之深也卿能以琦仲淹自勉則何巽避之有所辭宜不允

端明殿學士正議大夫同簽書樞密院事陳卓辭免除依舊端明殿學士簽書樞密院事恩命不允詔

朕即政之七年嘗命舊德爲同簽書尋進簽書今右揆是也故甚重其選卿廉方足以起懦謙恭足以壓浮擢聯宥密許謨備究如玉在山隱然邦家之光循序而升寵數非過深長邊瑣之思懇切籌帷之助朕所以進卿者未艾也懋哉母格成渙所辭宜不允

權禮部尚書魏了翁辭免兼侍讀恩命王人求多聞以建事朕自親政以來宏開禮廈詳延儒雅性命道德之奧治亂安危之機所聞多矣卿何相見之晚耶一命而典禮再命而傑直三命而勸讀蘇軾在元祐嘗兼之惟卿爲允平居之所講切憂患之所論著本末該貫從容前陳朕將虛心以聽尚奚辭

權禮部尚書兼侍讀魏了翁辭免兼同
修國史實錄院同修撰恩命不允詔

西狩絕筆還國獨以良史稱迨唐魏謩領起居注
人主索觀之以兼書善惡不奉詔厥職舉矣爾系
出於謩論議挺挺猶有證之風烈紬書史館裁成
一代之典疇不謂宜況爲望郎名卿爲柱下史皆
嘗執簡纂次今顧以大宗伯參紀錄之職而辭乎
往欽哉書法母隱所辭宜不允

光祿大夫新除左丞相兼樞密使鄭清
之辭免特進恩命不允不得更有陳請
詔

朕惟說命之進于王立政之教厥后旣交孚於志
慮必共訂於規摹無言不酬從欲以治卿學足以
正人心承三聖材足以經邦國紀萬民進躋上宰
之班增壯中朝之勢牢辭欲去力挽廼留歷歷乎
奏牘之數百言卷卷乎治道之十餘事上勿搖於
疑問下自絕於依違開元要說之姚崇彼何取尔
正觀勸行之魏證是蓋似之方堅此意以責成必
踐乃言而底績胡爲卑牧猶遜崇賢雖賜位之加
隆實懋官之宜厚矧乾道並命之盛典即元豐改
制之首階匪朕敢私惟人是稱亟對揚於休命毋
過事於撝詞所辭宜不允

權禮部尚書魏了翁辭免兼權吏部尚
書恩命不允詔

朕謀廟訪落之始卿以嘉猷入告曰王位在德元
厥亦惟棐民彝用懌寧人受命實獲我心無人乎
子思之側不我留也間去而嗑惠然來思敷奏以
言亦克用乂方將迪簡在庭借庶明翼于朕躬以
春官行天官事顧以爲大介賚尔耶惟寅斯清惟
公斯明卿蓋裕於率屬毋違朕所辭宜不允

兵部侍郎淮東制置使趙葵乞罷黜不
允詔

維予前寧人經德東哲咨乃父宅牧于江漢匪糾
匪棘肆牧寧武圖功迄今靡聞言良用嘉歎迺考
錫壹惠之謚以忠冠肅亦惟旌往勸來庶幾世有
不二心之臣服勞于王家卿佩教忠之訓奮志孔
武朕推心任之整淮浦之旅雪嶠函之青菴觀後
効顧以群疑自鞠自沮何耶夫簡物議者喪功之
本畏人言者進德之機搢卿來奏謂忠孝有聞憂
懼無所且重感於基間不行之子儀繼自今其知
所進矣庠秋風戒寒嚴車攻之修備謹采薇之守
衛以張吾國而昭乃辟之有乂朕疑何有哉避謹
祈免非朕樂聞所請宜不允

端明殿學士太中大夫廣東經略安撫

使崔與之再辭免除參知政事趣令就
道恩命不允不得再有陳請詔

朕慨念爲君之難儀圖者壽俊共政用康保民以
長我王國詔書屢下申之親札致敬有禮視安車
蒲輪爲加厚卿抱道俟時可幡然起東海之濱矣
巽章至再陳義何切范鎮年未及謝事而休致在
元祐固不以爲矯獨不思文彥博起於旣老之餘
力扶丕乂豈徒爲保身之哲耶夫麒麟鳳凰之出
百鷟率服以其德非以其力也卿旅力雖愆精神
逾勁坐而謀國必能折茲弭戩翼朕攸濟維日望
之彊飯就道毋憚于行所辭宜不允不得再有陳
請

寶謨閣學士正議大夫提舉江州太平
興國宮余巖乞俾致其事不允詔

華髮舊德壯猶元老有國者所甚重故朕親政以
來樂得耆喆是馮是翼兆渭水以奮庸起海濱而
共政經闡史觀亦參列備咨訪安有先朝名法從
老於學問政事如卿而簡拔獨後乎顧卿牧御湖
湘積勞嬰疾姑俾均佚祠庭齋精神以俟用茲攬
來章祈致厥事惻然宿恙之未平也知止不殆抗
懷固高渴想儀刑詎容得謝其務玩勿藥有喜之
象以康乃身佇嘉謀之入告所請宜不允

太中大夫權禮部尚書兼直學士院兼
同修國史實錄院同修撰兼侍讀魏了翁乞賦祠廩不允詔

韎韜不道闖我蜀關卿伯氏杖使者節來河誓不
與俱生而死之朕盪然歎嘉詔褒金城之節以勸
忠且以紓卿孔懷之戚而請祠欲西將進至荆夔
與父老謀救鄉國陳義甚高昔漢嘗有事于四方
馳傳諭蜀屬之司馬相如汲黯則留以自近山立
玉色姦寇奪氣功出大將軍上本彊則精神折衝
故也卿其圖濟乃辟謹勿言去有勝筭亟入告所
請宜不允

禮部尚書魏了翁辭免慶典轉一官詔
緇衣之宜兮敝予又改爲兮好賢之心無斁也卿
曩以言去國非朕意更化入儀橐從直諒之氣不
少衰朕愛其有元祐諸賢之風既還銓簿之四階
茲又進慶典之一秩眷隆恩浹豈以周南留滯爲
間哉夫天爵之尊固無慕於人爵緇衣之好朕心
庶幾焉其母過辭所辭宜不允

知樞密院事曾從龍辭免樞密使督視
江淮軍馬恩命不允詔

朕承艱難之業昧綏御之方蜀旣被兵襄復告警
長淮大江風寒之備孔棘元戎重寄安危惟人然

自昔康時濟世非便儼儼厲者所能爲此截截善
論言秦誓所以重悔也卿沉深如鄧禹鎮靜如謝
安始對延英首以佳兵爲戒識慮遠矣共政逾年
威重有體朕知可屬大事時方多壘輟股肱之臣
以盡護邊將國有令典便朝咨卿勉爲朕往卿旣
許朕矣而猶以取具臨時爲解夫軍國一機內外
同體措置得宜精采立變走符堅於肥水折佛狸
於瓜步盡在卿指縱之下毋留成命佇奏膚公所
辭宜不允

權禮部尚書魏了翁辭免除端明殿學
士同簽書樞密院事督視京湖軍馬恩
命不允詔

可大之業由事而生此功業所以見乎變也蠢茲
黠虜窺我蜀襄朕慨事變之方來一日建兩督府
於江上使聲援相接以全制勝卿學洞古今安危
之略識照夷夏盛衰之幾眷知特深讒基莫間趣
進參於樞筦往盡護於上流成命一頒江漢重湖
已隱然有虎豹在山之勢顧以軍旅未學辭何耶
中軍謀帥必本之詩書禮樂萬里戎情亦惟儒者
能料之文事武備不容異觀也集思廣益之有加
保大定功之可必亟究真儒之韞毋遲先乘之行
所辭宜不允

同知樞密院事鄭性之辭免兼參知政事恩命不允詔

軍國雖有異容文武初非二道屬時多故輯我衆謀召虎來旬來宣既出揔徹疆之寄山甫令儀令色宜進參賦政之規卿學術深明氣度軒豁蚤培遠業嘗有志於著鞭晚造邇聯猶不忘於運甓居切風寒之慮圖爲陰雨之防適當東府之暫虛爰藉西樞之兼領雖相與經綸於萬務何以假爲然熟觀酬酢於百爲自此升矣勉殫忠益奚事勞謙所辭宜不允

權工部尚書兼知建康府陳韓辭免刑部尚書沿江制置大使控扼長江往來武昌巡視恩命不允詔

西陵之至江都俱切風寒之護建鄴之控天塹尤嚴王氣之占方邊遽之孔殷宜中權之增重卿弘深智略沉毅威名自膺留鑰之司備舉戎旃之務賢於長城矣旣高閭外之謀豈憂匈奴哉何吝師中之寵常伯申加於妙選制垣仍進於大名寧於卿榮徒得君重盍亟講於勝畫毋過爲於遜辭乃若上流更資巡視之勤陪都恐有空虛之慮肆披來奏式契朕懷况西府盡護於列屯北門毋勞於行役第江流之絕警暨海道之無虞實予顧憂維

尔成績所辭宜不允

端明殿學士提舉萬壽觀兼侍讀李璣
乞賜骸骨不允詔

卿宿學深於造微壯略優於經遠簡知惟舊禮遇
特殊專紬石室之藏首勸金華之讀班升書殿恩
視政塗示委曲以貪賢俾從容而獻可胡爲陳力
婁欲乞骸豈齊王無以留孟軻抑魯公不能安孔
伋致煩耆德遂起遐心朝無白首大儒則內勢輕
國有黃髮良士則外侮息當此艱圖之日豈卿得
謝之時母以兄弟之子而嬰其心勉爲君臣之義
而安厥位所請宜不允

寶章閣直學士太中大夫提舉江州太
平興國宮史嵩之辭免除華文閣直學
士知隆興府江西安撫使恩命不允詔
南昌爲江湖間一都會蠻荆甌粵左控右引形勢
今猶古也必得威望夙著者宅乃牧以卿抱應變
之材懷經遠之志分閫京峴厥有勞績故進嬀閣
之直起家以鎮之顧以親年喜懼辭往來擊鮮獨
不可耶亟其入覲朕將臨遣所辭宜不允

太中大夫同知樞密院事兼參知政事
鄭性之辭免同提舉編修勅令恩命不
允詔

道者立治之本法者制治之具成周盛時冢宰以六典八灋八則治邦國都鄙官府必有掌其貳者重成憲也我朝勅局之設總以宰臣貳以執政蓋此意卿富博古通今之學茂致君澤民之志擢副樞筦進翊政枋几前律後令著在簡策參舉而科別之非卿誰宜爲有次律令之蕭何則規摹宏遠有奏故事詔書之魏相則品式備具而況以三代之佐修三代之法乎分職有常引避徒贅所辭宜不允

端明殿學士提舉萬壽觀兼侍讀李璣乞歸田里不允詔

岷峨江漢之英靈鍾爲人物其萃在本朝莫今爲盛而德爵齒之俱尊孰有過於卿者累章祈去挽留愈力朕豈私卿哉一陽在內衆陽朋來留卿所以聚坤產之珍爲邦家之光也矧蜀警未弭思卿疇昔控禦還定之功猶未大暴白於時儻聽之輕去人謂朕何卿以禮義庶耻而自砥礪朕以耆壽俊在厥服而加繫維宜體貪賢之心益究格君之學所請宜不允不得再有陳請

新除端明殿學士太中大夫同簽書樞密院事督視京湖軍馬魏了翁辭免兼同提舉編修經武要略恩命不允詔

國朝以武名書究鶚冠黃石之首則有神武秘略
采留侯揚僕之制則有武經總要三朝控禦之
方則有經武要略阜陵規恢之志則有武經龜
鑑而經武要略爲尤重創業中興之宏模懿範皆
在焉編刻以儒臣提綱以宰輔尊閣以樞廷其來
尚矣朕方整軍修戎以折衝固圉旣進卿翊本兵
於內又屬卿視成師於外而是書命以參掌凡兵
制邊防而下發金匱之閱藏續玉鈐之會粹昉分
彙輯熟訂詳施職也亦時之宜也卿曾蟠四庫神
幹五兵筆力所至挾雷霆而驅風雨奚遜爲所辭
宜不允

侍御史兼侍講李鳴復辭免除權工部
尚書恩命不允詔

朕撫艱難之運而求治越拘攣之法以用人苟得
非常之材可無不次之舉卿頃階卿列峻陟臺端
蔚乎直其正方其義之風挺然剛不吐柔不如之
操力扶國論密契朕衷茲繇耳目之官超進喉舌
之寄蓋中興百年所未有也侍從職在獻納何事
不可言卿其毋以言責官守爲問祇若予命所辭
宜不允

平齋文集卷第十四

平齋文集卷第十五

內制二

殿中侍御史王遂辭免除戶部侍郎恩
命不允詔

朕自親政以來臺諫以直聲著者必超軼等級而
進之所以勸敢言廣忠益也卿氣壯而材茂識高
而論偉繇分察再遷察非法於殿中暴未殄之惡
折方萌之姦蹇蹇匪躬聞于天下朕甚器其直稽
諸故府臺臣以供奉赤墀攝貳版部僅一二見如
卿即日爲真亦足昭眷簡之殊旌拔之異矣矧嘗
考覈郡國計簿具見本末理才有疏茂利之辨尤

嚴今特舉而措之母多遜所辭宜不允

權戶部侍郎趙立夫辭免除戶部侍郎

恩命不允詔

小司徒掌建邦之教灋令貢賦抑其細也而後世專以理財爲職卿本固而末茂外寬而內明踐敗所至務以有餘不敢盡之意寓於政事攝貳地卿恂恂如不能言而鈎索原委檢覈滲漏吏無所容其欺心計精矣就俾爲真用懋前業夫天下大計分隸四總其入于版曹者纔二十七郡生寡而食衆用疾而爲舒故常患不澹鞭笞笏畫之長朕方以陳恕望卿勿辭可也所辭宜不允

權刑部侍郎李性傳辭免除禮部侍郎

恩命不允詔

有虞氏命伯夷作秩宗曰夙夜惟寅直哉惟清寅文直故清也知此然後可以爲禮樂之官卿務敬以直內之學有淵乎似道之風甘泉之論思露門之勸講責難陳善備罄忠益而不汲汲於進實直清矣若昔折民惟刑與降典相爲表裏疇庸邦憲之平正序春官之貳選妙望華朕命惟允齊仲孫來省難知魯秉周禮而不敢動晉欲服楚必先大蒐被廬示之禮時方多艱卿其思所以尊吾國者徒鳴其謙非朕所望所辭宜不允

權兵部侍郎趙彥懌辭免除兵部侍郎
恩命不允詔

卿學問造乎精微論議根乎正大垂紳端笏於朝
蓋麟之儀儀鳳之師師也引年告歸朕以金華之
業未竟擢繇武部之最就進貳卿之真亦可爲勉
留矣而猶以歸諗歷觀在廷耆耋黃髮我尚有之
而公族之年耆德明孰踰卿者四郊多壘主憂則
臣辱同姓之老方與國同其戚休而忍不爲朕修
九伐之灋明七德之武遽舍之去乎其彊起就厥
位所辭宜不允

朝議大夫新除兵部侍郎兼國史院編

修官實錄院檢討官兼崇政殿說書趙
彥懌辭免陞兼同修國史實錄院同修
撰恩命不允詔

經者道之綱也史者事之紀也八書十志而下述
作紛紛經學之不明也深於經則必良於史卿學
有師傳晚造自得邇英論說析微抉隱多先儒所
未發用力於經深矣典謨歷代之軌範春秋百王
之繩墨記言動者祖焉卿能以經法爲史法品藻
實錄方將軼遷董而上之進參纂修尚奚遜所辭
宜不允

特進左丞相兼樞密使鄭清之等奏爲

雷發非時乞賜罷黜家居待罪不允詔
自昔有國之患莫大於君臣玩天變而不知懼間
者雷沔發於首春雷君象也燁燁震電不寧不令
朕方引咎修省卿等亦以陽不斂藏俟罪于家上
下相與儆懼若此吾國其庶幾乎漢丙魏同心輔
政風雨災變時氣失節皆惕然以爲己憂而中興
之治成卿宜一乃心德圖所以回天意者移災股
肱非朕志也明發其率百辟以朝端朔所請宜不
允

特進左丞相兼樞密使鄭清之等奏爲
滿敬 天基聖節乞許免肆筵不允詔

朕惟天心仁愛人君故出災異以譴告之星雷示
變天所以大儆朕也而卿等職思其憂莫不震恐
引慝可謂得交修之誼矣然損貴酌損節戒苦節
禮以義起必惟厥中朕於誕日旣寢上壽之禮群
臣嘉賓之式燕可盡略乎勉體示慈之意毋勤引
避之嫌所辭宜不允

太中大夫同知樞密院事兼參知政事
鄭性之奏爲雷電非時乞賜顯加黜罰
不允詔

廼立春再翼日庚戌般雷始發又再翼日壬子而
震少陽驟洩恐懼靡寧故預戒百官天基節寢介

壽輟用樂庶幾上荅天譴卿乃謂咎在臣等乞加
顯黜昔我仁祖以春雷為異明詔責躬曷嘗歸過
股肱卿宜悉心輔朕以兢兢致福勿復辭費所請
宜不允

工部尚書李鳴復辭免玉牒兼侍讀恩
命不允詔

周小史掌邦國之志莫繫世辨昭穆師氏以數詔
王居虎門之左司王朝自唐以來瑤牒之纂修經
緯之誦說蓋昉諸此而兼其長為難卿著御史之
冠曳尚書之履聲稱籍甚而執春秋一經以陪緝
熙之講尤多所發明朕孰察所韞閎中而肆外故
以開元褚無量開成李衢之職兼命之進而勸讀
則明引君於當道之誼退而撰次則用大事書於
策之法恢乎有餘地也所辭宜不允

戶部侍郎王遂辭免同修國史實錄院
同修撰恩命不允詔

文以氣為主職史事者有直氣則無曲筆卿以學
問養集義之氣頃為御史不為強禦屈剛且直矣
進升言語侍從之聯參舉紀傳編年之法以前日
之是非一時者榮辱百世均是氣也況司馬遷之
進茲雄崇執利班固之否正直輕仁義曾莫能當
卿麾訶之餘鋒一代大典久未就緒非卿其誰宜

爲所辭宜不允

兵部侍郎趙彥恢辭免侍講恩命不允
詔

元祐中程頤爲說書以敬涵養君德范祖禹爲侍講以和開導主意親學士大夫之益如此朕知卿和而能敬始進之以頤今進之以祖禹德性之迪意嚮之正惟吾宗老是準巽積來上謂究心自得而無能悟主朕實愧焉雖然學有緝熙千光明佛時仔肩示我顯德行亦惟卿勉之所辭宜不允

特進左丞相兼樞密使鄭清之金紫光祿大夫右丞相兼樞密使喬行簡再上奏爲雷發非時乞賜罷免退伏田里不允不得再有陳請詔

春秋書三月大雨震電夏正月也劉向謂雷未可以發而發陽不能閉陰之象故邇者雷發於春始朕甚懼焉丞相與國同其戚休旣夙夜熏心圖答譴告積陰隨霽矣而猶執咎不自已夫勅天之命惟時惟幾元首股肱交相儆戒固應天之實然宣王遇災而懼側身修行詎嘗分過於申伯仲山甫哉況今外患未弭內治未飭朕方倚丞相如左右手其安厥位懋我政事以保乂我有夏穆我天緯毋輕於奉身而退以孤朕也所請宜不允

端明殿學士宣奉大夫李臺上表辭免
除資政殿學士知眉州恩命不允詔

朝廷以耆儒而尊故國以世臣而重朕萬里召卿
期以爲股肱心膂詎肯使一日去脩門哉惟西土
嘗不靖朕爲之廢寢食者累月峨英岷秀盡萃主
庭鄉大夫之舊德宿望莫有留者拊髀躊躇憂顧
無所寄然後知季良在隨庶頗用趙之足以重鄉
國也輟經幄之優進書殿之重高牙大纛歸鎮鳴
珂薦紳父老念疇昔綏靖之勲猶在必動色相告
坤維可無憂矣况峻職以尚賢即家而爲守在蜀
境止一人朕於卿可謂盡體貌之宜往哉毋以中
外爲間所辭宜不允

端明殿學士宣奉大夫李臺再上表辭
免除資政殿學士知眉州恩命不允詔
孔子自衛而反魯孟軻去齊而歸鄒弗逢其時乃
諉諸命卿心存於致主朕志切於用賢將以有行
未爲不遇曩頻年外服嘗著績於制垣今再歲中
朝遂眠班於執政雍容勸讀繾綣給扶顧圖任之
念未忘何引謝之章屢至躋隆名於祕殿建巨屏
於故鄉歷考前聞罕見近比相如之諭蜀道方來
弩矢之迎買臣之守會稽何勤卽綬之上諒薄言
於畫繡尚遠告於辰猶所辭宜不允

太中大夫守兵部侍郎淮南東路安撫
制置使兼知揚州軍州事趙葵以護邊
無狀乞賜罷歸不允詔

善射或失於百命中之餘良醫多得於三折肱之
後此操危慮深者所以達也卿蚤懷智略銳赴事
功雖鳴劍伊吾之志未酬而堅壁細柳之風猶在
梁荆俶擾淮獨晏然涉歷多而識慮老可與圖守
矣邊烽少歛亟上歸請兵法曰毋恃其不來恃吾
有以待之賊情叵測吾圉尚䟽卿宜日討軍實思
敵王愾其可遽奉身而退乎所請宜不允

太中大夫守尚書戶部侍郎兼副使
令官趙立夫乞畀叢祠不允詔

漢張蒼爲計相更以列侯主計唐劉晏自度支領
租庸鹽鐵至僕射猶領使如舊理財不宿其官簿
書放紛吏並緣爲姦利雖竭江河之入莫供尾閭
之泄也卿踐更中外之久財賦脉絡洞燭表裏而
姿稟靜固精力彊乂又足以行之左戶爲真朕方
委重閱日幾何遽以春衣辨集而求均佚蒼晏職
業僅以是自諉耶維時調度孔殷尚究爾材毋曠
吾事所請宜不允

朝奉大夫權工部尚書時暫兼權吏部
尚書兼修玉牒官兼侍讀李鳴復辭免

除權刑部尚書日下供職兼職並依舊
恩命不允詔

朕惟舜命九官垂共工臯陶作士皆終其身不易
後世必遞遷熟試以觀通材卿爲棘卿有明清之
風則峻總一臺爲臺端有直亮之操則超躋八座
爲起部有簡靜之譽則併攝天官知卿深故進卿
亟也然經遠猶者貴事功之詳歷圖大任者在望
實之積乎茲繇五雉之華趣典鵷鳩之重擢無虛
月意蓋有在卿以因人序升而辭過矣其思式敬
爾由獄以長我王國所辭宜不允

中奉大夫質文閣待制賜紫金魚袋重

震辭免除寧章閣直學士知靜江府廣
西經略安撫恩命不允詔

朕待臣下無中外之間以久不見卿召自姑孰賜
對于便朝議論平實可見於行良用嘉獎攝長起
曹詔墨猶濕而嘖言已至憮然不得而私也廼睠
桂筦爲廣右都會有江山之勝無瘴癘之虐峻直
西清往顓牧御過家上冢行道謂榮豈若季布徒
以一毀譽爲進退哉勉敷德意使海蠻山僚人人
懷其生則予以懌所辭宜不允

朝議大夫權尚書兵部侍郎四川安撫
制置使趙彥呐乞速加汰斥不允詔

西南六十州倚天險以爲固卿老於邊籌控仙原之險以挫賊鋒功與馬服先據北山等朕既下詔獎勞矣而爾子洸夫又能獨潰旅以紓心腹之憂威名既立賊雖狼貪無厭抵觸未已獨不思吾老羆之當道耶進卿武部之貳且官厥子於朝其體有功見知之意益堅授任危難之圖收合散亡謹固封守使全蜀以寧毋過爲引咎以自餒其氣也所請宜不允

朝議大夫試尚書工部侍郎汾江制置使兼江南東路安撫使馬步軍都總管知建康軍府事兼行宮留守陳韓公

昇祠廩不允詔

天下一身也論病以及國原診以知政漢之跋盭唐之疽根皆識國體者所深憂朕不能遠德肅然念三垂之不靜北門管鑰徒得卿重除戎蒐實養威制變靡一政之不舉再進文昌用懋乃績俾修扞我于艱病在膏肓日甚一日忽騰祠請殊駭朕聞得非切於憂國以身之病論國之病歟夫醫緩所視固砭劑所不及秦越人浣腸滌胃必有可起之方蓋國勢之轉移在人未可諉之壞證而不之治也卿亦勉爲王事親藥餌畱精神以佩安危之寄所請宜不允

魏了翁辭免依舊端明殿學士除簽書
樞密院事令疾速赴行在奏事恩命不
允詔

采薇以遣戍視薇之剛柔爲行役久近之候而出
車勞還杖杜勤歸繼之所以閱歷時之勞也間者
歲聿云暮卿憤於封豕長蛇荐食上國烈然以樞
臣視師于江上星言夙駕冒犯霜露曾無幾微見
顏面亦云壯矣吳楚上下數千里臂拍運掉氣勢
翕合有出門同人之應朕寢爲安迺睠莫春閱時
且再勞於王事盍遄其歸在師中吉序進一等特
以示吉甫之燕喜而舍爵策勳猶有待也何行而
謂歟戍之後艱何施而杜挺憂之內異同所處置
而使朝廷尊靈生靈之無失所延英入對其孰數
于前以圖綏靖引疾而辭非朕所望所辭宜不允
謝奕昌辭免特授保寧軍節度使提舉
萬壽觀恩命不允詔

我孝宗迪開睢之風重葛覃之本言告師氏間歸
謁於祖禰之庭詔馭群臣必進褒於伯仲之列著
爲國典用厚人倫卿笙磬和平珩璜鎮粹清規雅
度具存江左之風嘉則令儀同稟洽陽之氣聯鴈
行於朱閣蕭鷺序於彤墀祇奉官闈還展寢廟榮
光接于五世異數萃於一門超陟齋壇總提真館

蓋率先朝之舊匪繇近戚之私宜益務於好脩毋過勤於引避所辭宜不允

謝奕禮辭免特授保康軍節度使提舉萬壽觀恩命不允詔

朕尊臨函夏夙建長秋化成二南曾無示私外家之意禮成五廟宜有昭德異姓之恩卿性行淑均風神秀徹如圭如璧沂慶派於貂蟬吹壘吹簫播英聲於鸛鷺託在肺附蔚爲羽儀奉翟禕而修寢廟之恭擁旄節以領祠庭之佚寵超二等榮動一時以淳熙戚畹之疊章爲慶元相閤之盛事匪徒馭貴抑以教嫻勉循制節之規宜略撝謙之請所辭宜不允

魏了翁再辭免依舊端明殿學士除簽書樞密院事令疾速赴行在奏事恩命不允詔

兵難隲度則倍道而疾征事有密奏則乘傳而趣入王事靡盬所以不皇啓處也國朝儒而知兵莫加於范仲淹慶曆中出經略西事久之未獲要領而召爲副樞定廟謨於殿陛之間震天聲於靈夏之表卒搃服之卿腹有萬甲名齊一韓廼者視師之行協比諸閫拊循三軍有關疆事旣得以直達朕聽今又以所目擊還歸坐籌折籌答之好音

懷之吾有以待虜矣恢台之交風日未烈其溫驅
以尉渴佇所辭宜不允不得再有陳請

皇叔祖少傅保寧軍節度使充萬壽觀

使嗣秀王師彌生日詔

十一月十七日生

新陽踰浹協氣先春生一代之宗英爲兩朝之國
老眷隆列棘恩賁垂蓬備牢餼以陳儀茂燕頤而
介壽

同知樞密院事鄭性之生日詔

小寒屆節駿嶽儲神應昌運以生賢幹洪樞而贊
治特隆睠遇肇錫餼牽介黃髮之脩齡後緇衣之
篤好

永寧郡王楊石生日詔

紀鳳標春將臨銘栢傳龜毓瑞先慶垂蓬豐好賜
於周官洽燕私於漢戚祗予寵渥介爾耆齡

光祿大夫右丞相兼樞密使鄭清之再
辭免授特進左丞相兼樞密使恩命不
允批荅

元愷並舉而百揆宅之司空公孤俱立而六典掌
之冢宰大厦必棟梁之任巨川惟舟楫之資允繫
具瞻曾微虛授以卿韞帝師之學抱王佐之材疇
績中台升班首輔蓋欲究致主澤民之業凝調元
贊化之功使國勢重於泰山而人心安於磐石倚

毗良切考謹非輕盍亟爲莫枕之圖猶堅執循墻
之請人不足與適也朕正賴於格心時則勿有間
之卿何疑於立政况此艱難之日豈其閑退之時
所辭宜不允

宣奉大夫知樞密院事兼參知政事喬
行簡再辭免特授金紫光祿大夫右丞
相兼樞密使恩命不允批荅

帝賚良弼而輔丕乂天生賢佐而祐中興繫一德
之交孚實千齡之幸會卿三朝壽俊四海達尊充
於性則碩大而光明備於身則康寧而壽考如圭
如璧之倚重較久人望之獨隆非龍非彪之遺次
師新國均之對秉蓋天所相維朕之承中外之場
證已形上下之憂心如醉趣展濟時之略毋貽避
事之嫌所辭宜不允

宣奉大夫知樞密院事兼參知政事喬
行簡再上表辭免特授金紫光祿大夫
右丞相兼樞密使恩命不允仍斷來章
批荅

朕以治國平天下根本於人主之身深宮暗室左
準右規局嘗一息懈而世道積壞之餘國勢未振
物情易搖中夜以思慄乎若朽索之馭六馬榆塞
又將秋矣並建輔弼亟圖康濟免積滯至得無以

補苴罅漏扶植頽敝之難耶 列聖紀綱法度具
在天下事猶可爲以卿老於謀國勇於致君調元
經武特在機括之一轉趣亮天功用荅人望牢辭
可已也所辭宜不允仍斷來章

光祿大夫右丞相兼樞密使鄭清之再
上表辭免特授特進左丞相兼樞密使
恩命不允仍斷來章批荅

元首明則股肱良股肱喜則元首起相須甚切相
值甚艱卿學足以承三聖之傳識足以定萬世之
策適更張之有待嗟大壞之難圖救病於已危以
爾爲上醫之盧扁葺廬於旣朽以爾爲巧工之般
輪特陞左揆之登昭示右賢之切交孚靡間頻異
奚爲瞋眩而厥疾瘳妙試回生之劑綢繆而彼桑
徹熟思禦侮之規毋棄爾成亟祗朕命所辭宜不
允仍斷來章

金紫光祿大夫參知政事兼同知樞密
院事曾從龍上表再辭免除知樞密院
事兼參知政事恩命不允仍斷來章批

荅

國朝之治莫盛於嘉祐時則有大臣考覈兵數地
理使邊防無闕戍奉行典章故事使百官奉法循
理而朝廷尊卿之祖也卿山立川流克世厥德茲

以參預進本兵之重且世厥官運籌帷中制勝堂
上修攘兩盡庶幾海內復還全盛之風詩不云乎
對揚王休作召公考此朕所望於卿者攜辭徒費
所辭宜不允仍斷來章

端明殿學士太中大夫簽書樞密院事
鄭性之上表再辭免除同知樞密院事
恩命不允仍斷來章批荅

有國之患莫大於君臣上下以危爲安而不知懼
知懼則可爲矣朕靜觀天下之勢惕如涉淵故並
建股肱心膂圖濟于艱二三大臣切於體國莫不
念形懼之不可已而卿踴然以外憂內患爲己責
天所以訓楚警晉之意其庶矣乎本彊則精神抗
衝得道則狙詐作使力贊樞機之運毋徒偃俯之
恭所辭宜不允仍斷來章

端明殿學士正議大夫同簽書樞密院
事陳卓再上表辭免簽書樞密院事恩
命不允仍斷來章批荅

蓋聞宣王中興倚重於孝友之張仲有孝友之臣
主於內則戎車四牡始得以成伐功於外卿踐履
全君子之和操守得大臣之正朕之張仲也自登
宥府物望具孚進不躡等厥任增重夫國勢之安
危在所寄邊防䟽闊軍律放紛風寒之慮方深陰

雨之備宜急卿雖位樞庭之末可過謙乎所辭宜不允仍斷來章

曾從龍再辭免樞密使不允批荅

召虎江漢之命姬旦淮夷之征皆爵上公往衛中國欲威靈之旁暢必名位之加崇卿有武而有文能定而能應處基命宥密之寄得受任危難之風果爲朕行耶趣進臨於都會吾無復憂矣知坐折於遐衝胡尚遜於使端似未孚於予志望之重則可以盡護諸將權之尊則可以獎率三軍矧視周家之禮猶輕其在國朝之典未遠匪隆揔統曷聳觀抑使表裏聯絡之諸屯皆識上下綱維之深意猶猶孔熾我是用急姑煩籌筆之勞徐方來庭王曰還歸佇錫命珪之寵倚毗良切偃俯奚勤所辭宜不允

魏了翁再辭免簽樞督視京湖軍馬不允斷章批荅

昔在先朝蜀出名輔張浚精忠之山立允文碩畫之淵深皆於王事靡盬之秋克奮元戎啓行之略朕方深於憂顧卿盍展於英猷荐披謙櫝之勤猶遜師干之重矐禁塗之獻納暨經厦之建明雖所陳略施未盡如賈誼之志然其策常用已深識子房之心於艱難乃過虞於扞格况上流之

形勢甚重而中朝之體統不殊精神既孚脉絡自貫甲寅報可亟宜上方略於金城辛巳饗功詎止訖天誅於洄曲倚湏戒道勿事循牆所辭宜不允仍斷也 辛

曾從龍第二次辭免樞密使都督江淮軍馬不允斷章批荅

易之師正丈人吉非必以素居富貴稱也才謀德業衆所尊信畏服則國勢倚之而重卿德業之茂才謀之偉積孚于衆望出分憂寄盡董師千十乘啓行有日矣本兵置使特壯前茅豈以富貴卿哉矧所相兼官於中元戎專官於外體貌司章脉絡貫修扞于艱以救寧武圖功蓋在此行况拜稽首對揚王休毋屢勤遜牘爲也所辭宜不允仍斷來章

文武百寮宰臣鄭清之等上表奏請
皇帝正月五日天基聖節御紫宸殿上
壽不允批荅

朕親臨政枋以來嘉與海內相安於善治而秉德不康寧無以輯天人之和咎證荐形於象緯妖氛旁煽於曩垂致使吾民重罹其害夙夜忪厲心焉如擣其敢晏然盛禮備樂于廷以侈誕彌之慶哉群公百辟盍圖往求朕收濟顧援承平舊章以請

君曰卜爾萬壽無疆固天保歸美之至情而嚴恭
寅畏天命自度治民祇懼無逸享國之長在此不
在彼也其已將順用副憂勤所請宜不允

文武百寮宰臣鄭清之等再上表奏請
皇帝正月五日天基聖節御紫宸殿上
壽不允批荅


誕節之置非古也我朝 列聖觀會通以合禮必
隨時而酌損之上天示變則寢同天之祲容萬民
失業則蠲天申之縟典蓋以畏天恤民爲心不以
位爲樂也朕獲承至尊休德于今一紀露囊獻賀
每抑而不進矧今沆瀣雷之象恐懼修 德敢違
息而可効千秋爲宴樂乎約浮崇簡 朕志
等勿重請也所請宜不允

謝奕昌再辭免特授保寧軍節度使提
舉萬壽觀恩命不允仍斷來章批荅

后父據春秋褒紀之義帝舅緣大雅申伯之意而
外戚恩澤寢博其來尚矣卿以相門芝蘭之彥中
闡棠棣之雋蹈履規矩藹有令譽翟車歸謁首建
駢旄 恩數超出拘攣之表而人不謂過豈特舊
章之可循抑官惟其稱非私昵之及也樊氏世篤
陰亦戒倭恂恂苗裔傳龜襲紫朕所以期卿者甚
遠毋留成命所辭宜不允仍斷來章

謝奕禮再辭免特授保康軍節度使提
舉萬壽觀恩命不允仍斷來章

閨門者王道之本后有進賢之志無私謁之心則
公道行而倖門塞紀綱立而名器重雖同氣何有
乎濫恩卿僚富貴而退遜服儒雅而謹勅后實嘉
之于邑于謝寢廟既成禕衣歸省相祀有恪伯仲
一日而授兩節度越常科恩義稱也免櫝來上謂
隆名盛典不容倖得而謙畏有加漢四姓罔克
美於前矣亟祗若予命所辭宜不允仍斷來章



平家文集

十六之十八



漢書門	一〇二七七號	七四函	一二架	六冊
-----	--------	-----	-----	----



内閣文庫	番號漢	10277
冊數	12	7
函號	3	1



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM, Kodak



国立公文書館
National Archives of Japan

糊などで貼り付けられている部分がめくれない個所があります。

原本の文字など不明瞭な個所があります。

綴り部(喉部分)の文字など不鮮明な個所があります。

平齋文集

卷第十六

平齋文集卷第十六

內制三

光祿大夫右丞相兼樞密使鄭清之可
特授特進拜左丞相兼樞密使加食邑

食實封制

門下伊尹學而後臣商后所以懋格天之業周公
相而爲左成王所以綿卜世之休朕厲精百度之
新注意一賢之切望旣孚於巖石位宜正於元台
咸輯群工渙揚大號具官某道包乎衆甫氣塞乎
兩間其無我則顏氏克己之仁其有爲則曾子守
之勇升暘谷之日而春萬象翊我初潛興太山

之雲而雨八瀛贊予更化即上天下澤以辨分本
內陽外陰而進賢凜諫路之復開紛倖門之自塞
回狂瀾於既倒坐消貪濁之風沂大川而獨航期
濟艱難之運惟宿弊不容於驟革而駿功有待於
美成修攘之務孔嚴安危之寄逾重匪進久虛之
次曷旋丕應之機是用稽之端拱趙普之元勲叅
以咸平李沆之舊德序陞左輔光踐前修總樞機
於本兵超品級於賜位仍陪多邑併衍真番以尊
天官冢宰之權以應太微上相之象於戲一德咸
有莫大乎主善之爲師百志惟熙莫先乎任賢之
勿貳予欲天緯之穆也予欲國棟之隆也予

欲職業咸修汝明予欲也聲俱和汝聽也予
顓俊之意益究佐王治邦之功一人以寧萬世永
賴可

宣奉大夫知樞密院事兼參知政事喬
行簡特授金紫光祿大夫右丞相兼樞
密使加食邑食實封制

門下朕玩占泰象稽右乾文北斗璇璣之幹天樞
既運平於四序太微端門之列次相爰經緯於三
光肆嘉宥密之英夙稔弼諧之望誕揚制綽也事告
廷紳具官某秉先覺之姿厲後凋之操學問貫穿
於千古器能苞括於三才退然不勝衣充以至大

至剛之氣淵乎其似道形爲可觀可度之容徧儀
禁路之華趣踐政塗之峻力扶更化備罄陳謨卷
卷乎任賢而去邪懇懇乎理內而禦外尚猷詢茲
黃髮獨知籌慮之深咨岳有能奮庸咸謂延登之
晚睠予菲質紹我前修宴紫雲之樓念民生之未
裕開天章之閣虞國事之多艱揖舟必賴於丞弼
維厦匪資於一木參諸夢卜得爾耆明庸合守文
應變之長共致經體贊元之助仍揔提於樞筦兼
疊進於文階申錫多畬併陪真采於戲仲虺爲左
而伊尹爲右本一體以相須召奭在後而周公在
前必同心而叶濟惟於補袞則無彌縫之迹惟

妙於和美則有調一之功惟精神強則國執張惟
紀綱正則人心定俾予以治時乃之休可

金紫光祿大夫知樞密院事兼參知政
事曾從龍可除樞密使督視江淮軍馬
加食邑食實封制

門下朕祗承洪業遠慕駿功督江左之軍而國勢
張晉賴謝安之略視淮右之師而皇威暢唐資裴
度之籌顧采薇治外之孔嚴宜烝民任賢之尤急
妙簡元樞之望盡提諸將之權肆諏剛辰式渙孚
號具官某學醇而識邃德厚而器閎蚤擅兩都之
論魁蔚爲三代之王佐炳謀國之智先見洞平著

龜勵事君之忠精誠貫乎金石再踐政塗之峻獨
顓宥府之崇一念慮必圖又於邦家一訐謨必思
安於社稷氣塞乾坤之大志期宇宙之清蠹棘韜
之黠戎乘女真之末緒并吞諸郡莽萬里之丘墟
蹂躪中原慘兆民之塗炭不顧夷夏大分之定不
思帝王正統之尊敢嘯餘兇自干顯討况太一之
神來格久占福曜之臨而甲子之曆有開適應初
陽之復趣迎善氣特命元戎皇天付予有家莫重
要衝之守寧王遺我大寶適資艱運之扶維文武
之全才蘊沉深之大略就陞使領仍衍井畝總表
撐裹拓而庭規摹合前後聖而文節度風王草

木聲震山川聖策定

有功可

應兵之見其儒

用而無敵何難賊虜之平注倚非輕延登有待於
戲義問之拒逆亮收萬全於拍顧之間張浚之卻
偽齊奏三捷於談笑之頃朕方恢於祖烈爾宜邁
於前修衆思集則精神彊列戍睦則首尾應亟苗
攘於外侮用勦相於中興可

左丞相鄭清之口宣

卿德尊朝廷勲在社稷欲重處中之寄宜膺虛左
之求宅揆奮庸揚庭孚號亟祗殊憊力濟不平

右丞相喬行簡口宣

卿斯文砥柱有國元龜久樞紐之密旋趣鈞衡之

對秉綸言渙發興望僉諧亟祇予休共圖乃又

左丞相鄭清之批荅口宣

延登上宰翊贊中興增九鼎之尊安永三階之澄
穆趣祇成渙母事勞謙

右丞相喬行簡批荅口宣

孚號大廷登庸碩輔允賴巨川之濟式隆巖石之
瞻亟効贊襄奚勤遜避

右丞相喬行簡批荅口宣

朕寤寐治功延登耆德既協從於龜筮宜交濟於
鹽梅其遏牢辭以圖丕乂

左丞相鄭清之批荅口宣

天慈成功帝賚良弼首陟泰階之峻亟圖鼎鼐之
和勉爲堅留毋煩牢避

知樞密院曾從龍同知鄭性之簽書陳

卓批荅口宣

外治有嚴中樞尤重必進爽邦之彥廼凝基命之
功勉効勝籌毋勤遜櫝

樞密使曾從龍批荅口宣

十乘董戎亟宜引道五兵置使奚尚循墻體予憂
顧之深寢爾撝謙之過

節度使謝奕昌批荅口宣

卿世業韋平家法陰馬寵陟齋壇之峻榮施先朝

之崇渙綍已孚異函可遏

節度使謝奕禮批荅口宣

卿椒掖流暉芝庭峙秀襲冠貂之積慶膺綬鶻之殊恩朕授非私爾辭母屢

賜龍圖閣學士京西湖北路安撫制置大使兼知襄陽府趙范兵部侍郎淮東安撫制置使兼知揚州趙葵銀合夏藥勅書

卿望聳禁塗籌高邊閫屬履炎蒸之序備殫牧御之勞宜錫上奩用旌內劑禦茲烈日揚我仁風

賜工部侍郎公江制置使知建康府陳

韓銀合夏藥勅書

卿法從名流陪京重寄餘同上

賜權兵部侍郎四川安撫制置使趙彥
訥銀合夏藥勅書

卿天派名流坤維重寄餘同上

賜司農卿知慶元府兼公海制置使游
九功銀合夏藥勅書

炎令司衡赫威鑠石廼睠輔藩之彥具宣制閫之
勞爰錫珍良式資寶衛

賜右文殿修撰四川安撫制置副使兼
知成都府丁黼銀合夏藥勅書

延睦漢廷之彥具宣蜀閬之勞

餘同游九功詞

賜兵部郎官兼淮西安撫制置副使兼知黃州楊恢銀合夏藥勅書

廼睦漢廷之彥具宣淮閬之勞

餘同游九功詞

賜直寶章閣權發遣鄂州兼權公江制置副使張元簡銀合夏藥勅書

炎令司衡赫威鏢石廼睦上流之寄具宣外禦之勞爰錫珍良式資寶衛

賜鎮江府都統制王虎池州都統制趙邦永鄂州江陵府副都統制樊文彬江州左軍統制權管幹光州武定都統制司職事主忠銀合夏藥勅書

三庚御序萬甲分屯總戎律以良勞犯炎威而不憚宜攷珍劑用示眷懷

賜平江府許浦水軍都統制董琳銀合夏藥勅書

三庚御序萬甲分屯護海道以良勞犯暑威而不憚宜攷珍劑用示眷懷

賜帶御器械兼權主管馬軍行司公事兼知光州孟珙建康府都統制兼知泗州李虎鄂州江陵府都統制兼權發遣德安府王旻興元府都統制李顯忠鎮

江府副都統制劉虎襄陽府忠衛軍副
都統制江海權沔州都統制司職事陳
昱權利州都統制司職事曹友聞權廬
州強勇軍都統制司職事王福利州後
軍統制權行管幹金州都統制司職事
吳桂銀合夏藥勅書

三庚御序萬甲乘邊揔戎律以良勞犯炎威而不
憚宜攷珍劑用示眷懷

賜龍圖閣學士京西湖北路安撫制置
大使兼知襄陽府趙范銀合臘藥勅書
卿任隆外間威聲上游犯霜露以靡寧護風寒而
良苦爰錫衛生之寶用旌敵愾之勞爾精神寬
予憂顧

賜權刑部尚書泂江制置大使兼江東
安撫使知建康府陳韓銀合臘藥勅書
卿佩囊法禁典鑰陪都凜水澤之中堅嚴風寒之
外護爰錫攝調之劑用昭眷倚之懷壯爾精神寬
予憂顧

賜寶章閣待制泂江制置副使兼知鄂
州黃伯固銀合臘藥勅書

卿承恩中宸建閫上游犯霜露以夙征護風寒而
良苦爰錫衛生之寶用旌敵愾之勞士爾精神寬

予憂顧

賜兵部侍郎淮東制置使兼知揚州淮
東安撫使趙葵將作監淮西制置副使
兼知廬州尤煥銀合臘藥勅書

朔雪方霏淮風更凜言念制垣之重備殫王事之
勞爰錫珍良用資葆蓄增壯魚麗之氣茂揚鶴唳
之威

賜權兵部侍郎四川安撫制置使趙彥
呐右文殿修撰四川安撫制置副使兼
知成都府丁黼銀合臘藥勅書

卿分憂北顧制勝西垂犯霜露以靡寧護風寒而
良苦爰錫撫調之劑用昭眷倚之懷大振戎容亟
蘇民瘼

賜太府卿四川總領兼撫諭使安癸仲
銀合臘藥勅書

卿分憂北顧宣指西垂

餘同上

賜司農卿知慶元府兼沿海制置使游
九功銀合臘藥勅書

卿坐綏海服密拱京畿凜水澤之中堅嚴風寒之
外護爰錫攝調之劑用昭眷倚之懷民瘼旣蘇戎
容益振

賜帶御器械兼權主管侍衛步軍司公

事兼建康都統制王鑑帶御器械兼
主管侍衛馬軍行司公事兼知黃州孟
珙帶御器械鎮江都統制李虎池州都
統制趙邦永鄂州江陵都統制兼權發
遣德安府王旻興元都統制李顯忠平
江府許浦水軍都統制劉虎權光州武
定都統制司職事于俊權利州都統制
司職事曹友聞利州後軍統制權行管
幹金州都統制司職事吳桂權江州副
都統制楊福興襄陽府忠衛副都統制
江海鄂州江陵副都統制兼知棗陽軍
英文彬平江府許浦水軍副都統制兼
知海州趙東淮西路鈐兼權廬州強勇
諸軍副都統制司職事王福權管沔州
都統制司職事和彥威銀合臘藥勅書
卿等系出山西威行塞北慨朔風之未靜忘霏雪
之爲勞賚以寶奩實之珍劑用壯前茅之氣進圖
破竹之功

賜端明殿學士同簽書樞密院事督視
江淮京湖軍馬魏了翁銀合臘藥勅書
卿推誠體國決計視師犯霜露以靡寧護風寒而
以苦爰賜上池之劑用紓先乘之勞壯爾精神

子憂顧

賜直微猷閣汾海制置副使兼知慶元

府王定銀合臘藥勅書

卿顯膺閭寄坐鎮瀛壖

餘同游九功詞

文舉殿試策

朕猥承至尊休德于今一紀夙寤晨興懼不克負
荷以羞列聖廼者收攬大柄躬親萬務嘉與海內
共濟丕乂拔人材於久鬱疏言路於積壅亦既踰
年而更化善治猶未云獲豈弊端膠轄汙俗沉浸
未易遽更與抑崇名忘實齊末遺本所更者政而
不及化與謂責治愈切而愈邈也黃帝堯舜通其

變使民不倦非聽其窮而莫之及垂衣裳而天下
治必有妙於化裁推行之表者三代忠質文之尚
其敝未始不可救而禮有損益隨時施宜亦非區
區於制度文爲之間也孔子變魯至道孟軻以齊
王猶反手綏來動和過化存神固不容以淺智窺
而四代禮樂經世之大法三王四事治國之要道
知之者衆而行之者寡何與夫天命不難於延續
而難於疑人心不難於轉移而難於固朕歷觀治
忽消長之運念此至孰而行有弗逮國體嘗少振
矣而苟且相仍未保其不弛國論嘗少定矣而是
非交至未保其不搖國勢不可不彊而異厲兵

屯田積穀未能兩全攻守之宜國計不可不裕而
約已厚下開源節流未能一出取予之正伊欲整
紀綱於姑息之餘飭法度於因循之後洒濯衆志
新美大化以凝固天命人心於無窮其要安在子
大夫彊學待問久矣其據經證古科別以對朕將
親覽焉靡有所隱

武舉殿試策

蓋聞有天下者審其御御有得失則狙詐有作使
作敵之殊自昔英君猶難之朕厲精更始以來無
日不討諸軍國以興起治功而繼策一世銜檠四
夷每有慕於漢高祖經營帝業而拜以龍韓
信踞洗而召以挫黥布御將帥之法然也周廬內
衛列屯外戍使功使過俾皆踴躍奔走於作興之
下而無跣弛之累兒戲之習其道何先光武再造
炎圖璽書明見以服竇融幘坐迎笑以折馬援御
豪傑之法然也中原遺材慕義來附效智效勇俾
皆歡呼鼓舞於大受之中而無養鷹之患放虎之
虞其術何要孝宣號稱中興先零負固則留屯浩
亶以平之呼韓稱藩則置酒甘泉以饗之御夷狄
之法然也故讎雖殄新隣方張或和或戰情僞叵
測在我必有以待之進可爲車攻之復古退不失
禾稼之守衛其策何工夫能御將帥而後世御豪

係能御豪傑而後能御夷狄審本末之序權緩急之勢以制動靜之機操縱闔闢顧不在我乎至若軍律之當嚴戎旃之當睦邊民之當卹新氓之當撫無一不關宵旰之慮子大夫有志事功其悉意茂明之朕將親覽

召試館職策

天下大勢首蜀尾淮而腰膺荆襄自昔所甚重也諸葛亮之用蜀祖逖謝元之用淮羊祜陸遜之用荆襄規摹具在得其人善用之則撫機酬變進退闔闢豈不在我而猶患備守之匪易蜀方告警襄之戒嚴且蔓延于淮賊虜爲三市以觀所應故我之應敵不容出於一術諸閫外和爲援如常山之蛇力非不合也或慮趨前不能無後顧畫境人自爲守可無連雞之患然同舟遇風又慮一處不牢則俱受其害分建三數大鎮聚甲兵糗糧以重軍權似可能卧虎視而並塞列城護風寒之地恐難於歛戍使寸寸而守之則備多力分抑兵家之所忌挾初郡以爲外扞庶增藩籬之固而鞭長或不及於馬腹委雞肋而棄之又幾前功之俱廢沿江諸大屯招兵增戍而練舟師門戶之急務也或謂守淮襄自能蔽江原堡綿亘於鳳沔所以保蜀也移三關之戍而扼三泉得無已迫乎督府駐荆

鄂上流壯矣金房聯蜀海道接淮延表數千里或
虞運掉之難隨地分立莫府則大費又未易支也
以至南北軍何以相制官民兵何以相使屯田於
新疆何以能不資敵調夫於邊郡何以能不重擾
子大夫孰於觀時切於憂國其舉三邊備守之要
悉意陳之將復于上

萬壽觀純福殿開啓甲子本命道場青

詞

玉曆紹休猥次周星之歲金行紀閏適臨元命之
辰祗被瑤壇具宣瓊籙伏願真游潛格景况旁流
六扈有秋陶人心於和樂三皇五帝警羣國於專
實

朱表

孟秋月閏先甲命元肅延真馭之臨仰控忱衷之
禱上銷咎證下鎮危情格不乂於萬方儲鴻休於
百世

太一宮祈晴醮青詞

西成應允南畝占豐熏心淫雨之憂拜手叢霄之
禱伏願颺旂潛格曦馭昭升九陶玉燭之和均燕
金穰之慶

永祐陵下宮

顯恭皇后殿神帳後壁

山墻冊損修整畢告遷神御還殿表文

奠幄栢宮靈旂夙御繕垣椒寢僊伏嘗移屹鳩儔
之告功儼燕寧之復次

孟冬朝獻祝香文

伏願乾文循軌泰道迂衡爰日薰和民遂恬熙之
樂朔風絕警軍無暴露之憂

昭德崇勲閣安奉太師趙汝愚貌像祝

文

維姬有旦維宋有公斷鰲莫極賔日升穹歲閱周
星祀登功宗諏禮曲臺妥靈肖容肩摩前詰凌煙
姬隆

祭告功臣二十三人祝文

容靈丹青森拱星弁有虛其席惟人是踐賴我前
寧盤宗碩彥訊良告虔俎豆群獻

甲子本命青詞

氣轉一陽甫應初躔之紀辰開六甲首逢端命之
元祗演雲籤仰延飈駕伏願天光下濟帝况博臨
壽域四方永底凝民之治金城萬里亟收卻敵之
功

滿散朱表

序屆初陽辰臨元命宣演冲科之祕導迎善氣之
新鶴唳風聲奉天威而制勝星暉日暈受帝祉以
繇休

立春祭太一祝文

天尊神兮挾東皇龍駕翔兮周八荒五福舍兮迪
時康祠壇紫兮歌青陽神宴娛兮夜未央星留俞
兮集祥光四氣和兮萬有昌三垂晏兮九農穰多
受祉兮命溥將

太一宮交年醮青詞

化功密轉序首正於孟陬歲事更新灋肇頒於象
魏輒輸悃素仰扣旻蒼靖念眇躬適逢多故狂胡
反道方孔熾以逞兇降虜昔恩又相挺而濟惡狼
烽交於梁汙騎壻徧於荆襄由秉德之不康寧致
御事之曰艱大跂叢霄而引然迎端朔以祈休伏
願上帝昇矜尊神駕右以全取勝亟清玉塞之塵
轉危爲安增壯金城之勢九遂耕桑之樂悉歸覆
育之仁

天基聖節青詞

保右自天運應一元之泰誕彌厥月氣陶萬彙之
春展案瑤壇投忱璇極伏願兩儀申祐列曜延光
時和歲豐妙協玉衡之正兵寢刑措屹隆磐石之
安

朱表

星回箕歷茂迎震夙之期雲護芝函備展泰元之
薦仰祈昭鑒申錫鴻釐東作西成躋民生於仁壽

南暢北洽措國勢於安彊

孟春朝獻祝香文

伏願緝熙純嘏保合大和雨露既濡宜加結植先事以業風恬柳塞盡清南牧之塵

攢宮補種祝文

路寢孔碩每切慕思春露既濡宜加結植先事以告維靈之安

孟夏朝獻祝香文

伏願本支蕃衍豐場收寧物被生成穆若薰風之阜民陶耕鑿熙然化日之舒

雨師雷師風師祝文

天步方艱以稔爲命龍見而雩雨不時若高原下隰燠其乾矣熬熬然卷簑笠倚耒耜以告瘡神所閔也雷霆以鼓之風雨以潤之坎震巽三者之氣合而陰陽和甘沛應既霑既足迄用康年維爾神之功

昭慈聖憲皇后永思陵憲節皇后憲聖慈烈皇后下宮修葺奏遷神御表文

葱蒨鬱鬱蟠佳氣於兩儀實實枚枚輦闕宮於千古飭御史以省視戒工師而繕修遷御有嚴前期敢告

孟秋朝獻祝香文

伏願氣調玉燭序秩金行兩足周原年慶登於大
有風清漢塞運丕濟於中興

天基聖節錫宴致語

帝出乎震祥開華渚之光雲上於天恩錫鎬京之
燕恭惟 皇帝陛下聰明時乂剛健日新與物爲
春播大和於有截自天申命綿景祚於無疆臣等
幸備伶官願陳口號

寶鳳銜春度玉墀開基節後即天基日行黃道三
辰秩斗轉蒼龍萬象熙扶起車攻常武運做成既
醉太平時千官拜舞東風裏歡上延英萬歲卮

勾合曲

高岳三呼山鞏聖人之壽鈞天九奏不融治世之
音上奉天顏教坊合曲

端平二年端午貼子詞

皇帝閣五言三首

更化開皇極中興兆赤符節標千歲曆氣協五時
圖

又

雨足秧分畝風清麥弄岐聖心涵水鏡即是太平
基

又

明進離方午柔生遇己陰妙參三聖易細測兩儀

心
七言三首

緝熙虛敞薰風細清燕深明晝晏長大學中庸緒
詠久金猊幾度手添香

又

登進英才追慶曆開延正論踵咸平朝廷有道長
如此拜賜宮衣信是榮

又

王師一舉下河東好定規摹繼伐功入眼宮槐且
夏日轉頭關柳易秋風

貴妃閣五言二首

風
飄襲芳蘭碧釵明寶篆深宮三十六同被二
風

又

萱長宜異草榴開結子花歡聲喧令節慶事屬天
家

七言三首

綺疏浸影槐龍轉繡戶浮香艾虎垂硯冷玉蜍金
井水手抄警戒愛君詩

又

裁成寶月翻宮扇織就祥雲製御衣朝賀歸來無
點暑坐看燕子引雛飛

又

穿蓮漏水金鋪遶雪藕衣輕玉殿涼好把無邪母
不敬細挑絲字壽君王

端平三年春帖子詞

皇帝問五言三首

開
飲鳳東風轉攜龍北斗回人間道鐸振天上獸搏

又

春
冰天寒色餞暘谷霽華賓生意乾坤蒲宸襟一點

又

熙
寬大朝廷詔中和郡

可欲求躋慶厯先使月清

七言三首

喚仗紫宸披曉靄退朝清燕坐晴霏簡編有味爐
熏永鈴索無聲漏箭稀

又

東風送喜上天顏吉語飛來井軫間榆塞雪消鳴
鏑靜柳營月暖擊刁閑

又

麥苗培秀臘前雪稻種浸芽春後晴野老田夫觀
治象便從新歲賀升平

皇后閣五言二首

紅
太液輕澌泮溫明霽日融
菜流芳荇碧花頌瑞椒

又

千
甲觀韶光集祺壇好語傳
思齊男慶百假樂子宜

七言三首

塗山陰贊夏王化嫺汭密
禪虞帝仁保合大和無
間斷際天蟠地一般春

又

關雎風化冠周南次

元天及葛覃

龍種女紅方起又親

又

殷雷金鑰千門邃斜月璇
題六寢深禁柳護寒鴉
未起求衣已獻晚朝箴

貴妃閣五言二首

皇
梅試催粧粉蘭披入夢香
迎春占北斗受福拜東

又

象應軒龍次恩承帝座光
燕壇風澹蕩蠶館日舒
長

七言三首

春透蓬萊碧玉壺晴窗恭侍寶奎敷從容玩畫家人卦取次題歲列女圖

又

鳩鵲雪殘籠霽景鳩鵲波暖颺紋漪宮中不用催行樂草木群生各自熙

又

萬年枝上綵裁綠千葉花頭酥點紅鏡綬囊絲相映燭探先半月慶流虹

平齋文集卷第十六

齋文集卷第十七

外制一

國子司業張處除祭酒仍兼侍講制

勅具官某賢必希乎聖士必希乎賢朕欲新美天下之士親擇老成有賢望者爲國子師士非幸歟爾淵乎海濱之老也見幾而蚤遜覽德而肯來俾參師氏詔嫩于虎門望其容則易直子諒之心生聽其辭則淵泉溥博之義見而况摳衣問業於函丈之間者茲用進之大司成以專六德之教師道立而善人多豐芑所以爲數世之仁朕其庶幾乎可

樞密檢詳表蕭除右司郎中兼權樞密

副都承旨制

勅具官某朕更張萬化首命一相筦文武之柄宰
掾以贊政理樞掾以參訏謨非深識厲精求治之
意不在此選爾學得其傳而邃於知氣集以義而
勇於行端笏立朝論議閱偉朕知其可大受也挈
宏綱於省闈導密旨於殿陛肆兼命爾維時股肱
大臣內欲爲朕修天保以上之治爾彌縫之外欲
爲朕舉采薇以下之治爾佐佑之往欽哉可

右司郎中袁肅除太府少卿兼知臨安府制

其官某維前古人得名法從濬正太之源以養
君德折茲邪之氣以興人心學無不該用有未盡
求諸一庭詩禮之彥爲我四方岳牧之師爾講貫
有源業履甚度盤根利器奏民庸而獨高熟路輕
車聳朝望以更偉肆簡都曹之最進參列寺之華
典吾神臯資乃儒術俗久壞而周南之化未浹政
積弛而商邑之治未張澄精神於百爲妙機括於
一轉迪若考詩書之訓宣朕躬道德之行民情咸
熙國勢自重此非趙張三王所能知也往遠乃猷
用對予渥可

大理少卿李鳴復除大理卿制

勅具官某朕近親勅令所編類舊典我 孝祖宸
筆遇事點勘增修刪改曲當情法於恤刑之條尤
加詳焉企慕不已因親札以示輕用徒刑之戒廷
尉天下平可不遴擇爾表于西州儀于王朝心夷
氣蘇藹然君子長者之風廼者俘累之獄咨爾聽
之簡稽得情弊成以宥而朕好生之德被于貉隸
達于窮髮之北良用嘉歎晉躋九列帥屬棘廷使
四方司政典獄咸知朕欽恤之意念之哉刑期無
刑以長我王國可

吏部郎中趙彥恢除大理少卿制

勅具官某朕近觀勅令所編類舊典我 孝祖宸

筆逐事點勘增修刪改曲當情法於恤刑之條尤
加詳焉孰復企慕因親札以示輕用徒刑之戒廷
尉天下平可不遴擇爾講學之粹操履之茂標的
于公族而吏治更高司臬江左讞奏平允一道無
冤民入爲望郎進參列棘四方司政典獄於爾乎
則焉欽哉刑期無刑以長我王國可

國子博士李大同除祕書丞仍兼崇政
殿說書制

勅具官某斯文在天地間前乎管百世之既往後
乎鑰百世之方來非諸儒誰屬爾以經明行修都
倫魁之望詩所謂如金如錫如圭如璧者也列在

書帷据經訂古以沃朕心具有師法朕甚嘉之繇
博士進丞中祕仍懋金華之業蓋將閱其中而肆
其外用昌斯文豈特以鎮吾群玉之府可

著作佐郎蔣重珍除著作郎仍兼崇政
殿說書制

朕甚嘉之繇佐撰進領著廷

餘同前

校書郎黃朴除著作佐郎仍兼崇政殿
說書制

朕甚嘉之進繇典校佐撰祕廷

餘同前

太常博士徐清叟太學博士葉味道
除祕書郎仍兼崇政殿說書制

爾以經明行修茂名家之傳

餘

爾以經明行修都儒林之望

葉

朕甚嘉之繇博士進典中祕

餘並同前

祕書丞彭方除著作佐郎兼權侍左郎
官制

勅具官某斯文在天地間前乎管百世之既往後
乎鑰百世之方來非諸儒誰屬爾以經明行修都
儒林之望詩所謂如金如錫如圭如璧者也承于
祕丘攝組畫省銓綜餘隙盡讀未見之書韜涵日
富進之佐著蓋將閱其中而肆其外用昌斯文豈
特為時佳吏部哉可

秘書郎張洽除著作佐郎制

入典中祕盡讀未見之書

餘同彭方制

敷文閣學士通奉大夫程秘該 慶典
轉正議大夫制

勅奉壽卮於長樂方深追慕之悲通禁籍於甘泉
尚共榮懷之慶有嘉宿德何愛崇階具官某學邃
而識融履純而養厚濟時欲議五英六莖之齎華
國高文四璉八簋之古自玉堂之引去每宣室之
興思胡扼虎關尚閑駒谷復非遽復已萌於碩果
之餘睽不終睽必合於遇雨之後首進班於宮閣
仍賦廩於珍臺在爾初無慕爵之心惟朕蓋有慰
官之典肆加蕃錫庸侈殊私施戟方新寧鬱起家
之望佩囊惟舊毋忘存闕之忠可

著作郎權司封郎官吳泳除軍器少監
兼直舍人院制

勅具官某朕親攬萬機總飭百度與士大夫洒濯
激昂以追元祐思得軾轍掌我書命興起人心於
播告之下爾操行純茂文思汗瀾本之詩書暢之
莊騷太史體宜演誥朕有戎監職優務省往服少
事雍容討論推厲精更始之意著之訓辭渾厚森
嚴與越棘大弓同其古斯無媿江漢之靈矣論駁
以扶國是朕又於此觀爾之風力可

禮部郎官兼學士院權直趙汝談除祕書少監兼權直學士院制

勅具官某中興百餘年公族之直禁林惟淳熙間彥中一人爾識度純明風槩凝遠杜門著書尚友千古皎皎白駒之在空谷也泰道宏開勉爲朕起南宮北扉文簡而有法進參木天之峻仍直丹地之嚴選妙擢殊前後間見爾其推朕厲精更始之意著之訓辭使四方萬里咸曰大哉王言一哉王心是爲稱職可

太府少卿何炳除司農卿制

勅具官某文帝一形錢穀出入之司貫朽粟腐其効立見朕於國計登耗念之孰矣而大農經費常患於不澹何耶爾性行純固材諳通明蚤游刃而有餘晚輶光而更密入參治藏之府曾幾何日能聲著聞進長九扈將以裕吾國也孰漏當室孰蠹當除孰冗當節公爾忘私毋憚叢劇庸稱予厲精政事之意可

金淵李桀並除太學博士制

勅具官某等科舉之學非所以淑士心也必義理性命之學明則多善士化更而新師選可不重乎爾抱負閎講貫熟製錦劇邑弦歌藹聞可以爲成師矣敷暢奧義薰陶善性使諸生人人有舞雩

言歸之樂則吾與點可

太學博士葉應輔除國子博士仍兼景
獻太子府教授制

勅具官某科舉之學非所以淑士心也必義理性
命之學明則多善士化更而新師選可不重乎爾
抱負閎講貫熟模範賢關惠訓宗師能茂明所學
可以爲胄子師矣敷暢奧義薰陶善性使人人有
舞雩詠歸之樂則吾與點可

奉議郎袁立儒錕賞轉一官制

勅具官某間者均光襄房之役靡勞不酬爾材良
氣雋優於邊畫督錕以濟軍事不囁鞅掌禦侮制
有勞焉朕方信賞以勸事功汝官一列其懋
承之保障最聞嗣有褒擢可

全子材除淮西安撫副使兼知廬州兼
計度轉運副使制

勅具官某朕夢想東都廼睠西顧若昔濡須之築
芍陂之屯郾城之士飽馬騰淝水之風聲鶴唳欲
追往躅宅牧良難爾彊乂而忠果達且武荆襄淮
海備著賢勞入塞朝列之華出鎮邊維之重四履
綏靜三軍激昂令行陳穎之間氣薄潼藍之表朕
嘉爾勇於徇國就畀帥旄仍揔飛輓用究多多益
辨之韞雅和戰之議論不齊守禦之規模一定

量敵而進慮勝而會必臨事而懼好謀而成能圖萬全何往不濟爾尚勉之哉可

贈寶文閣直學士楊邁特贈龍圖閣學

士制

勅朕慨念漢宣入承天統博陽侯之定策方共致於中興漢中翁之受詩胡獨成於長往密勿麟儀之舊淒涼馬鬣之新瞻懷若存褒贈宜厚具官某抱古粹學事予初潛反覆發明盡詩書禮樂之奧從容規切必仁義道德之言每尊所聞務藏諸用既授五龍而夾日忽比列星而騎箕雜佩贈之莫克仔肩之益一鑑亡矣可勝殄瘁之心維報典之有加尚徽章之未稱峻陟淵圖之序增泉壤之光易文子之名死宜不朽錄叔敖之後生與俱榮尚其營魂服我休寵可

黃壯猷何處信課最各轉一官制

勅具官某總核名實而信必其賞罰親政之急務也爾守信何貳輔藩有美政且能濬導利源坏室蠹穴版部課賦入以最聞增秩賞能庸示予信其益厲精白以承可

右正言王遂除殿中侍御史制

勅具官某朕始親萬幾首得一士置在明目張膽之地蔚有正色敢言之風神鼎鑄而魑魅莫逢干

將淬而犀兕亦斷善類吐氣貪夫革心察之既稔
所安用之不厭其速甫躋諫列丞副臺端純仁之
內出姓名蓋非輕授趙抃之不避權倖抑所優爲
朕方虛已以受人爾亦得時而行道難逢者風雲
之胥會易失者日月之如流萬古在前億世在後
毋替精白承休之節用爲汗青傳遠之圖可

吏部郎中兼右司李宗勉除監察御史
制

勅具官某蓋聞淫朋去然後可以穀正人側媚屏
然後可以用吉士天運之往來消長此其機歟爾
和而趨於中大而進於正日用力於明善之學如
恐不及泮奉郡最入儀郎省素絲一匹未嘗以爵
祿入於心諸大夫國人皆信其爲賢也朕方謹愼
人充耳目之戒儀圖可御史者莫如汝宜在易一
陰不能勝五陽則決之於坎五陽不可忽一陰則
扼之於遇潛觀機括而制其微天下可常泰也爾
亦有辭于永世可

大理卿李鳴復除侍御史制

勅具官某朕稽家法之相傳睠臺綱之特重仁
廟思得忠厚淳直之士裕陵務革澆浮薄惡之
風蓋心術正則無詭隨議論平則不沽激欲維吾
國且表告人爾秉心澹夷蘊識精粹良吏之譽溢

於外服吉士之稱著於中朝甫陞卿月之華趣應
法星之象維昔田錫暨于何郊莫非西土之英列
在南宋之選幾年無此一旦得之春秋之盡而不
汙大關榮辱洪範之會其有極一洗黨偏百辟咸
慕乎君子之中四方聳聞乎仁者之勇繫予所屬
惟爾其承可

祕書丞兼崇政殿說書李大同除右正
言兼侍講制

勅具官某師氏詔燉保氏諫惡皆有道之士爲之
朕厲精求治之初增置經筵官相與講明五三六
經之道以養其源諸儒序進檐如翼以爾於其間
道肩皓白氣肅而辭莊淵乎其似道也朕退而

喜曰得一佳諫官矣擢真騎省仍侍輶廈逆耳沃
心朕於爾乎嘉賴官守一時之臧否言責萬世之
榮辱毋憚嬰鱗有懷不盡然軺輪折檻特救過於
已著望儀刑而意消不聞亦式不諫亦入庶其置
朕於無過之地乎可

呂殊除太學錄制

勅具官某科舉之學非所以淑士心也必義理性
命之學明則多善士化更而新師選可不重乎爾
抱負閎講貫熟金玉其度而不苟售可以爲成均
師矣規矩脩明之餘數暢奧旨薰陶善性使人人

有舞雩詠歸之樂則吾與點可

制
太宗正丞蔡範除戶部郎中淮西總領

勅具官某三表五餌不如晁錯實塞之策破羗強弩不如充國留田之奏綏御皆不可廢夫守也爾名儒之胄良吏之表廉靜有立不爲苟同宜出入省闈以緝庶務中原事機方集必事力之裕乃克濟庸輟爾以尚書郎給餉道往哉守淮所以蔽江而控河士飽而歌馬騰于槽淮西之成雋功以此出納有經而無壅利取予有權而無近名足食足兵爾蓋優爲之寓攻於守而不殊其寄蓋以

上可

歸順人李義承節郎張瑀李德魏珏保義郎制

勅具官某討叛以誼懷服以仁殲渠貨脅歸斯受之爾能革心奚愛勇爵祇戴寬恩勉圖報効可

歸順人同鼎武翼郎王聞顯武翼大夫呼延實來伯友修武郎制

勅具官某國家推天覆之仁舍逆取順豈以南北爲間爾等執羈紲以從亡虜途窮力屈束身歸命朕不汝棄也易畀武級之勞毋忘忠力之報可

廣州觀察使官魏國梁歿于王事贈通

直郎制

勅具官某領吐不靖爾挺身往諭恩信亦既勤止得疾于行齋志以沒錄勞進秩尚慰九泉可

淮西路鈐范用吉授高州刺史節制京西北路軍馬制

勅具官某殘虜就燼中原為墟關河方俟於來蘇陳頴首歸於疆理上功莫府謂爾有勞亟陞遙刺之華仍摠進屯之重祗承休渥益勵忠勤可

江陵府副都統孟珙特轉武經郎制

勅具官某方城為城漢水為池天險也制閫設險加嚴峙芻榦具畜車濬深苦高屹然金湯之固

勞來上爾實程督進秩二等用勳事功可

西和州守陳寅妻安人杜氏男基壘壘

死節贈官制

勅具官某妻某氏

男某

西和嬰孤城抗賊力窮援

絕臣為國死忠子為父死孝妻為夫死義三綱立

焉捐身犯難人所甚難闔門徇節古亦罕見朕悲

歎不忘優贈以賁營魂往從爾夫于廟食可

三子改夫

父為

西和州守陳寅族人立照重館客李良

臣死節贈官制

勅具官某族人某人等

館客

西和嬰孤城抗賊力

窮授絕臣為國死忠子為父死孝妻為夫死義三
綱立焉爾以族黨良臣爾義不苟免亦相從于死
良用嘉歎贈杖以貲營魂往從寅于廟食可

權兵部侍郎陳公益磨勘轉中大夫制
勅朕一日萬幾厲精方切三歲群吏考績尤嚴肆
疇法從之勞庸渙明綰之寵具官某操修無玷問
學有源簪筆雍容每罄論思之益敷經密勿屢殫
啓沃之忠繇積日以效功爰歷年而會課瞻賢雖
舊詔爵惟新漢中大夫之負寢高秩序周小司馬
之職勿替謀猷可

秘書少監徐僑徐太玄少卿制

勅具官某禮者天地之序樂者天地之和
兼命也而簞瓢陋巷之士夫子遽以四代禮樂付
之何哉爾好古學行古道瞻彼淇奧其容比於禮
考槃在澗其節比於樂朕方網羅衆俊聚之本朝
老成典刑思見如渴擢貳蓬省翔而未集又舉奉
常亞卿以進之時行則行幡然一來講明王道於
玉帛鍾鼓之外以善人心視獨善有間矣母使朕
有齊魯二生之歎可

楊一夔父秉遷 明堂恩封承務郎制

勅具官某父某人宗祀慶成均福寰宇高年尤吾
所重爾稟厚養深年過九袞有子登名于奉常

義方立矣錫慶增封用勸好德可

韓昱特轉武功郎制

勅具官某廼者克渠就殲于揚逆儔猶負固于楚元戎進討諸將爭奮薄城一鼓而空之東垂以寧第多來上爾戰尤力用命必賞朕不食言進秩四等總徒騎以護周廬勸功之典渥矣益懋衛上之忠增壯居重之勢可

門下省檢正諸房公事辛克承除太府

卿制

勅具官某朕閱班簿輒興才難之嘆得非比年以來包有用之才鬱於頓挫之人閑逸

紳實無華廉靖不競越在外服而藏之若將終身焉朕方收召四方俊人以重周行起爾宰士又進爾治藏之長豈以貨賄出納爲足以煩吾老成哉百辟卿士媚于天子不解于位民之攸暨尚求無媿於古可

資政殿大學士曾從龍 明堂加恩制

勅朕紹 祖宗之休蒙天地之況十年養晦垂衣宸於巖廊三歲歲祠奉珪幣於重屋眈蠭高靈之墮嘉虞熙事之成廼睠時髦嘗參政枋有赫慶條之布於昭命綍之敷具官某肅括而端方沉深而凝重泗今茹古學術兩都之宗尊主庇民器業二

代之佐孰復於安危之勢雍容乎進退之機始終
幾年夷險一節東山之卧安石常存憂世之心江
左之見夷吾盍究濟時之略登崇有待注想惟深
頃展采於合宮躬受釐於宣室肆盼祭澤增錫圭
畚以昭體貌之隆以侈榮懷之盛噫靖四方於我
將之頌朕正切於儀刑上萬壽於天保之詩爾毋
忘於歸美趣承丕渥入告嘉謀可

資政殿學士葛洪 明堂加恩制

勅朕稽周典九筵之規酌義經二簋之義禮從簡
約誠罄精純玉璫黃流哀時之對青元神策何八
之休屬浸容之

播顯綸具官某簡

而廉剛大

一日用力於仁特立獨行雖三公不易其介甫罄
弼諧之益遽興恬養之思心廣而體自胖年高而
德彌邵方詳延於俊乂每渴想於老成翊翊而神
嘉虞雖阻受釐之間皇皇而帝宴饗盍均賜胙之
恩申衍祖畚光昭簡注噫列文辟公之錫祉福聿
圉繼序之功黃耆台背之介壽祺尚篤乞言之意
體予寅畏告爾辰猶可

左諫議大夫鄭性之 明堂加恩制

勅朕蒐儀先甲展采上辛賦思齊之詩制雖嚴於
孝恭稽我將之頌禮不廢於宗祈恍三靈之宴

遭百祿之來下有嘉首諫宜錫閑休具官某抱陸
贄之忠勵汲黯之直深見遠識平國論於玉衡忠
言嘉謨開君心於金鑑其博大則廊廟之器其浚
明則邦家之光啓沃方深鄉用良切授策而拜泰
一莫侍奉高之祠受釐而問鬼神尚前宣室之席
肆增華於騎省庸申衍於爰田雖舉邦彛實均帝
祉春秋承祀欲大祖功宗德之傳夙夜畏威
勿替天命人心之戒可

吏部尚書崔與之

明堂進封南海郡

開國公加恩制

勅使寇儀先甲辰年上辛武吉

孝慕稽我將之不廢方宗
道百祿之來下聿懷耆俊宜錫閑休具官某行峻
而約之中氣剛而養以直風暨高古秋霜烈日之
嚴典刑鎮浮泰山喬嶽之重游十行之趣召儼三
命之滋恭展也達尊爛然全節延英論事莫遑汗
盛夏之衣宣室受釐猶思前半夜之席肆肇開於
公社仍申衍於爰田繫舉邦彛實均帝祉積德而
後興禮安得魯生之來爲治不至多言勿替申公
之告可

敷文閣直學士知潭州余巖除華文閣
學士泂海制置使知慶元府制

勅朕總治中朝分任外閫或統江淮表裏之勢或當襄蜀風寒之衝廼瞻鄞江近扼海道欲壯股肱之郡必求方面之材具官某學明而履方氣充而用博操縱闔闢莫窮應變之長卷舒屈伸不改有常之度擁甘泉之宿望鎮長沙之价藩謂弄兵多出於無聊而患盜每生於有欲風采一振號令具孚驪綠林之革心渺青草之息警轉聞良偉簡在逾深寇恂之定潁川久徇借留之請蕭生之守馮翊更圖詳試之功陟奎閣之穹班總制垣之重寄宏開四履遠控三韓惟威望聲小風浪舶之無虞惟恩信著則三并衣之六

田里福併及於京官緊我興

直祕閣新成都府路提趙彥覃除都

大坑冶制

勅具官某國計莫重乎銅楮之相權朕出寶帑之儲歛宿楮而易之物價寔平又必鍾官能振厥職爾天支之秀周行之雋甫起家于蜀部舉圜府之權盡畀之進用亟矣唐諸道置爐九十有九不南爲多地產今猶昔也爾能公以程浮冗明以剔姦蠹敏以幹壅滯少府水衡之積何患不承平若哉可

太后山陵衛土錢忠表趙若浚轉一官

制

勅具官某等六駟復土五使置官凡備驅馳悉霑
賞賚爾祇吏役例進一階茂對恩榮勉思策厲可
李安國特轉武節郎制

勅具官某比歲蜀閩失馭潰旅迸逸為民害甚於
寇爾薰染忠義奮揚驍雄扼險要待其來民恃以
無恐果山至今德之增秩旌勞嗣有褒擢可

直祕閣知温州游九功除司農少卿制

勅具官某良二千石入為九卿漢法也北海先生
以治行第一掌周稷之業蓋此士之賢庸敏而靜

易而立京蜀制

屢更名部

至元二年

坏民安其政而有

思可謂良

之弊循名責實思用其良不俟吏

選貳司均夫長於治民者必優於裕國信能為朕
養其和節其流而時斟酌焉錢穀之問其紓乎可

林禧子封父承務郎制

勅具官某父某宗祀慶成均福寰宇高年尤吾所
尊禮爾稟厚養深年過九袞有子登名于奉常議
方立矣錫慶䟽封用勸好德可

林禧子封母孺人制

勅具官某母某氏宗祀慶成均福寰宇高年尤吾
所尊禮爾稟厚養深年過九袞有子登名于奉

毋訓昭矣錫慶疏封用勸好德可

歸順人孫政鮑義邊寶張仲子德楊翼
張彪張實高三受張旺汲漢臣邢海蔡
青魏成方元郭通綦全張時並補承信
郎制

勅具官某人等討叛以義懷服以仁殲渠貸為歸
斯受之爾能革心奚愛勇爵祗服寬恩勉圖報效
可

歸順人王元純補迪功郎制

勅具某人討叛以義懷服以仁殲渠貸為歸斯受
之爾嘗為士奚愛文秩祗服寬恩勉圖報效

史復祖除刑部郎中制

勅具官某朕聞者閔雨念中外獄吏奉吾法不虔
逮繫多淹上干和氣亟下宥減之令而雨憲部列
屬必求知朕意者爾靜而不浮謹而不迫明習于
律令而不苛累駕緹屏具有善譽輟郡而郎參聽
四方之讞奏其選甚高公則強禦不能欺恕則文
致不能入勤則冗釀不能困欽哉監于茲祥刑以
達朕好生之德可

卿制
軍器監兼刑部郎官李直柄除大理少

勅具官某我
神宗定官制李寺卿一少卿

才聚刑獄今園土空虛治獄雖非宿其業
四方奏讞萃於斷刑業可不宿乎爾惻怛行之
氣儼蕭習于舜士師周司寇之典而以惻怛行之
五為理官三為憲曹其業宿矣爰命爾以亞卿斷
天下之刑宥過無大刑故無小能知此意則可以
明于刑之中率乂于民棐彛念之哉可

權工部尚書松江制置副使知黃州兼
淮西制置使趙范除兩淮制置大使節
制巡邊軍馬兼松江制置副使制

勅江為國之門戶淮為國之藩籬門戶嚴則謝元
無後顧之憂藩籬固則祖述有前進之

運掉之如意在表裏撐拓之得宜分外闡以相維
總中權而尤重具官某兼資文武世篤忠勞贊籌
江漢之衝隱若敵國制勝淮海之表賢於長城功
雖著而有謙抑之風氣雖銳而有沉深之度知可
屬於大事期共成於遠圖殘虜宿讎歟一朝之就
盡中原故壤莽萬里之為墟欲乘車攻復古之機
無出天保治內之略孰強吾意爾壯其猶拔諸八
座之聯付以元戎之寄淮東西之星壘盡受拍麾
江上下之雲屯參聽號令本之老成謹重之識行
之平定安集之心以守為攻以全取勝乃若秦人
之鹿角相資崑山之蛇首尾俱應必能通脉

方謂道斯可會精神於一家近濟中興用光前烈可

趙凝除大理寺丞陶木司農寺丞趙崇
岳太府寺丞姚珪國子監丞賈似道軍
器監丞制

勅具官某等漢宣帝厲精求治綜核名實以練群
臣黜陟有序衆職修理上下無苟且之意迄濟中
興朕甚慕之爾凝世業之華器能精敏爾木儒林
之望議論堅明爾崇岳公族之彥材譎通暢爾珪
決科之雋講習有源爾似道克家之美趣尚不苟
廷尉大農太府有丞冑監戎監亦有丞仕爲我分

治之丞者承也所以承輔其長使無曠職也政事
文學法理之士繼自今咸稱厥職則予以懌可

林申除宗正寺簿趙鎬夫司農寺簿趙
汝謐太府寺簿余元虞國子監簿制

勅具官某等漢宣帝厲精求治綜核名實以練群
臣黜陟有序衆職修理上下無苟且之意迄濟中
興朕甚慕之爾申茂於踐敗聲華甚暢爾鎬夫勇
於奮厲材術孔優爾汝謐抱負純明志不苟售爾
元虞涉歷詳練材不自裸宗正大農太府冑監皆
有簿往爲我分治之先簿正祭器聖人猶不敢忽
哉崇之盡也政事文學法理之士繼自今咸稱厥

則予以懌可

趙汝訥除司農寺丞杜範軍器監丞李
以制大理寺簿章勸將作監簿制

勅具官某等漢宣帝厲精求治綜核名實以練群
臣黜陟有序衆職修理上下無苟且之意迄濟中
興朕甚慕之爾汝訥秀于公姓材刃有餘爾範穎
于儒紳業履甚度爾以制金玉其質安雅自將爾
勸弓冶其傳謹畏自飭大農戎監有丞李寺匠監
有簿往爲我分治之丞以承輔其長簿以糾正厥
違非特示進擢之榮也政事文學法理之士繼自
今咸稱厥職則予以懌可

准西安撫司機宜兼通判廬火劉子澄

除軍器監簿兼准西安撫司參議官制
勅具官某邊閫上介之置非內地比中原事機之
集非他時比故擇材尤謹爾氣稟爽邁論議英發
與聞經略西事之機籌亦既熟矣班王朝而長莫
府厥任逾重深沉者無躁謀老成者多遠慮爾能
贊乃牧圖全而制勝功懋懋賞朕所不吝也可

國子監丞張紳除祕書丞制

勅具官某寺監皆有丞中祕爲高天球琬琰之出
元圃梗枿杞梓之生鄧林地望殊也爾學殖環粹
猷翹拔蔚平諸儒之穎丞戎冑監不撓于法而

孝令行賢問益昭西崑群王之府游其間者皆天下選爾往丞之地望稱矣本固則末茂形大則聲宏其益充所養以待方來之用可

太府寺丞尤焞除樞密院編修官兼權

檢詳制

勅具官某 國朝經武要略一書尊閣於樞庭賡萬幾之暇親御翰墨作經武閣三大字扁之事增重矣職刪潤者宜稱爾涵負器識之高講明理義之熟困能不失所亨此致養所以致用也中興保大定功之略咨爾纂修垂則于億世時政有記會計有錄併以屬爾而檢詳兼

之長慮却顧密贊帷籌求所以

利社稷斯

無忝家傳之學可

太府寺簿劉炳除諸王官大小學教授

制

勅具官某行葦忠厚內睦九族朕豈惟睦之必擇師儒以玉其成爾西產之良遽於易能發明未盡之蘊其師表于磐宗紬繹義理切劇情性使成人有德小子有造則予汝嘉可

軍器監丞謝奕禮除大宗正丞兼權兵

部郎官制

其官某丞郎朕所重非其人不輕畀爾葦平之

齊有詩禮之傳陰馬之族無不當貴之累可謂雅器
矣丞我太宗攝組郎省豈特用為爾榮恭儉惟德
恪勤延事朕將以是觀爾之致遠可

賈似道特轉奉議郎制

勅具官某朕建后於相家又命妃於法從家而閔
睢之化行進封有假推恩惟稱爾襲芳弓冶之傳
承暉四星之首擢丞武監進秩二等奕奕光榮矣
務學好脩用燕多祉可

度支郎中謝采伯除軍器監制

勅具官某具粵之劍取其地良於用之器取其材
美於觀諸此得器使群工之道生相

氣之良也提儒科而有能辭之也地良材

美繇郎版部長戎監疇不謂宜豈徒以肺附進哉
易之除戎詩之備械書之穀胄敵干皆今急務毋
視訓工程作為猥釀而不之屑可

魏峻除太社令楊璪除藉田令制

勅具官某等杜藉置令類以公卿佳子弟處之
停鵠峙於梧竹間貴其稱也爾峻貂蟬世家風度
凝粹爾璪筆橐名裔氣稟開敏或司國社或掌帝
藉列在容臺培養遠器其益勵于學以對寵榮可

華文閣待制知瀘州魏了翁 明堂恩
進封蒲江縣開國男加食邑制

勅朕蒐儀先甲歲祀上賦思齊之詩慕親方切
稽我將之頌變帝尤嚴忱三靈之宴娛適百祿之
來下有懷時彥宜錫神釐具官某學貫乎古今氣
塞乎穹壤立朝素節挺朝陽之梧桐去國丹心凜
歲寒之松柏屬更張之伊始願趣召之宜先穎川
正急於借恂宣室遂遲於見詎既底于治迺適其
歸維昔宗祈敷時餽惠駿奔百辟曾齊胙之靡遺
燕衍一賢胡曾膳之未至宜爵升於穀壁仍戶所
於畚圭爾毋謂萬鐘之何加朕方念四簋之不飽
亟承頤屋入告嘉猷可

平家文集卷第七

平

第十八

外制二

諸王宮教授蔡仲龍除太常博士制

勅具官某奉常禮樂之司王政繇出朕方起耆儒
爲介卿以備諏訪博士參之宜得賢爾仲龍醞藉
其學詳雅其度楷模宮邸蔚有賢聲端委佩玉摠
經以訂損益之文折是非之議蓋裕如也彼度吾
所能行而遷就焉朕安取此可

太社令季晞顏除大理司直制

勅具官某三尺法枉於舞文吏之手朕甚憫焉必
得古之遺直而後可爲邦之司直爾詞藻有華英

履有度所居官惟法守是謹以是議法於廷尉不
撓不折不僭不濫而王道行皇極立矣枉已未有
能直人則孟軻之戒可

敷文閣學士李壘 明堂恩加食邑實
封制

勅朕蒐儀先甲歲祀上辛賦思齊之詩慕親方切
稽我將之頌饗帝尤嚴恍三靈之宴娛道百祿之
來下有懷時彥宜錫神釐具官某學博而識明氣
全而節勁螭頭去國望久鬱於論思豹尾行邊功
獨高於綏定屬大權之親攬務衆正之詳延首告
李公以束裝欲爲賈生而前席正深樂只且亟來
思維昔宗祈敷時餽惠駿奔百辟曾齊昭之靡遺
燕衍一賢胡魯膳之未至肆疇采邑仍衍真畬爾
毋謂萬鍾之何加朕未嘗五秉之輕與懋承顯渥
入告嘉猷可

戶部侍郎京湖制置使史嵩之 明堂
恩進封鄞縣開國子加食邑制

勅朕蒐儀先甲歲祀上辛賦思齊之詩慕親方切
稽我將之頌饗帝尤嚴恍三靈之宴娛道百祿之
來下有嘉邊最宜錫神釐具官某賦穎脫之才抱
輻湊之略從塗融顯侈世業於韋平制閫崇嚴聳
軍聲於羊陸惟四履遐烽之絕警故九筵精意之

潛通禮既底於熙成福寧容於專嚮爵升蒲璧戶
衍畚圭帝命式于九圍朕既荷受球之寵天威不
違咫尺爾毋忘拜胙之恭懋暢英猷對敷景況可
徵猷閣學士新知太平州鄒應龍 明

堂加恩制

勅朕蒐儀先甲展采上辛賦思齊之詩慕親方切
稽我將之頌饗帝尤嚴恍三靈之宴娛道百祿之
來下有懷夙望宜錫蕃釐具官某學擅倫魁望高
法從居易以俟命初無徇世之心充實而有輝未
究濟時之蘊試望之於馮翊得汲黯於淮陽雖廣
合宮之詢尚遲宣室之見維時熙事丕舉慶條肆
加多邑之榮庸示名藩之寵綏我思成者在於溫
恪介爾景福者由乎靖共懋展英猷對敷休渥可
華文閣學士知慶元府余嶸 明堂恩
進封信安郡開國侯加食邑制

勅朕蒐儀先甲展采上辛賦思齊之詩慕親方切
稽我將之頌饗帝尤嚴恍三靈之宴娛道百祿之
來下有懷宿望宜錫闕休具官某學擅名儒材優
法從長沙之稱吳芮久藉蕃宣東海之得翁歸更
需鎮撫雖緩受釐之訪靡忘籲俊之思迺睠明禋
迄成熙事餽惠下逮於輝胞之賤賑膳上親乎族
姓之尊豈繫時髦可後祭澤肆進徹侯之重仍加

采邑之腴綏我思成在於溫恪介爾景福由乎靖
共趣懋展於英猷用對敷於休渥可

楊汝明聶子述

明堂進封加食邑制

勅蒐儀先甲展采上辛賦思齊之詩慕親方切稽
我將之頌饗帝尤嚴恍三靈之宴娛道百祿之來
下有懷宿望宜錫閔休具官某業擅名儒材優法
從騎星辰於奎閣步武寢穹挹風露於珍臺精神
更遠屬改弦而更始每前席之興思廼瞻明裡迄
成熙事餽惠下逮乎輝胞之賤脈膺上加乎族姓
之尊豈繫時髦可後祭澤肆肇開於公社仍申衍
於爰日維舉邦彝實均帝社予靡忘於寅畏爾毋
替於辰猶可

吏部尚書崔與之除端明殿學士提舉
西京崇福宮制

勅節誼天下之大閑而厲其節者在人主德齒天
下之達尊而褒其德者在朝廷朕瞻懷東海之濱
夙著南陽之望渴於見晚趣使來思顧抗志之何
高且疏恩之特異具官某純明而積學靜定而善
謀東撫淮堧制勝紛拏之表西馳蜀道計安震擾
之餘乃寧考簡知之深予冲人住想之切薄十
年之圭觀洊一旦之旌招戔戔之賁丘園儀圖共
政翼翼之樂畎畝懇請辭行屹砥柱於患失之波

歸靈光於戒得之境勉從雅志不振高風維元祐
諸賢之方來獨范鎮屢召而不至進承明之秘殿
領崇福之殊庭茲復見於耆英宜一循於優禮鳳
翾翾而亦集爰止朕雖阻於儀刑駒皎皎而母有
遐心爾尚殫於訓告可

華文閣待制江西安撫使陳韓除權工
部侍郎兼江西安撫使知隆興府制

勅政令寬猛之中而後有苻澤之茲民困飢寒之
迫而後有潢池之盜鉏萌芽則力易圖滋蔓則功
難有嘉討捕之勞庸示褒遷之寵具官某忠以體
國儒而知兵遏淮寇之鷁張威名蚤揚殄閭寇之
螽起籌略重高綠林動於循梅黑祲被於江贛跳
梁莫制震蕩靡寧朕合三道而建元戎爾鼓諸將
而鏖劇賊訪鴻鴈於棘矜之下追徃魑於篁竹之
間左翦右屠而禽其良旣大懲於弗靖下筦上簞
而安斯寢遂咸樂於有生以數年宣力之勤底一
且成功之偉宜進班於起部仍宅牧於洪都勉爲
朕留益振如虎如貔之氣盡除民蠹永凝買牛買
犢之風可

大理寺丞鄭伯謙差知常德府提舉常
德澧辰沅靖州兵馬制

勅具官某武陵枕重湖帶五溪民夷錯處牧御匪

易必熟知德意者往綏之爾厚而不浮莊而不撓
正于廷尉惻然惟恐一民之冤德意蓋熟之矣
布藩條旁制四郡奉法循理以康乂民吏俗亦將
聞風而帖服本正則末治也朕方以責實課吏爾
求爲可知嗣對光華之渥可

復中大夫直龍圖閣致仕李衍特贈通
議大夫制

勅具官某天未有久而不定者士君子所以不急
乎人之知而靳乎天之知也爾公而忠廉而直所
至厥績用茂顧以閑退終人勝天乎朕思起事功
於積弛而才之難九京莫作良深悼歎既還爾秩
又寓直義園進兩階以追榮之天者定矣魂而有
知歆此愍章可

新知西外宗正事趙彥紆乞休致除直
祕閣宮觀制

勅具官某奔競成俗如水下趨有安於命詎而無
得心吾能尊顯之爾業履平實治行廉靜嘗爲部
刺史通顯矣耻於浚常之求甘從肥遯之樂讀書
求志若將終身朕起之外宗曾莫能奪何卷懷之
深耶寓直木天優游間館身愈退而愈榮可以愧
世之嗜進而驚得者可

王儀特轉朝奉郎致仕制

勅具官某仕者以負外郎致其事則澤及後嗣非
會課應格不可倖得爾疏通而勤敏嘗貳安慶板
築之功居多引疾告老進秩一等不俟積閥遂郎
負外殊恩也歸而教忠尚其無數可

朝散郎直祕閣李燾特轉朝奉大夫直
華文閣致仕制

勅具官某朕新美政化民獻有十夫子翼方來而
未艾也胡一賢之不憖遺爾蚤從諸老之游熟講
有用之學果達而藝從政何難時未可爲則卷而
懷之時可爲矣則歲不爾與果制於命也耶陟序
正郎陞華奎閣榮其歸老示我惜賢可

歸順人僞防禦使樊辛特補武翼大夫

忠州刺史淮西兵馬副都監制

勅具官某淮右鞠旅汝南歸疆爾有簞食壺漿之
迎我無亡矢遺鏃之費肆嘉知義易授穹階往分
刺郡之榮仍領護戎之寄勉強忠力用荅殊恩可
李大謙特轉朝議大夫依前直寶章閣
致仕制

勅具官某竭忠盡瘁者人臣之職分榮始厚終者
人君之恩禮爾寬平而栗精練而介吏能著聞久
矣輟從郎省司臬左泐皐皐臨遣精神猶炯然也
亡幾何遽以謝事告良用閔惻華之奎直佚之祠

館又陞之元士始終恩榮爾尚奚憾可

寶謨閣待制致仕毛憲 明堂加恩制

勅蒐儀先甲展采上辛賦思齊之詩慕親方切稽
我將之頌饗帝尤嚴恍三靈之宴娛適百祿之來
下有懷宿望宜錫蕃釐具官某業擅名儒材優法
從松階凝邃了忘勢利之榮栗里蕭閑自適性真
之樂屬厲精而更始每籲俊之興思廼瞻明裡迄
成熙事餽惠下逮乎輝胞之賤服膳上加乎族姓
之尊豈繫耆英可後祭澤肆衍邑畬之富庸增家
食之華雖舉邦彝實均帝祉予方篤養老乞言之
意爾毋忘歸美報上之忠可

許應龍除禮部郎中制

勅具官某朕親政以來除南宮郎者再西垣北扉
斧藻王度皆繇此其選爾紉襲荃蕙之芳步武珩
璜之節璧海瀛山休問藉甚望郎出守挹汗瀾之
澤于潮學益老矣撰儀草奏挈之華峻能以博古
之識昌用世之文其升也孰禦可

司農寺丞傅壘除都官郎中制

勅具官某周司隸總冗辱之役屬秋官漢都官從
事掌中郎官不法屬司隸今在曹憲部挈令隸士
職古而事簡爾儒術通明吏事詳敏累綰郡紱綽
有治行蓋能世其家者涉筆農扈甫謂之來賜墨

隄禦趣進厥序其欽飭百隸使不枉于法以培鄉
用之望可

淮西強勇軍統制呂深轉武經郎制

勅具官某廼者山東逆儔敢犯王略大振貔虎之
氣亟正鯨鯢之誅制閫第功爾嘗鏖戰進宮三列
仍統一軍其日夕淬礪以稱信賞可

趙汝遇除度支郎中制

勅具官某地官帥屬以經邦用司金職其入司度
職其出贏虛所關維材是授爾攷歷中外以老成
精練聞國賞積冗軍調紛集楮幣鹽筴術窮而莫
繼爾其精意計度量入爲出斟酌損益而固厥中
毋徒妄諸有司之吝可

安恭行除大理寺簿制

勅具官某朕緬懷先朝樞臣保蜀之勲而厘其
報既擢其子又錄其孫爾競爽而警敏王父所鍾
愛也丞郡東川方騰善譽簿正棘廷趣登華綴三
世有蹟于朝榮矣哉仕優則學圖稱厥家可

利州路轉運判官陳隆之除直寶章閣
權知沔州兼利州路提刑兼提舉制

勅具官某蜀號天險沔當要衝積吾百年之經營
空於一旦之蹂躪孰寬憂顧宜得偉材爾氣銳於
理禁術優於應變祁山斜谷之遺迹木牛流馬之

故智紬繹蓋精輟從漕輓往圖控禦合兩節奎閣以重其行爾能以公滅私一意國事阨塞當築堡塢當修流離當集疲弱當練悉爲朕挽舊觀而回之進可以瞰秦隴退可以蔽梁益則維汝功可

利州路提刑王翔除利路轉運判官制
勅具官某武侯用蜀每患餉道之不繼以木牛流馬爲未足而雜耕渭上規摹遠矣朕訂古謀今慨然于懷爾志氣閎壯材猷瓌達周旋劍棧之表具著勞効繇憲而漕豈特以平時將輸望爾關隘空於寇攘閭井蕩於兵燬舊規猶未還也爾其以堅力行實政安輯流離經葺荒墜使民趨生業之樂則兵享耕屯之利西顧庶其寬乎可

宮觀葉莫除權發遣贛州提舉南安南雄汀州兵甲制

勅具官某章貢與閩粵錯壤其俗易搖而難服奉吾詔令以填綏之其惟良二千石乎爾和平而有制莊靜而有立武岡戎伍之變洞察情僞密設方略不數旬亮渠授首一邦底寧帥閩上功旣懋爾賞繩於文吏吾帥臣又爲爾明白之起分二水之符坐總三州之甲必恩意孚而善良吐氣威信著而悍獷革心治化蒸蒸如漢良吏是爲不負所舉可

陳良驥轉承議郎制

勅具官某維揚翦寇之賞大闢第功無微不逮爾
庀役瓜洲賁伐援比以自請亦陞一列責實方嚴
思稱所蒙可

王丙特改承務郎制

勅具官某巴蓬山高林深茲民淵藪嘯呼剽劫實
繁有徒爾奮身書生急義鄉井招懷其脅從禽俘
其不率一方安堵制閫上功超授京秩宦塗方開
亦克用勸可

參知政事兼同知樞密院事喬行簡除
知樞密院事同提舉編修經武要略

食邑實封制

勅朕撫車攻復古之運慕烝民任賢之風我儀圖
之則山甫柔嘉侯誰在矣則張仲孝友廼睠股肱
之重夙咨德齒之尊講內治以旣嚴籌中興而抑
孰進握本兵之寄俾殫謀國之長渙我明綸諗于
列序具官某直大而不倚沉深而有謀脩然其臞
精神溢乎萬物之表皓然其老志氣塞乎兩儀之
間予養晦則密勿以效忱予更化則從容而贊決
凡君子小人之進退暨中國外夷之盛衰備輸啓
沃之忠居賴弼諧之助惟關洛有鼎來之機會而
江淮有前進之規模必元老壯猷乃可以出萬全

必真儒無敵乃可以大一統就煩舊德坐筦洪樞
總提經武之編益懋運籌之略申陪并賦併實圭
臆意詢黃髮則罔愆朕方謹乞乞番番之戒有常
德以立武爾毋忘絲絲翼翼之圖涉歷深則無躁
謀思慮精則無遺策共恢大業茂對閔休可

資政殿大學士新知建康府曾從龍除
參知政事同提舉編修勅令加食邑實

封制

勅慶曆之開太平范仲淹爲參預元祐之新大化
呂公著爲疑丞朕遵晦十年厲精一旦趣召先
朝之彥俾還近輔之縣誕敷告誓統具宮

其學根乎正大氣抱乎純明其重足以挫衆紛屹
然鼎呂其靜足以燭群動瞭若著龜蚤服在於大
僚耻苟同於汙俗不合則去有待而行鶴鳴九臯
久聞聲而樂只鳳翔千仞迄覽德以來思予興相
見何晚之嗟爾動可爲忠言之喜舉昔大對勸今
力行嘿有契於此心期共繇於斯道更化則可善
治宜增重於本朝折衝何必臨邊奚尚勞於外服
爰輟居留之寄聿嚴共政之圖蒞勅局以提綱拓
爰田而衍賦併昭異數式獎英猷噫六典建於周
家莫先乎設參而置輔庶績凝於虞室尤在乎同
寅而協恭勉殫訏謨之忠共濟垂拱之治可

左諫議大夫鄭性之除端明殿學士簽
書樞密院事同提舉編修經武要略進
封加食邑實封制

勅朕迪簡在廷儀圖共政繇諫長而選蓋僅聞於
二紀之間自倫魁而升况並見於一日之頃繫非
常之盛舉必不世之奇材翊我事樞揚于制綽具
官其身端而行治心廣而體胖鴻漸可用爲儀望
夙高於華著雞鳴不改其度志晚適於槃阿維予
初潛慕世賢詰未親魏證之論已稔蕭生之名迨
躬攬於萬幾首旁招於衆正擢從郡最列在從塗
朝入對於治朝暮進登於騎省規君德則中肅大
學條國事則天保采薇方累疏之前陳已一言之
默寤徑躋宥府密贊籌帷由求之切而得之難故
知之深而用之速總武經之大筆陟書殿之穹班
爵肇啓於徹侯封更陪於多邑以寄股肱之重以
示精神之強噫虞舜之治有五人朕方篤任賢之
意宣王之德洽四國爾盍思復古之圖叶濟廟謨
丕昭儒効可

何處久除直寶謨閣知鎮江府制

勅具官某南徐襟江枕海而控淮地望重矣制勝
孔嚴擇守加遴爾材猷閑碩志氣激壯爲御史諫
官嘗陳內外修攘之略具有本末朕甚偉之冠冕

蓬山未望設施祖述擊楫渡江之地以奎直往爲
朕圖厥功應接于外屏蔽于內威行愛孚而天險
之勢以強京師併蒙福也可

何琮除直徽猷閣福建路轉運副使制
勅具官某七閩樂郊也間者鷗義姦宄多抵冒于
法非蕉萃苑結莫之省乎爾風槩凝遠性行脩絜
世道渫濁能不磷緇朕器之奏對間久矣歛武華
要寓直疑邃風駕暑征往將使拍豈直爲飛輓計
以鐵冠觸邪之餘威察一道臧否貪廉而刺舉之
使吏姦澄而民氣舒斯稱朕臨遣之意可

董洪父自脩王公瑾父困方岳父欽祖

趙子森父復先陳子椿父千期朱日炎

父師友孫鏞父价以明堂恩封官制

勅具官某總章大饗熙事消成歛福錫民同躋仁
壽爾旄期康彊有子仕版京秩䟽封式昭善慶可
太中大夫曹叔遠特轉通奉大夫依前

煥章閣待制致仕制

勅訪正元之遺事尚想告猶追長慶之高風遽聞
請老莫回雅志庸錫徽章具官某襟度曠夷風規
凝粹羊腸峻阪蚤備罄於忠勤豹尾屬車晚寢隆
於恩遇勞禁塗而諗疾佚真館以言歸賜杖竊遲
掛冠何亟疊進高華之秩仍通嚴邃之班祗服寵

榮益綏壽嘏可

正議大夫程秘磨勘轉正奉大夫制

勅等六曹而上課嚴三歲之遷超四品而升秩重
八年之轉雖循彝典實著恩章具官某粹學淵深
英規山立謀猷猷獻納備殫日月之忠典冊鋪張叶
應風雲之會繇殊庭之引興每魏闕之存心積閱
既深陟明可後飛鴻自適初何計於穹階鳴鶴相
求肯尚遺於宿德可

問丘梓林炎趙崇媿趙崇森除大理評
事制

勅具官某等典獄惟平之難漢吏用法巧文寢深
爲重爾行已純固莅事精恪丞于北寺不詭不接
蓋涉深而識定者也考功課吏之法公則一私則
萬殊勉爲我權衡之抑揚惟允嗣有褒進可

權兵部尚書趙至道除寶謨閣直學士

知鎮江府制

勅法從莫如文昌八座之尊价藩莫如扶風三輔
之重必卷舒之有裕斯出入之俱榮具官某蚤以
孝稱晚繇廉進歷耳目之寄每侃侃以自將并喉
舌之官尤循循而唯謹以厭禁嚴之直欲尋閑退
之盟莫挽而留宜華其去赤刀琬琰峻祕職於西
清皂蓋朱轡輦名城於北固亟上中和之最尉予

者艾之思可

太常寺丞兼權右司曾天麟除將作少
監制

勅具官某永惟技巧工匠之鮮及不如宮室苑囿
之無增故繕監不以飭工而以儲材爾䟽通而文
寬靜而栗材出鄧林信良矣容臺省闋趣升于少
匠厚其儲以致用也爾知器用利則用力少而就
效衆斯識朕心可

王淪轉承議郎制

勅具官某朕觀新店民之語知和糴之厲民尚矣
爾守滁日糴辦而民不擾數踰三萬應我賞格增
秩旌勞尚鞭其後可

歸順人沙兀惹特補修武郎添差蔡州
兵鈐兼權蔡州事制

勅具官某襄漢奮伐淮蔡底平莫府以戎捷來上
謂爾能知逆順之分赤心歸誼願効忠力蔡人即
吾人也爰畀右階就命爾守復民業以趨耕作士
氣以待戰保障鞏固斯稱委寄可

房應發轉文林郎制

勅具官某六駟復土五使置官凡備驅馳悉霑賞
賚爾祗吏役例進一階茂對恩榮尚思策厲可

劉顯以父評戰歿補承信郎制

勅具官某蜀關禦寇虢將死勇爾父從之鏖戰繼
歿羽林孤兒漢恩特厚錄爾一官用勸徇國可

石天瑞白華補秉義郎制

勅具官某等方城濯征垂瓠震潰執訊獲醜餘燼
為空爾能自歸貸而官使尚圖忠効用荅生全可

李駿起復直龍圖閣四川都大茶馬制

勅具官某秦蜀權牧之政分合九幾然非其人分
任而不足得其人合治而有餘爾沉毅足以經遠
果達足以治劇所居底績晚譽更偉坤維事力日
匱茗法壞而後馬政壞頃嘗分任未見其益也茲
庸合以命爾且寓直淵圖以重其行毋俟梓琴懷
慨叱馭能使廉信浹於園戶行於蕃落則摘山富
而効牽蕃矣可

工部郎中鄭寅除尚左郎官制

勅具官某民以止為體能時止則止然後能時行
則行爾簡粹而通亮為郡嘗以治理効聞顧時俗
之流從又孰能無變化懼荃蕙之俱茅也而恬然
歸絜坐玩歲華待化機之轉移偕眾正而彙集其
將有行乎郎選甚高毋憚于劇朕方思所以進爾
者可

王邁轉朝請郎制

勅具官某權務萬貨萃焉而摘山煮海之利居多

羨入必賞厥有著今爾材優於從政嘗司出納歲有羨利其知理財正辭之義乎一官懋賞益圖爾庸可

將作少監趙與芮除大理少卿制

勅具官某孟侯朕其弟必卷卷以陳時臬事丕蔽要囚爲誥豈非刑者君子所盡心友之篤則誨之切乎爾氣質金玉步趨繩矩卓有大雅不羣之風朕猶欲其政事之熟更也既試之大匠又試之少大理民命至重國脉所關欽哉恤哉其寧惟永爾亦與有令聞可

鄧雲轉武節郎制

勅具官某山東逆儔負固淮楚大振貔貅之氣一空狐兔之群制閫第功爾嘗鏖戰峻升武級用獎湖右其日夕淬礪以稱信賞可

王旻

勅具官某山東逆儔負固淮楚大振貔貅之氣一空狐兔之群制閫第功爾嘗鏖戰峻升武級用獎驍雄仍顓戎律之嚴坐鎮邊城之重祗承異渥勉策奇勲可

直寶謨閣宮觀劉宰除太常寺丞制

勅具官某聖人與曾點說漆雕開蓋不汲汲於用乃所以致用也爾得於天者厚求於人者薄見幾

遠引樂道而著書與行乎國政之久者相為終始
世方瀾倒獨落落乎其有風颺朕甚嘉之拔之槃
澗丞我奉常幡然一來尚不負國人之望可

考功員外郎桂萬榮除尚右郎官制

勅具官某比歲倖門開而吏道雜武級猥濫尤甚
綜核方嚴銓筦宜允爾為考功郎氣嚴詞厲吏莫
敢欺推是以修審官西院之法鑒揭而妍醜分衡
設而輕重判劇曹其澄乎來幾何日三錫厥命用
惟其材毋謂序進可

前右正言何萬齡特轉朝奉大夫直寶
謨閣致仕制

於是置廷尉平四人務平之爾梓爾炎爾崇燾爾
崇森皆練習律令而文無害故並命以司庶獄之
平明啓刑書胥占咸庶中正中則平矣欽哉可

虞衡除大理寺正制

勅具官某王制獄辭之成史告于正正聽之正所
以正庶獄之不正也爾簡澹而詳敏褰帷嶺嶠之
東以風力著庸命爾正于李吏有上下其手以舞
吾法爾悉為朕糾之庶幾廷中稱平而天下無冤
民可

權知信州史彌志除將作監丞制

勅具官某上饒間于江浙頃悍卒軼紀律以駭吾

民翦其萌可緩乎爾優於應變勇於討惡尸二渠于市而群姦之魄褫千里底定朕甚材之召丞匠監用旌爾能繕修務簡益培雅望可

趙與權起復直寶謨閣淮西提刑制

勅具官某兵刑一也西淮方整軍經武陳時臬事宜加謹爾公族之雋材優而氣盛嘗守輔邦蔚有能譽敏繫弱可以縻乎起之樂棘進之奎直往司臬于西能使在泮獻囚與在泮獻馘同功則移孝爲忠之道得矣可

大理寺丞桂萬榮除考功員外郎制

勅具官某馮唐白首顏駟厖眉尚書郎以老於職舍豺狼問狐狸有年矣爾以駿發之材邁往之氣列在騎省能於波流風靡之中奮擊大吏疾於迅霆非不畏強禦者乎銜卹以歿歲月奔駛崇階遠職示不汝忘可

兩淮制置使兼沿江制置副使趙范除江淮制置大使制

勅全江淮濟中興莫重乎要衝之勢築壇場拜大將莫嚴乎專閫之權廼睠時髦密承廟筭內養威而植屏外觀變以投機丕建使名特加命綽具官某挺姿果毅抗志忠勤材閎而用周力振西平之

業氣壯而識老遠追鄧禹之風自討賊之策勲即
平戎之定計入儀法從出撫成師朕惟九節度以
無統率而危唐四將軍以有領屬而強漢必中權
之獨揔斯外治之咸張車攻復會東都首經營於
江許閔宮遂荒徐宅先疆理於淮夷茲大恢表裏
之規摹宜盡稟精明之號令翼翼文昌之座堂堂
太一之旗壯本根於荆揚震聲采於汴洛詩書之
帥以尊主爲德仁義之將以安民爲功行三軍則
務於好謀掌六師則貴乎同力觀宣勞之宴久信
任重之優爲江左自有夷吾朕方倚深長之略河
南盡爲晉土爾盍堅綏定之圖可

權工部侍郎留元英除集英殿修撰知

江州制

勅翠綏鳴玉入聯法從之榮皂蓋飛旗出殿名藩
之重不輕厥選宜責其行具官某篤實無華寬平
有則物情方靡初何意於鷹鷂世道旣回仍可儀
於鷁鷺政藉居中之益忽騰補外之章勉徇懇祈
俾圖共理升班論譔留夙望於甘泉奉最蕃宣寄
壯懷於湓浦予曲盡待臣之禮爾益殫報上之忠
可

葉奭除國子博士應禕除太學博士兼
莊文府教授汪之道除國子錄制

勅具官某道存乎人心蘊之爲德行行之爲事業
文辭陋矣朕故謹擇知道者爲學校師爾與直簡
而廉爾猷融明而靜爾之道英拔而粹俱有得乎
正大之旨庸命與爲博士以學胄子繇爲博士以
學士仍典藩房之教之道爲錄以糾胄監之不如
規者師道立而皆知以求仁明善爲急化成天下
獨不在茲乎可

著作郎兼權司封郎官蔣重珍除起居
舍人兼崇政殿說書制

勅具官某迪惟先朝策士多得倫魁之彥敷
後人休猷既簡在大僚又簡厥修如爾重珍者以

柱史從華光之游矯矯乎鳳凰之集阿閣黃鵠之
下太液也榮貴素定盛名難居詔燉責難益究
韞使碩大光明不愧天聖嘉祐之盛顧不偉歟
黃壯猷除金部郎官制

勅具官某朕方經理京洛財計裕於內則事力充
於外金幣委輸鉤考其數以周知登耗而頒節制
司珍職也爾器局明整材華暢茂司庾左制能斟
酌取予歛散之宜以又我民趣踐郎省參掌國用
曹雖劇刃游盤錯矣抑以是詳觀爾之官可

司農寺簿趙鎬夫除司農寺丞兼提領
安邊所制

勅具官某景壽昌丞大農關內漕穀國使之常平
置倉民便之北邊亦藉以給丞不當如是耶爾錫
夫機園而不窮氣銳而有立逾月再轉就丞九扈
且坐總邊計材選也孰利當興孰害當除毋使壽
昌專美於漢則職之稱可

軍器監簿陳振孫除諸王宮大小學教
授制

勅具官某我 仁宗詔諸官院教授非止講習經
旨須選履行端慤蓋欲其以身教也爾靜而不
簡而不華可謂端慤矣振振麟定以爾爲之師
渠度於步武之間挹芳潤於言論之頃而成聖賢

冠莫非大雅麗澤講習之說將有考於此可

方大琮除司農寺簿樓杓除軍器監簿
制

勅具官某寺監有簿職鈎稽違失簡矣國以養材
士以養望爾大琮粹然其瑜而靜俾簿于農寺爾
杓凝然其度而立俾簿于戎監鴻之漸而鷺之振
也觀其所養朕不敢忽爾益觀其自養可

知南安軍彭鉉職事修舉轉一官制

勅具官某漢二千石有治理効輒璽書勉厲增其
秩故良吏爲盛朕甚慕之爾果於事功達於識慮
而敏於材江右南接嶺嶠俗驛而難御支壘戢守

能不以蠶絲易保障田里相安蠱賊屏息其漢吏之良乎一秩示勸益進于理以對顯擢可

施梈差知融州制

勅具官某融在廣右爲望郡銅虎符不輕畀爾以淳熙執政之胄克修令猷履平而植固三爲別乘抱璞不售亦老於世故矣以是起家母鄙遠其民而厚拊之廉善達于聽聞斯稱惟良之選可


曹叔遠贈光祿大夫制

勅老之將至甫抗志於垂車生也有涯遽遺言於易簣推我蠶傷之意形于贈襚之章具官某薰然澤物之春蔚乎成己之學年去國留落而氣不衰晚節還朝虺隤而志已壯進少論思之選退尋蕭散之盟方惜日以自休胡御風而不返出處本末具知存闕之忠始終哀榮茂享書棺之寵可

季衍直寶文閣致仕制

勅具官某河東守以一人之毀而去雲中守以文吏之繩而罰今昔之通恨爾直方自信無所撓折宅牧淮右竟以賈憎朕夷攷其平生公於徇國廉於居官朕弧之疑可亡也齒髮未衰遺榮何亟進直寶奎尚其吐氣可


平齋文集卷第十八



平家文集

十九之十一

内閣文庫			
番 號	漢	10277	
冊 數		12	8
図 號		3	1



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM Kodak



国立公文書館
National Archives of Japan

原本の文字など不明瞭な個所があります。

綴じ部(喉部分)の文字など不鮮明な個所があります。

齊文集卷第十九

外制三

倉部郎中林清之除直寶章閣都大坑
治制

勅具官某蓋聞有道之世地不愛寶比鍾官之課
不登非地寶畱耶抑裕之惟人爾通練敏劭治郡
有善狀九府圜法泉布爲重輟材星省徃幹東南
三品之產轉畱而爲豐賈誼有言上挾銅積以御
輕重錢輕則以術歛之重則散之貨物必平朕有
望於汝矣可

黃孚權知建寧府制

勅具官某建安富庶文物之邦比歲不登糴踴而
民易動遷朝廷憂故擇守良難爾審機於應物迎
刃於制事咸以材屬駕輶漕粵易轍殿閩人宜其
官何嫌改令夫鎮危疑之情活彫瘵之俗固守職
也握苗常患於助長種木亦忌於太恩行所無事
而不求赫赫其吏治之良乎可

戶部侍郎京湖制置使史嵩之除權兵
部尚書制

勅朕仰稽韓奕江漢之詩俯考皇武方城之雅嗟
古風之寢邈睠王事之良勞擢繇外間之崇列在
丘壘之峻有華從橐冗錫鞶書官某廷秀明

出奇將略審刺虎之勢必威厲某廷秀
機雖會戎而不憚震威聲於垂瓠褫營魄於穹廬
珍奇之灰既空冒頓之鏑遂絕圖八陵而效捷固
知天道之還告九廟以歸功亦賴人謀之贊肆嘉
乃志式獎爾庸躋文昌八座之聯攝司馬五兵之
柄維時眷遇允謂遭逢豈不懷歸而畏簡書既舉
勞還之典乃使帥屬而平邦國尚修獻愷之儀可
大理少卿趙與芮除寶文閣待制提舉
佑神觀仍奉朝請制

勅龜鈕藻衣甫奏平反之最翠綏玉佩趣躋次對
之聯匪親愛之私恩實榮懷之彝典具官某暉承

霄極秀挹天潢性行忠和踐丞郎而養望材節通
敏歷卿監以蜚聲朕觀萑藟之綿綿嘉棠棣之韡
韡久恬於進宜峻其遷延閣陞華儼荷囊而待問
真庭均逸樂戲綵以承顏益隆信厚之風茂對熾
昌之嘏可

辛克承除直顯謨閣主管紹興府千秋
鴻禧觀制

勅具官某蒹葭蒼蒼白露爲霜世道不競人材老
於摧折者何可勝數爾以練達之材精密之識屢
更事任具著勞効意所不合翩然駕飛鴻而獨往
不計搖落之幾秋也朕厲精求治亟

看哲而

之則以病論豈遂忘斯世乎寶本寓

養心

尚識予遡洄之意可

張洽除直祕閣主管建康府崇禧觀制
勅具官某蒹葭蒼蒼白露爲霜世道不競人材老
於摧折者何可勝數爾以簡澹之姿明遠之識嘗
於撫字關決見其材意所不合翩然駕飛鴻而獨
往不計搖落之幾秋也朕厲精求治亟起耆哲而
用之則以病論豈遂忘斯世乎祕廷寓直間館養
恬尚識予遡洄之意可

宗正少卿張嗣古除祕閣修撰樞密院
副都承旨制

勅具官某朕長馬中原樞掾皆得以與聞廟筭矣
導宣密命日與柱下史並直文均爲最近爾識照
未然之機材擅有用之器曩記言于朝國勢虜情
論建甚悉恨不果用也白首重來識益定材益老
其以中祕論譔參承宥密制勝之略保大之謀凡
可以贊吾樞紐者毋懲毋忽可

太宗正丞兼兵部郎官謝奕禮除將作
少監制

勅具官某右賢左戚國之令典戚且賢裒進可後
乎爾端良而敏英潤而澤芝輝玉映有文靖故家
之風度宜不爲流水游龍而移攝如

幾畝貳

非朕之私戚而賢也其靖共爾位

加來少

福可

太府寺丞陳韞除太宗正丞制

勅具官某綿綿瓜瓞本支百世必屬近行尊者訓
齊之而丞以庶姓春秋公族大夫之意也爾穎然
處囊之錐恢然發硎之刃而退然不自襮涵負蓋
遠庀屬外府藉甚有聲董治太宗勉贊而長朕之
進用爾者此其階可

副都承旨張嗣古除右文殿修撰權知
建康府江東安撫制

勅具官某秣陵槃槃一都會進可以控中原朕方

規復輿圖思得魁壘俊偉之彥付以留籥爾起自
久間入對便殿敷陳攻守大要具有顛末擢承密
旨出揔陪京卹民以厚根本厲兵以壯形勢鞏護
天塹應接汴洛地以人重毋謂事權之非昔也祕
殿論譔姑華爾行有功見知顯拔未艾可

張元簡除太府寺丞制

勅具官某士君子知用舍有命行藏有義則身可
屈氣不可折爾軒岸而闕偉任重器也荆門城築
之役平板榦程土物其成不愆于素如楚艾獵民
方便安之遽掣其肘而去身雖屈其氣全矣起之
家食丞于外府朕蓋以是爲事任之諸可

曾天麟除浙東提舉常平公事制

勅具官某朕親政以來諸道部使者選必精察必
謹欲光華之被原隰也爾名家之彥周行之翹穎
知朕德意志慮蓋熟左浙庾臺往將使指維昔先
朝有疏曹娥斗門洩鑑湖入江而田不病民至今
德之非爾祖也耶遠乃猷裕乃以民寧毋徒曰山
海之藏足以利吾國可

僉書樞密院事鄭性之贈三代

故曾祖可大贈太子少保制

勅朕儀圖近弼招選譽髦自竒童而升如天聖之
晏殊由倫魁而進如端拱之蒙正蔚扶輿之鍾粹

侈演迤之儲祥榮燭九原寵延三世具官某故曾祖具官某隱居求志積善在身無言不酬著在鄉評之望非禮勿動形爲家法之傳軸雖折於壯齡榦實培於慶裔予倚西府邇臣之重爾登東宮亞保之崇祇服綈章茂綏廟祀可

故曾祖妣陳氏贈咸寧郡夫人制

勅豫章生於鄧林璆琳出於元圃積深蓄厚則發之遠推高原大則報之隆具官某故曾祖妣某氏嫠居而肅於齊家約處而豐於教子惠來師友燕及孫曾覩警悟之姿則愛鍾于心聞弦誦之聲則喜動於色成茲國器翊我政樞雖八柱明堂不及生前之見而六瑚清廟竟爲身後之光肇開湯之封增賁烝嘗之祀尚其不昧歆此殊榮可

故祖獎贈太子少傅制

勅叔虞之唐必興畢萬之魏必大何天道之應若券劑以取償蓋人事之修猶耒耨而望穫欲驗孫謀之遠盍觀祖澤之休具官某故祖某穎悟秉姿淹該進學文從字順勇追賈馬之風墨妙筆精雅得鍾王之法方賢哉之騰譽胡逝者之興嗟不在其身克昌厥後繫我弼諧之助皆而講習之傳宮傳參華起英魂於既往泉扃增耀垂景祐於方來可

故祖妣陳氏贈齊安郡夫人制

勅上推乎八世者康成之先下占乎五世者有媯
之後矧王母誨言之未泯而聞孫承弼之方新肆
加告第之恩庸表起家之慶具官某故祖妣某氏
坦直無隱靜間有儀奉事嫠姑動不違於四德扶
携幼子守益厲於三從斷機之教既嚴含飴之愛
更切受茲介福發爾幽光文軒象服之華懿典蜜
章之寵懿魂如在尚克饗之可

故父汝永贈太子少師制

勅爲人君止於仁而仁莫宏於錫類爲人子止於
孝而孝莫盛於揚名朕博求開物成務之材以濟
修政攘夷之治隆樞廷之眷倚侈禰廟之褒崇具
官某故父具官某蹈道有常秉德無競周旋鄉黨
寬洪長者之風盤礴丘園正潔幽人之操念義方
之爲訓豈科舉之徒文凡一時師友之功必千古
聖賢之蘊晁董公孫之對固有源流益稷皐陶之
謨正資羽翼佩一經而追往撫三金以興悲欲慰
孝思可稽祿典超進宮師之亞增光家學之傳式
勸教忠毋忘垂裕可

故母碩人黃氏贈宜春郡夫人制

勅袞衣而感蓼莪不如戲綵之爲榮鼎食而悲凱
風不如負米之爲樂矧乃三遷之訓成予四輔之

賢且沛恩榮用紆孝慕具官某故母某氏夙姿警
慧素履靜柔佩悅奉姑修婉容而特謹傾奩教子
揭懿範以尤嚴迄培隆棟之材克贊改弦之化流
徽無斁鍾慶有源幾年馬鬣之封一旦魚軒之錫
德無不報魂尚知歆可

故妻碩人潘氏贈清河郡夫人制

勅碩人其頤必稱厥德君子偕老誰無此心同甘
苦於隱約之秋異幽明於顯融之日有懷契闊曷
尉欷歔具官某故妻某氏生自名門儼于魁彥淑
均接下佩纓奎芷之芳雖蕭奉先錡金藻蘋之潔
推舉按齊眉之意致趨機斷織之規生資助以居
多歿追榮而宜厚委佗象服首正小君之封積累
鵲巢益綿奕世之慶可

直華文閣知江陵府楊恢除知襄陽府
京西安撫副使時暫兼京湖制置司公
事制

勅具官某荆襄自昔衿喉之地吾國之上游也師
以進爲功故襄陽視荆南爲尤重爾雋偉而有志
莊靜而有謀頃上邊最擢帥于荆事任蓋重矣王
師方向河洛俾爾擁旄進屯于襄任又加重望隆
中而懷葛亮眺峴首而慕羊祜臨江漢而思召虎
積穀練甲控扼險要使前茅無後顧之憂首尾有

相應之勢而吾之取中原可以萬全時乃功可

尤燭除直祕閣權知江陵府兼主管湖北路安撫司公事制

勅具官某荊州用武之國東連吳會西通巴蜀而北控京洛經理中原之秋宅乃牧尤難其人爾涉深而養之固蓄厚而發之閑太阿龍泉之出匣斷蛟剗犀忽若筆泛豈安陸專城足以展其材寓直中祕全護荆楚觀三國必爭之形勢考羊陸守禦之規摹熊臥虎視精神折衝上流之顧寬則朕可安意而圖中原矣往懋厥功用副推擇可

知吉州劉煒叔職事修舉特轉奉直大

夫制

勅具官某漢二千石有治理効輒爾書勉厲增其秩故良吏爲盛朕甚慕之爾處已靖壯待民樂易所至有漢循吏之風茲守廬陵政平訟理田里安其條教而灌輸章貢以戢蠢動曾靡告勞休問達于朕聽久矣奉直必實歷七年乃轉優於勸不汝靳也其益勤弗懈以需選拔可

范炎辭免赴都堂審察特轉承議郎與

宮觀制

勅具官某高帝有尊顯賢士之詔而魯兩生不至朕收攬衆正如茅斯拔爾顧安貧樂天不屑弓旌

之招易所謂履道坦坦幽人正言非耶進秩賦祠
姑遂雅志病愈造朝尚其有待可

葉武子辭免召命特落致仕除直祕閣

主管華州雲臺觀制

勅具官某元祐間文彥博既老復與大政范鎮既
老不復來亦各行其志也爾少而立壯而仕有聲
老而知止不殆良可嘉尚朕求士如渴起之垂車
志益堅節益固可以媿鐘鳴不休者富直祕丘賦
廩祠館貪賢重老之意尚懋承之可

劉福轉武德大夫制

勅具官某鵠鶴負靈征行方銳犀渠鶴膝製作宜
精嚴除上功謂爾舉職進官一列用勸只勤可

高之問除直祕閣主管亳州明道宮制
勅具官某人之止以久爲難節或移於晚守或失
於終此良之上九所以爲止道之至善也爾姿簡
澹而踐平易用不盡材渺送目於冥鴻之表光生
德宇之泰定坐閱物華之變遷時可以行猶堅卧
而莫起其良止之至善者乎厖眉華髮與汗漫游
命職賦祠用賁晚節可

知樞密院事喬行簡贈三代

故曾祖勝之太保贈太傅制

勅朕惟有維師尚父則成變伐之功有元老方叔

則建中興之業延登壽俊坐筦決樞備殫瘁沃之
忠宏濟規恢之治垂休亡斁開迹有源具官某故
曾祖具官某琮璧粹溫笙鏞淳古左圖右書之外
一泯行藏仰事俯育之間兩無愧怍克篤曾孫之
慶肆躋近弼之聯申錫恩章誕揚敷冊拜王祥之
秩夙敷賁於泉扃進卓茂之官益寵綏於廟祔尚
其冥漠同此榮懷可

故曾祖母孫氏婺國夫人贈越國夫人
制

勅形大者聲宏膏沃者光燁爲仁雖在於一日之
頃積德實計於百年之餘睠華髮之元龜兆中興
之治象溯求慶派申賁曾聞具官某故曾祖母具
某氏淑謹飭躬惠和逮下于沼于沚克勤錡釜之
共宜室宜家允穆琴瑟之好積自一門之懿流爲
三卅之昌地靈有開天報不爽小君都號夙臨婺
女之區大國進封肇啓會稽之壤歆我漏泉之澤
揚而奕葉之休可

故祖堯太傅贈太師制

勅素安之爲太尉自良而傳陳群之錄尚書由寔
所積寸雲足以興泰山之雨勺水足以導黃河之
源方倚重於中樞宜追榮於先廟具官某故祖具
官某家庭肅穆鄉黨雍和機械俱忘忠信之寶獨

富肱脾不鑿仁義之爵尤尊篤生萬石之孫坐幹
五兵之柄推功祖澤錫命師垣雖聲迹已陳何施
靈壽之杖而典刑具在不愧進賢之冠祇服予恩
永綏爾祀可

故祖母杜氏慶國夫人贈益國夫人制
勅樂莫樂於抱孫榮莫榮於尊祖况樞機周密特
重舊臣之圖而源流深長實受王母之福欲報含
飴之德可稽刻蜜之章具官某故祖母具某氏婉
婉令儀幽間懿行受蒞蘭而獻常有起孝之心采
蘋藻以承益秉有齊之念培本根而燾後茂枝葉
以光前積累既豐寢崇亦腆彤管有煒旨開慶永
之封象服是宜易肱岷山之壤紆悲霜重無祉雲
仍可

故繼祖母蔣氏華國夫人贈吳國夫人
制

勅有孚而它吉者人事之當修積善而餘慶者天
理之必應欲驗自葉流根之澤當觀歛華就實之
功具官某故繼祖母具某氏冲靜以和嫺柔而度
三遷教子未酬志士之懷萬卷誥孫遂享真儒之
効惟股肱之寄甚重故體貌之恩特隆延及重闈
均加襁褓典旌周公之遠裔既盛笄珈相太伯之名
邦更豐湯沐信在天之可恃宜奕世之知榮可

故父森太師追封寧國公制

勅四海之福君明而臣良一家之慶父慈而子孝
瞻言耆俊服在大僚上應極樞星紐之光散爲天
街析木之潤增彊吾國用顯其親具官某故父具
官某明善而誠身弼中而彪外學貫穿於千古獨
得其宗氣充塞於兩間莫窮所養培經畝而遺子
拓文苑以傳家成茲儒英爲我國鎮高車駟馬雖
不覲於生前袞冕植圭果有開於身後侈赫赫南
山之望啓槃槃北地之封庶可作於九京尚克昌
於百世可

故母俞氏福國夫人贈魯國夫人制

嶠松產於祖徠而充棟梁桐生於嶧陽而中琴瑟
蓋稟鬱積蜿蜒之氣乃成光明俊偉之材匪施告
第之恩曷顯擇鄰之教具官某故母具某氏姿涵
圭璧行中準繩夙夜組紉恪謹女功之習春秋錡
宮祇勤婦德之修旣舉按以賓夫又斷機而訓子
及今熾艾念昔劬勞幼學而壯欲行豈爲萬鍾之
奉欲養而親不逮空懷三釜之悲尉孝慕於寒泉
拓恩封於曲阜懿魂如在休命知歆可

故妻呂氏安定郡夫人贈東陽郡夫人制

勅宋啓皇圖呂爲望姓贊太平之治則蒙正夷簡

輔更化之功則公著大防迨南渡之徙都盛東陽
之占籍世傳雖遠家法猶存既有名儒以昌斯文
又有賢女以相君子具官某故妻具某氏性姿嫺
澹襟度冲夷誦內則之篇佩左紛而克謹玩家人
之卦主中饋以尤嚴宜為偕老之期俱享鼎來之
慶胡先朝露莫共歲寒拱木參天護泉臺之佳氣
脂田易地聳鄉國之榮觀可

故繼妻樓氏譙郡夫人贈吳國郡夫人
制

勅魯公有令德之妻韓侯有燕譽之婦惟宜家而
得助斯與國以同休猗嗟契闊之情於亦便蕃之
流具官某故繼妻具某氏備典顯胄配德名門禮
法周旋凜若惠昭之訓詩書薰染粲然道韞之風
居既定於鵲巢進方偕於鴻漸命胡不淑生遽有
涯易譙城之故封斥茂苑之古壤增華竈安永燕
丞嘗可

趙應愚轉保義郎制

勅具官某王后六服周主以奄女御及奚實從其
役爾為胥史亦既竣事一秩酬勞當思自勉可

王珪轉武顯大夫制

勅具官某西洛歸疆已奏三京之捷東淮平寇猶
論一壘之功爾於是行嘗奮其勇升四階而示勸

總尺籍以知榮可

繆夢達轉武德郎制

勅西洛歸疆已奏三京之捷東淮平寇猶論一壘之功爾於是行嘗效其力疊進官而示賞雖去職以知榮可

林演權知德安府制

勅具官某黃霸爲廷尉正數決疑獄廷中稱平至守潁川其治遂爲天下第一爾以內寬外明嘗庇屬棘寺不阿不縱鉢之以禍福不顧起家景陵宜其政平訟理而民無愁歎也安陸爲湖右重鎮往而藩條能推所以治景陵者治之根本強則保障固懋之哉可

李煒知崇慶府制

勅具官某西南六十州惟唐安以蜀名最古且阜陵潛藩也不輕授爾篤厚不欺慈祥有則分符天彭制閫以實政上旣增秩矣茲以蜀辟將又觀實政焉朕厲精更始以來寬卹之詔婁下賦欲簡刑欲平政令欲信莫非實之尚州縣吏能勤於奉詔澤安有不下流者哉其典聽朕哉可

吏部侍郎鍾震除寶文閣待制知太平州制

勅大江以東姑孰爲重

先朝建侯植屏莫非雞

翹之英近世為人擇官未免龍斷之賤迨改弦而更始每弄印以柬求得諸小宰之聯付以鉅藩之寄具官某家傳正大躬踐和明華國鴻文駢轅常揚之上沃君讜論頡頏褚馬之間顧朝望之方穹胡民庸之自詭貪賢良切申諭莫留擢升次對之華往膺共理之重周行十五年之久曾不磷緇漢守二千石之真何難鎮撫維川澮浸淫之後加田閭稚剝之餘正藉循良爲甦凋瘵風規汲黯諒無薄淮陽之心事業周瑜尚識屯牛渚之意勉圖治最入告嘉猶可

將作

監謝炎禮除大理

制

勅具官某朕篤於同氣之愛必試之匠且近之棘卿封培其遠器推此以待椒掖之同氣顧不厚歟爾謹言而敏行履和而牧謙貂蟬世家龜紫大闕有此天球琬琰之粹親賢並用列在班著旣觀之以繕修之儉又觀之以欽恤之仁豈苟然哉有關睢麟趾之意而後可以行周官之法度宜識朕心可

吳昌裔除軍器監簿制

勅具官某士以登朝爲榮伯仲同朝又儒者之至榮矧同官寺乎爾學有源委氣明而材良入充坤產之賦如護瑱壁戎監務簡肩隨伯氏相與講釋

於鈎稽之餘允戈和弓森然在目杜武庫萃一門
矣其益砥礪以對寵榮可

太社令魏峻上殿特改宣教郎制

勅具官某朕待天下士靡親疎之間日博士有以
奏篇可采通金閨之籍者矣爾氣和姿整將以儒
雅便殿入對首陳天命人心堅凝之本其味悠然
而長懿戚大家好學喜文良用嘉歎升之京秩仍
司右社顯融易奕懋稱厥家可

王極權發遣順慶府制

勅具官某果山躡於兵厥既收合餘燼還井邑之
聚渙剔蠱安民亡止貼危懷其情者

之爾博習修絜又學為政事吾制臣

謂婉畫居多舉以守果沛平詩書之澤家游泳而
人鼓舞潛藩重矣勉哉行且召可

權刑部侍郎周端朝磨勘轉中大夫制

勅一日無曠董治官之常規三年有成待法從之
令典屬嚴會課特重䟽綸具官某氣莊以舒學博
而約勸露門之講發韞奧於微言紬石室之書沂
源流於絕筆越在司刑之貳久殫弼教之勤爰計
積勞肆陞華級登崇方切豈以日月而為功獻替
有加庶幾夙夜之終譽可

曾庶贈通直郎制

勅具官某猗鹿固爲共蹈之謀養虎必有反噬之患山陽荼毒爾以幕僚死事闔門不免焉念之慘怛追畀陞朝之秩仍錄應門之孤魂而有知歆此殊渥可

國子監丞姚珪除祕書丞制

勅具官某自天聖至嘉祐進士上之三人多至公卿豈惟后稷之穡有相抑豐芑之仁也爾以強立之學輔致遠之器大廷射策名在龜列而安平進朕親政始徠之丞于胄監進丞于中祕盡交瀛洲之彥縱論藏室之書浩乎沛然光明秀傑之望得所封植矣可

軍器監簿吳昌裔除將作監簿制

勅具官某簿皆以糾違鈎墜而匠監視戎監爲高非賢不捷進爾茂於學穎於文而縝於識蜀閬以賢聞結綬登畿諸大夫皆信其賢也擢庀除戎之屬越三日改屬于大匠雖伯氏聯治之嫌實公朝褒進之意鴻漸于干而至于磐於爾乎觀之可

著作郎兼權左司彭方除將作少監兼景獻太子府教授制

勅具官某省闥百司之綱領萬務之機衡劇矣而繕監爲最簡用者以材仕者以志爾學有誠身之功心無交物之累泊乎其遇而不留也頃繇著廷

參我宰掾理明見定優於叢劇顧欲趨簡以養天
爵何志尚之遠耶升班少匠靖共自守宗磐峙秀
往爲我淑艾之宜有餘裕可

江西安撫使陳韓除工部侍郎制

勅朕永懷 阜陵妙選法從越在內服必有獻可
替否之益越在外服必有折衝厭難之勞茲率循
於燕謀庸謹簡於英望具官某懿文而莊栗洵武
而沉雄高山深林卓爾濟時之略秋霜烈日皜乎
徇國之心自蠱動於江閩浸蔓延於嶺海民無寧
處國有隱憂屢勤繡斧之行未息耒耜之警龍遂
尉安渤海令一布而已乎景奔窮追尤來威四馳
而隨定策勳獨茂締眷逾深歌出車以勞還趣韓
奕而入覲班參五正密扈豹尾屬車之塵朝進一
賢坐掃旄頭罕畢之祿究爾論思之韞副予柬注
之懷可

馮邦佐除直祕閣主管潼川路安撫司
公事知瀘州制

勅具官某瀘南控扼六詔爲重鎮頃連以法從宅
乃牧民夷按堵繼之厥選雖艱爾文有英氣政有
卓識蜀士之位表著者亟稱之擢自偏州往殿帥
閫且榮以中祕之直朕於用材可謂超越拘孥之
表矣維昔武侯將有事于中原必深入不毛七年

帝之無後顧之慮也懋展夙韞稱此委可

黎伯登除直寶章閣潼川路提點刑獄

公事兼提舉制

勅具官某民無遠近悉恃部使者爲司命御史爲
朕言東蜀司臬之非材謹擇而亟易之爾靜實充
於內亮達著於外立朝未幾翩然引去累更名郡
櫛垢濯瘼聲稱藉甚出少府之節已晚故寓直寶
奎以賁之周爰咨詢則民情通不畏強禦則吏治
聳惟察惟法其審克之則獄訟平蜀雖萬里夫何
遠之有可

項寅孫除直祕閣權成都府路轉運判

官制

勅具官某魚鳧鰭蠶叢之國邈在參井皇華命使自
江漢差擇而上之庶忘登天之爲難爾以果達之
姿疆乂之志給餉上流旣底厥績就易飛輓之節
駕言西征其氣蓋已狎瞿唐灩澦而旁礪我雪之
表矣吏以不失平爲良民以不取贏爲富邊徼以
不求功爲安知此於將指乎何有可

童頤除直祕閣權發遣夔州兼主管本

路安撫司公事制

勅具官某夔子之國楚蜀衿吭時平急於拊綏有
索人於空扼牧民卸衆必惟其材爾氣豈瑰偉風

采子發畧守齊安能不撓于彊衡陽又以節用愛
人著推之坐鎮三峽鞏護十連不惟刀耕火種之
民懷生而樂業平沙八陣歷歷魚復折衝應變之
略盡在目中矣往哉母憚叱馭可

游九功除祕閣修撰知慶元府兼沿海
制置制

勅具官某四明密拱吳會遙控瀚海制閩重寄間
以法從臨之苟當其材何嫌超授爾涵負之深踐
敷之久要衝鉅鎮隨所至以最聞矧導承密旨熟
聞德意而以中祕論譔莅吾股肱郡辦治易爾雖
然維大家有禮字細民有恩龍鱗魚鹽茲究之出沒
有威靡舛厥施時乃良牧其抵若子訓可

張元簡除湖南路轉運判官兼知鄂州
制

勅具官某季子歸魯廉頗用趙民望素孚則舞纒
於熟路易爲功爾氣壯而材豐識高而論偉曩守
邊壘奮不顧身以衛其民重湖以北莫不想聞其
風采茲駕漕輶往填鄂渚號令未施列城已信其
能福我矣轉輸澄按之餘扶羸飫飢蒐情繕圯使
隱然長城之足恃斯增重於夙望可

何元壽除太府寺丞總領湖廣軍馬錢
糧制

新長官某紹興分建四總今垂百年時有不同
其人則轉難而爲易爾肅括而將以敏暢達而守
以靜試郡並塞不求快意之功厥慮蓋深起守武
昌以漕輓攝軍賦切切於民之瘵國之疚厥慮益
深事惟知其難則易者將至此朕所以就畀餉節
而革之丞郎也信能以仁爲本以智爲制幹盈所
權取子俾挈畚用裕而民不病則予以懌可

林半千除江東路提點刑獄公事制

勅具官某慶曆初謀國者欲漸易監司使澄汰所
部吏以興太平朕采是說於親政之始所易多矣
而一節以度再節以漕三節以憲獨爾之升若操
級然豈非進不_久矩施不失度能以儒術行耶夫
聽獄之道明則不濫恕則不苛敏則不淹爾固無
俟多告察屬吏賢不肖廉濁而勸沮之使江左風
未有聞焉惟汝嘉可

丘岳除淮東路轉運判官兼知真州制

勅具官某國家有事于中原淮民征調勤止必知
其俗者順而拊之庶幾說以先民而忘勞爾淮人
也忠實而無僞精敏而有勇久宦于淮閭閻之休
戚邊瑣之利病瞭然于中朕知其非嘗試者比也
虎符龍節自西徂東科歛思所以紓之繇役思所
司之口糴之害屯田之便思所以罷行之勞蓋

鞭笞之中不失鞠人謀人保居以福一道豈特哉
真之私哉可

平齋文集卷第十九

平齋文集卷第二十

外制四

貴妃賈氏贈三代

故曾祖嗣業太子少保贈太子太保制
勅朕仰觀天樞四星之象俯稽王宮六寢之儀選
名閥以建妃帥列嬪而佐后恩同宰輔秩視公台
推慶系於一門加愍章於三世具官某故曾祖具
官某忠信行乎里孝友著于家源深流長散作滂
葩之潤本固末茂敷爲沛艾之芳宜荷祉於孫曾
遂參華於宮壺肆稽故典茂發潛光升青宮三太
之榮侈黃壤百年之報歆予休渥燕爾後昆可

故曾祖母於氏贈文安郡夫人制

勅古者高禰之祠帶韞而授弓宗廟之服躬桑而獻繭后必以妃參之此朕所以東求淑德陪輔陰教而成王假有家之吉也匪開其先曷昌厥後具官某故曾祖母某氏令儀中度懿行應規教子則朱轡熊軾之榮抱孫則茸纛油幢之重慶垂三葉化應二南宜申拓於脂田用增華於翟茀予非私授爾尚祇歆可

故繼曾祖母於氏贈通義郡夫人制

勅后順承乾元朕既選之貂蟬之裔妃密贊坤德朕必選之筆橐之門顧積慶之有初宜追崇之無斁其官某故繼曾祖母某氏幽閑女則婉婉歸儀承先以于沼于沚之勤垂後以如山如河之懿是鍾邦媛實冠宮嬪汧產嘏之源流衍疏恩之命數易封名壤增賁幽局可

故祖偉太子少傅贈太子太傅制

勅赤城霞起而建標雙闕雲竦而夾路渟涵神秀發越嘉祥地靈人傑之有開德厚流光之可卜具官某故祖具官某材猷雋茂學問精深射策決科蚤登士林之望分符出守晚蹇宦路之華惟所積如江河之源故其傳全川嶽之氣子爲法從孫有賢妃子方正王化之基爾盍進儲室之傳九京可

作百世其昌可

故祖母於氏贈蘄春郡夫人制

勅帝譽建四妃而萬化成虞舜立二妃而四海乂
蓋得正家之道廼凝治國之功茲位亞於軒龍甫
儀新於禴翟肆嘉內德爰獎先徽具官某故祖母
具某氏秉柔嫺之姿履惠和之行閨門視則嫺黨
推尊生也有涯蚤棄采蘋之絜死焉不朽終流芳
荇之芳號既正於小君封更加於大郡優乎如在
其克祗承可

故繼祖母陸氏贈和政郡夫人制

勅唐之昭妃有以恭順稱者有以敏淑稱者雖享
天姿之懿貴原世範之嚴具官某故繼祖母具某
氏步節佩環聲諧琴瑟言言乎勉君子之正翼翼
乎承先祖之恭身無愧於女箴家克貽於嬪則膺
子光寵具乃肅雍紫綬金章既視儀於一品文軒
象服宜追命於重闈益開湯沐之封永燕煮蒿之
祀可

故父涉太子少師贈太子太師制

勅梁傳有孫首被世宗之選膠東生女亦形光武
之思推百世之發祥驗一門之流慶肇新妃掖追
貴親闡具官某故父具官某敵愾精忠折衝遠略
披攘妖祲功成淮泗之郊撫納遺黎恩被淄青之

堯施隆而報必腴積厚而發亦閎象開次北之星
光映遡明之月開睢寤寐思服克參窈窕之求雞
鳴警戒相成更致盈昌之助望孚禁壺澤被私庭
迨東宮師範之尊侈北岳神休之應繩繩蟄蟄尚
克相之可

故母史氏贈太寧郡夫人制

勅葛覃后妃之本必以在父母家志女功之事言
之子得賢妃言動中繩矩母訓豈無自來哉具官
某故母具某氏出韋平之裔歸嚴徐之門熟薰染
於詩書恪步趨於禮法維蛇協夢篤生淑嫕之姿
柔燕上祥均近衆多之杜睠起家之垂慶宜告第
之䟽榮由錫郡封永綏廟食可

桂如璫除川秦都大茶馬制

勅具官某茗出於蜀駟駿來於秦熙寧分職元豐
合之故邇者權牧分而復合爾氣稟溫良治理平
易夔巫之民安其政進嫺閣之直總秦蜀之務興
利除害必有得於熟聞素講者詩曰秉心塞淵騶
牝三千又曰思無疆思馬斯臧精爾心思之運蕃
吾克廐之良魯衛之政且將改聽易視矣往哉母
忽可

高稼知沔州兼利州路提點刑獄公事制

勅具官某汚屏翰梁益而扼秦隴自關堡險阻蕩
析於兵燹連年繕治舊觀猶未還故擇牧尤遴爾
氣度軒豁議論精到周旋閭閻秦蜀如指諸掌朕
方趣之來將有訪也而汚非爾莫固吾圉榮以木
天之直一道臬事併屬之拊循必厚經理必密東
西應援同獎王室必睦小大之獄必以情奉計入
奏有日矣可

陳隆之除直華文閣知興元府兼安撫
制

勅具官某西顧之憂朕未嘗一日忘也制蜀既分
置使副梁以謀帥請得非原堡失其險難於方
面之勲並爾出入兵間而膽略雄往來塞下而幾
籌熟汚雖重孰與梁重進直文奎建屏作牧民生
之未殖者爾集之軍政之未覈者爾飭之邊防之
未密者爾緝之聲援合而彼已無異情志慮公而
内外有實政守固而戰克矣往勿替朕命可

權兵部侍郎陳公益除集英殿修撰知
漳州制

勅荷紫橐而事主儒生之榮擁朱轡以奉親人子
之樂肆升華於論譔庸增重於蕃宣具官某韞篤
實之姿迪中和之度通今博古曾靡事於空言明
善誠身常自安於平進翼翼從塗之列閭閻經幄

之游如慶雲莫能名其祥如時雨不自知其潤屢
抗分符之請勉為紬史之留既上送官爰畀使郡
睠言漳浦近接海雖綠林妖侵之已空而篁竹
驚魂之靡定亟圖綏輯盡息歎愁雅在本朝豈不
念蕭生之志咸知上意正欲觀黃霸之功可

吏部郎中權國子司業王與權除國子
司業制

勅具官某大少司成並置定於隆興朕既得老成
之望為大司成以範多士少司成亦必於士望乎
取之爾經明而行修本固而末茂宜為人師白首
郎潛攝貳成均士翕然胥嚮三學之教法政令非
爾其誰屬夫學校長育人材之地寬以來之必嚴
以導之生徒斤斤皆有法度陽城所以陶冶人心
必有在於記事纂言之外者知此則知樂正后夔
教胄子之意可

樞密院編修官兼右司尤焞除樞密院
檢詳兼右司制

勅具官某宰樞掾軍國之筦彊弱安危出焉淳熙
甲辰乙巳間三邊無塵九扈樂業時則有文儒以
檢詳為右司行其所無事而天下安強蓋爾祖也
去之五十年爾以奇材壯志踐厥官故事便宜家
有遺墨自公退食盡取而閱之以尚論其世豈特

寶魏證之笏哉朕方懼祖武之不克繩故申告可

太府寺簿趙汝謏除樞密院編修官兼
權兵部郎官制

勅具官某刪潤置官隸樞屬爲卑在紹興有若直
臣銓在乾道有若名儒熹能大其官爾拔于公族
名在甲科鞅掌州縣坐閱群飛之刺天而無競心
不旣賢乎朕蒐英獵雋首在選中擢掾宥廷攝郎
武部以貫穿馳騁之材與聞廟畫從容援古誼以
訂邦國之若否所居官大矣毋安於卑而不之勉
可

太常寺簿朱揚祖除樞密院編修官兼

權刑部郎官制

勅具官某八陵隔於腥膻踰百年讎虜燼滅俘來
以圖朕灑涕恭覽慨懷朝謁謀及卿士爾銳於行
犯暑披榛祗欵陵下橋山弓劒儼乎猶昔而嵩洛
之王氣可挹也星言歸奏良尉朕心進編摩於宥
府仍攝事於郎曹姑獎忠勤實階選拔可

羅愚除淮西提舉兼知無爲軍制

勅具官某王師順動科調繁興朕懼淮民之告瘡
亟下詔蠲逋已責毋收今年租非部使者之賢殆
壅吾澤爾名家之雋論事剴切處事精練出守江
城不求有餘於官而慮民之不足田里用乂其以

一節觀風于淮右平爾羅公爾權察州縣吏奉吾
詔不動而厲民者糾逃之人心固則國勢強矣濡
湏斗壘特游刃之餘可

黃朴除著作郎兼權考功郎官徐清叟
著作佐郎兼權司封郎官葉味道著作
佐郎兼權屯田郎官並仍兼崇政殿說
書制

勅具官某元祐初程頤說書崇政范祖禹在著廷
朕登崇峻良思得若人發六經三史之韞爾以魁
壘之彥立于朝如玉在山輝潤虹貫經帷論說全
爲席前承明金馬之遽網羅舊聞採摭前記以

二代之史茲舉以屬爾涵養君德鋪張帝典求
媿於昔賢可也青綾入直又以觀爾之吏能可

校書郎杜幼節除祕書郎兼莊文府教
授制

勅具官某漢藏書麒麟天祿命劉向楊雄典校謂
之中祕書後漢藏之東觀以馬融爲郎惟其稱也
爾深於龍韜豹略之學而進於經尉爲兩科之雋
翺翔冊府摩光奎壁序升以司四部之圖籍且爲
宗藩師疇不謂稱乃若萬里之情三邊之勢討論
餘隙試爲朕孰計之可

趙與勲除太府寺丞余元虞國子監丞

章勸太府寺簿高奎國子監簿制

勅具官某君人在於阜財明道大府掌貢賦之貳
師氏掌教國子不容偏廢也與勲擢秀宗盟首騰
關決之最其爲我丞外府而以吏事通敏能稱其
家之勲爲之簿元虞蜚英膠庠久著敷歷之譽其
爲我丞冑監而以邊畫精練克踐所學之奎爲之
簿夫善政得民財善教得民心其得民雖不同而
同於盡君師之責爾等其各效厥長以助予治可
資政殿學士提舉萬壽觀兼侍讀宣
除資政殿大學士光祿大夫提舉洞霄

官制

勅朕瞻懷元祐登用群賢范鎮以內祠召而辭
馮京以勸讀除而請老維予宿德有昔遺風肆加
進律之恩庸渙告廷之綍具官某體全碩大性韞
端良蚤擅文場盡奪諸儒之氣晚躋政路首參元
化之機國論之可否未明人材之進退未決深沉
籌畫密勿敷陳已究同寅協恭之謀迺抗陳力就
列之誼功成名遂而身退固適雅懷齒宿才壯而
意新每形渴想屬親政柄趣侍經筵遠稽真廟
之命耆儒近法阜陵之尊舊學亟宜強起胡不
果來進祕殿之大名升爭臣之穹秩夷猶故里匿
薄殊庭式昭體貌之隆增重儀刑之舊且酒醴維

醺以祈黃耆豈忘壽俊之思毋金玉爾音而有遐心尚賴遠猶之告可

劉用行除太常寺簿制

勅具官某孔子先簿正祭器寅清禮樂之府簿非冗曹比也爾以凝重之器和平之政久著聲於湖表擢實容臺禮制樂作皆參聽之漢儀雜秦唐舞因隋情文本未必稽其失而糾其違毋徒諉之簿書之末可

宗正寺簿林申差權發遣安吉州制

勅具官某衆賢聚於朝而郡國吏不能皆賢元氣猶未貫也故間擇周行之彦以出守爾博習明經蚤藹時譽翔而後集甫簿正于麟宗吳興闕守輟一賢以惠之漢選博士諫大夫爲守相之意也脩門咫尺轉聞良易勿棘勿弛圖惟厥中可

大理少卿謝奕禮除右文殿修撰主管佑神觀仍奉朝請制

勅具官某本朝家法上軋三代威畷富而貴之不及以政豈特防微杜漸之意示優異也爾晉太傅之懿傳漢長秋之篤友丰神氣度灑然塵表詎容久煩奏讞之冗升班論譔賦廩內祠日奉便朝玉色而山立優且榮矣益厲謙恭之美對敷光大之休可

林應龍轉承直郎制

勅具官某飛錢造幣蜀材孔良灌輸外帑歲有常額爾董裝發應我賞科其進一階益勤勿懈可

戶部侍郎淮東總領岳珂磨勘轉中大
夫制

勅虞廷考百工之績而黜陟行周官計群吏之治而誅賞定茲疇勞於法從宜疏渥於綸言具官某蚤擅長材屢膺煩使控天塹之勢望久著於筭鞭參地官之權班寢高於禁橐閱匪一朝之積課當三歲之遷爰舉彝章式增文秩元豐近臣之品特示寵榮紹興名將之家益殫忠藎可

慈聖太后山陵復土提舉官吳惟德轉
翊衛大夫制

勅慈殿升真渺僊游於少廣茂陵卜祔蠶王氣於橘山廼睠按行之勞特循褒進之典具官某稟姿溫恪莅事精勤北省承休特重遭逢之慶東朝罹變可勝攀慕之悲沂沙麓之慶源相稽山之吉壤龍盤輦勢駟馭妥靈宜陟序於橫階用增華於留務益思謙益祇對恩榮可

叅知政事曾從龍贈三代

故曾祖詳太傅贈太師制

勅朕進

寧考之舊臣懷

昭陵之碩輔修紀綱

於基命宥密之日問政令於同寅協恭之時終定
策于兩朝用垂休乎億世去之幾葉有爾曾孫具
官某故曾祖具官某靈臺湛凝泰宇昭晰忠和孝
友之行悉本諸身詩書禮樂之風遂昌厥後卓犖
倫魁之彥雍容近弼之聯遠泝慶源丕敷愍冊巖
石之瞻師尹蔚爲竈安之光故國之有世臣益介
雲仍之祉可

故祖澄太師衛國公贈魏國公制

勅元受之參則一貫忠恕之學參得之點則浴沂
舞雩之風出雲必自於太山導漾實由於嶠冢不
遡所積曷觀厥成具官某故祖具官某性抱冲和
氣涵磅礴款段下澤風優鄉里之評駟馬高車終
遂門閭之志鍾聞孫而間出參大政以更張爰敷
告第之恩庸侈傳家之慶自天錫羨文公之衛允
臧易地進封畢萬之魏必大營魂儼在寵渥祗歆
可

才人賈氏故伯冲贈迪功郎制

勅具官某氏故伯具某人維邦之媛建閭後庭澤
暨一門厥有令典爾其伯父拱木已陰初品追榮
尚歆殊渥可

才人賈氏故兄承奉郎貫道贈承事郎制

勅具官某氏故兄具官某維邦之媛建閣後庭澤
暨一門厥有令典爾其同氣拱木已陰進秩追榮
尚歆殊渥可

故母弟迪功郎史商卿贈修職郎制

勅具官某氏故母弟具官某維邦之媛建閣後廷
澤暨母黨厥有令典爾其季舅拱木已陰進秩追
榮尚歆殊渥可

趙以夫除江西路提舉常平茶鹽公事

制

勅具官某江右壤接閩粵創殘未補思得賢使者
藥石而梁肉之亟還元氣之舊爾以公族儀儀之

麟周旋外服藉甚有聞輟臨漳之符以便節幸一
道部邑南豐緊乃故治民之情僞俗之良窳皦如
示諸掌咨諏所及精采一變積懋甦醒矣亦惟深
求大學以義為利之意則獲我心可

祕書少監趙汝談除宗正少卿依舊兼

權直學士院制

勅具官某宗正四星在帝座東南漢取象置官以
序九族辟彊德更生遽為之爾學如辟彊行如德
文采議論有更生之風羽儀道山翛然澤醴輝浸
群玉不可得而親踈也維今屬籍蕃衍盛大過劉
氏其為朕莫世繫辨昭穆而陶之信厚以重盤石

之宗視草鑒坡則已試可笑可

袁甫除祕書少監制

勅具官某朕惟五緯聚奎天開離明之運科目取士而異人出焉故親政以來招選魁躔之雋登之政途列之經幄且進之策府爾學傳于家磨礪于師友所造蓋深麾節攸屆旣推詩書之澤浸其民又合秀民佳子弟以義理性命之學啓迪而薰陶之自任以斯道若此參領登瀛宜矣詩曰樂只君子邦家之光其疾驅以副虛佇可

張嗣占右文殿修撰知平江府制

勅具官某漢重三輔唐重四輔闔閭故國吾股肱郡也選任維艱蚤聞前輩之論議孰識昭代之典章而特誘足以濟之龍泉于將鳴匣蓋久用之惟恐不亟北門留鑰雖輟于行屏翰近畿徒得君重其通班于祕殿往宣朕意時和歲豐坻京相望民有漁陽不可支之樂而無新店實強取之苦斯稱厥職可

趙立夫除祕閣修撰樞密副都承旨制

勅具官某天下之勢猶衡朕旣遊東廷彥出長外服必博選民庸入治內服然後無輕重之偏爾頃繇九列觀風近甸聲氣不搖而百蠹戢蓋吏師也孝宣厲精政事樞機周密周貴加詳密貴加謹維

爾老於識而精於慮式遄其歸以譔著中祕參看
廷之道首周密以濟中與其庶矣乎可

朱鑑除大理寺簿林環軍器監簿制

勅具官某等作士而致猾夏之誅獻囚而參獻馘
之禮此致刑諸戎所以分職並命也爾鑑所傳者
正濟以疏通爾環所養者厚守以靜退朕惟兵刑
非二事既命鑑以鈎棘寺之違又命環以稽戎監
之闕能使析楊卽於圜扉戈鋌森於武庫厥職無
不舉矣可

張元簡除直寶文閣知鄂州兼沿江制
置副使制

勅具官某江漢上流而下三制閭相望捍襄拓表
之勢也鄂渚參襄陽金陵之間事權既還責任與
等爾氣盛於折衝謀深於應變而崇論足以發之
廷臣謹謂可當一面寶奎寓直龍節虎符往爲朕
控長江而制勝遠觀三國必爭之形近考中興布
置之略民力汝裕軍實汝充千艘萬弩汝肄墜者
舉惰者奮而隱然老羆當道之足恃乃言底績矣
可

權戶部尚書真德秀除翰林學士知制
誥兼侍讀制

勅天下之動正夫一務興起於群心聖人之情見

乎辭在宣昭於大訓迪惟仁祖有若臣脩朝京
師於甲午之元拜內相於季秋之月其深厚則兩
都之正氣其坦明則三代之遺風登崇若人鼓舞
斯世具官某剛而濟以大和而約之中殫見洽聞
學貫乎百世之上崇論閎議名塞乎兩儀之間
先帝封植以詒謀冲人招徠而訪落甫辭徂直遽
厭論思羔羊素絲五紵每慨懷於正直白駒生芻
一束徒嘉歎於逍遙惟碩果之剥不窮故拔茅之
泰有待少重十連之寄遄歸八座之班屬親攬於
皇綱志中興於帝業予欲山東之聽詔令觀化成
於須臾予欲河西之被璽書驚明見於萬里疇咨
大筆樂得英髦趣躋鼇禁之崇仍侍虎門之邃虞
夏之書渾爾遠追雅奧之風堯舜之道皇方備究
緝熙之益尚圖大任用穆群瞻可

曾穎秀除浙西路提點刑獄公事制

勅具官某畿內部使者諸道取則非識召南甘棠
行露之意不在繡斧之選爾篤學喜脩風裁簡遠
抱夜光而不輕售起之浙右之節行以絜矩之道
貪殘退聽善良吐氣四方將於是乎觀不特徃行
之無冤也矧伯氏陳時臬事于閩其思光華所被
無遠邇之間可

都官郎中傅雍差知嚴州制

勅具官某諫大夫有以直聲著於嘉定初者吾不得而見之思用其子爾謹守家學而有父風不阿不詭安於平進朕始親政事旣起之丞又進之郎顧猶退然以疾辭維爾郡縣最著於江閩久矣嚴陵輔邦姑分符竹少需葵丘之戍以俟疾平朕不汝忘也可

鄒應龍父微贈宣奉大夫制

勅蕝儀世室備殫饗帝之誠肆肯端闡誕布漏泉之澤矧義方之垂慶宜愍與之追榮具官某侃侃德人怡怡善士一真不鑿但知積王之藏萬卷有傳何愛簞金之滿鍾倫魁之雅望通法從之宵旌嚴父之禮旣成顯親之恩可後蕭零湛露特升一列之華木撼悲風尚吐九原之氣可

葉宰直華文閣知泉州制

勅具官某朕嘉與海內更始疇昔庶士御事淫朋比德者退之有爲有猷有守者進之而內外肅爾以直簡之器明通之識列在烏府幹棄周鼎而寶康瓠時論日陂乃能不爲咸股之隨有識韙之泉七閩望郡且筦琛航凋憊久而未甦爾其以奎直起家熟思振刷之方挽回富庶之舊用稱簡拔可

陳舜臣湖北提點刑獄公事林演提舉
湖北路常平茶鹽公事制

勅具官某等禹貢田賦定於雲土夢作乂之後召
南獄訟息於美化行乎江漢之餘今荆楚境也故
出節而分遣爾舜臣以詳練之材治邑管遠民安
之司庾湖右就進憲節明刑弼教必能使江漢皆
善俗爾演以平易之政治景陵人有去思易麾安
陸亟進庾節推利予民必能使雲夢無橫歛夫監
司賢則郡守賢郡守賢則縣令賢轉移習俗當自
身始保護風寒亦惟本固往懋哉可

桂萬榮直寶章閣知常德府彭方直祕
閣知袁州制

勅具官某等汲黯顧出入禁闥蕭望之雅意本朝
士以華近爲榮自昔然也而吾望郎如萬榮名監
少如方顧牽聯以外庸請豈朕待賢之道有未至
耶抑賢者體國無內外之間也武陵統乎澧辰沅
靖宜春介乎潭洪贛吉其俗皆易治而難服爾萬
榮子職往守武陵爾方子職往守宜春寬以字之
靜以鎮之異壤而同治矣朕將於此乎選表可

留元剛轉中大夫直寶文閣致仕制

勅具官某唐以博學宏詞設科裴度陸贄李絳杜
黃裳繇此途選今其蜚聲是科者皆列在禁近惜
一賢之不及見也爾學該七略文成一家先朝以
殊科擢真柱下史未爲不遇而留滯周南抑何久

耶未衰告老宜實僅秀進之華秩仍直寶奎以寄
賢雋之思尚祇休渥可

權刑部尚書李臺除權禮部尚書兼侍
讀制

勅義易之定民志莫先乎乾坤衣裳禹範之叙彝
倫莫大乎威福玉食朕收還八柄扶立三綱堂陛
之分既嚴鼎呂之勢斯重爲國以禮待人而行具
官某氣清而神腴齒宿而意壯齋淪其學瞿唐三
峽之深紆餘其文邛邛九折之峻自夾螭而振武
屢鳴鳳以蜚聲去不可留用然後見油幢中立坐
息江湖之波茸蘂外馳盡收我雪之侵茂賢勞而
不伐堅初志以善藏玩世何求際時乃出渴大老
之入見促便朝之給扶中庸九經所陳者天下國
家之道丘索五典所讀者上世帝王之書嘉德義
之可尊知文獻之足證擢繇司寇進攝春官以正
名爲衛之先以秉禮爲魯之本豈止九賓之臚句
群臣無敢誼譁抑令三輔之威儀老吏或至垂泣
乃若石室太史之業金華師氏之功具罄英猷奚
煩多訓可

禮部尚書陳卓除吏部尚書兼給事中
兼侍讀制

勅朕仰惟

孝廟夙重天官妙選於乾道淳熙之

間豈一二士真除於俊卿必大之後纔三數人矧
趨瑣闥之嚴仍侍露門之邃輯茲茂渥屬我耆儒
具官某玉粹而春和霜明而秋潔代言爾雅蔚乎
廊廟之文批勅森嚴屹然社稷之器久周旋於禁
橐日密勿於宸旒望之則祥麟威鳳之在廷親之
則天球洪璧之照几簡知惟舊鄉用采深瞻遵晦
於十年甫厲精於期月內閑請謁旣絕側門敕授
之風外杜營求盡革都堂唱注之弊猶慮三銓之
法未精九等之材疇庸儀曹冠序選部以水鏡之
清而洗世道之濁以衡石之公而遏物情之私品
藻之鑒旣高論思之望逾重帥屬掌治朕方思周
公六典之規知人安民爾盍究臯陶九德之訓祇
承眷倚懋對儀圖可

崔福轉兩官制

勅具官某邊城讎保虜將火攻烈焰駕風危檣飛
燼受降旣久論賞可稽峻陟武階力圖忠報可

故通直郎游九言特贈直龍圖閣制

勅具官某洙泗之傳爲伊洛伊洛之傳爲建之熹
潭之棧得其學者皆能著見於世爾天姿敏強博
極群書而質疑就正於二子體之心驗之身且推
之民其學進乎成矣習僞有禁秉德不回棄通籍
而抱遺經賁志黃壤朕聞而嘉之義圖寓直表厲

節介光明芬郁於百世者未嘗沒也可

葉奭除宗學博士金淵國子博士戚士
遜太學博士袁商武學博士兼魏惠獻
王府教授制

勅具官某等漢重師法淄川濟南齊魯燕趙之學
皆以專門名家爲博士或變其師說雖衆薦不得
與厥選蓋精爾奭直而方有折角之風爾淵莊而
靜有下帷之志爾士遜明而整五業並授爾商端
而絜諸家兼通其學悉有師法茲進奭于宗庠進
淵士遜于上庠進商于右庠仍範我麟定各推所
蘊招諸生立堂下誨以仁義道德性命之歸正學
有傳矣可

將作監簿劉克莊除宗正寺簿制

勅具官某鶴鳴于九臯聲聞于天士抱負足以鳴
於世雖迹隱未有不達於朕聽者爾學有源文有
度歛芒鏟采不與韋布角進而英聲發越不容拚
朕夙有聞焉瑤牒屬籍與慶系僊源圖譜纂輯于
司宗天近地嚴有列其中者皆名儒咨爾往簿正
之途轍清矣益養其聲之所自出以鳴國家之盛
可

戴朮宗學諭何處恬太學正馮去疾太
學錄王萬國子錄制

勅具官某等士始進于朝而優游詩書之林饜飫道德之海不其榮乎爾杰之溫明雅有風致爾處恬之沉厚蔚有典刑爾去疾之雋邁遠有志槩爾萬之純茂深有韞藉其學皆可爲人師杰往諭宗庠處恬去疾萬往正錄成均進之始也大學始教皮弁祭菜宵雅肄三知此則知立教之本可

顏頤仲司農寺丞魏峻軍器監簿制

勅具官某三代盛時因井田以制軍賦廼積廼倉與干戈戚揚非二事也農寺戎監故並建屬爾頤仲抱材通敏治郡可紀其歸以丞治粟之司爾峻賦姿爽亮立朝可觀其進以簿儲戎之府太倉武

庫雖異厥職農以養兵兵以衛農尚於斯有考可

韓濤除太社令制

勅具官某司社置官紹興中首命臣彥直爲之蓋以光寵勲將之家爾同出一門克紹弓冶庀職漕幕能寡悔尤茲故命之世厥官知寅直之難秉而輕肥之易縱則亢厥官矣可

史宜之直龍圖閣致仕制

勅具官某維昔兩朝元輔之猶子宜之均佚釐館以謝事告亡幾何台星亦坼朕念之怛然爾敷歷四十餘年業行在州里政理在郡國人能誦之胡遽止於斯也華屋山丘恍其昨夢淵圖進直尚

服恩榮可

王陸轉承節郎制

勅具官某造幣之楮來自蜀道爾督綱程靡有稽失進秩一等用酬勞瘁可

同鼎武節郎來伯友武翼郎王聞顯武節大夫呼延賞武翼郎制

勅具官某等漢開降者封賞之科唐著異域歸忠之傳爾委身主國效力邊城疊二秩以升華肩一心而圖報可

張震雷張萬取並補承信郎制

勅具某人等武舉以郭子儀重爾兄弟講磨兵略外省聯登屬邊關之贊籌阻萬里之入對悉授初品開之榮途其相勉以功名見可

史彌鞏轉朝散郎高不儔轉奉議郎制

勅具官某筦權國計所關羨利必賞爾庀職京口克懋厥官歲入有常能溢其額俾進升於一列庸獎厲於勞能可

不儔改京口為畿內

高平郡夫人毛氏進封和國夫人制

勅明德伏波之女自蘭發祥和熹太傅之孫由陰毓瑞睠慶源之特異宜寵數之增隆具官某氏性行金相容儀玉度河山稟粹嬪于相國之門江漢流徽鍾我倪天之妹篤禕衣之致養侈象服之䟽

榮號既正於小君秩更加於大國祗膺休渥茂介耆齡可

楊恢除直徽猷閣權知襄陽府京西安撫副使制

勅具官某西清邃閣列聖圖訓在焉寓直其間非積望之舊效績之新不輕昇躋級而升尤爲異數爾擷岷峩之秀吞雲夢之雄進牧京襄坐控許洛文奎峻直越三等而上之蓋以方面之勲望爾非徒以華爾也矧徽猷實維哲廟寶儲遐想俘獲鬼章青宜結之盛尚起壯志可

彭鉉廣東路提點刑獄公事石孝寧廣

東路轉運判官制

勅具官某等五嶺之東官以征粟鬻醪牟利民一疏食不獲安或怵於無聊而動朕甚憫焉爾孝淳守曲江無苛政旣出節以推平反之惠就畀外計坐軫賦與爾鉉守南安有善譽甫增秩以獎中和之最趣攬儒轡往司祥刑其踐實同好整同熟於治理又同觀省民瘼廉訪吏茲相與布宣詔條如朕臨遣毋使遠方重蘇洵刺史又抑之歎也可

陳畏浙東路提點刑獄公事制

勅具官某泰與否相爲消長疇昔人材排根於檢人耳目之官者朕悉起諸家食用之不遐遺爾豈

身而廉端方而靜中外之譽俱高贊萊施以盈室
判獨離而不服宜險德之莫容也錯枉舉直公道
是張左制鄉部亟爲朕起衣繡而畫行獄讞之亭
吏治之澄惟爾風力之凝可

平齋文集卷第二十

平齋文集卷第二十一

外制五

司農寺丞陶木除大宗正丞制

勅具官某宗正以卿少丞簿聯事合治大宗正獨
置丞簡且嚴乎爾融明而凝重有韞而不裸論奏
亶亶切於爲民旣俾丞大農矣重惟明德睦族之
意非賢莫宣故亟進之以丞大宗尚書郎之選於
此乎儲勉佐乃長母以再轉爲淹也可

權兵部尚書史嵩之除寶章閣直學士
宮觀制

然封萬里之侯不足以敵過庭之榮佩六國之印

不足以易戲綵之樂方枘柱之還役乃式微之賦
歸具官某蚤奮儒科浸躋朝列牧民御衆擁漢水
之駢旌舍爵策勲佩甘泉之紫橐雖向日之云切
顧望雲之抑深願爲返哺之鳥退奉閑居之燕重
違雅志俾領真游以西清嚴邃之聯致南陔怡愉
之養石舊之教素謹諒亟下於里門子牟之心常
存尚毋忘於魏闕可

林楷特轉朝議大夫直敷文閣致仕制
勅具官某情莫切於閔勞恩莫厚於崇卒廼者赤
子嘯兵三衢朕爲之內夜不安枕爾以公平廉靜
選拔出守雒鉏稂莠不遺餘力廩廩向還定矣而
病以革告天胡奪之亟耶進官一列升職四等用
書爾樞尚克知歆可

趙范除龍圖閣學士京湖制置大使兼
知襄陽府制

勅仲淹守慶州而純粹踵其成規世衡築青澗而
种諤保其遺績繫戟纛燾交輝之盛實衣冠奕葉之
榮具官某望壓江淮志吞河洛前茅後勁不虞街
亭節度之違左橐右鞬益募金城圖略之上獨差
彊於人意常簡在於朕心睠上流形勢之雄有乃
考威名之著闕如虢虎賢於長城爾嘗從士燮之
心廉頗之用趙士冠西清之邃職護

上門
元農扶杖以歡迎喜談舊事宿將帕
紅而上謹誓立新功惟寡欲可以全剛惟集思可
以廣益惟多筭可以制敵惟不殺可以結人守果
見於有餘攻奚憂於不足功名未艾何止復鴈門
之踦機會無窮正可奮澠池之翼勉揚先烈用荅
殊知可

史洽轉奉直大夫制

勅具官某間者韃犯信陽略雲夢轉黃陂而薄浮
光虐燄蓋烈烈也爾爲守將能識事機亟調貔貅
奮前迎擊賊虓氣而宵遁可謂敏則有功矣一歲
三階實爲異數賞無倖得其懋承之可

孟點鄧泳各轉一官制

勅具官某等唐鄧息蔡復歸版圖雖發縱之有人
亦莫府之交助爾能知體國不憚從戎効婉畫於
郾城贊成功於峴首特升一級用獎賢勞可

樓昉贈直龍圖閣制

勅具官某士君子存心養性以事天天壽不貳以
立命豈計一時之屈伸哉爾淹貫而有歸正固而
不撓蓋深於道者立朝莅郡聲稱甚茂并雖滌而
可汲需見險而竟止此心不失其本然之天則命
自我立宜區區者之不能縻也王通氏抱太平之
策以歿房杜諸賢卒用之以昌正觀之治道安有

終屈而不伸耶。裁圖邃直，仍錄遺孤拱木。九京尚其可作可。

李道傳贈直龍圖閣制

勅具官某：學以見道爲難，苟有見乎道，則形而爲實踐，發而爲正論，推而爲美政，無異源也。爾以蜀莊之珍，薦清廟之璧，踐履也，方議論也，剛政事也。昌非漸平師友之澤，洞乎聖賢之奧，殆將委厥美以從俗，蘭芷變而不芳矣。西風寥碧，駟虬獨遠，跂予望之，惜不我遇。奎躔峻直，且表其孤，以一時之屈易百世之伸，爾尚奚憾可。

胡夢昱贈朝奉郎制

勅具官某：朕訪落伊始，首下詔來，謹直蓋與諫鼓謗木同意，以直言求人，而以直言罪之，豈朕心哉。爾風裁峭潔，志槩激壯，繇廷尉平上書，公車言人之所難言，方嘉貫日之忠，已墮偃月之計，問途胥口，訪事瀧頭，曾無幾微見於面，何氣節之烈也。仁祖能全介於遠謫之餘，孝祖能拔銓於投荒之後，撫今懷往，魂不可招，潦霧墮鳶，悲悔何及。陟階貲外，仍官厥子，用旌折檻之直，且識投杆之過，爾雖死，可不朽矣可。

徐瑄贈集英殿修撰制

勅具官某：舍生而取義，殺身以成仁，惟剛者能之。

爾燭理明植志果屢躓而氣愈勁晚治廷尉獄休
之風旨不移壓之禍福不折据經訂律反覆開陳
寧以一身試不測之淵而不忍以根連株送之命
資其身委蛇炎瘴其甘如飴非所謂剛者乎唐司
刑有功守死明道不阿旨詭辭以求苟免吾於爾
見之追榮論譔仍錄遺孤英魂如在尚知未有久
而不定之天也可

陳宓贈直龍圖閣制

勅具官某 列聖以隆寬大公涵養天下敢言之
氣故雖世道波靡必有巍然自見折茲萌而扶正
論者爾風猷名相之裔學問諸老之傳剛行出政
具有源委嘉定一疏朝陽獨鳴於萬喙皆瘖之頃
儉壬褫魄而不敢肆頑鄙洒心而思自立何其偉
也分符畀節挽之莫回樂道著書死而後已砥柱
斯世之功甚大進直淵圖仍獎厥子泉局有知其
識予恨不同時之意可

張栻中奉大夫致仕制

勅具官某岷峨多奇士朕弓旌下招絃網略盡其
不克忍死以湏更化則囿於命爾抱材翹雋蘊識
超邁分教眉山適遭蜀變慷慨灑涕不草賀偽之
表志節立矣入儀班著出最麾節方將滂洋厥施
以盈科之後何返壑之速耶萬里蒐賢于嗟靡及

一階告第冥漠知榮可

楊必復贈朝請大夫制

勅具官某聖人有金城以守固扞敵之臣能死城郭封疆也爾棄障文南不虞潰卒之涉境挺身諭告期革鷄音雖披赤心竟蹈白刃望風棄郡紱而逃者宜知媿矣優加愍典超進華階仍俾世延用旌死節可

尤元龍贈通直郎制

勅具官某尉以警捕為職盜發三衢爾能躬帥刀嬰其鋒而死之職不曠矣官之升朝仍錄厥孤尚紓九泉之悲可

趙與貌贈奉議郎制

勅具官某韎韜頃為不道犯我應山爾以戶曹攝邑寄勇於徇國率厲戍卒輿臺迎擊之雖死於寡不勝衆而氣吞此虜矣旌之華秩用尉忠魄可

宋昭遠贈通直郎制

勅具官某鹽城之役飛芻走粟以餉師亦既勞止又轉致于山陽宜爾馬瘡僕痛而卒於行也官以升朝知予閔恤可

吳淵轉朝奉大夫制

勅具官某漢堯鹽鐵有官唐權茶有使利源出於東南為多均通得宜經費用裕爾以儒術飾吏事

以宰士贊邦計提綱筦樞有條不紊一歲之入沛
乎其贏既應懋賞之科且進正郎之秩毋忘體國
用對恩華可

趙必灋轉承議郎制

勅具官某虜保陟山王師進討調度旁午陸運尤
艱爾贊畫於計臺備宣勞於供億進升一列益礪
廉勤可

王子申落致仕除刑部郎中制

勅具官某韓厥既老而稟政留侯道引不食穀而
強起材足以爲斯世用詎容得謝爾操尚渾厚風
致簡遠郡國選表再召再辭遂以垂車請輻巾林
壑獨立氛壻之表固泊乎世味矣朕訪西華人物
於朝謂爾年耆德明精神猶未衰懷香憲部勉爲
一來霜峽放舟使觀者知朕能致華髮於萬里顧
不遑歟可

趙希昔除工部郎官制

勅具官某朕日御便朝與二三大臣妙柬四方之
雋又登崇之廼睠西顧有公姓之老在爾秉心靜
夷制行縝栗聲問蚤穎擢于政事之科晚守東川
材益練政益美捐有餘以紓征調之迫家誦而人
德之卷懷滋久宿望猶鬱握蘭起部宜不俟駕蜀
之邊防軍實民賦吏治爾平日講之蓋熟朕將修

輦過郎舍故事而問焉可

辛稹潼川府路提點刑獄趙希濬夔州
路提點刑獄張起艮成都府路提點刑
獄公事制

勅具官某等東井法令所取平參下三星曰罰主
斬艾分節司憲於參旗井絡之分加遴惟均爾稹
世傳威望身佩材名直指夔巫姦宄屏息其進以
典東川之獄爾希濬氣稟篤厚政術寬平共理眉
山田里熙豫其升以司巴峽之臬爾起艮吏事詳
敏邊籌精練出入制幙多所毗益其擢以亭西州
之讞在易賁無敢折獄豐折獄致刑噬嗑明罰勅
汪皆有離象取其外剛而內明也然無慾者必剛
無私者必明爾等果能以明用剛則數道之間吏
之不良民之無告悉瞭乎目擊矣欽哉毋謂君門
萬里之遠可

汪之強歿於王事特贈朝奉郎與一子
恩澤制

勅具官某魯誅責父漢錄孤兒閔死事也爾庀職
淮幙密參機籌變起倉卒父子併命聞者悲傷之
進官一等澤及遺孤營魂有知可無銜憾可

楊伯雨除夔州路轉運判官制

勅具官某四蜀財計莫豐於大寧鹽筴之入數十

年來漕臣以羨餘濟苞苴囊橐無遺利矣朕欲變而通之故謹擇所使爾材甚穎政甚練可使治其職也一節起家六轡督餉擁牢盆之富運筭鞭之長輕車峻阪夫誰能禦然民力竭矣盍思所以裕之軍餉棘矣盍思所以濟之利源無壅上下阜通朕蓋於此乎課爾之廉能可

王翔除直祕閣利州路轉運判官兼知利州制

勅具官某寧武控梁蔽益夙號重鎮故必以漕兼守而制閩亦於此立莫府今閩外之制移梁閩內之制還益漕守滋重爾材茂而識遠志堅而慮密隴蜀山川之形勢兵民之便宜歷歷在目中玉節銅符采衆譽而併屬且木天寓直以華之委寄隆矣夫邊儲軍實以厚民爲本農桑勸則食貨通田里安則保障固祁山斜谷之運與中和樂職之詠實相表裏爾其懋圖之可

黎伯登除直華文閣知潼川府制

勅具官某實材用則天下治堯舜三代循吏之効惟其務實不務名也爾莊靜不褻而篤求己之學廉直無華而堅爲民之意自去周行屢牧壯郡朝梳夕紀不遺餘力用能害除而利興非善美充實之發耶甫出憲節隨昇藩符進以鵷閣之直維東

梓地鉅望隆疇昔聞以衮舄望橐臨之非偏郡比
布吾實德行爾實政使民被實惠選表有日矣可
國子錄汪之道除諸王宮大小學教授
制
勅具官某朕寤寐雋髦以起治功日輪百執事入
對便朝求其通達如賈誼懇到如陸贄未多見也
爾茹古而涵今弼中而彪外頃敷奏以言慷慨英
發作興天下之勢鼓舞天下之材纏纏有契於心
朕甚奇之措模河間東平之系陶冶成人小子之
質姑爲朕往起視六合周覽群動朕方思所以訪
爾者可

大理寺丞趙蕤除司農寺丞制

勅具官某師行日費千金石城非粟莫守漢大將
軍票騎之出所以必取給於大農也爾居家有孝
謹之行治郡有廉靜之譽立朝有深遠之識甫承
棘廷又承農扈夫豈輕進爾哉仲季分閫淮襄日
講立武足兵之略一歲錢穀出入使爾與聞則軍
國之調度供億填篋交應矣且以示獎拔之權與
可

趙崇濤直祕閣知遂寧府制

勅具官某沂夔萬而陸走穹山複嶺虎兕出沒涉
武信乃趨夷良疇沃壘桑稻彌望坤維樂土也必

填之良吏爾以信厚之質邁往之材行平易之政
將指已變漕輸阜通而民不病可謂良矣寓直中
祕殿我巨屏旁制于四郡恩威兼濟辦治無難然
元祐諸賢邦有遺像尚求聞於往行用康保民以
表于蜀可

李鈞差知嘉定府制

勅具官某捷爲古夜郎國漢定西南夷與沈黎俱
置郡而地望負出黎上迨爲潜藩又加重爾璵璠
其質豫章其材故家之最良也試郡于黎疚心邊
瑣所陳便民事宜懇切而詳明知必良于政易鎮
捷爲昭示獎擢體予不忘遠之意懋爾有常吉之
行恩信並著民夷胥安則所至可紀矣可

李良孫知隆慶府李仲熊知紹慶府制

勅具官某等劔門北扼棧道黔陽南控溪洞皆要
藩也亦皆潜藩也守不輕授爾良孫以敏劭之姿
著關決之譽就擁劔麾駕輕車於熟路爾仲熊以
駿邁之器養融顯之望趣縮黔紱發利刃於新硎
孟子曰固國不以山谿之險險雖天設必以人固
爾能虔奉吾詔養民也惠使民也義則人心隱然
可恃如金湯往哉毋忽可

劉竑之改知重慶府制

勅具官某蜀有蒼壽雋直節著於慶元高風振於

嘉定落落乎其不苟合朕聞而賢之爾其季子也
力學而脩潔抱材而謙粹雍容氣度酷似厥考方
需偏壘趣典名藩超等而授人不謂過而喜古渝
之得賢守家法可想也益懋中和之治用昌詩禮
之業可

李景翔和羅賞轉朝議大夫致仕制

勅具官某李惺平羅之法百世可行也居是邦而
習其俗則雖多易辦爾總蜀賦而歸優游家食以
富於才任我羅事年豐價平農固樂市積數踰億
能無勞乎躡升元士之級尚知告老之榮可

陳一薦屯田和羅賞轉承議郎制

勅具官某羊祜墾田於襄陽至有十年之積豈一
手足之力哉爾材高莫府職涖耕屯當危機交急
之秋收平時勸課之効迄充兵廩用濟邊功進升
一級之華益懋方來之績可

歸順周岳補武功郎遙郡刺史淮東兵
馬鈐轄制

勅具官某胸山東峙密邇淮浦挈城歸誼爾實倡
之莫非王臣超昇武級仍躋榮於遙刺俾參領於
戎鈐祗服異恩勉殫忠力可

李敏補修武郎制

勅具官某虜情叵測以間為奇爾戍安豐深察情

偽不為利誘仍效戰多超授武階用旌知義可

蒲南強落致仕差知茂州制

勅具官某自祚以東北并駝為大茂其地也六夷
七羌九蠻錯處之俗猶有遺者置守必廉靜爾廉
而介於守靜而恬於進踐敷可紀蜀士共推之詎
容以據鞍矍鑠掛神武之冠耶起之里居住鎮汶
水化浹于襁褓風行于旃毳不待按籌邊之圖而
遐徼莫枕矣其毋徒以遺榮為高可

楊恢除直寶文閣淮西制置副使兼知
黃州制

勅具官某弈莫先於審局布勢取勢多則勝局也

江淮表裏分置制閫亦然爾乘塞於均宅牧於荆
進屯於襄撫機應變之材愈出而不窮維時淮右
風寒最切而齊安據山川之會峻直寶奎參領閫
寄往為朕守中襄鄂昇揚而立首尾聯絡非取勢
獨多乎江漢之詩曰匪安匪舒淮夷來鋪又曰經
營四方告成于王淮服底寧則四方可經營也內
繕諸關外嚴列戍懷來新氓綏定故境朕方倚重
於汝懋哉可

工部侍郎知建康府陳韓明堂加恩制

勅朕蒐儀先甲歲祀上辛賦思齊之詩慕親方切
稽我將之頌饗帝尤嚴恍三靈之宴娛道百祿之

來下有懷時彥宜錫神釐具官某學擅名儒望高
法從翰圉膽略吞青海於習中磅礴威名碎黑山
於掌上廼瞻明禋之講沆臻熙事之成雖阻清廟
之執籩靡忘宣室之前席爵爰升於蒲壁戶仍衍
於畚圭帝命式于九圍朕既荷受球之寵天威不
違咫尺爾毋忘拜胙之恭懋暢英猷對敷景況可
虞孝先特轉一官授朝奉大夫制

陳亞卿知德慶府制

勅具官某古康名藩也邈在嶺海之東必習其風
土諳其俗者爲之守爾裕於材諳敏於事功自筮
仕至試郡扶胥黃木之間熟知津矣藹勞能之可
紀鬱瓊韞之未究起家分符往鎮瀧水其爲朕布
宣寬大之意簡賦平刑以惠遠民可

牛大年以子病乞祠除直敷文閣主管
建康府崇禧觀制

勅具官某立朝而引去握節而賦歸殆不以富貴
利達入其心者歟爾玉雪其廉明準繩其平直卓
有立於斯世晚繇蜀道入儀郎省步武寢華矣而

出駕四牡列城聳動顧浩然有歸志何耶父母惟其疾之憂天性之愛也爾以子諗朕重違之進班穹閣均佚釐館非朕之不汝以也尚培高風用礪頽俗可

曾治鳳除直徽猷閣知建寧府制

勅具官某閩粵接壤比歲黔首失職相挺而動亦既底定矣推吾德意燠寒飫飢以遂其欲安欲壽之情在賢牧守爾器識邃明材猷通亮所至以最稱宅牧番禺恩信茂著一道晏然沉析建安鉅屏號稱難治其進直奎躔易地填綏之爾知閩之俗與粵近則變友柔克彊弗友剛克何往非美政哉可

沈安義辟差知宜州制

勅具官某廣右郡二十餘或繚而深控蠻而枕海守慮人器之不相習也故委重於臺閩之辟爾賦材彊敏抗志駿偉貳政長沙綽有佳譽辟函上於公車謂宜方闕守奉詔條以撫遐嶠莫如汝稱往哉毋鄙遠其俗而同其戚休山暘溪獠咸知德意是爲舉能其官可

鄧雲特轉武略大夫制

勅具官某功之多者賞必厚爾江右捕盜山陽討虜皆以功受賞崗門鹽城又著奇功信能迪果毅

矣躡進穹級參護戎旅毋玩寵榮而忘賈勇可

留子邁救荒推賞轉朝奉大夫依舊潭

州通判制

勅具官某救荒無定法得其人則政舉爾試邑衡陽再講荒政既脫民於溝瘠又儲粟為先備朕惠養元元之意庶幾下達矣升秩正郎貳政大府益進民庸惟勤惟恭可

王燭轉朝奉郎致仕制

勅具官某官至貧外郎則賞延于世必年勞乃克轉爾飭已無玷莅官有聲方諗疾以少休遽遺榮而長往肆疇前績式進華階燕爾後昆服予異渥

可

章謙亨除京西路提舉常平茶鹽公事

制

勅具官某朕選拔四方譽俊布列中外苟當其材用之惟恐不亟縱騁景靡過都歷塊乃見齧膝乘旦之良也爾業履正平材氣駿發能不墜其家聲擢繇轄院趣守壯藩未合竹符趣畀英蕩蓋欲及精銳而用之維京右民力憊而未甦財計屈而未裕出納歛散權之以義而行以仁惟爾之能可

勅具
淮東路兵馬鈐轄桑青轉武功大夫制
于台之役大小三十七戰而城降士用

命也。上功謂爾勇鷙而敢戰，宜受醲賞。峻躋武級，統成惟揚，報國赤心，更觀來効，可。

趙彥覃除直寶謨閣權知廣州兼廣東路經略安撫制

勅具官某：自唐以來，殿南服者，能使海嶺之陬，既足，既濡，幾何人？故宅牧必謹，爾嚴於治己而不絕物，切於愛民而不近名。公族之英吏之良也，起乘蜀傳，昇治節，刀布之利，方興。番禺課帥又輟以往，爲官擇人，奚嫌數易？夫貪泉不能汙夷，齊之操固也。以身爲表，州縣吏聞風皆趨於精白，則遵海而南，斯民安必樂業如中州矣。朕蓋以廉頑立懦，而望汝可。

翰林學士真德秀磨勘轉中大天制

勅用儒無敵，奚拘考績之科？彰德有常，可後懋官之典。矧承暉於蓮炬，盍疏寵於芝綸。具官某：學富而文醇，行方而言正。孟氏舍齊而去，昔豈本心？季子爲魯而來，今維衆望。冠鑾坡而視草，列擅厦以侍言。展也開陳，隱然裨益。雖時行或異於時止，而歲會悉歸於歲成。稽課簿之既高，陟文階之宜峻。食舊德從上古也，政資密勿之規。有好爵與爾靡之懋，對便蕃之渥可。

頁容孫改差知順慶府制

才
力果山朕潜藩也睠焉西顧未有以慰其
父兄子弟思得良二千石以惠之爾材猷之偉事
功之敏能稱其家者分符蜀道亦既鼓枻三峽易
文以果地益大寄益重疲氓凋俗元氣未固視其
戚休爲朕風披而雨濡之使物物皆生意澤庶乎
不下壅矣往哉盡乃心可

李以制除大理寺丞趙師楷太府寺丞
衛洙大理寺簿魏峻太府寺簿制

勅具官某文帝明習國家事首以決獄錢穀爲問
仁儉一念之發也朕此意每於分職授任見之以
制學業粹明心術平厚勾稽棘猷惟允故進之以

丞廷尉洙莊靜有守寬衷無競則擢繇司匭爲之
簿師楷宗枝秀穎吏能通暢討論外計蓋熟故來
之以丞外府峻風規嫻整志尚簡遠則輟繇儲戎
爲之簿獄者生民之司命財者天下之血脉朕甚
重焉爾等惟良折獄而不留獄惟正理財而不傷
財斯副體仁行儉之意可

朝謁八陵朱復之除軍器監主簿制

勅具官某紹興間燾士儂朝八陵之後今且百年
朕祇承聖緒慨想中原未嘗不望嵩洛而灑涕龍
庭
倚山歛壻分道展省爾弗憚行駿極之勢
氣如故歸陳梗槩若指諸掌克尉不

復之良勞俾勾稽于戎監習中兵甲
筆牙尚於此培致遠之器可

天水軍教授權知軍州曹友聞特轉承
事郎權知天水軍事制

勅具官某矯矯虎臣在泮猷猷此風無傳久矣爾
奮迹詩書典教邊壘冠至不爲先去之謀見義乃
有必爲之勇迎鋒鏖擊蜀關以寧儒而知兵良用
嘉歎趣升京秩仍進一階就分保障之符增壯金
湯之勢可

吳駟特轉武經郎制

勅具官某毅將中軍漆爲之佐贊籌幙府每難其

材爾從元戎備殫婉畫躋榮一列毋替忠勞可

城固縣尉趙僕特轉儒林郎制

勅具官某尉黃綬卑秩也苟志事功必露囊顙爾
警于邊瑣克贊戎旃進秩旌能益勤勿懈可

武功大夫湯孝信轉右武大夫制

勅繁纓不如多邑弊袴必待有功况品級超越于
拘攣之表具官某抱姿梟勇屢効戰多都梁之役
接近比以祈醲賞雖礙止法亦進橫階予豈爾私
蓋以勸忠勞也懋建舟師之績仰酬異等之恩可
川秦都大茶馬桂如琥除戶部員外郎

制

勅具官某尚書郎非民庸暴白不授矧地官之屬
建高而劇可輕乎爾將漕于變就建帥閫不苛急
以牟利不矯異以干名刀耕火種之民悉安之朕
惟推牧畀節以示獎厲孰與入奏明光之爲密式
遘其歸贊我邦計凋窮若何而裕煩冗若何而節
幣輕物重若何而權推此類具言之用觀爾韞可
吳昌裔除太常寺簿鄭逢辰將作監簿

制

勅具官某等朕惟湯執中立賢無方故待天下之
材未嘗以進士世家爲輕重爾昌裔氣明而文富
所謂江漢炳靈曄曄其秀者爾逢辰志立而器整
所謂臺閣之儀不習自成者朕知其皆蘄然而角
陞昌裔于奉常以訂禮登逢辰于匠監以信度塗
轍相望而簿正等臺萊杞梓盡在封植中其競厥
職以對蒐拔可

陳瑄授中奉大夫直敷文閣宮觀制

勅具官某朕親攬八柄進退百辟以成調瑟之化
苟爵於先甲當其材則申命之爾澹乎無慾凝乎
有度藹乎聲稱江右繡斧之行雖未竟乃功亦旣
勞止增秩進職於更化之前今不與易也真祠均
佚善刀而藏時方急材尚觀新硎之發可

中奉大夫趙善璫轉一官回授本土父

不卞贈承事郎制

勃松栢不生於培塿而梧桐生於朝陽士君子可忘其本哉具官某故本生父某秀挹天潢評高月旦是生賢息出繼同支屬進秩以旌能願貤恩而報本爰加愍典用慰孝思顯親揚名之榮衣被九原矣尚歆承之無斁可

中奉大夫趙善璫轉一官回授故本生母梅氏贈孺人制

勃松栢不生於培塿而梧桐生於朝陽士君子可忘其本哉具官某故本生母某氏歸嬪宗磐蔚著閭範是生賢息出繼同支屬進秩以旌能願貤恩而報本爰加愍典用尉孝思顯親揚名之榮衣被九原矣尚歆承之無斁可

中大夫參知政事陳貴誼特授正議大夫守參知政事致仕制

勅湏股肱而治甫新萬化之更乞骸骨而歸俄惜一賢之老晉加異數渙播明綬具官某寬博而川涵凝重而山立道貫六學足以羽翼乎聖傳文成一家足以經緯乎國典蚤華塗之徧歷亟邇列之延登補袞於有闕之時而胥訓居多改弦於不調之後而同寅更力允天民之先覺蔚王佐之全材况休然而有容且澹乎而無慾宜其俾艾胡爾

榮維楫未施朕方念乘航之勢輻輪俱壯爾乃爲
枕駕之圖睠委倚之素深惜訐謨之未究趣升峻
秩仍拓真畬九老自娛孰與繪樂天之社五湖莫
返尚思鑄范蠡之金可

陳章特授中大夫致仕制

勅具官某幼學而壯行者在所立生榮而死哀者
在所遇爾制行寬夷莅事明練荐更共理之寄民
熙於田野士競於庠序蔽蒂猶未拜也方祝釐而
自適遽謝事以長逝進躋崇秩用荅宿勞朕之待
臣下可謂有恩矣營魂如存歆此盛典可

爲觀察副使顏仲明爲都總領王逸爲

徵仕郎化平縣令胡士元爲徵仕郎單
公履爲明威將軍鄭彥爲將仕郎尚書
戶部任嘉言爲都總領亢志忠爲安平
都尉張林爲宣武將軍安居信爲明威
將軍晉德爲武節將軍同進爲同知號
州軍州事聞鈞爲徵仕郎王采苓爲登
科人尚書令史朝列大夫陳紀並補承
信郎爲朝列大夫郝士特爲都尉劉儀
僞昭毅大將軍楊全僞定遠大將軍郭
春並補承節郎僞光祿大夫張俊特補
忠翊郎制

勅具官某等王者大一統際天所覆孰非吾臣
等效官外域歸誼中朝授之右階拔于左衽其相
與竭忠以報上可

故正議大夫守參知政事致仕陳貴誼
特贈少保資政殿大學士制

勅抗章太紫之北歸志方新占象尾箕之東遊魂
已遠迺瞻謨明弼諧之韞未究輔相彌縫之功茂
錫恩徽誕敷命紵具官某學根乎正大氣備乎中
和德盛禮恭謙九三君子之美義方敬直坤六二
大臣之風自儀禁路之華趣踐政塗之重了無緇
磷具罄猷爲欲仁而仁斯至則無念非公不言而

言必中則有謀斯斷屬重大化共振頹綱三千惟
一心正賴丞徒之助五十不稱天遽驚隆棟之摧
惟慶曆之仲淹暨元祐之蘇轍用俱不盡命尚奚
尤萬金之藥雖施何嗟及矣十漸之屏猶在如將
見之欲紓殄瘁之悲庸侈褒崇之典位外朝之列
棘班祕殿之鴻名噫亮天功而弼一人詎止書棺
之寵質鬼神而俟百世永爲銘鼎之光極而生死
之榮歆我始終之遇可

金部郎中黃壯猷除直祕閣權知紹興
府兼浙東安撫制

勅具官某會稽東南鉅鎮中興百年之馮翊朕


豐沛也吏治剛則覲柔則坏故牧守以識體爲良
爵軼姿融明慮事精密間者攬轡左淊政得寬猛
之中朕深知之輟自望郎出殿帥閫中祕寓直擁
高牙大纛而東豈特以華舊部之觀哉書曰以厥
庶民暨厥臣達大家又曰康濟小民率自中德禮
刑政導齊有序而上下相安於和樂體斯得矣重
楮幣而輕和買抑思乃言之踐可


彭協贈承信郎制

勅具官某勇士不忘喪其元義重於生也武休之
役爾挺戈陷陣効死封疆而賊氣奪可謂勇矣荅
武級仍錄孤兒英魂有知歆戴無憾可

歸順人王青劉天山米興王庭李思齊
門清劉全魏師愈王瑜李裕范天保並
補保義郎制


勅具官某等王者大一統際天所覆孰非吾臣爾
等效官外域歸命中朝授之右階拔于左衽其相
與竭忠以報上可






平田文集


北二七三



漢書門類	一〇二七七號	七四函	一二架	六冊
------	--------	-----	-----	----



内閣文庫		
番號	漢	10277
冊數	12	9
函號	3	1



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM Kodak



国立公文書館
National Archives of Japan

糊などで貼り付けられている部分がめくれない個所があります。

原本の文字など不明瞭な個所があります。

43218 部(局部)の文字など不鮮明な個所があります。

平齋文集

卷之五

平齋文集卷第二十二

外制六

忠州團練使淮東路鈐國用安除順昌
軍承宣使右武衛將軍制

勅李祐自蔡而至效力擒吳韓信由楚而來抗謀
滅項惟知擇主之義斯著際時之勲具官某山西
梟雄冀北翹駁屹虎頭之風槩勇蓋三軍聳龍額
之威名氣酣百戰耻委身於戎索願歸命於王朝
抱志竟酬乘機斯奮杖劍而渡漣水適會風雲塞
沛都而不淹日月朕肆嘉壯志首錄前勞升
班留之崇領衛周廬之重仍提軍律坐振忠

宣示丈夫哉徒較一勝一負之勢此真將軍矣尚
萬舉萬全之功厲爾精忠對予顯渥可

李琦武義大夫吉州刺史制

勅某人制域有華夷之辨勸功無內外之殊爾倡
義來歸杖忠自奮勵貔虎以賈勇屠鯨鯢而効功
峻陟武階仍躋遙刺祇承異渥勉究殊庸可

李琦除福州觀察使蕭均除和州防禦
使黃國弼轉武功大夫除蘄州防禦使
李璨轉武經大夫除和州防禦使制

勅具官某唐收契苾阿史之用漢有弓高襄城之
討能効殊勞可稽讓賞爾以身區脫庀役螯弧王

旅嘽嘽氣獨高於後勁戎容暨暨志尤銳於先登
進乘汴洛之機圖合關河之勢趣升武級仍昇廉
車旌益殫舊衛之忠用對勸功之典可

歸順人李伯淵武翼大夫和州防禦使

制

勅某人制域有華夷之辨勸功無內外之殊爾倡
義來歸杖忠自奮勵貔虎以賈勇屠鯨鯢而効功
趣升武級之穹仍揔軍防之重祇承異渥勉究殊
庸可

歸順人李璨補武功郎制

勅某人制域有華夷之辨勸功無內外之殊爾倡

義來歸杖忠自奮振貔虎以賈勇屠鯨鯢而効功
山并武階用厲壯志可

陳一薦除軍器監簿兼淮西制置司參
議官制

勅具官某幕掾以王官兼之朕親政逾年未嘗輕
假人也爾抱駿拔之材贊襄峴之畫積勞著矣今
嚴內柔外淮右為要思得識機達體者叅外間之
謀宜莫如汝武監有簿以榮其行朕不得而吝也
繁弱之弓闕鞏之甲尚精思古制以告可

劉用行知安慶府制

勅具官某群舒瀟為大兵調旁午之餘民亦勞止
疇為我分承流之寄以爾儒猷茂明吏事宏達可
使足民而治賦也輟之奉常為我屏翰推禮樂之
澤以浸其民庶有望矣漢世循吏蜀郡之文翁東
海之朱邑皆生長於是邦尚論千古而師友之何
民瘼之不瘳乎可

大理少卿趙彥恢除太府卿制

勅具官某鄭武公以同姓為王卿士緇衣一詩適
館而授粲親親賢賢也爾公族老成之典刑而邃
於學力於行入貳廷尉平心以閱四方之讞咸庶
正茲庸進之卿于受頒貨賄之府易之理財有
義大學之生財有道非言利析秋毫以為富也推

明經意發舒儒術裕民足國於道義之中蓋爾素
朕抑將引之自近以究講貫之益可

崔福轉四官授武功大夫制

勅具官某于台之役大小三十七戰而城降將士
用命也莫府上功謂爾勇鷙敢戰宜受醴賞峻躋
武級鈐護南昌公侯干城毋忘努力可

楊孝錫贈通直郎子一子恩澤制

勅具官某爾積學入官奉檄督餉見危授命罵賊
不降父子併命於白刃而女光訟其節可哀也已
遂以升朝之階且錄遺孤用尉忠魄可

龐謙轉武翼郎制

勅具官某滁陽介于兩淮恃城以爲固修壞植圮
爾與有程督之勞進官二列用示激厲庀職轅門
勿憚鞅掌可

陳畏除大理少卿制

勅具官某朕嘗詔有司毋輕用徒刑頃又詔諸將
毋專殺重人命也而哲人惟刑必自士師始爾見
善之明迪德之茂山立時行不與物靡推以折獄
宜片言而人信之甫憲節之起家趣棘廷之參聽
豈徒以登僊之行爲爾榮唐虞畫象而民不犯朕
慕之得淑問如臯陶者彌五教則欽恤之仁達
于四海矣懋哉可

白身人任震亨襲父官補修武郎充珍
州綏陽縣沿邊都同巡檢制

勅某人士無世官惟控扼西南夷則襲之爾恪遵
父訓洞曉邊情宜傳勇爵之榮仍踐徼巡之職撫
寧遐俗惟信惟廉可

崔端純除倉部郎官制

勅具官某周設廩人之職漢置倉氏之官求會計
當也而重本之意存爾靜而不苛平而不陂脩潔
而不矯田里相安之政番之士民謹稱之襍被粉
闈司我庾事蓋以旌治行也維時八蜡雖通國與
民猶未底俱裕高廩萬億及秭太倉紅腐相因果
何道可以臻此亟其來思具以告朕可

朱實之差知肇慶府制

勅具官某朕廣求民瘼每患郡縣吏不能體篤近
舉遠之意故嶺嶠擇守尤謹爾踐歷之久通練而
詳明佐理番禺蔚有善譽就畀符組假守高要炎
荒凋羸特甚鎮物以靜字民以寬吾澤東漸于海
矣往既乃心罔俾包拯之專美可

權刑部侍郎周端朝特轉通議大夫守
刑部侍郎致仕制

孟氏脩身立命不以殀壽易其心曾子正色出
辭不以寢疾忘其道生惟無媿歿亦有榮具官某

蚤負直聲晚充素學廣廈細氈之上考古以訂今法從屬車之間獻可而替否久朕心之簡在斯吾道之將行胡不歲寒乃先朝露渺流光之莫返湛正性之長存跂予望之尚想嘉猷之告嘏其歎矣徒勤遺藁之求往升二級之華用作九原之氣可

李伯度除直祕閣京西轉運判官兼提舉提刑制

勅具官某京右比歲科調轉輸之繁民不堪命朕屢詔寬卹必賢刺史奉行之爾材周於用政得其平上流並邊之郡治理茂著擢昇庾節民情具宜進丞戎監就領漕輓又華之中祕之直憲庾併以屬爾身兼數器矣孟子謂省刑薄斂深耕易耨而修孝弟忠信可以撻堅甲利兵人心國勢蓋相爲表裏也往圖稱朕指可

顏耆仲直祕閣淮東路提舉常平茶鹽兼提點刑獄公事制

勅具官某江淮財賦之淵唐所恃以用其國也朕自親萬務日討御外理內之術顧詹在廷求善治賦者使于淮迺今得之爾開亮而敏精練而實越在省闥事有可否不爲詭隨朕嘉其公爾忘私也輟泉南之行授節東出庾政臬事併咨之而牢盆之課爲尤重本錢給則亭戶樂其庶鈔法定則商

貢趨其信浮鹽室則官府安其義從容笏畫幹東南山海之藏以濟經費可不勉歟可

楊椿贈武經郎制

勅具官某爾結髮從戎熟知虜勢赤心報國竟死邊鋒陞再級以示褒俾列屯之知勸可

李安國轉武功郎依舊知金州兼管內安撫制

勅具官某爾忠烈有傳材勇自奮入屯八屯之列備宣十稔之勞既應賞科宜升華級往任蕃宣之寄力圖控禦之勲可

周宗傑轉四官授武功郎制

勅具官某于台之役大小三十七戰而城降士用命也莫府上功謂爾勇鷙而敢戰宜受醲賞峻躋武級統戎惟揚報國赤心更觀來効可

宮人丘氏封信安郡夫人制

勅曹大家之芳規具存女訓蘭夫人之淑行實重母儀宜䟽翟茀之榮用侈葛覃之慶宮人某氏性姿柔惠德履懿和祇事名臣壯聲猷於虢虎篤生良媛承輝采於軒龍屬通禁籍之華盍渙郡封之寵仍稽祿式並著恩徽尚謙誌之有加對熾昌之未艾可

陳隆之除屯田郎官兼知興元府兼利

州路安撫制

勅具官某諸葛亮北駐漢中以圖中原以木牛流馬爲未足又雜耕于渭上食足兵強而後國勢振遺蹟可尋也爾材猷卓犖志氣軒岸健颿烝楫駕順風於長川誰能禦之褒斜建藩瞰雍蔽益威名一震膚公亟奏朕知其當一面有餘也惟邊關雖靖田萊尚荒繕原堡濬溝洫貸牛種以耕最今急務咨爾良牧郎于司田以莅之墾屯積穀糴糝宿飽秦隴在吾目中矣往哉圖稱東拔可

盧進李聚朱廣等一十六人歸順補承節郎制

勅具官某等王道以舍逆取順爲貴人情以用夏變夷爲難唐鄧歸疆爾能自拔爵之鵬弁爲我王官其祗服恩榮毋怠可

李虎趙邦永轉右武大夫王政轉左武大夫制

勅具官某等隆興詔旨橫階非戰功不授勸忠勇也山陽之役爾等忠於衛國勇於敵愾功最來土應我賞典進升五列特免貶恩尚思在師中吉以承天寵可

周祚轉從事郎制

勅具官某荒政莫先於勸分建安饑爾不俟勸捐

私廩與邦人共之非輕財急義能爾耶循陞二列
用旌好善抑厲異時居官及民之益可

王瓚轉朝奉郎制

勅具官某浮光子威巴灣之捷論者疑之然功疑
惟重爾提身肅括莅事正固非徼功爲利者關決
于光嘗同調遣書生而知戎情何愛一官不以爲
賢勞勸往分乘障之符亟上安邊之最可

林瓌除直祕閣與宮觀制

勅具官某朕惟華髮國之元龜年耆德明靡不招
選而逸老養高亦必有以厲其節爾素履昭融泰
宇澄澈逾八望九脫屣世故之心與冥鴻俱遠朕
欲起之名藩不能奪也木天寓直仍賦真祠閱理
多而更事深尚乞言之有待可

殿前司統領劉喜轉武顯大夫制

勅具官某詩嚴備噐易重除戎爾董工程悉皆犀
利進陞穹列用獎精能庀役羽林益勤國事可

董昇葛仙白身補忠翊郎制

勅具官某等拔自材官戍吾邊壘勇而知義不墮
賊謀登名勇爵之榮勵志事功之會可

游侶除軍噐監制

勅具官某紹熙末國有大議蜀士主軍噐監簿者
實發之宜其有子哉爾雅粹而明靜莊而舒曠列

予朝慷慨論事有風槩意所不合攬轡徑去朕未嘗不思見賈生也化弦更張召自萬里便朝趣對氣不少衰武監務簡姑為朕長之以需東拔夫難得者可為之時易奪者有為之志立朝大節能若犀渠鶴膝淬勵而常新爾父履綦猶在與有榮矣可

知嘉興府趙與憲政績轉朝議大夫制勅具官某嚮李吾股肱郡民衆物繁號難治共理得人朕不輕易也爾明而整寬靜而有立所至宜其材典我輔藩視田里疾痛抑搔之亦既用乂而賦入不愆于期知體國矣孝宣親政以良二千石為重有治狀則增秩使留朕於爾用之度越品級不計也然自昔政令以久而孚亦以久而玩力鞭其後益茂厥成則惟汝能可

李昉英除大理寺司直兼廣東經略司
機宜文字制

勅具官某東廣弗靖朕起壯猶之老於其鄉以鎮綏之簡僚必謹爾抱邁往之氣而有賢聲月評所重進列棘廷就參幕畫雲川飛冰孰講長筭恩威得兼濟之方海嶠息桴鼓之警謂爾來矣可

李華依舊直華文閣廣東路轉運判官
制

勅具官某朕親政逾年深惟民貧而不加恤軍勞而不加閔戒飭收司屢矣嶺左吏奉吾詔不勤釀成蒲澤之警部刺史可不擇乎爾踐履平實施置精敏臨汀政美盜不敢近嘗進之奎直以風厲四方南顧未寬用輟以往星言夙駕謹勿歎賢勞之獨也轉輸方亟綏靜爲期臺閫相望叶謀共濟斯稱予重遠之意可

趙汝憚轉中奉大夫致仕制

勅具官某生而在選拔之科死則有贈襚之典國家之待搢紳厚於恩篤於禮矣爾以公族之雋蚤即鴻臚中嘗鷁退老其材而用之意蓋有待何嶠嶢迅景之迫耶進官一等往書爾樞榮光下燭尚克祗歆可

趙希逾轉兩官授朝奉郎制

勅具官某維昔洞徭負固湖湘繹騷爾切於衛民勇於徇國深入窮討一方以寧帥垣上功疊進華秩公議信其不忝也益殫撫字之勤茂對褒遷之渥可

軍器少監直舍人院吳泳除祕書少監兼權中書舍人制

勅具官某東壁圖書之府西垣誥令之司皆儒者至榮也然成周盛時內史掌策命御史掌誅書外

史參其間掌四方之志掌三皇五帝之書豈書志之藏與策贊之出相爲源委歟爾學明河洛之正文擅江漢之奇試代予言韶雅而不華翹明而有體斧藻百度律呂萬化具乎千觀聽而還詔惟允朕甚器之用進貳于蓬山以重四禁汗牛之書飫於中而倚馬之藻掞於外源而委也唐武德正觀間是兼命師古號爲稱職爾尚懋乃訓以亢斯文可

安癸仲除太府少卿依舊總領四川軍馬錢糧制

勅具官某西南民力竭矣稽九賦之登耗權萬貨之盈虛以贍列營惟王人是屬苟稱厥職九卿不吝也爾蚤嘗與聞定蜀之謀天險地產歷歷在目以燭照數計之智濟笏畫鞭筭之長挈畚用裕外府繇貳而長豈特序遷以獎爾勞推周官九府之法均通乎上下兵食足而民不病朕有望焉可

陳康熈除司農寺主簿兼知泰州制

勅具官某蜀有三陳閩之三陳實似之爾抱淹洽之學雖退然不以殊科見而素履行願含章時發鴻鴈行之良也簿正農扈出守海邦蓋以起爾詎謂是足以處爾哉可

歸順人王世昌補武翼大夫差知宿州

制

勅具官某老上之庭旣焚月氏之頭且漆爾見幾
興起慕義來歸挈符離於版圖削左衽而冠帶朕
甚嘉之峻陞武列仍領軍防往分銅竹之符用聳
鄉枌之望其竭忠以稱殊渥可

歸順人張子良補武翼郎京東路兵馬

鈐轄制

勅具官某爾久厭旃裘樂慕冠帶縫旗所拍相與
挈符離而歸職方可謂知義矣峻躋武級往莅戎
鈐茂對寵光勉圖忠効可

歸順僞進士出身齊希古補承直郎制

勅具官某爾久厭旃裘樂慕冠帶縫旗所拍相與
挈符離而歸職方可謂知義矣特昇文階毋忘忠
蓋可

歸順人西珪補承信郎制

勅具官某爾久厭旃裘樂慕冠帶縫旗所拍相與
挈符離而歸職方可謂知義矣易授勇爵尚知激
厲可

歸順人于仙郭珍劉用游淑並補承信
郎制

勅具官某等爾等久厭旃裘樂慕冠帶首挈唐鄧
歸吾版圖可謂知義矣易授勇爵尚知激厲可

偽朝列大夫張德直改補文林郎偽朝
列大夫李國賢改補從事郎制

勅具官某等江漢之師于征唐鄧之境盡復爾等
窮而歸義待以同仁易授文階示有科級祇服好
生之德勉殫事上之忠可

張叔寅贈宣教郎予一子恩澤制

勅具官某韃犯蜀關兵行如鬼爾以郡博士從戎
而死之盡臣節也褒進京秩仍官遺孤邾矢復魂
可以瞑目可

趙善璫除刑部郎中制

勅具官某吾欲省刑甚憲部置郎以參決四方之
讞必熟於布宣德意者乃在此選爾守潯陽能奉
吾詔以惠利其民近規社倉遠準平糴露積相望
使千里無凶年而嬰孺之失乳保者皆有養民之
慈母也推是心聽刑於省戶天下無冤民其庶矣
乎可

黃朴差知安吉州制

勅具官某董仲舒宜在漢廷而出相江都膠西教
令國中所居而治志在及物無中外之間也爾以
春秋奉天人之對褒然為舉首細氈廣廈著廷郎
省搏扶搖羊角而上方將使九萬里風在其下而
一息豈仲舒不遇比哉雲川密拱行闕姑煩共理

脩材奧學朕不汝忘可

參知政事真德秀除資政殿學士提舉
萬壽觀兼侍讀制

勅避繁機於政府特陞書殿之班祝曼壽於殊庭
仍勸經闡之讀睠予近弼爲世鉅儒雖寒疾未遂
於造朝然嘉猷何嫌於告后茂揚異渥誕播明綰
具官某玉裕而金相川涵而嶽負十年去國澹乎
沕淵潛以自珍一旦際時幡然見德輝而復下其
入奏則祈天永命其侍言則格物致知嘉其有補
袞之風進而共改弦之政偶嬰微疢遽起遐心魯
人望季子來歸期弼諧之有益余伯使醫和視疾
謂輔養之宜先稽典章於熙朝隆體貌於舊德躋
榮穹職均佚內祠時從邇英延義之游丕展中庸
大學之韞噫道之將行也命方無言之不酬天之
未喪斯文尚勿藥之有喜勉加葆蓄用副倚毗可

太府寺丞呂延年除大理寺丞制

勅具官某中原故家落落如晨星况蓋世名儒之
子乎爾挹正大之澤襲秀穎之芳好脩而有吏事
外府轉丞廷尉能贊而長以欽恤之意是爲克
家可

劉燁叔除太府寺丞制

勅具官某丞者述六職以輔治故九卿皆有丞而

外府爲重爾守家傳之典刑究吏術之本末分符
盱江能使其民愛慕如貳郡時知爲政矣治藏設
官來涉爾筆尚思理財正辭之義可

何琮依舊直徽猷閣知福州兼福建路
安撫制

勅具官某君子而有才國之寶臣也故孔子以爲
難爾爲臺諫清而不隘和而有立質直而知體敷
對詳雅藹然君子之風輟自版曹出將漕指不苛
不競威愛胥濟豺虎興於前而色不動迄談笑而
殲之才之稱也閩中謀帥弄印蓋久就爲朕往以
詩書禮樂陶其民於整暇使朕無方面之才之歎
顧不美歟可

曾穎茂除直祕閣依舊福建路提點刑
獄公事制

勅具官某端拱初詔就崇文院建祕閣擇三館書
充其中淳化御飛白以扁之穹窿宏敞號稱木天
今偉觀猶昔也寔直其間有登瀛之榮爾佩詩書
之訓濟聲猷之美亭刑七閩而行帥事雍茲植良
民聽用肅朕聞而嘉之俾進直于東壁以重臬臺
天球琬琰河圖大訓虹光下飭可挹可攬益思所
以稱榮遇可

趙彥候湖南路轉運判官姚子材湖南

路提點刑獄黃靜夫湖南路提舉常平

茶鹽公事制

勅具官某等重湖以南地大而物夥二三部使者
皆賢則列城風動與斯民相安於和平之域爾彥
候秀整而雅疏亮而潔陳我臬事率義棐彛其升
之漕節爾子材寬夷而栗安恬而邵司我庾事亦
克用乂其進之憲節爾靜夫平易而敏詳謹而練
著績外服善不近名其畀之倉節孔門三子果達
藝皆可從政仁則未也朕同日出三節以參舉一
道之政治賦折獄能知用力於仁民其有不被皇
華之澤者乎往哉毋虛朕選可

陳埏除直敷文閣知安慶府制

勅具官某漢科瑣邊吏於赤白囊交馳之後蓋已
晚矣故竝邊擇守綢繆於未陰爾清謹而有立志
宣勞江湖間非一日起丞農扈聲問益華皖城關
守其寓邃嚴之直勉爲朕往民嘗苦於征調兵猶
疲於戍守恪意鎮撫屹爲保鄣尚何風寒之慮哉
可

厲模直祕閣知常德府制

勅具官某武陵人氣和柔多淳孝常彈五絃以自
樂有虞夏之遺風守得其人易治也爾氣姿開敏
材諳通亮自齊安改守是邦嘗以有政溥寓直中

祕往訪故俗蔽芾其猶舊平朕惟五溪蠻獠昔梗
漢化與其得一討擊之名將不若得一撫循之賢
守爾尚勉之可

葛逢除著作郎劉炳除司農寺丞制

勅具官某等漢良二千石必選召渤海入爲水衡
都尉潁川入爲太子太傅左馮翊入爲大鴻臚美
意猶在也爾逢脩潔而寬厚守嚴能使其民咸樂
於有生承明有庭進爲之長爾炳詳明而通敏守
微能與其民相安於無事司均有丞俾還其舊文
學政事之科雖異表厲藩輔之意則同或汗竹之
摘華或治粟之贊計各據素韞用對殊獎可

陳韓除工部侍郎汭江制置使兼江東

安撫使知建康府制

勅朕顧詹陪京控扼天塹折衝有術武騎千群奚
所用之設險無方衣帶一水何足恃者茂選從塗
之雋往開制閫之雄具官某瓌韞鈞深英猷經遠
智略輻湊蚤馳騁於淮楚之間功名鼎來晚震耀
於江閩之表進起部之妙選揔別都之重權虎踞
龍蟠遺風猶昔魚麗鵠勝筭方新惟江陵武昌
之相望暨合肥蕪城之對峙首尾聯絡輔車因依
其堅共獎王室之心以壯外攘夷狄之勢頃奉圭
而入覲有嘉韓奕之忠茲掌籥以居留尚

鄧侯

之志可

王與權知寧國府制

勅具官某死陵介吳楚之交地望非不朽然大也其土磽瘠其民熾畜大絃急則小絃絕故其治貴清靜爾舍於昔而無愠容用於今而無矜色挈範六館士曰得師翩翩孔鸞之在廷何色舉之亟耶詳試近藩能如烹鮮之勿擾巖耕谷隱生意彌蒲儒以道得民爾尚有焉可

韓祥轉儒林郎制

勅具官某江東荒政之講民無捐瘠夫豈一手足之力哉部使者第勞來上謂爾宜賞其進一列思勸字民可

鍾璵轉修職郎制

勅具官某六驄復土五使置官凡備馳驅悉靈賞賚爾祇冗役例進一階茂對恩榮毋忘策厲可

崔興王信劉旺彭立劉政王才彭辛王用並補承節郎制

勅某人等壽春兩寨分扼東西爾能效忠寇不敢犯登名勇爵益厲功多可

劉謙王鎔轉兩官並授保義郎制

勅具官某等虜旣焚巢爾因削衽易之武級列在王官其加進於二階俾恪勤於乃職可

王福轉武翼郎陞差淮西路鈐兼強勇
軍都統制

勅具官某軍務孔嚴將材匪易爾以挽彊射遠奮
不顧身爲吾帥臣所舉升之一秩進領戎鈐任責
捍邊尚迪果毅可

戴翼轉奉議郎制

勅具官某盜發江右蔓延嶠南討平雖倚於元戎
奔奏抑資於群吏爾抱材試邑竭力餉軍其進華
階用旌勞効可

何元壽除戶部郎官依舊總領湖廣軍
馬錢糧制

勅具官某我 思陵詔戶部郎建臺鄂渚專總軍
賦自霍蠡始良法美意垂裕百世爾以通練燭物
理以沉密制事宜餉師逾年有宿飽而無後憂襄
鄂用壯正序地官之屬增重王人之權有功見知
矣主兵主財惟和惟一漢之人傑豈以戰勝攻取
而後給餽之勞哉可

王伯大除江南路提舉常平茶鹽公事
兼知池州制

勅具官某朕甚重部刺史之選必試可然後爲真
爾清粹而恬夷多文而有政所至以治行著池陽
密控天塹臺郡常相依而立假節臨藩亦旣滿歲

牧御兩得軍民胥安爰疇屏翰之庸就正司庠之
寄歛一道之權以重一州又推一州之澤以幸一
道田間爾甦卒乘爾輯吏治爾澄財計爾裕賢譽
日起豈久於外服者可

李江轉四官授武功大夫依舊淮東路
兵馬鈐轄制

勅具官某于台之役大小三十七戰而城降士用
命也莫府上功謂爾勇鷙而敢戰宜受醲賞峻躋
武級總戎海陵報國赤心更觀來効可

趙汝捍和糴賞轉朝奉大夫制

勅具官某漢享平糴之利唐被和糴之害行之惟
人爾以材選將漕畿內雖乘豐糴賤易於辦集而
農樂與市亦云善矣進陟正郎賞格維信可

趙希惠轉承事郎制

勅具官某永王朕大父行也莫覩老成之則尚思
垂歿之請爾其季子信厚有傳進陟一階前言是
踐庸示予追遠睦族之意可

陶木除祕書丞兼右司郎官制

勅具官其中書之務清而後能簡節疏目以經綸
天下之大務置掾不可不謹也爾裏夷表莊言寡
理中蔚爲通達國體之器轉丞道山脫氛壒而凌
沆瀣俾得以悉心於省闈整紛疏壅剔煩撮要中

書之務其清乎 神宗聖訓有云左右司須是學
爲宰相爾雖兼官尚帥志毋怠可

趙與簋除大宗正丞兼權樞密院檢詳
諸房文字制

勅具官某朕欲內外之輕重等朝譽之休或畀之
麾節民庸之茂必登之班著爾守近輔潛藩民無
繭絲之苦而有耕鑿之樂既增秩以表厲之又趣
之來丞我麟籍劉德以千里駒嘗爲是官矣職清
務簡攝掾宥府帷幄勝籌勉思裨益可

趙與熈轉一官授儒林郎制

勅具官某六駟復土五使置官凡備馳驅參贊
賁爾冠冠役例進一階被服恩榮毋忘策厲可

陳應星輸粟補迪功郎制

勅某人一毛亦畱富民之常爾業儒樂善能於兵
荒發廩無靳色富而知仁矣文階示勸增耀且評
可

衛洙除大理寺丞方大琮太府寺丞制
勅具官某片言折獄千乘治賦孔門高第爲之於
此可以觀有用之學爾洙浚明而不苛爾大琮安
雅而不褻皆學者也聯翔表著有問甚華爰進丞
于廷尉外府獄訟得哀矜之仁財賦得阜通之誼
所學見於用矣懋哉毋忽可

新太府寺丞劉輝叔除大理寺丞制

勅具官某郡太守以美最登朝著榮矣脩門未入
除書再下其榮抑多爾守劇壘于江右政得寬猛
之中愛友者樂業彊弗友者無梗化風物寢還舊
矣召丞外府轉丞廷尉丈二之組猶綰也惟服其
榮而圖其稱可

知高郵軍馬光祖政績轉朝奉郎制

勅具官某承據江淮舟車之會富庶出他郡上能
與民相安則爲良守爾以實穎之材分共理之寄
政令明簡田里熙豫其在惟良之選乎進官一等
用旌善最尚加鞭以須甄采可

何文美轉武德郎依舊淮安州三品制

制

勅具官某定遠戰禦之勞去今十有八年矣爾累
闕積階而後自列朝廷方厲忠勇以勸事功不汝
靳也進升再級仍將偏師淮水湯湯毋忘敵愾可

何處久除太府卿制

勅具官某九府設於周今唯太府官名猶古受其
貨賄之入頒于受藏之府職業亦猶古也知圜法
之爲均通則爲稱職爾登騎省而聲采蕭長蓬山
而風致遠治輔藩而恩威立蓋通儒也鹽楮之令
屢變錢穀之問日棘非通莫濟蓋法一審也人猶

權也衡一定不易而權之以人則通矣八儀九列
總幹萬貨任法任人庶其兩得乎可

史雋之除直寶謨閣致仕制

勅具官某范呂世家多良材所積厚也爾師垣之
孫文昌之子受材孔良遺榮何早禹閣寓直尚尉
出門折軸之憾可

游九功除司農卿依舊知慶元府泐海
制置使制

勅具官某江淮制閫皆以王人臨之重其權也分
閫海服其可輕爾簡而廉剛而塞彊而義頃系濃
少壯嚴束茲待榮獨高明有體而無吐

乎鯨豢之表朕用嘉之進升列棘仍鎮舊
晏澄三農和樂尚益加之意可

莫異德白身襲父官授銀青光祿大夫
制


勅具官某舜化柔遠禹聲暨南爾知慕於華風宜
克承於世業昇階崇祿効職遐陬祗服寵光益肩
忠孝可

陳韓磨勘轉朝議大夫制

勅虞陟明於考績之餘周詔賞於計治之後瞻時
法從鎮我陪都適銓簿之程勞宜贊書之錫寵具
官某涵淳術業震耀威名豹尾屬車之嚴吉猶良

切石頭鍾阜之勝宜力惟勤積日經以課功按歲
成而進秩雖高賢躅不廢舜章元祐之著定貪增
重論思之望紹興之付劇政益堅控禦之圖可

平齋文集卷第二十二



平齋文集卷第二十三

外制七

吳淵除右文殿修撰知鎮江府制

勅具官某物不受變則材不成人不涉難則智不
明此風雨霜露所以爲天道至教爾以昂霄聳壑
之質秀出於鄧林夫豈常材也哉而匠石必取於
斂華就實之後京口爲江淮襟喉升班論譔起家
出鎮識老氣定而政平軍民之福也暇日登北固
而長望慷慨擊楫聞風作興斯稱予蓄材待事之
意可

蔣重珍除集英殿修撰知安吉州制

勅具官某董仲舒宜在漢廷而出相教令國中所
居輒治志在及物無中外之間爾以奧學閎識奉
天人之對嘗褻然爲舉首不輕於售挽莫能致迨
攬大政幡然肯來敷經擅厦吮墨螭首朕方傾意
鄉之非仲舒不遇比也卧疾念歸姑以論譔殿輔
藩勿藥且召矣可

姚珪除直祕閣權知建寧府制

勅具官某富沙軍情屢搖頃爲甚官治民廬半委
烈燼朕念之怛然故選孰知德意者爲守寓直中
祕以榮其行爾名在文學之科而議論鏘發志氣
英邁飛于麟臺郎于憲部典聞廟筭於宥

日起詎宜輕去一方病矣勉爲朕往廉平
簡靜以馭軍百廢具舉而聲色不動以表列城是
爲稱選可

何炳除集英殿修撰知江州制

勅長江上下護風寒非一處潯陽西挹武昌東引
京口自晉以來爲重鎮故輟從臣臨之具官某以
撥煩之材致遠之識嘗建臺閫于上流厥績用茂
晚登從塗齒宿而氣不衰升華論譔往控天險酌
保鄣繭絲之計嚴綢繆牖戶之圖江波不驚廬阜
屹峙尚可登庾亮之樓而銷憂也可

國子監書庫兼皇后宅教授徐維除國

子錄制

勅具官某虞周有胄子國子之教漢有四姓小侯之學朕參用之以作人爾講習克勤圭角不露方授經陰馬之家遂分錄成均之政師道行焉茂哉思其所以爲人師可

陳大樸平黎蠻賞轉儒林郎制

勅具官某黎蠻干紀海邦繹騷爾密贊守臣設謀致討論功宜賞爰進一階漢水之陽益勤警邏可張綽平蠻督餉賞轉儒林郎制

勅具官某黎蠻干紀海邦繹騷維時守臣亟致討定爾服官黃綬督餉良勞示勸一階益勤

趙善瀚知岳州制

勅具官某岳陽處粵蜀荆楚之會吳晉皆爲重鎮以魯肅陶侃爲之守爾氣盛於權奇材優於盤錯傑傑然公族之穎繁弱橐藏人所共惜起馮熊軾揖肅侃於千古之上可無薄洞庭而羞君山也維彼澤國民生孔艱悉力拊循毋失休譽我有好爵將於爾乎進之可

黃朴改差知泉州制

勅具官某奉親而守便郡搢紳之至榮爾學問昭融議論激壯以倫魁雅望昌文聲於朝而料戎情商國勢類出人意表識者以方面之材期之甫以

吳興之綬隨綰溫陵之組去家歷境能幾何舍板輿親御如行戶庭父老相與榮豔於道周且喜色相告曰仁孝同源孝於親必仁於民凋瘵其甦乎可

塗顯行知崇慶府制

勅具官某蜀在萬里外朕於人物之賢否難踰度而耳目惟制間之寄爾之公廉律已豈弟愛民彥呐爲朕言之觀遠臣以其所主唐安一麾不汝吝也政平訟理圖稱厥舉謹勿以去朝廷爲邈可

厲模楮綱賞轉朝請大夫制

勅具官某幣行於東南而取楮於蜀精實

難以亂真也爾抱材敏銳將漕井絡歲發木難應賞令其升一級庸勸奉公可

權工部侍郎徐僑除集英殿修撰提舉佑神觀兼侍讀制

勅勞侍從之事願去承明考仁聖之風勉留廣廈雖優老之令典實崇儒之盛心具官某志操孤高問學淳古詠歸沂水之上世果何求作興北海之濱時然後出有嘉耆艾實在清華守益固而眷益隆進愈峻而辭愈力茲領祠於闕下仍勸讀於禁中以體貌大臣之舊規爲尊寵高年之特禮更陞論譔不替纂修行葦之養老乞言亦此厚矣大學

之致知格物尚茂明之可

黃堦知肇慶府制

勅具官某朕惟民生之不易吏治之不良雖斗壘未嘗輕畀矧名藩乎爾承元祐故家之傳材優而氣壯自著勞於試邑即振譽於登畿僅爾小休倏焉復起爲遐嶠之民擇守也潰旅未殄地迫高要往疾其驅亟圖按堵可

丁晔除直寶謨閣淮東路轉運判官制

勅具官某王良造父之御鳴和鸞逐水曲無不中節人與馬相習也爾氣明而敏材通而偉屏翰澄清之最荐著於淮左物情地利習之久矣茲選不才奎之直俾膺飛輓之寄咨諏貴廣積貯貴豐有先乃心用圖厥績以寬我東顧可

魏了翁除權禮部尚書兼直學士院兼

侍讀制

勅秩宗之典三禮虞凝垂拱之功春官之掌九儀周格盈成之治緊制作之自古必推行之在人進我鴻儒膺茲妙選具官某氣以志爲帥學以經爲宗賈誼六太息之書洞達國體魏謚十不終之疏仰當帝心梧桐方挺於朝陽蒹葭已颯於白露逆處以順樂忘其憂務著書而立言期精義以致用綠竹猗猗而瞻彼奧每興磨切之思白駒皎皎而

食我苗徒起繫維之歎適中朝之更始俾外服之
遄歸睠百王之典寢微而一代之防多闕匪究定
民之本曷爲經世之方漢僅草儀猶折武夫之氣
魯惟秉禮卒回彊國之謀爾熟講乎后倉之九篇
深稽乎姬公之六典未入趨於宣室趣攝長於容
臺仍摘盤詰之文更勸索丘之讀登崇伊始簡注
良深吏士之見官儀正賴濟時之略公卿之明王
制毋忘致主之規可

叅知政事曾從龍除知樞密院事加食
邑實封仍兼叅知政事制

勅聖賢相維而致升平莫重弼諧之寄文
而有智略尤嚴宥密之圖廼睠譽髦游參太政進
莞五兵之重用培九鼎之尊倚成匪輕作命惟允
具官某學該乎今古識貫乎天人長江大河不足
以喻其量之深太山喬嶽不足以言其器之重夙
擅倫魁之望嘗陪近輔之聯仲舒見嫉孫洪不少
安於朝廷之上李泌出避元氏寧退處乎畎畝之
間既屢最於侂藩爰趣還於政路屬逢更化備罄
告猶直方大之兼全深得鎮浮之體知仁勇之並
用洞明應變之機顧邊瑣之孔艱期廟謨之宏濟
宣帝樞機周密固先二相之資憲宗紀律設張尤
切衆賢之助肆疇庸於間社俾進序於本兵總

星紐之權仍贊台衡之務邑畬申衍邦典增崇以成道德之彊以全帝王之勝噫天保治內所以收采薇之功烝民任賢所以定車攻之業維真儒之無敵知中國之有人務遠乃猷用底于乂可

簽書樞密院事鄭性之除同知樞密院事加食邑四百戶制

勅帝舜之格三苗有伯益以贊禹宣王之定四國有吉甫以誦申瞻宥密之孔嚴賴寅恭之協濟肆頒命綽叅典事樞具官某資蚤悟而夙成學旁貫而曲暢函鐘太族爲角始終皦繹之和玉璜黃流在中表裏清明之粹久矣冥鴻之去時哉儀鳳之

來不累日而長諫坡未再月而登政路以非常之際會爲有大之規摹難於定不難於回熟知國勢可以戰斯可以守洞識戎情爰進貳於本兵仍申陪於賜邑維予制勝咨爾陳謨府兵列於關中孰是相維之制屬國置於塞下曷爲叵測之防隱憂旣深區畫可後坐弭控弦之警密輸借箸之籌噫文武之憲萬邦政有賴中興之畫明良之康庶事盍共圖不應之功惟爾之能俾予以治可

同簽書樞密院事陳卓除簽書樞密院事加食邑四百戶制

勅民默救寧武功求濟於艱大之日王師遵養

晦用介於純熙之餘睠國勢之重輕視人謀之臧否進賢宥府揚號明廷具官某柳下惠之聖和樂正子之好善謙謙自牧夙全君子之風蹇蹇匪躬克慕王臣之操紛炎門之競驚獨夷軌之徐行一泯忝求兩無緇磷去知有命靡矜器能政理之長來亦何心益稔議論文章之望迨親攬於威柄爰趣登於政塗勤樸斲於梓材力贊厲精之治綢繆戶於桑土常懷先事之憂備罄壯猷采深邃簡就陟樞庭之序仍循書殿之班爵進公主秩陪邑采俾密裨於勝筭用坐折於遐衝噫明主可爲忠言朕方合介冑摺紳之議上策莫如自治爾蓋思此馬器械之圖必同寅協恭而和衷斯禁暴定功而保大式孚民聽庸對王休可

余玠起復宣教郎襄陽府通判兼京西制置司機宜文字制

勅具官某奪情非令典也惟從戎則許其墨爾以明敏練達受知于制閫秋防孔邇辟置自助起之望室貳政要藩且參莫府之畫不以家事辭王事其禮之變乎移孝爲忠勉圖協濟可

李勉平黎賞轉朝奉郎制

勅具官某廣右平黎上功爾以彊敏宣勞于莫府進二秩以獎之甫通閩籍遂階貲外異渥也試

于虔益勵勿懈可

軍器少監徐清叟除將作監依舊兼司
封郎官兼崇政殿說書制

勅具官某朝廷之用賢非一途信其賢耶用之惟
恐不亟故必躡正郎梯監少而升爾家傳正大之
學躬厲直方之操金華開說援古以證今璽璽不
倦朕甚嘉之攝主爵貳戎監而進大匠華軌直矣
朴素化行繕修務簡涵泳竹素綽乎餘暇輪人有
釋椎鑿議堂上之讀者試詳訪之以告庶乎他山
之石可以攻玉也可

太宗正丞蔣峴除軍器少監仍兼

左郎官制

勅具官某武監戎部之附庸官間無事少也占位
涉筆無幾牘然鄉用之材於此乎儲爾學問醇茂
義理融暢恬夷而莊舒卷阿吉士其人歟丞我麟
宗攝郎銓省几案文書填委不動聲氣隨手冰泮
而九品無遺鑒體用具矣試材以劇養望以暇鶴
膝犀渠姑貳程作朕方圖所以進爾者可

丘岳除兵部郎官趙與憲除都官郎中
兼樞密院檢詳文字制

勅具官某等國朝最重尚書郎之選懷香而奏明
光撲被而直建禮非郡最不真授爾岳篤茂而暢

邁守儀真以吏畏民懷稱爾與憲疏明而詳達
嘉禾以政平訟理著朕厲精政事以來歷課吏治
皆其良也表惟良之吏以勸郡國故俾岳郎于司
武與憲自丞大宗郎于司僕且攝屬于宥府太微
積星之次即日爲真顧不謂榮乎兵不可黷刑不
可濫必寢必措勉贊而長可

樞密院編修官趙汝謐除宗正寺丞仍
兼右司制

勅具官某三丞望華職簡而宰屬爲劇授官兼劇
以簡欲其材有餘於事也爾蚤收危級蔚著雅望
攝組省闥靡枉于法守而事不辭難沛乎其也
擢繇編纂涉筆宗盟仍行紀綱百司之職輕車熟
路疇能及之益涵致遠之器用對方來之渥可

汪之道除太常寺丞制

勅具官某漢制朝儀武夫拔劍擊柱之風爲之氣
奪使成周禮樂得見于後世情僞之防何如哉故
奉常置丞必通于古誼爾學博而約氣直而清時
輅冕舜之傳孰復蓋久談經官邸薰陶信厚涉筆
曲臺宜矣因革損益訂古而施諸今以美化善俗
亦惟無忘夙夜惟寅之義可

劉克莊除樞密院編修官兼權侍右郎
官制

勅具官某時政記者國史之椎輪經武要略則先
朝制勝典刑之囊括其書纂次於樞屬自昔必名
儒文士爾家傳儒藝蚤著文聲韞抱不凡脫餌科
級諸老先生多之簿正屬籍進升刪潤維汗青之
稱也與聞廟畫攝事郎潛精宏簡通對我殊擢可
陳一薦護獻俘有勞轉朝奉郎制

勅具官某垂瓠合圍穹廬就燼函守緒檻天綱獻
功于藁街脩途護役爾寔宣勞其升負外之階往
効幕中之畫可

顏信之獻俘有勞轉保義郎制

勅具官某淮蔡函骨獻俘之役爾與有勞其陞一
階以酬跋涉可

蔡仲龍除大宗正丞兼權屯田郎官兼
商太常博士並兼沂靖王府教授制

勅具官某等沂邸於屬爲近朕篤內睦擇師而教
之久則迺遷獎其勤爾仲龍爾商皆以經明行修
立於朝如玉在山燁然其輝潤楷範麟趾麗澤多
益是用進仲龍丞于大宗且攝省郎進商繼仲龍
議禮于曲臺而典教悉惟求舊懋詩書禮樂之訓
陶河間東平之風不特講留屯菟綿蕞之欽厥職
也可

安恭行除大理寺正制

勅具官某廷尉有正監及平漢制也我朝置正於
卿少之下丞司直之上厥選蓋謹爾材姿亮通風
渠明整蔚其梧鵠之秀丞郡以李法簿召未至升
之正以聽獄成甄拔峻矣書曰明啓刑書胥占咸
庶中正勲哉圖厥稱可

魏峻除宗正寺簿楊璪太府寺簿趙與
爽藉田令制

勅具官某等梗枿杞梓之材生於鄧林其地美矣
非雨露之養不成爾峻簡而溫雅而文爾璪茂而
通整而練爾與爽穎而秀韶而明英英世家翹翹
天支朕皆欲養其材以待用故進峻簿正璪璪
璪繼峻簿外府與爽繼璪令帝藉前輝後暎其容
懋於自獻可

馮去疾除武學博士制

勅具官某善用兵者不學古兵法而圯下一編亦
詎容無師慶曆置右庠之意昉此爾以通經博古
之學彪炳於文成均諸生咸歛衽其下風而平時
慷慨激烈論南北離合之勢兵家勝負之略皆有
據依遷之博士使業韜鈴者又得所矜式新美作
成之下安知不有武舉如子儀出於中乎可

劉宰除將作少監制

勅具官某朕宵旰圖治計効猶邈每嘆君子有士

之難然不敢諉斯世之無其人也爾隱居以求志
深造而自得君子人歟其論天下事目無全牛投
刃可以中桑林之節材抑偉矣旌招屢下未肯從
吾游何耶超越拘攣繇丞奉常徑貳繕監迎之致
敬有禮矣惠然來思毋興盡而返可

尤燭除知江陵府兼京湖路安撫劉輝
叔政績轉一官依舊知建昌軍制

勅具官某等河東以地望之重歸李布穎川以民
情之安留寇恂悉惟其宜爾燭抱識時應變之長
往帥荊州事權非昔而承上撫下無間言可以爲
難矣故齒召復還以壯吾上游控扼之勢爾輝叔
厲盡職奉公之志出守盱江邑里甫集而興利除
害無遺功可以爲善矣故選擇復留以尉千里戀
慕之情分閫乘壘任有輕重朕爲地望民情而擇
官奚有間哉各鞭厥後毋棄爾成可

葛洪除資政殿大學士提舉洞霄宮制
勅武公叡聖晚不忘箴國之心文子廉忠老猶篤
事君之志朕緬懷舊弼久樂燕居年垂九袞之崇
望稔三朝之重峻陞邃職昭示隆恩具官某嶧陽
特生之桐新甫後凋之栢致身廊廟雍容麟也之
來引興丘園翕忽鳳兮之去仁樂山而俱寂義飲
水以自娛雖黃髮之番番愈丹心之炯炯廼卷

古務尊者儒不得謝則賜杖而安車優游佚老如有問則就室而珍從懇切乞言方將遺掌故而訪伏生乃欲致少傅而從疏受旄期雖重於趣召矍鑠詎容於告歸陟祕殿之大名踵珍臺之優廩肆加體貌式聳觀瞻噫壽考維祺朕敢忽日秩月存之禮憂心如醉爾毋忘晨興夙寤之規益茂養恬對揚猷訓可

何處久太府卿兼知嘉興府制

勅具官某士君子任於時入儀九列出殿三輔通顯矣矧建惟月之旰馮扶風之軾而爲王人爾守故家之學術熟昭代之典章色莊辭毅爭是非於殿陛間不少誦用之郡國何茲萌之不戢戾氣之不弭哉因南徐惜其去之早知樛李恐其來之暮就乘夏縵趣布藩條徒得君重母薄淮陽也可

度正轉朝議大夫守禮部侍郎致仕制勅允矣君子佩筆橐以方真賢哉大夫掛衣冠而何亟能知所止盍貴其行具官某學守粹傳性全至善見於治郡有閉閣思過之風推以立朝得自牖納約之體進貳秩宗之典仍參師氏之司尚賴繩愆遽聞告老一正君而定未究責難之恭致爲臣而歸廼慕保身之哲宜升華秩用尉耆齡還家我雪之邊遺世煙霞之表莫回爾志徒嗟予懷可

平定府志卷之三
禮部侍郎致仕度正贈通議大夫制

勅有十夫子翼方來下於井參不一老慙遺乃去
騎於箕尾宜加祿典庸示眷懷具官某秉心醇明
制行平實大夫國人之譽蚤推其賢諸老先生之
傳晚試所學踐禁途而獻替造經幄以開陳每望
其儀嘗期以壽胡夕陽之莫駐忽朝露之先零臥
病於數千卷之間性焉已盡殮含於二三子之手
命也何言淒涼萬里之歸赫奕四階之贈英魂如
在茂渥歆承可

趙絀除大理寺丞諸葛十朋除大理寺
司直制

勅具官某等獄重事也鍛鍊以爲巧擗撫以爲察
析律以爲密深文以爲公而民命近止國脉斷矣
理官其可不選爾絀器涵渾璞薰然忠厚長者之
風挈繩直於園棘刑不失仁故就進之丞爾十朋
步中規矩藹然恂幅無華之美贊笏畫於國帑利
不失義故俾繼絀司邦之直皆以達吾好生之德
也敬之哉惟良折獄可

太學博士李渠除諸王宮大小學教授
制

勅具官某大學在西郊小學在國中四代之制然
也二學並設以教神明之胄明我朝作占爾行應

周旋之規學茂講習之澤相觀而善六館得師而
吾葛藟瓜瓞之秀不可無良範也故輟之司教于
宮庠小以成小大以成大等就傳肄簡而上皆知
勉於爲善則振振之化行矣可

太學正何處恬除太學博士制

勅具官某博士掌通古今漢始以五經置施讎之
易孔霸之書張生之詩小戴之禮皆嘗以是論同
異於石渠其通經何如哉爾涵渾厚之氣蘊精深
之學正于膠庠士服習其訓而不敢犯升之分經
講授之官剖疑析滯導正釋回以成首善之風乃
見師法可

架閣林宋偉除太學正臨安府學教授
林伯順除武學諭鄭斗祥除太學錄制
勅具官某等文武異庠而樞紐風化坯冶人物之
功等故選授皆明師爾宋偉志氣激昂講藝精博
爾伯順風規凝整汲古深長爾斗祥抱負瑰傑造
理閎奧掌故郡博士中一舉而得三士上庠以宋
偉爲正斗祥爲錄右庠以伯順爲諭望實孚矣教
學相長之道尚觀所進可

兩浙轉運判官顏頤仲除戶部郎官兼
知臨安府制

勅具官某朕間者親扎十有二條文義嚴尹以重四

方之本丁寧猥到奉行惟人爾立心直而平見理靜而明處事果而精將漕闕下聲采奮厲撫虎兇之出押知牛羊之求牧兼組彈壓都人士安之茲用擢之版部郎俾爲真周以尊枕于京爲盛漢以桴鼓不鳴爲能燮友彊弗友剛柔異施而國勢增鼎呂之重斯克訓于朕志可

都官兼檢詳趙與憲除直寶章閣兩浙路轉運判官制

勅具官某歲九遷而日三接遇合之盛也未半歲褒表者五六其非常之遇歟爾良而材寬夷而精密治備邇有善最朕旣增秩原其任未幾以丞大宗召又未幾以都官樞掾進又未幾以寶奎寓直國畿將漕選翼乎鴻鵠之遇順風誰能禦之夫諸路之漕一也而漕于畿爲難噓弱揉彊厭浮鎮薄與牧尹參錯爲功皇皇枕莫矣可

端明殿學士廣東經略知廣州崔與之除參知政事加食邑四百戶制

勅朕仰稽列聖並建輔臣在乾德則除餘慶於荆南就參國秉在紹興則擢趙鼎於江右入預政機肆嘉牧御之賢久鬱訐謨之望討論舊典揚厲新綸具官某存心以事天行義以達道風節高乎一卅威名聳于四夷泛三峽而歸久適山林之樂越

五嶺而召尚安水石之閑甫陞書殿以賦祠旋即
里門而宅牧期釋宵衣之慮忘居書錦之榮方飛
鶚懷我好音已肅登陴之諭迨急鹿鋌而走險竟
伸負固之誅環扶胥黃木以懷生極交趾蒼梧而
息警益深簡在可後儀圖維漢化之雖更尚唐綱
之未振聚民獻以爲救寧之本每拊髀於才難開
皇極以示會歸之方尤拂膺於道遠疇可裨於大
政信無易於老成以叶群心以熙庶務仍總提於
邦典兼申衍於邑租趣裝而來虛宁以待噫召公
成南國之化旣茂著於民庸尚父起東海之濱盍
共扶於國勢體予至意究爾嘉猷可

凌嵩除大理評事制

勅具官某天下之平一傾則用法者皆爲之輕重
故廷尉置評以平之爾秉心近厚蒞事詳敏退然
不知而不愠擢畫一之科亭四方之讞以身體之
以心求之何往不得其平哉毋徒曰三尺法安出
可

江西路轉運副使吳潛除太常少卿制
勅具官某禮樂根於心著於日用達於天地之化
百物之產隆古聖人重之故分命夷夔以治其精
後世文勝實衰一奉常掌其粗足矣矧卿不常命
惟貳之置爾以倫魁之望發名父之傳事

見從兄

仁義充於一性而禮以節之樂以樂之無非實理
出揚濡轡之光華入揔容臺之制作孰非實用哉
世教之防範不立人心之情僞益滋借鉏取帚拔
劒擊柱綱常幾少墮矣爾其思辨上下和神人之
道以暢所學可

馮田改差知金州兼管內安撫制

勅具官某襄沔上流爲安康以守行帥事左符每
艱其選爾守洋川有治行制閫謂才周應變績著
籌邊宜易鎮要藩信如其言吾得良牧矣郡據秦
楚蜀之會距商虢孔邇非讖常山蛇勢不足以固
攻守而撫軍字民其本也毋怠毋易可

資政殿學士中大夫提舉萬壽觀兼侍
讀眞德秀轉太中大夫守資政殿學士
致仕制

勅上印祈閑風獨高於東府掛冠告老景遽迫於
西山繫一身何有於去留而四海實關於輕重特
隆禮貌昭示眷懷具官某俊偉而光明直大而博
厚出則野老望車而迎拜識恨不先入則都人遮
道以聚觀用嗟何晚進陟詞坡之長密陪經廈之
游勉朕躬爲天地而立心使斯世見帝王之爲道
久韞經綸之妙徑躋丞弼之崇方觀厥成廼辭以
疾雖堅留於勸講莫力過於懷歸何但上下未信

人才之有間如失左右手況時事之多艱維聖賢之會難逢而治忽之機易判所期三事寧計一階噫君子不可諉兮尚想英規之在賢者樂與共也竟嗟初志之違往服恩徽用光祖道可

資政殿學士太中大夫致仕真德秀贈
銀青光祿大夫制

勅致爲臣而歸南惜孟軻之去非夫人之慟忽驚顏子之亡以十年退養廊廟之姿不一日與聞朝廷之議悲深易箚恩重書棺具官某休休焉有容屬屬乎其敬中庸大學之經卅講貫深微伊訓說命之格君敷陳坦白少徊翔於禁路首典領於文

闡爲國蒐賢忘身竭瘁方騰徹棘之譽已告負薪之憂趣升股肱旋乞骸骨鍾全氣於三光五嶽如斯幾人受正命於太極兩儀僅爾中壽舉朝歎息行道咨嗟顧民生之方殿屎豈天意之未平治咸缺金甌之望特陞銀艾之榮噫涉大水而無津軌濟奔流之勢仰高山而景行尚聞屹立之風九原可興百世不朽可

同簽書樞密院事陳卓贈三代

故曾祖嘉謨朝奉郎贈太子少保特贈

太子太保制

勅有嫺遠系爲漢卅家咸而欽欽而躬躬而寵則

位司空寔而紀紀而群群而泰則官僕射繫流光之無數蓋鍾慶之有源具官某故曾祖具官某充實中存浚明外著愛人利物

博古

通今

子拔列卿之穎孫奉法從之

華傳至爾曾進輔子治培深而發必茂積厚而報亦豐雨露九霄峻陟青宮之保雲來百世益增黃壤之光可

故曾祖母黃氏上饒郡夫人特贈文安郡夫人制

勅天降時雨山川出雲崧高駿極之詩所以作也必有嘖祉發祥之懿是鍾經文緯武之英具官某

故曾祖母具官某氏初行椒蘭柔儀蘋藻婦從夫而積累始大厥家孫生子以顯揚遂彊吾國丕顯曾門之慶申加名郡之封優然如存歆此休渥可故祖膏朝奉大夫太府少卿贈太子太傅特贈少傅制

勅寤寐洽功登崇人傑三階聯耀不忘夙夜宥密之忠五廟均休益茂春秋烝嘗之孝宜隆尊祖用顯詒孫具官某故祖具官某德履純明風猷簡遠荐更外服陰成勿翦之棠特立中朝氣凜後凋之栢僅升華於卿月竟鍾瑞於樞星贊我遠圖皆而遺訓班高亞傅特申加第之恩望重世臣

家之慶可

故祖母蔡氏魏郡夫人特贈安國夫人制

勅舜帝之後爲陳文王之昭有蔡宜其家室貽厥子孫具官某故祖母具某氏任只秉心溫其積行禮嚴舉按曳藻綬於名卿教篤斷機飛翠綏於法從傳芳再世制勝五兵不忘報本之恩宜厚追榮之典積恩徽於大郡新湯沐於名邦象服是宜尚其不昧可

故祖母汪氏魯郡夫人特贈崇國夫人制

勅含飴弄孫者家庭之慶爲醴烝祖者寢廟之榮肆倚重於良臣庸追榮於大母具官某故祖母具某氏淑均姆訓雍肅婦儀采南澗之蘋躬承家而共祀有北山之李世爲國以生賢睠時樞紐之尊贊我經綸之妙孝思維永德報宜隆易郡號於曲阜之墟進國封於崇墉之壤潛光煥發懿魄祗歆可

故父居仁華文閣學士正奉大夫贈太師特追封申國公制

勅朕講求采薇治外之略企慕烝民任賢之風擢時英猷列我該輔千尋之木以培植而茂九層之

臺以積累而高必有教忠乃能移孝具官某故父
具官某心夷而履粹學博而文雄締眷 阜陵佩
荷囊之清切受知 光廟撫茸纛之森嚴視萬石
以爲輕傳一經而特重克開哲嗣進翊洪樞禰廟
疏榮躋上公於二呂師垣流慶邁盛事於三陳可
故嫡母王氏鎮國夫人特贈燕國夫人

制

勅延范逵而開陶侃濟世之功闕元齡而卜王珪
佐時之業家或無於賢母國奚有於名臣具官某
故嫡母具某氏環珮雍和婉紛肅穆獻納論思之
最能勉其夫彌縫輔贊之功克昌厥子任方隆於
君之號音容未泯嚮習其歆可

故所生母俞氏新安郡夫人特贈和政
郡夫人制

勅綵衣之戲天性真樂板輿之奉人生至榮瞻予
兩社爲輔之英抱此萬鍾致養之憾匪隆襁典曷
尉孝思具官某故所生母具某氏毓詩禮之門嬪
衣冠之族怡聲下氣奉棘列之尊章柔則令儀佐
橐班之君子爰篤生於國棟肆坐幹於天樞心如
母存義以子貴易舊封於古歆加新命於西泠
惟紓蓼莪之悲抑亦示白華之勸可

故妻林氏信安郡夫人特贈大寧郡夫

人制

勅召南鵲巢之什夫人起家魯侯燕嘉之詩令妻受祉何嗟契闊不遠顯融具官某故妻具某氏佩服女箴踐修婦則于沼于沚齊明錡釜之共如山如河媚雅笄珈之飾宜百年之偕老胡一旦之溘先顧予樞臣失此內助宜郡封之加峻俾廟食之增華陰相其夫永輔吾國可

家抑除將作監丞制

勅具官某參井之光下濟岷峨之氣上直鍾其英者多清廟之唱故為盛爾淵於學而粹範於

詞而峻西產之珍也外間荐以名薦深鐫弗售特招乃來球璧宜在東序而涉匠監之筆朕豈以閭鄉善最為可略哉職優事簡姑涵雅望伯仲堦簞聲聞就禦可

四川制置司機宜文字趙堯夫除太社令制

勅具官某朕重名器甚錄其父之勞而進其子於周行不一二見也爾父以名法從當方面撫蜀控秦具有威略贊壽莫府爾抑有助朕何愛司社不以爲循陔之榮哉其砥礪事功使人知西平之有子可

史彌鞏王寓權務羨賞各轉一官制
勅具官某等莞擁國計所關羨必賞爾庀職京口
克懋厥官歲入有常能溢其額俾進陞於一列庸
獎厲於勞能可

史全之監軍平蔡州轉兩官制

勅具官某方城負固我師進討摩壘鏖戰遂復故
境爾監厥軍計功受賞兩秩升華勉思來効可

孫林張旺告發軍姦並補承信郎制

勅具某人羽林失馭敢犯紀律爾發其姦悉正顯
戮而京邑以寧登名武階儲材將列表示戎行使
知懲勸可


陳文孫知禹州制

勅具官某炎嶠守吏必諳風土稔習俗然後能盡
心於撫字爾端飭而敏於政守封川民無歎愁易
符高涼必能推之共理詩不云乎誰能享魚漑之
釜蓄貴不擾也往毋鄙遠其民可

淮東路兵馬領轄耶律均復山陽有功
轉三官授武德大夫兼知淮安州鹽城
縣制

勅具官某山陽淮之門戶間為寇保王師大討蟻
潰鼠逸爾塞旗鏖擊之勇莫府高之疊進武階往
理邊邑加意撫循毋失軍民之譽可

平齋文集卷第二十三



平家文集


天明乙未

内閣文庫		
番 號	漢	10277
冊 數	12 (10)	
品 號	國	3 1



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM Kodak



国立公文書館
National Archives of Japan

糊などで貼り付けられている部分がめくれない個所があります。

原本の文字など不明瞭な個所があります。

綴じ部(喉部分)の文字など不鮮明な個所があります。

平齋文集卷第二十四

平齋文集卷第二十四

啓一

謁莊提舉啓

鐵硯關心。莫續盤洲之脉。繡衣具眼。好開泮水之
荒。雖離奇了無先事之容。而啐啄或有同時之理。
不孤此志。端繫其逢。昔者東坡之門。卓然北斗之
望。惟斯文之宗主。在是故當世之豪桀。歸之后山。
仕徐嘗賦稻苗待公秧之句。山谷游魏亦哦小草。
有遠志之詩。皆繇郡文學之官。自附墨客卿之列。
品題一出。聲價倍增。四學士之名。等華嶽而俱重。
六君子之選。與日星而並垂。此風無傳。吾道誰屬。

必宗工之繼作則善類之爭趨伏念某骨相踳蹠
性資骯髒悲歌長鋏眉鼻之檄未能活計短檠床
頭之易猶在颯重闌之白髮峭獨冷之青衫訪三
洪於故國之中拜一范於公堂之上湖山醒夢何
嫌書懶讀之嘲山色療飢敢爲飯不足之歎顧此
游之不惡知其命之將通恭惟某官吾儒津梁斯
世鼎呂辟雍講道激揚洙泗之波祕府紬書排戛
蓬萊之氣胡斜飛而背日肯鳳駕以觀風以曾中
之鏡而照老吏之百姦以肘後之方而起疲氓之
九死且力扶於公議每樂得於英髦有覲賞音遂
忘躍冶僖公六轡九頓首於先驅惠子五車一點
頭於後覺歸依良切敷染奚殫

謝葉提刑薦啓

泮水思樂孰觀魯侯之旂舞雩詠歸首與曾點之
瑟孰虬蟬之借援自螺贏之投機引而進之望不
及此竊以古靈之藁莫匪名臣溫公之門類多君
子惟相知不在肝鬲之表故一見盡得眉睫之間
信公道之主盟乃人材之司命如某者拊缶不韻
挈瓶無竒遇會意之文時擬景福靈光之賦求安
心之法日對布衾陋室之銘羞襜褕以不爲任擲
揄而弗顧正請老農之學忽求病甕之師抵掌而
談古今千歲可坐致也屈指而計日月期年尚竊

遲之豈期夜雨之燈忽入春風之筆先鞭方着歸
袞難留遠埃風而上征殿奔雖後過屠門而大嚼
知味已多儻自茲或尋覆蕉之緣則其他可乘破
竹之勢造物所相終身焉依茲蓋伏遇某官列戟
名家褰帷膚使抱王霸之略前身江左之夷吾主
人物之評後世汝南之許劭障末流於既倒牖晚
學於方來淑氣一噓韶華四滿猶謂疎枝冷蘂有
未放之寒梅縱令換葉移根亦舊栽之紅藥軒昂
露剡特達知音某敢不恪守官箴勉求師說四方
逐東野自今有入道之門一辦爲南豐何日是報
恩之地

謝費提刑薦啓

光近繡衣久跂八鸞之末褒榮華袞忽開三鱣之
先一舉軒然斯文幸甚嘗觀種樹之傳因得論花
之評香出淤泥濂溪之愛蓮未爲過影橫籬落和
靖之好梅正自佳其或合山樊水仙而爲弟兄以
至集海棠醠醠而與賓客雖非同調還許聯芳如
某者猶有弗爲懦知自立收心學問不過乘欸段
而稱善人抗志功名未免帶櫪具而見公子來習
青青之佩得依皇皇之華曲爲吾道之主盟不以
衆人而見遇念瀕於蒲盍寵其歸飛一鶚於霄漢
之邊送乘鴈於江湖之上俾之末綴假以先容茲

蓋伏遇某官功過于張材如房杜轉移風俗力可
以迴萬牛主張人材言足以重九鼎滋蘭荃而方
茂擷芹莠以尤勤遂令孤楫之微亦殿群英之後
某敢不篤於信道期以酬恩誦醉時歌寧嘆廣文
之冷作進學解尚觀宰相之方過此以還未知所
措

謝鞏都大薦啓

虎鼠不齊幾多屬吏熊魚兼得獨一門生異哉知
己之深榮矣終身之託嘗觀古人推賢之道因得
君子引類之心仁傑之舉束之婁稱爲宰相之器
蕭何之薦韓信數謂有大將之材言不厭多用然
後已每嘆此風之寢遠不圖今日之猶存如某者
真是孤寒甘從獨冷過辱諸公之遇特開寸進之
塗着從事之衫固知有分給尚書之札猶嘆無因
忽聞一鶚之飛復許六鰲之掣俾與政事文學之
秀者早及英華精銳而用之茲蓋伏遇某官範世
清規鑄人妙學以修明公道自任如日行天以涵
育人材爲心如川赴海最憐冰底之芹藻屢采水
邊之芷荃始終三年眴睽一意某敢不力守狂狷
之行多讀聖賢之書陳古靈疏名以聞未知所報
趙韓王綴奏而進更大其成國士自期墨卿莫究
回鄱陽章宰啓

閱千佛之經升沉有異作同官之記先後無多分
桃李之餘陰動茆芹之生意恭惟某官氣摩霄漢
手摘星辰過秦論以來復見作者諭蜀檄而下蓋
優爲之蜚聲翰墨之場抗志功名之會凜凜習中
之兵甲堂堂眼底之金湯八面當鋒一身是膽張
睢陽之罵賊誰解秋圍劉并州之却胡竟成宵遁
歟當居最賞未酬勞收唳鶴之餘聲躡飛鳧之雋
武未施於事已信其能三異政成沸弦歌於東楚
十行詔下鏘環佩於西崑某一第八年重親寸祿
睨健翮於扶搖之上抱寒根於寂寞之濱忽得年
盟好爲道地有酒酤我不須問識字之奇退食自
公政可說從軍之樂

通交代林教授啓

才名方冊之間願從而後交好佩衿之地偶在其
前糠粃包羞藻芹增氣恭惟某官學傳伊洛文過
晁張橫絕銀河織天孫之雲錦倒翻滄海弄明月
之驪珠妙舍選之青錢高臚傳之淡墨欲培所養
靡疾其驅乃睠楚東庠序之林實爲江左衣冠之
藪一關隔市俗客不來雙塔照湖偉人間出宜得
胡安定之宿望以修范文正之遺規螺蚌地清聊
對簷花之雨螭頭天近即迎御柳之春某喜共儒
門媿妨賢路經腹之嘲未解刀頭之夢頻驚遺君

子以桃李之場逝將去此納諸生於芝蘭之室尚
亟圖之

生日回學職啓

乾策年華方驚去速土圭日景又欲添長雖無蛻
鶴之姿僅有聞雞之志辱高懷之期許迂雋步以
臨存出幼婦受辛之詞推老人甲子之數絳紗幘
底欠度曲之雪兒青玉案邊付誦詩之驥子其爲
感佩未易名言

謝黃留守科目啓

分教三年受察詩書之師去官數月登名文學之
科藐無地以先容恍自天而下墜得公借重舉世
知榮竊以古人以文表見者蓋多後世隨手漸滅
者皆是作毛穎傳猶謂類俳續春秋經或譏失僭
要得宗工之印可始成後進之聲名伏念某嗜古
忘餐愛奇成癖有歐陽必同歐陽之說期之千百
年之餘非子雲莫好子雲之書豈以一二人而輟
未離翰墨之逕遂墮虀鹽之場患在爲師教因知
困謝江郊之陳跡臨京國之迷津吾黨雖狂誰門
可扣遽辱收千金之敝帚奚啻獲一壺於中流機
會之來神明所相茲蓋恭遇某官日光玉潔山立
時行著書立言襲六爲七而無媿解疑辨惑問一
得三而有餘發先儒之所未傳使後覺之有定鄉

頃東游而納謁因北面以知歸見若平生期諸晏
歲不謂久違於矩範乃蒙肯記其姓名雖無子固
之文亦應溫公之格某敢不益彊所學期放厥辭
日近長安喜聽袞歸之詔雲趨材館終歸釣播之
功

宗教謝廟堂啓

鑿鹽有分未寒侯類之盟橐籥無私仍玷宗庠之
選寸進當安於常分一命皆出於至恩拊已包羞
逢時知幸竊以東平爲善之最樂河間大雅之不
群由其得涵養學問之源所以忘生長富貴之習
欲陶成於公族必鑒擇於師儒如某者久坐文窮
難書癖頭顱如許敢謂緝緝有封侯之方面目
可憎自知管城非食肉之相末第坐踰於一紀冷
官僅了於三年畫餅可觀炊沙不飽靖念皇極無
棄人之法况當太平樂與賢之秋歸誠光範之門
妄意翹材之館惟愛人之以德故應物之無心謂
其嘗在文學之科可使往分屬籍之教資格雖慙
於黃甲姓名猶託於青氈磨鐵硯以爲期徒抱益
堅之志垂玉衡而在上莫名平施之功茲蓋恭遇
某官德享天心功在王室網維萬化國有關睢麟
趾之風羽翼群經人由中庸大學之道力任斯文
之重妙裁吾黨之狂權度無差斗筭不棄某敢不

篤於絜已思以淑人遲瓜戍於八年之餘疇能縮地速化功於一息之頃尚覲廻天捧戴惟深珥摩罔既

謝莊中書舉自代啓

禁路問津首玷十科之選詞垣正席仍推三字之儲賞音愈久而愈深推轂不進則不已感由心刻聲與淚俱竊以東坡免試而薦伯脩南豐初除而舉貢父是賓是主無古無今如某者鐵硯僅存金桴何有少未聞道徒寄榮華於飄風之中晚悟作文頗見涯涘於霜降之後抑而爲說難孤憤放而爲牢愁反騷是特不平之鳴殆非有用之學胡傑出於一佛俾同升於諸公舍旃舍旃苟亦無然雖讒波之可畏類我類我久則肖矣終恩地之有歸對黃茅白葦之秋光借紅藥蒼苔之春色聞風甚偉學步良難茲蓋恭遇某官道德宗師文章宿老紫微閣靜一揮贊普之書白玉堂深婁草河涼之詔每謂絲綸之手要湏錦繡之習豈無他人正在我輩爲命得裨謚子產顧不韙歟稽首遜及前伯與亦幾過矣某敢不彈冠而起執筆以從醜婦効顰詎作金屋人家之想癡兒說夢尚追鈞天帝所之遊銘德惟勤抒詞莫既

謝廟堂啓

雷霆震疊正切省循日月清明遂叨杖拭轉化功
其有力戴恩紀乎無涯竊以剝復相乘者陰陽之
機生育不窮者天地之德蠖伸於屈沍寒之氣回
春苗槁而興大旱之雲爲雨凡物皆尔於人亦然
如某者魏瓠中枵晉錐外鈍生涯牢落初無郭外
之田學殖荒疎僅餘床頭之易或喜其有山林之
氣或疑其非邊幅之材竟坐五窮難逃百謫大爲
世僂方無地以容身過重親憂遽終天而抱痛所
欠一死不圖更生緇衣之宜又改爲丐端出中心
之好白圭之玷尚可磨也大明前事之愆復俾臨
民免爲棄物茲蓋恭遇某官身任四海九州之重
道爲五帝三王之師排幹黃河回天下不能回之
勢涵滄海受敵已所難受之言趙韓王開國之
元勲文潞公服人之厚德相去幾世合爲一人乃
若以春秋爲繩世之權以皇極爲用人之法平心
而運公是以昭脫諸千仞之淵示以九遠之路虎
豹啄下人些知莫扼於九關鸞皇爲先戒兮願早
施於八翼大造所及終身焉依

謝廟堂差幹官啓

公朝天大甫開荆棘之塗邊閭地雄遽綴芙蓉之
幕驚魂復返感涕交流蓋嘗絕大江而東遊倚長
淮而北望雖有可乘之機會未知一定之規摹

於偏安殆非孔明公瑾之志急於進取未免蔣詵
義之之憂雖堅忍可與成功而審重最爲上策首
擊尾應尾擊首應要莫測於吾謀我出彼歸彼出
我歸使常牽於後顧縱未大尉乎玄黃之筐亦可
坐弭乎赤白之囊責在元戎亦資婉畫如某者交
無狗監泣有牛衣滄浪濯纓早嘆鬚毛之颯太行
倚劍斗驚髀肉之盈居紛紛其離郵分落落乎難
合化功一轉生意頓回朝刊黜籍之丹暮剡辟函
之墨拔從九地實在重霄巴西此日之放魔可謂
仁矣塞北向來之失馬詎非福耶矧去家無千里
之遙而望祿特半年之近生成至此稱塞謂何恭
惟某官以社稷臣爲帝王佐十年生聚十年教訓
坐凝更化之勲一歲力役一歲戍屯深軫佳兵之
慮惟尊安中國以爲急斯鎮撫四夷而有餘旣素
定於廟謨尤不輕於邊瑣大先謀帥細及簡僚遂
令守玄尚白之蹤亦在依紅泛綠之數某敢不痛
心前轍加意後鞭不徒丐升斗以養親庶幾展尺
寸以報國平定安集况曾讀建武天子之詔書踴
躍歡呼所願草頡利可汗之露布依歸大造誓畢
餘生

通崔安撫啓

捧研從游久綴門人之列分弓叱役就充幕吏之

負天巧其逢人榮所託竊以小范之帥環慶舉
方平大蘇之牧中山進李端叔兩公辟士之盛事
百世知人之美談不圖晚生親見前輩恭惟某官
光明而亮偉端重而沉深望之儼乎道德之容挹
之薰然仁義之澤驅千兵萬馬於筆下風雨恬霽
而無聲吞五湖三江於胸中波濤舂撞而不動掣
兕麻源之右掣鯨桂海之南清畏人知靜忘物競
其去也諸公挽留而莫可其歸也四輩趣召而後
來甫躋郎省之華亟填戎垣之重秋風保障威行
萬竈之煙春日耕桑騷動一犁之雨淮南倚以爲
脉山東聞而屬心况狐兔失穴之餘正貔貅扼塞
之日人皆輕進公獨隱憂謂中原機會之方來而
外治規摹之未立灞上棘門如兒戲耳尚遺債帥
之風方城漢水雖衆用之未免市人之戰要須彊
國勢於精神之表乃可制虜命於掌股之間反覆
開陳庶幾感悟彼賢儒幾敗乃事徒諉諸一勝一
負之常此元老克壯其猶必運以萬舉萬全之略
寧少遲於遄召庸迄奏於庸公坐縛可汗盡還輿
地某四年食客三世夙緣濟慈航於黑風大海之
中送靈槎於黃河昆侖之上烏幕濫巾於溫石兔
園接袂於鄒枚誓上下以相隨抑東西而惟命誦
蕪城之賦熟形勢於曾來續泗水之碑寄功名於

不朽矢心歸倚拜手敷陳

謝崔安撫舉改官啓

子來幾日甫爾依紅我有二天居然破白惟屹立于世方橫潰之表故力挈於人不比數之中抒敬辦香歸恩丈席竊以人材由江左而降幕客在淮南爲多韓魏公得王金陵而不及賞音牛竒章辟杜書記而未嘗推轂遂令遺憾尚見前聞伏念某讀書不多涉道更淺方其始銳自謂五石瓠可剖以爲樽迨此中艱乃知六州鐵猶鑄不成錯以舟行岸移而閱世變以霜降水落而觀物情虛憊寢平剝蝕漸復富貴非吾願未敢云然貧賤王汝成容或有此然紛紛成敗之異論而咄咄炎涼之易情不固一日之逢遂有終身之託拔從食客列在屬僚歲寒東閣之梅結根已舊春色平山之柳成蔭方新廣平下坐而揖之前相如末至而進諸右使無地主誰破天荒茲蓋伏遇某官功蓋三邊眼高四海論材以相馬之法觀過於奪牛之蹊得一士於河南了無貴戚之命空群良於洛北惟有山人之媒共驚甄拔之殊誰識機契之早五更進履已是會心半夜傳衣不容放手故於落落難合之會而有沾沾自喜之榮上下四方盡是依劉之地始終一節敢忘在莒之時銜戴寔是深編摩抑略

謝丘安撫舉改官啓

從莫府之游南當春後上公車之薦忽在秋先軒
軒特達之知落落希闊之遇得之驚躍傳者信疑
竊以橐駝種樹以蚤實爲功狙翁賦芋以朝得而
喜伊物理之猶爾豈人情之不然矧墮七選之坑
欲結五剡之塔寧爲雞口毋跂狼胡必考素以點
頭始探期而入手如某者有倅直之短無趨和之
長肝膽輪囷據鞍之髀易蒲頭顱蕭颯讀書之眼
尚明不能忍藜藿之飢漫欲決枋榆之起勉辭襁
褓來拂堦螯多以白面書生而見嗤獨得紫髯將
軍而許可樂哉飛泳藉甚推揚着鞭要使出祖逖
之先成佛肯教在靈運之後未回沆碣預借扶搖
茲蓋伏遇某官親得南軒之傳世濟文定之美非
有心於富貴而富貴自迫不求名於氣節而氣節
更高脫彼少年新進之場運此真儒無敵之略識
微見遠常懷猛虎出柙之憂彊本折衝自有老羆
當道之勢至若虛以接物而謙以下士明於見善
而勇於拔材又當路諸公之所難實舉世善類之
攸屬矧在晚出豈爲至榮本無疇昔之緣便蒙刮
眼不負平生之學即是酬恩百喙可窮寸襟莫寫

賀侍御啓

榻前承渥柱裏升班物情大早之餘適蘇霖雨

象太微之次首應法星九重倭知人之明四海
任賢之福竊以兩儀具清明廣大之體萬物鍾扶
輿磅礴之靈得其中和者爲景星爲鳳凰全其剛
正者爲屈軼爲獬豸況千古之間氣生一朝之偉
人如伯夷聖之清如孟軻勇於義用能任天子耳
目之寄于以壽皇家氣脉之傳恭惟某官步趨聖
賢冠佩道德旁蹊捷徑不求少室之山絕岸孤峯
坐閱瞿唐之浪顧環轍之久矣終覽輝而下之簪
筆烏臺伏蒲騎省上不爲危言而駭聽下不爲矯
節以沽名惟致辨於君子小人之間而防微於宦
官女子之際外邪不入元氣自充以培社稷無疆
之休以兆國家中興之象深締邃嚴之眷進顯雄
劇之權堂堂不撓爲儒宗謀猷惟舊行行且止避
御史風采又新然而一論列關吾道之盛衰一建
明係斯民之休戚時雖無關事或可言士夫懷寡
廉鮮耻之風將帥乏趨事赴功之志戰守之規摹
靡定賞罰之綱紀未張斜封尚費於調停橫斂更
多於朘剥惟正人用則國勢重於黃鍾九鼎惟公
道行則人心安於泰山四維此皆前日之已言抑
亦于今之最急願申欲議迄濟不平當今文靖之
警君復聞于世毋使清獻之論事專美於前狂斐
一鳴隕越萬坐

謝李坡舉自代并應詔啓

草正元之諫疏既許同升應建武之詔書又蒙特
舉人驚再推轂於朞月之頃誰信屢擊節於十年
之前撫往事以慨然幸平生之有此伏念某灌畦
自命媚竈不能忽起市虎無端之疑遂罹蹊牛已
甚之禍丹心獨破疇能百口保之白髮相看寧忍
一家哭矣已甘墮地之棄甌不謂中流之得壺剪
紙而招驚魂探囊而起壞證雖乏洛北山人之譽
亦備淮南幕客之貞憐抱影之零丁爲騰書之旁
午六鰲連掣五鶚齊飛它人不足而我有餘大造
已公而公未倦讓讓龍而讓朱虎誠過乎謙進
豹而進魚而進樂羊抑何其力所謂真知己者夫豈
輕予人哉茲蓋伏遇某官地望如山門庭似水萬
斛轉柁運平國論之偏五色補裳彌縫君德之闕
其正足以用大其公足以生明去小人如去稂莠
不厭其芟夷愛君子如愛杞梓寧過於封殖引蔡
襄而居同列有言必酬薦唐介而處要官弗進不
已爰得魚而取掌仍騎鶴以纏腰曷勝自喜之情
猶有無厭之請苦心選佛固慙衣鉢之傳九骨登
僊更乞刀圭之賜寸忱有屬尺楮奚殫

謝制使李尚書舉改官啓

謁裴度於洄曲之營最居人後拔杜牧於淮南之

幕忽處衆先得之擊地而驚恍若從天而下竊見前輩所謂汲引孤寒之綆近世以爲攀結權要之梯倚冰山爲太山延頸待囑指鼠璞謂荆璞拱手奉歸名爲蓄吾家之參苓實則種它人之桃李自喜得計烏知可羞若其點頭堂下之一言具眼坐中之小異幾年無此一日見之如某者材非奇奇老已冉冉方虛憍恃氣安知涪翁四句偈之有功迨拂亂動心始信岍山三字箴之得力眇鴻毛其自命最難助以何求竭來刀斗之鄉偶備縶轡之役既不能磨盾以草檄又不能推枰而畫壽第於內臂拍之拘攣與夫上下精神之消磨久所感

觸之隱憂顧國事以如斯於身謀而何有炎門耻炙捷徑甘賒道之將行歟但居易以俟命人莫我知也欲忍窮而著書不圖負壑之秋乃有回瀾之力未齊五鶚先獲一麟固非曹劉沈謝摸索以可知且無金張許史游揚而爲助迫出望表猥塵選中茲蓋伏遇某官翰墨大蘇威名小范黃髮親齒入奉壽母之懽織文鳥章出寬聖主之顧以忠孝兩全之懿用文武兼資之材號召青齊拍摩燕薊已斷匈奴之臂行漆月氏之頭與共功名孰非豪傑乃至噓一寒之谷欲使脫七選之坑以勸着鞭以愧刊印偉此舉之尤特信所關之匪輕某敢

不敬佩十六字之褒期答二三策之取九藥生翼
初匪求而得之辦香報恩當有大於此者卷卷銜
戴切切敷陳

謝權帥洪提刑薦啓

駢揚州之鶴正切夢思冠楚人之猴忽叨論薦嗟
世道之寢薄幸宗盟之有歸竊以終苓同生於松
而終託苓為根葉荷皆出於藕而葉倚荷為蔭惟
鼻祖源流之無間故耳孫枝幹之相依伏念某少
耕潛山壯宦鄱水訪盤洲之事業正印難傳誦野
處之文章餘燈可續柰九京之不作竟千里之空
還期芳菲菲而彌章今歎景翳翳其將暮不圖

州牧出我世家蔚乎相扶日有川泳雲飛之樂劃
然長嘯時窺山鳴谷應之機胡人事之方乖曾身
謀之靡定帆隨風引舟挾岸移長缺自隨勃窣塊
牟之底短檠相對淒涼刁斗之邊皇華不隔於照
臨吉語忽傳於吹送一鳧已去五鳳俱飛雖狄武
襄之譜梁公大非吾耦然呂文穆之舉夷簡豈無
它人出於真情有此奇事茲蓋伏遇某官器能管
樂苗裔韋平材恢恢乎辦多身矯矯其立獨山韞
玉而自潤粹然有道之容水中準則不爭澹乎無
我之意扶立故家之喬木挽回末俗之頽波涕唾
熱官金玉寒峻謂族姓如晨星之有幾况主賓與

春風而俱和置冗蹟於四賢借華褒於一字俾懋
所學用昌斯文白髮聲名魏難齊於二陸青雲步
武尚自附於三洪深感于中姑陳其槩

謝賈制置特薦啓

小單于之膽落方集奇謀大都督之眼高首薦下
士試新刻黃金之印署獨銜碧玉之章同日驩傳
一時盛事伏念某萬無能役一不敢欺蒲架挿書
自矜鄴侯之富舉家食粥誰念魯公之貧風霜不
貸而枝葉凋歲月已老而根幹在往來塞下出入
兵間車麟麟馬蕭蕭每痛心於浪戰田确确牛吒
吒更攬涕於煩輸兩年之賞識固多一旦之遺

元是義隨磨轉鴈逐陽飛趨幕折腰甫識少陵之
面上堂携手已知駸茂之心聽說劒於酒邊許推
枰於燈下良由機契遂以名聞茲蓋恭遇某官貫
穿古今揮斤宇宙望長安於灞岸一生忠義之心
進雍丘於淮陰百戰功名之會用紹興分道之興
故施慶曆定邊之規摹旣綏靖於山東且經營於
河北築臺延士思得良籌推轂進賢不遺餘力爰
俾摧頽之下走亦蒙特達之殊知念圖報之無它
惟納忠之有益虎兕出於柙曩嘗失於防閑蛇龍
放之菹今盡思於區處勢必知己而又知彼權當
在我而母在人御衆莫若寬平制敵無如審重財

散則民乃聚食足則兵自強此皆已見於施行務
在更加於推廣大享衆望弘濟中興繪像雲臺不
媿膠東之傳磨崖涪水願書元結之碑觸突有誅
震惕遐聽

平齋文集卷第二十五

平齋文集卷第二十五

啓二

通李參政啓

退思巖之勲名聞從諸老獨樂園之風骨識後群
兒惟伯陽實出於洪宜孔融自通於李輒將一辨
仰扣六符竊以武侯未起於草廬熟知成敗晉公
雖逸於綠野常佩安危上天非無故而生賢君子
蓋有待而行道矧今大勢異昔平時朝廷未深察
取燕之圖邊鄙或復用攻遼之策國計捉衿而見
肘民生剗肉以醫瘡士懷諛鶴之心將有養鷹之
志屯棘門屯灞上視紀律以如無出斜谷出祁山

問規模而猶未縱使置一勝一負於度外可不計
五大五細於目前鬱攸煽煽而薄京師熒惑吐芒
而犯帝座仰占天意似應人謀朋黨漸萌未免向
時一網之慮元良未定豈無異日半紙之憂彼方
急而維楫莫施證已壞而刀圭安在上深念此公
有意乎恭惟某官道德宗師文章宿老太山之雲
爲雨自有機緘虞淵之日洗光不動聲色方權姦
之用事惟明哲以保身幾年出鄴侯以避元載之
鋒一日進弱翁而正霍禹之罪雲霓盡掃宇宙復
清五龍夾以飛旣展濟時之略四蛇入其宇初無
不世之心鋤梅花之月於未春飲木蘭之露於將
曉觀渠血拍攢我醉眉然救否者莫謹乎苞桑而
反剝者亦由乎碩果離當復合危可使平我公有
衮衣以歸趣登上相天子負斧宸而立迄濟中興
某涉道未深謀身更拙聊爾署冗銜於紙尾居然
託後乘於遨頭矯詹峨眉太白之間知有東坡穎
濱者在雖執鞭之晚矣尚捧研以從之蓋欲質平
生書囊之疑豈止爲方來夾袋之地後天下而樂
況曾協於寅恭安宇內爲先願無忘於辰台寸忱
所屬百喙奚殫

上劉閣學啓

駟玉虬以征尚遲牀下之拜騎青牛而過敢後道

傍之迎顧斯文千古以無傳而前輩百年之幾目
熟窺梗槩粗識源流蓋自蜀公以來始有後漢若
作其清明則青天白日其高深則太山黃河參古
今之典刑具出處之本末權門鼎盛在熙寧自拔
於熙寧聖化更張處元祐不黨於元祐以雞鳴嚶
嚶之志追鴻飛冥冥之風去不可留歸猶未老巡
梅花而索笑浩若胸中之春樹護草以忘憂蕭然
物外之樂盡醉於田父泥飲之頃相忘於舍者爭
席之間文章散落於人寰翰墨流傳於夷裔雖有
詔以強起曾何心於復來然而一飯不忘乎吾君
百才欲濟乎斯世有開廟畫每以驛聞宗盤案之
首東諸嗣事之十九疏民瘼已亟次及條例司之
數千言仗孤忠以直前犯衆怒而不顧寧爲仁者
之勇兼得聖人之清天下之達尊三孰如公者國
中之儒者一其捨我乎賜劔履以給扶偉衣冠而
入侍某邀頭後乘鉗尾冗銜每思退續離騷之詞
何幸親問太玄之字觀神和而氣定知目擊而道
存自憐孺子空侗母惜一編之教更願老親強健
亦如三壽之朋敬在下風有如曠日

上安宣撫啓

魚鳬鰲叢以來形勢千古伏龍鳳雛而後勲業一
人朝家西顧以寬憂屬吏東鄉而聽令九拂卯楨

之近三熏子墨之恭竊嘗泛觀古今制敵之機頗
識東南立國之勢腹心江浙腰膂荆襄維蜀道之
山川如人身之頭目吳合之則可奪曹瞞之氣晉
失之則難折阿堅之謀雖太白義眉四萬八千年
始通中國然西陵江都五千七百里莫重上游唇
亡則齒必寒首擊而尾自應欲混鼎峙三分之地
無如坤維半壁之天恭惟某官抱王佐之材任天
下之重乘雲氣騎日月橫驚沈寥之間歟鴻濛肩
雷霆獨立汗漫之表以道義養吾之大勇以忠忱
運我之壯猶唾怒虎其方拏截奔鯨乎已沛聲子
之罪血模糊於鵠體正劉關之誅刀紛綸於

脯三綱盡弛以重立四極既搖而復安逮黑谷
繹騷重綠林之俶擾病逢壞證棋入危機人寒
而莫支公攬涕而又起矛驅海若障漢沔之頽瀾
甲洗天河歛殺函之妖祲威行夷夏功塞堪輿益
歸上相之班猶坐元戎之帳以西土之方靖宜東
人之欲留不惟後勁以中權要使左鱸而右粥勃
律天西之野春草犢肥蓬婆雪外之城秋風馬臥
惟梁益無鳴弓之警則荆楊享奠枕之安紀社稷
之元勲申山河之信誓微管仲其左衽矣夙高耆
定之謀歸周公以衮衣方佇翼升平之運某暫濟
班尾即赴遨頭願治中之非長置負外而奚益惟

大莫府推赤心而聽計而小朝廷開青眼以延材
甘踏羊腸願詹馬首出師一表既於伊訓說命而
有光皇武兩詩當視吉日崧高而無媿委心歸倚
拜手敷陳

添倅到任謝廟堂啓

東望日邊迷前塵於班尾西來雪外陪後乘於遨
頭轍行地以雖遙梯倚天而實近作平生不到之
夢出造化非常之恩伏念某文字蟲魚姓名蟣虱
偏仄何偏仄定非湖海之豪伊優自伊優粗有
林之氣襲子長南游之遺跡放少陵北征之壯
游涉海漈以方休掛江帆而又去石頭牛渚六朝

勝之如存夏口烏林三國英雄之安在木葉秋
於楚些竹枝寒送於巴歌每渺渺以凝思還逢逢
而催發灘稠十二培之上路遶百八盤之間鹿角
狼牙旋渦正沸虎鬚龍脊激浪欲飛電驚鯨甕之
咭訝雷吼業牀之漬薄寄性命於一筏蕩神魂於
兩橈可謂人生之畏塗然亦天下之偉觀三峽蠱
井絡而上動搖星辰一川翻月窟而來傾倒河漢
屏巫山於絕岸柱滌瀕於中流峭立百牢之關橫
陳八陣之磧脚力未窮於涪萬目光已射於岷峨
萬里橋邊啁哳估舡之曉百花潭上喧呼藥市之
春以治中別駕之冗貲追方外司馬之樂事經行

所到獵取已多進可廢王褒益州之詩退可續太
冲蜀都之賦匪私鈞播疇與王成茲蓋恭遇某官
道大而有容功高而不伐謂紫雲樓之議論在安
細民而天章閣之條陳務去宿弊吐坤軸之萬里
邈君門之九重碩鼠多貪小鮮易擾既擇蕃宣之
雅望又收關決之驚材俾笏而魚隨琴與鶴惟民
愁之既劇且兵調之方殷衛公籌邊之圖必精思
而制勝武侯出師之表非快意以徼功要當爲根
本之謀乃可固藩籬之勢勉毗鎮撫期荅生成一
弛一張知妙得濟時之略五細五大願早施賢
之功言非所宜死有一罪

通成都倅啓

手弄參旗快治中之展驥眼穿危棧容負外之題
輿淒其一葉之來幸甚萬間之托恭惟某官儲岷
巫之秀傳坡穎之源天孫雲漢之分軒軒傑作巨
靈太華之擘矯矯竒材藏諸用而不窮隨所施而
可紀盍陟道山之峻猶迂錦水之遙泥軾生光油
幢倚重浣花勝踐聊接武於遨頭視草新除便問
津於龍尾某淮城久戍蜀道遐征雖云裂風月而
三之不過旅琴龜之一耳古心而又古貌自信獨
難異人而得異書相從未晚

回節推袖啓

殿上呼盧之讖早動諸公幕中倚馬之材肯交餘
子接茵已幸銜袂何謙恭惟某官琅琅國子監之
書爛爛蓬萊宮之賦一通脫手萬乘改容杜書記
在其下風嚴少尹置諸上客如石投水猶珠生淵
拍籌邊之兩圖平章蠻徼草出師之一表號召秦
關盡舉芙蓉之華遂翻芍藥之影某幾年心敬一
日眼明略窺小陸之文已識大任之韞屋頭問訊
欣雞犬之相聞劒外征行恨燕鴻之相避

回僉判袖啓

星槎仙客忽來笙鶴之聲雪錦主人益壯琴龜之
氣辱在聯事願言定交恭惟某官賀白材名冠
文采集芙蓉之裳而脩初服不着一塵卧蓮
舟而讀玉書平吞八極屢試發硎之刃難藏露
之錐宣閫拔尤戎垣借重落筆於龍筋鳳髓之上
寄興乎魚泳鳥飛之間姑贊籌邊即登天祿某遠
趨幕底近接墻陰合簪甫挹於清標撫袂首勤於
好語手遮西日曷圖橫草之功脚踏東風當共浣
花之樂

龍州到任謝廟堂啓

萬里橋邊甫解佐州之組百牢關裏忽分護塞之
符名未登聖天子之御屏身已入眞宰相之夾
袋夢想不到頂踵有歸伏念某冰霰窮至風濤苦

海藐爾幾年之流落軒然一旦之遭逢補太廟齋
郎入扣天田之角與京官通判出捫雲棧之參了
無關決之長惟佩丁寧之訓一來錦水四度劒門
雖弗陪大莫府之賓猶自詭老元戎之客其於徇
國靡忘愚公移山之心所謂籌邊但進彭祖觀井
之法偶畢葵丘之戎方謀栗里之歸不圖寒根遽
動春意茲蓋恭遇某官曾中水鏡筆下化爐有猷
有爲有守則念之得箕子建極之意乃牧乃事乃
準惟后矣循周公立政之規凡諸老退而無營
衆正用之未盡大爲坯冶悉入蒐羅上關豐蔭
廿之仁下應泰華一陽之象爲今元祐嗣昔漢
知堅甌之餘生乃釣之舊物亟令剖竹驟佐
瓜歷吉日以問塗朔下風而委命丹心許國政
畫戟之榮白髮倚門第想綵衣之樂兩全命誼一
出生成

謝制置崔閣學啓

目送飛雲欲問吳頭之路手遮落日忽乘蜀尾之
關告赤崖父老以天子之聖仁諭青菴種族以
元戎之威信凡束衿而聽令皆彈指以知恩伏念
某危機熏心老色上面拍銅斛而舞角銳之習已
空摩石鼓而歌嗜奇之癖猶在惟鶯鳩不能以自
奮故駉蛩有待而後行追隨一琴跂履雙初草在

將軍之檄雖未愈於頭風詎崔大夫之詩亦能驅
於瘡鬼滿耳去矣行復尼之走絕棧之危途訪緹
兵之間道邦人嗟異昔無朝士之來山獠傳呼今
見幕賓之出樂郊至止道院蕭然長嘯而萬壑應
獨立而千章拱真成吏隱何有官癡茲蓋恭遇某
官心與造物者游身任天下之重以強國勢爲定
三秦之根本以收人材爲用四蜀之規摹乘鴈雖
多前魚未棄始平辟司馬以丞郡其事略同小范
挾師魯以行邊所期更遠故雖公斯世而稱物未
免私其人而擇官矜此疎庸置之簡靜俾於抄
崔杼之暇而求切琢磨之功爲君子儒從先生
後類我類我久則敢忘函席之規式微式微其
不歸尚尉倚門之望請事斯語有如大江

回生日啓

年華垂暮久矣倦游月紀就盈依然初度影留積
雪之表心在飛雲之邊何勤記存特枉慶問夸詞
斑衣之樂鋪張黃綃之辭義重同寅情深泛愛贈
之秋菊知欲制於頽齡歌以木桃尚無忘於永好

迂鄭制置啓

入侍中宸出制外閫西控六詔磊落籌邊之圖北
定三秦淋漓出師之表惟卧龍之規撫素定故刻
虎之機會可投氣壓赤雲聲搖紫邏恭惟止

空萬古名塞兩間緇衣敝予又改爲芳典刑
朱弦倡而有遺音矣格調更高岸巾湓浦之秋風
舉酒平山之春色吟懷激壯酣膽輪囷論山東之
事宜浪戰非策指淮南之形勢寢謀在人上知爲
天下之奇材公請當今日之重寄方整雍丘之役
又嚴斜谷之征惟并參之上游與關隴而錯壤枕
戈雖切傳檄尚遲豈人謀之未臧抑天運之有待
虜乘丙午之釁而犯梁汴于今百年我應甲申之
讖而破秦川在此一舉開誠心以集衆智倡大義
以激三軍招搖所臨攬槍如洗天生晟非爲中
以首定之功帝

送相子不贊升平之業其二

身虎鼠萬里所

凌斗野以從游今介雪以面

聽令慨斯道之孰主誇吾邦之有人未睹前
占破竹讀長安之露布相與驩呼賡涇水之鏡歌
尚知興起

被旨奏事謝廟堂啓

瞻太行之雲心方搖於西徼近長安之日夢忽到
於東華天道以從欲爲仁人紀以錫類爲孝綱常
立矣聖賢能之竊以行邛邲九折而去官漢許全
於子道守西山三城而入奏唐使便於親聞蓋天
下之至情宜人上之深眷伏念某汚邪家世妻數
身名王粲問從誰猝猝行邊之志顧況海上

依去國之懷泝瞿唐艷瀕而西躡龍門石堦

趺足萬里回首五年江上秋風影斷未歸之鴈城
頭落日魂飛返哺之鳥讀何蕃之傳而躊躇覽孫
寶之章而惕息去天雖邈控地有祈但爲昏定晨
省之謀迺叨朝奏暮召之寵父曰嗟予子行役展
轉許時昔我往矣今來思團樂有日舉家懽舞行
道榮觀茲蓋伏遇某官以躬行作百世之程以性
學立三才之極大旣和於民則細亦盡於人情四
牡之啓處不遑聽其來諗杖杜之憂心孔疚知爾
懷歸况家山正在紅雲之旁而菽水難供白雲
小憊終此闕就

陔所謂老者安少者懷莫非

仁之至義之盡

闔護關之有虎蓬萊引棹

常風可恃而前惟繫所主三吐哺三握髮行
袞之光壹舉足壹出言永戴洪鈞之施過此以往
未知所裁

賀廟堂定策啓劄

恭審以一代元勲定萬世大策生靈有主社稷無
疆嘗觀歷代之源流因攷置君之本末奉之冕服
伊尹在太甲爲阿衡逆以干戈召公相康王作顧
命凡邦家奕世之慶皆宰輔得人之功秦不足言
漢亦未善代王之入以太尉陳平何爲曾孫之立
以將軍楊敞不與或外戚措擇於襁褓之間

官操制於掌握之中託周公行事者皆然女
用心者有幾以至晉聽之司馬之處分唐付之中
尉之轉移倒持太阿擅弄神器忠如狄仁傑中宗
僅付諸人智如李衛公宣宗不出於己噬臍莫及
搯擊徒多惟我熙朝若時元老藏書金匱定大業
於兄弟之繼承漬墨水盂扶正統於父子之授受
顧託之寄在宰相擁立之權歸朝廷大典具存盛
事復見某官相先帝十七年之治培皇家億萬祀
之休巍巍煌煌無逸太平之業濯濯赫赫崧高中
興之謀逮憑几之道揚重嗣服之付托謳歌之
而人心屬膺而天命歸危疑雖深咳唾已

定挈流雷而出獨待寸心扶大明而當天盡出
一手此蓋列聖監其志先正啓其衷用能奠九鼎
於聲色不動之中于以大一統於觀聽惟新之始
旂常徧紀鍾呂特書泰山喬嶽之俱崇長江大河
之無極其委身坎北拭目休明知宗祏之有依與
草木而同慶然事莫難於謀始功尤重於圖終潞
公老臣盡日立侍於少主之側魏公舊相一旦卷
簾於母后之前有光昔人正在今日某下情不任
踴躍慶快之至

秘書郎謝廟堂啓

虎落賦歸尚憶窮邊之戍館龍人奏忽切言

除當明兩作離之旦而兼心與謂一爲元之甫
並下始終大造之力俛仰平生之榮竊以漢九種
一百三家錄殿中祕唐四部二十萬卷藏富弘文
迨熙朝之煇興嚴列館之鼎峙上搜禹穴下采虞
初登其庭者道山日月之最華讀其書者瀛洲風
露之亦飽乃若秩美職清之選莫非見殫聞洽之
材如某者識字亡奇用心徒苦日斜牛背慣從發
襖之耕月暗馬頭間問堯牟之役莫府劒山之外
麗譙涪水之濱粗了官癡不改書癖伊川絕學已
猶匠之不存清獻高風尚蒼頭之可語心折百率
之客路眼穿萬里之親闈第期西崦之還乃作東
華之夢周章拜命勃窣趨朝天近五雲甫候紫宸
之對地清群玉忽陪碧閣之遊左思于此而賦三
都卅南由是而擅五絕歷觀作者深媿斯文茲蓋
恭遇某官定大計如隆興開皇極如元祐收召久
閑之耆艾韓呂朋來登崇未顯之峻良晁張輩出
謂今奎壁之府自昔豫章之林國以儲材士焉養
望遂下采於兔褐亦俾乘於鹿車某敢不澡雪精
神於征塵沒沒之餘收斂身心於夜氣搖搖之後
竹裏汲泉而煮茗花邊挹露以研朱端日將臨首
獻三元之頌盛時親見尚賡七德之歌

回胡判院啓

曠度高才方快景星之睹旋文大軸忽勤明
投喜獲一麟盡洗萬馬恭惟某官壘剌屈賈灰撥
陰何以湖海一生之豪爲京洛諸老之客流涕痛
哭見於議論怒罵嘻笑發爲文章具眼非無其人
壓頭終付之命黃金且盡長鋏猶存自昔聲名當
三千而何帝祗今富貴過五十以非遲某脫從煙
霞來足風露枕書清樾之底誰與喚醒拾落花
之邊更煩舉似略茲具報幸甚鑒紆

臨安諸友招講東山啓

慕徂徠之餘風退安西崦引嶽麓之故事延致東
巖豈不願一鄉善士之交共如非諸儒名家之選
莫當盛意輒誦淺聞蓋自兩楹之夢旣符一貫之
學如綫以仲尼事有若安能無貌似之疑由子思
傳孟軻所幸有性善之說迨秦焰之寢冷而漢塗
之復開淄川言易濟南言書各擅專門之業賈逵
作訓馬融作傳居多著錄之徒雖穿鑿之未純亦
發明之良苦會文有益溫故宜師乃若秦北之仰
昌黎衡湘之宗子厚頭童齒豁未免先生欺余哉
之嘲耳拂心騷且有吾子見愛爾之嘆顧好爲之
通患在善誘以疇能惟 本朝五星之聚奎而斯
文百川之至海自伊洛出有洙泗風氣象巖巖立
盡三更之雪精神盎盎坐餘一月之春所謂

聖聖希天夫豈書盡言言盡意諸老信有功於後
覺群英求無媿於前脩腔子裏盡惻隱之心貴於
存養科舉外有義理之學不厭討論能自得於源
流更孰加於模範貌如逐客老矣陳人久忘東塗
西抹之時未定南去北來之地辱拂黃龍之榻俾
修白鹿之規端是借聾誠難起甕見大巫而怯敢
危坐於虎皮從野翁者遊尚醉眠於牛背略敷梗
槩切幾墮紆

再答招講啓劄

某伏承妙語申諭寵延曷月予還歸哉久起故園
之興吾年今已如此難陪勝社之遊况竭延不足
以自濡而螢爝何堪於共照徒慙便腹多費解頤
幸諸君之見寬容老子之省事窪樽西乳甘寂寞
之漫郎石室東山付風流之太傅荐滕口說切幾
心孚

生日回啓 戊子

蒼顏五十三又逢初度化身千百億揔是窮愁辱
飛雙鳬來顧獨鶴開行厨於竹裏出妙語於梅邊
爲留西日之陰待轉東風之信掛梢綠鳳夢何到
於調羹啄黍黃雞盟尚尋於煮餅其爲心感併得
面陳

生日回程宰啓

己丑以墨
并詩來

牛奮其角閱良月之就盈鴻漸于千鷺朔屈之欲
暮過勤採藻加貢垂蓬某官學道愛人折節下士
同出老先生之門而矜其不耦日奉太夫人之懽
而念其有親欲回東里之春先寄西湖之信句隨
香動格與榦高照見百里奚飯牛之心寫出九方
臯相馬之意戒以點白俾之守玄老我長閑敲碁
聲於橘裏爲君細誦引酒興於梅邊

生日回啓 庚寅

閱天地之數久矣疑年對聖賢之書蕭然送日方
嘆箕張而牛奮忽聞春發以鯨鏗笑桃李之爭新
許煥楠之耐久詞高曼王意重訂金水調數聲
久寒兒之唱山光一帶願從詩老之遊占報斐然
垂察幸甚

生日回啓 癸巳

九年謫之賦不暇問天十月交之詩猶記墮地方
擁山陰之雪忽披沁水之春醞藉不凡機杼自別
以彼富貴榮華之夢開此風流散誕之懷意氣重
於斷金音調諧於佩玉醉喚盧仝之赤脚強爲我
歌笑摩杜老之白頭莫當君賜其爲感著未易名
言

生日回吳季永寺簿啓 乙未

歲周六甲氣近一陽過辱高情俯記初度置之



斧修月出語不凡洪崖之榼留春拜賜殊侈琢磨
以岷山五花之玉護養以峨眉千歲之苓愛之欲
生永以為好義襟特重莫訝卷錦鯨而還老眼尚
明要看冠鐵豸而立

復官謝廟堂啓

新綸渙發宏開宥罪之科舊秩復還仍賦祝釐之
廩與兩儀而同量控九地以知恩伏念某姿稟迂
疎學問寡陋明主可忠言之日誼孰數之天下本
無事之秋黯妄發矣宜坐反脣之律特寬擢髮之
誅僅褫官聯俾安家食兒從郎罷拾柿葉以學書
對藁砧然松明而理績凡此國寶之適莫非快
之私以口語心引手口額第一日之去國倏七
年之杜門戶外屨空但有莓苔之徑床頭金盞况
無耜耜之圩未問數百拍碎累之前煎熬可堪七八
十老親之落寞居然待盡忽爾更生長樂宮之稱
觴華夷同慶丹鳳門之肆眚天地皆春大或漏吞
舟之魚細亦振坏戶之蟄洗之丹筆畀以青氈昔
漁者爭隈已斷市朝之夢今廩人繼粟遂紓溝壑
之憂靖惟平生盡出大造茲蓋伏遇某官手扶社
稷心契乾坤卷卷乎緇衣之好賢休休然干旌之
樂善謂四海之英雄豪傑悉歸籠絡之中豈一介
之微厲便僕不在涵容之數貸之衆人欲受之貽

察之公論既定之餘欲放一頭趣開三面托細相
顧而動色簡稱大書而有光某敢不仰體包荒
思遷善步虛聲裏疑從鈞天帝所之游知見香中
期報佛地位人之德銘藏亡戮染奚殫

平齋文集卷第二十五



平齋文集卷第二十六

啓三

賀鄭丞相啓

漢章文庫

伏審揚廷渙號宅揆奮庸天開聖人揭大明於積
陰之後帝賚良弼興霖雨於久旱之餘九鼎尊強
萬殊闡懌竊以慶曆之進杜正獻盡革弊端元祐
之相司馬公力回正論凡其變則通通則久本乎
定而靜靜而安 聖上始親於萬機朝家大整於
百度追還盛觀允屬真儒恭惟某官秉粹而履方
造博而守約黃裳文在中也道傳往聖之宗緇衣
敝又爲芳身繫永賢之脉蚤勸初替之學軒爲大

任之儲淵源養蒙羽翼出震六龍御天而萬物覩
依乘最先九鰲負地而四極安扶植更方肆增隆
於上燿亟入贊於中樞密勿引裾雍容補袞避權
遠勢初無富貴之心合意運籌自契明良之會覆
金甌其久矣登玉鉉焉遲之播一朝希闊之麻開
幾年壅塞之路昔妖星示變除舊之兆已萌今瑞
雪應期作新之慶可卜兩全文武之憲獨幹中和
之機惟國事總總乎其方殷而民情喁喁然其更
切決否泰之消長在乾坤之轉旋平輕重於一舟
丕展濟川之略寄安危於八柱迄成支厦之功以
福華夷以壽社稷某霜途易蹶冰谷難春夙蒙鑒
賞之殊快覩延登之盛調元有道坐培上甲子之
休播物無垠早吐雌丙申之氣踴躍胥慶編摩局
宣

禮部郎官謝廟堂啓

九年去國甘從西崦之耕一旦起家遽草南宮之
奏大明昭揭於積暄之後妙造潛回於沍寒之中
脫跡沉淪委心坎北伏念某天姿不穎世諦更疎
虎負嵎莫敢撓徒奮直前之氣鹿走嶮何能擇了
無善後之謀寄懷抱於倚楹付光陰於面壁低徊
空谷展轉窮途蠻素掉頭早厭香山之老雍端拍
手亦嗤栗里之貧間意行而覓詩率危坐而讀易

忽逢陰剝遂與陽升牢落馮唐尋青綾之齒步摧
頽禹錫訪瑞錦之新窠久湮焦穀之芽頓吐寒灰
之焰俛仰自省生成有歸茲蓋恭遇某官道包元
功心契真宰伊尹舉而不仁遠矣選衆惟公臯陶
歌而庶事康哉知人尤急孰觀否泰往來之運密
轉乾坤闔闢之機大茲朝鋤衆雋暮拔謂鵲巢可
窺而鳳凰集駿骨旣市而騏驥來憐其數竒開以
寸進某敢不敬佩隆眷加鞭後圖白首爲郎敢嘆
桑榆之晚丹心報國更祈松柏之堅

回薛觀文啓

恭審陞華祕殿均逸殊庭六子之佐乾坤功成斯
退八還之玩日月宇定自光几几雖新巖巖維舊
恭惟某官吏師一代王佐兩朝問方略之世家自
唐浸盛練制度之人物視漢略同三十年密拱於
脩門一萬戶肇開於大國倚成方切引去何輕野
梅官柳之坊路喧迎騎流水青山之屋門繫歸舸
兒孫出萬卷以披吟父老散千金而燕集移閭闔
衣冠之夢爲園林鍾鼓之盟陽羨買田拍塞秧疇
之雨惠山試水颼颼茶竈之風誰爲公謀使有此
樂某猥馮容度輒犯顏行呂獻可固得罪於荆舒
文潞公初何尤於質肅想見幅巾蕭散訪疇昔之
釣遊願言列鼎春容享方來之耆艾

回程內翰啓

伏審均逸珍臺陞華穹閣人材凋落之久上深
念之天運轉移之新公嚮用矣漸所以進泰於此
占恭惟某官九垓隆名五嶽全氣伊川明道而後
獨傳正宗野處平園以來復見老作蚤從龍尾直
上鰲頭扶日之功未酬偃月之機已露方奪萑苻
之氣遽尋花竹之盟司馬公之流水青山姑從獨
樂歐陽子之茅簷涼簟尚想玉堂雖出處了無累
於吾心然安危豈遽忘於斯世宜膺蠖濩之眷趣
進凝嚴之班與造物者游益培夜氣後天下而樂
亟告辰猷某狂編虎鬚窮卷龜殼追六十年之夢寧
傲宰相而不敢傲翰林叨一日之逢難為諫官而
猶使爲御史蒙恩莫稱請誨無從所願君子之彙
征庶幾吾道之浸長元祐之詔大老我冠而來慶
厝之頌名臣執筆以俟卷卷有屬纚纚奚殫

中書舍人謝丞相啓

歲星之犯執法

前數夕太史奏歲星犯中執法公果出臺

猥干憲府之

誅帝座之拱紫微驟玷詞垣之選觀君相之深意
知乾坤之厚恩竊以爲治莫重乎紀綱之張用人
尤患乎意嚮之轉拱辰一網君子之氣遂衰之邵
兩來小人之勢斯逞歷攷往鑒寧忘隱憂伏念某
髮種種其絲焚心忤忤乎繩直歐陽余靖列在四

諫每懷聖德之詩王衍盧杞合爲一人欲著辨姦
之論適改弦而更始偶簪筆以居先議論不足以
聳鳳凰之鳴風力不足以快鷹鷂之逐第潛觀於
機括慮或撓於規摹景祐一不肖之來大圖搏噬
熙寧三舍人之作孰効鉗槌去狼莠所以養嘉禾
薙茅艾所以護芳草獨奮一擊衆觀四驚或疑面
前行路之未寬或怪袖中彈文之太早勇爲國計
奚暇身謀奉帝勅而傳霹靂之符何難驅鬼仗佛
力以運金剛之杵自可降魔雖閤門不隔於文章
而臺院俱成於退舍彼姦旣折此志還伸立五花
之塼甫軒眉於旬浹扈六飛之蹕遽充骨於湏臾
黜轉而升榮忘其辱茲蓋恭遇某官王迥砥柱斯
文津梁遜直諫如元齡之佐唐去副封如魏相之
興漢謂保合善類必去敗群之羊而修明大公何
愛溺井之狗辨薰蕕之殊氣培植杞李之深根俾京
尹授館以使留許詞臣遜闕以見處宣昭實意安
集危蹤續翻紅芍藥之吟莫知稱塞占澄碧琅玕
之夢終托生成銜戴輪囷栴摩梗槩

回趙制使啓

恭審上思東略公請西征以文昌八座之尊總元
戎十乘之重江淮增氣關洛屬心恭惟某官文武
兼資忠孝兩盡西平父子未如飛而如翰慶州弟

兄抑非龍而非虎挫狂虜於荊顧之下平逆離於
笑談之間功歸一家名震四海正佩甘泉之橐又
分細柳之弓幼度却符堅於合肥風聲撼塞公瑾
破曹瞞於赤壁雪浪翻江中莫府之宏開外提封
之盡護不求一勝必出萬全東夏口西武昌規模
既定北羊腸南伊闕經略何難大奏愷於前茅永
垂光於汗竹某搔頭白雪引睇赤雲竹樓之記猶
存徒懷清賞桃林之詩可作尚賀元功

回楊侍郎啓

竊以南臺執法未輸折檻之忠西掖代言遽獻斷
窓之醜蒙恩超越揣分凌兢伏念某蚤生排根久

成流落窮懷不柰每嗟煮鶴之琴老氣未衰尚愛
擊蛇之笏天適開於日月地偶借於風霜了無回
川障瀾之功僅有去莠護苗之志方奮前而抨擊
忽踵後以褒遷觀象門深浹日之留已幸翔鸞閣
靜半生之夢還驚取數過多揆元有自恭惟某官
聲諧笙磬佩襲璆璫闢裏掉頭耿耿高時之操閑
邊袖手卷卷憂世之心念善類之相扶欲頽風之
復起遂令滌辱亦轉光榮詩到蒼苔寄宦情之澹
泊帖來青李佩交好之綢繆占報斐然垂察幸甚
回趙婺州 必愿謝忠定配享劄子

恭惟先正忠定太師周程粹學文富精忠龍夾日

以飛定神器於危疑之頃資極而立安盤石於
指顧之間初罹偃月之謀終墮浮雲之計迨更聖
化始記功宗侑食原廟之廷圖形容臺之閣阿衡
格于上帝雖音跡之莫追周公祭于大烝迄英靈
之如在旂常增耀簡策騰芬某濫廁周行聳瞻盛
典知臧孫之有後宜文子之作原爾祖與享之已
著丹青之信斯文未喪也更堅清白之傳贊抃良
深敷宣曷既略此酬謙施之辱切丐紆登

回趙制置

葵謝忠肅賜謚劄子

恭惟先正忠肅太師學問以母自欺爲先踐履以
不遠復爲主曾吞八九雲夢浩乎無涯腹有數萬

甲兵用之不盡擁師于於江漢控戎索於關河以
頗牧之籌修羊陸之政屯田之奏則營平之遠略
出師之表則孔明之精忠收績前茅垂休汗竹邊
有雲中之警上興鉅鹿之思灑寶墨以疏恩易美
名而壹惠光流宇宙聲撼華夷是皆曹武穆之將
家范文正之儒裔克傳世業深結帝知故能顯揚
於無窮于以侈大其有子某聳聆盛事倍激懦衷
方圖狂於柔緘忽首勤於珍翰執謙良過抱愧爲
多排紛控賀不莊仰句台察

除禮部謝丞相劄子

某恭惟

聖上親萬幾之初賢相宅百揆之始大

明昭揭公道宏開群陰見曉而雪消衆正連茹而
茅拔融歸皇極扶立太平某去國九年奉祠再歲
自謂窮途之老死不圖大造之更生抱舊直之青
綾趨新窠之瑞錦孰云起廢有此叨榮某官監其
愚而無它腸愛其懦而有立志以恤窮悼屈之念
爲噓枯吹生之仁首加招徠使脫沉滯動八十親
之喜寬數百指之愁踴躍而與糜捐以報然念禹
錫十年待文昌之相始授此官溫公數月趣東坡
之還乃居是選豈繫晚學可跂前脩伏望鈞慈憫
傷弓之心危察墮甑之氣索收還誤渥改轉真機
賜其甌石之家授以斗升之壘一飽忘三熏哉


恩謹此控謝併布其衷仰祈鈞察

荅吳總卿劄子

某九年擯去玄都之樹已空一日喚回少林之壁
忽倒若有相者夫豈偶然某官功名鼎盛之秋意
氣相期之素謂荃蕙化爲茅父矣尚復何言而桃
李自成蹊有之不須多慮每對酒而憶太白必衆
飯而問子桑更加牙頰之春欲起頭顱之暮昔耕
今獲彼竭此盈竊自攷其平生曾不滿乎一笑方
趨郎舍忽被郵籤論復如前固待以唐質肅之舉
節難保晚正恐如韓忠獻之言倚須公歸共論此
事伏丐兩照


荅葉子真劄子

某九年坐廢翟公之門欲冰一旦謂來馮唐之首
已雪方群振鷺忽點棲鳥作之髀肉久消之餘置
諸夢想不到之地莫知稱塞第劇凌兢足下氣雲
升而川增文水湧而山出念嘗交訊知可論心方
從九芙蓉之游特貽百車渠之帖首勸之以劉元
城范希文奏疏繼戒之以王彥霖朱光庭策題推
車惟主於行乘舟毋偏其重卷卷一意纏纏千言
期頽風之復興使懦志之有立把玩不已感藏可
知此去凡可以警策其不逮毋惜陸續




平家文集

北七之北九



漢書門		一〇二七七號	七十四函	一二架	六册
-----	--	--------	------	-----	----



内閣文庫			
書號	漢	10277	
冊數		12	(11)
圖號		3	1



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM, Kodak



国立公文書館
National Archives of Japan

原本の文字など不明瞭な個所があります。

綴じ部(喉部分)の文字など不鮮明な個所があります。

平齋文集卷第二十七

講義上

豫利建侯行師

豫有猶豫備豫和豫逸豫之義人能決猶豫而思備豫則見幾於吉之先安往而不和豫過於豫則逸矣其義雖四而實一也豫承謙之後謙無凶悔吝則和豫可知震動於上坤順於下動必以順故建侯以親衆行師以動衆事雖至重無不利大順則大利在其中也建侯而非順則開國而用小人行師而非順則行險而毒天下果何利之有哉其卦以一陽主五陰亦有比建

國師蓄衆之互體

象曰豫剛應而志行順以動豫豫順以動故天地如之而况建侯行師乎天地以順動故日月不過而四時不忒聖人以順動則刑罰清而民服豫之時義大矣哉

六五以柔居上九四以剛應之剛密比於柔不期應而自應也人君有柔中之德虛己以任大臣大臣有剛健之德自任以天下之重剛柔相應而相濟志所欲爲何往不克然志之所以行亦惟其順也以順而動用能致豫既豫之後又以順動終始一順無有間斷天地所以妙不息之運如此而已人君之建侯行師其能違乎天地以順而動則日月四時無過忒人君以順而動則不待刑罰而民心服在我無所違乎理在人自無所違乎我也時者天運義者天理順而行之豫之時義豈不甚大苟或違道干譽嚙民從欲是爲悖矣

象曰雷出地奮豫先王以作樂崇德殷薦之上帝以配祖考

禮極順樂極和順則和矣樂所以導和也方雷在地中動於至靜而不露迨出乎地而奮乎天群蟄啓戶萬象趨榮孰不同其和豫然聖人合

震坤以爲象不曰雷出地上而以奮言深閉久
鬱之餘一旦震發造化妙用軒豁呈露施生訢
合動植昭蘇豫莫大於此先王觀豫之象發揚
和聲褒崇先德如韶繼勺酌以侈祖考對天之
休盛薦之上帝如思文我將推而配之蓋謂治
至於豫皆祖考盛德之積非予一人所能致也
人君惟不以和豫自居則不至於以逸豫自安
矣

初六鳴豫凶象曰初六鳴豫志窮凶也

臣聞巧言者誤國之具佞人者危世之本豫五
陰皆宗九四一陽四東大臣之權初以陰柔小
人密相應與極其趨和之意形爲邪諂之辭以
求容悅大臣亦悅其愛已而甘受之象以志窮
致凶爲言志不自立惟用之於獻佞貢諛其窮
可知矣等而上之以此求容悅於君人材阨而
不進則曰野無遺賢民生困而不省則曰雨不
害稼積薪將然而曰已安已治朋黨方興而曰
太平無象其發於聲音諂曲萬態而宦官女子
之言朝夕薰浹於耳者又相與爲表裏大厦就
頽同於一壓凶孰大焉
六二介于石不終日貞吉象曰不終日貞吉以中
正也

臣聞天下之理非與物俱轉者所能察也人惟主中正於中然後能介然如石能介然如石然後能見幾而作蓋石質堅而體靜靜者見善必明堅者用心必剛一念不動萬理洞燭不俟終日已盡見未然之幾區處先定應酬不差宜其正固而吉也蓋二與五爲應不與四爲應衆爻皆宗九四之大臣二獨居中得正介特自立以砥柱一卅可謂難矣然二五君臣雖爲正應而隔於九四其情不得以相親故介特之臣但能堅於守未能毫於用其先見之遠先知之明萬夫之望已深屬之矣人主能不沉酣於逸縱不昏蔽於便佞好賢之心不衰求善之志不改則介者終有時而親矣

六三盱豫悔遲有悔象曰盱豫有悔位不當也

臣謂此人臣患得患失之象三迫近九四當國之大臣欲如初六小人進爲容悅恐非正應而不我與眈眈仰視逐逐營求是患得也欲如六二君子介特自守又利害禍福交戰於胷中躊躇未決趑趄復前是患失也以不中正之人處不中正之位而盱遲皆悔隕穫充訕情狀畢露其悔而不凶者大臣不與爲應茲無所售故不至凶使其茲得售則欺君賣國無所不至矣有

國者安用是患得患失之臣爲哉

九四由豫大有得勿疑朋盍簪象曰由豫大有得志大行也

臣聞九四以一陽爲衆陰所宗材全而氣盛毅然以天下之重爲己任下傾心而仰之上虛心而屬之此天下之豫所由致也由我致豫建侯而國勢尊行師而人心順其有得大矣然功業之盛者必有信已太過之弊權任之隆者必有專已自用之咎大臣當由豫之時苟驕吝一萌不能開心與天下之賢以共治則豫之由致安保其不爲亂之階得亦安保其不失也惟洞無有我之私披胃臆以待賢忘勢分以下士疑豫一點不留於中則聲應氣求之下如簪聚髮何材之不集而致君澤民之志遂得以達於天下信於萬世此正周公握髮吐哺時也蓋疑者德之莠事之賊大臣無疑心之累則足以合天下之善斷斷乎知賢之當任知邪之當去不以疑貳之心來讒賊而啓基間則百志惟熙矣六五貞疾恒不死象曰六五貞疾乘剛也恒不死中未亡也

臣聞疾非特六淫之疾凡足以爲吾心之害吾德之累吾國之憂吾民之戚皆疾也人君處和

豫之極而逸豫生嗜慾好樂便嬖側媚之足以
蠱方寸者紛至於前於此能一念內固外邪客
氣不得以乘虛而干正則德性堅明元氣充實
既壽其身又以壽其民壽其國則億萬年無疆
之休皆其功也象以乘剛中未亡爲言蓋六五
柔中之君乘乎剛則有格心之大臣而內志不
可搖秉乎中則有閑邪之定力而外慾不能入
內外交相養此所以貞疾而安恒不死而壽也
夫德慧生乎痰疾鳩毒藏於宴安此爻在豫之
五當以無逸三宗享國之意參之

上六冥豫成有渝无咎象曰冥豫在上何可長也

臣聞人孰無靈明虛徹之性有物蔽之則靈者
冥和豫之極而肆逸豫此心瞽塞罔有知覺故
冥豫以成成非一日之積也方此心清明之初
豈不知觀逸遊田沈湎耽樂之爲患及爲外物
所移則勤者惰立者弛操者放日積月累性爲
情鏹而冥頑不靈之豫於是乎成正以陰柔之
資不能聞義而徒見善而遷以至此極也易卦
未有窮而不變者故逸豫既極必渝渝則亦可
以无咎无咎善補過前日之不善庶幾其可拚
也苟既極而不知變則危亡無日何長之有哉
然冥豫既成豈無可變之理聖人猶許之渝若

其未成而知變豈特无咎而止觀此則知唐元宗之亂兆於開元成於天寶惜不知變禍亂四起可爲萬世之戒

隨元亨利貞无咎

臣聞隨者從也從之義無不該人之從乎我與我之從乎人皆從也而隨以我之所從爲重外卦兌內卦震震動而兌說一念動於中隨所感而說從之得所從則有大亨之理然動說成體易於轉移惟利乎貞則可以保其終之无咎况人君宅民物之上一言而萬里響應一動而群黎風偃致其之大有不難者特懼乎所從不得

其正爾從乎天理正也而從人欲從乎人心正也而從己私賢人君子之從正也而從佞人忠言嘉謨之從正也而從讒說儒生學士之從正也而從宦官女子從非其正咎能免乎穆姜謂有是四德隨而无咎似識此意其以隨元亨利正同乾德之備非彖意也

彖曰隨剛來而下柔動而說隨大亨止无咎而天下隨時隨時之義大矣哉

臣聞易以上下無常剛柔相易成卦乾上九之剛來於坤二陰之下爲震而上卦則兌動於內而說於外也蓋隨自否來方否之時三陽位於

上三陰位於下天地不交而萬物不通何隨之
有隨之爲卦上下接而陰陽交故其動也臣言
可從則說而從乎臣民欲可從則說而從乎民
剛下於柔不惟己之徇也惟不徇乎己之私是
以否之塞轉而爲隨之通大亨且正終保其无
咎而與天下相安於時措之宜義農黃帝堯舜
氏十三卦之制作與夫子丑寅之建忠質文之
尚析因夷隲作訛成易之序莫非與時而偕行
上無戾乎天運下無拂乎人心其義至大而不
可窮皆剛來下柔轉否爲隨之功也苟徒恃一
己之剛而不明下柔之義勢尊則亢氣盈則驕

君子之言日蹊小民之情日戾猶不免於無民
無輔又安保隨之不爲否乎

象曰澤中有雷隨君子以嚮晦入宴息

臣聞靜極而動動極而靜造化自然之理也雷
動於春夏今潛伏於澤之中允爲澤正秋之時
也雷收聲於正秋亦維當靜之時隨時而安於
靜且以養夫動也雷不養動於靜無以出地而
奮豫君子不養動於靜無以體天而行健龍蛇
之蟄以存身豈徒蟄哉故朝以聽政晝以訪問
夜以安身莫非惟時之隨使不安其身於夜神
過役則易竭朝聽晝訪烏能無憊是以嚮晦必

入處於內而宴息息蓋作之幾生之本也夜氣存於至靜之中湛然其清淵然其明渾然與太極同體嚮晦所養若此凡旦晝所以泛應酬酢各中乎理而用之不窮者皆此其出也彼沈湎於長夜宴安於衽席安知瞬存息養之義初九官有渝貞吉出門交有功象曰官有渝從正吉也出門交有功不失也

臣聞隨以剛來下柔成卦重在初九初隨之始也所隨邪正是非當嚴之於始夫耳目之官不思而蔽於物心之官則思人之一身耳司聰目司明以至口鼻體莫不各有所司心則統之君子治身之道當先治其心蓋此心不難於應事物之常而難於接事物之端境變於前感物而動官失其守遂與俱移能於紛至沓來之變操之常得其正則吉矣然必出門而交乃能有功出門即出門同人之義交於事物無親暱係吝之私也一私不立與天下爲公則旣吉而且有功豈非所交不失其正歟彼謂不見可欲使心不亂是必死灰槁木而後可其何以定而應寂然不動感而遂通天下之故感而通天下之故而寂然不動者常自若能如是則見可欲而心不亂然後可與論從正不失之義

六二係小子失丈夫象曰係小子弗兼與也

臣聞理無兩立心無兩用人無兩從隨以得所從爲吉六二以陰從陽初九陽之微爲小子九五陽之盛爲丈夫小子剽輕而無遠慮丈夫靜重而有深識吾心所係苟屬於在下之小子則必失在上之丈夫所與豈能兼哉大抵中人之性趨下易趨上難小子狎而親便辟善柔如以石投水丈夫敬而踈直諒多聞如以水投石言焉舍忠而從佞事焉舍是而從非行焉舍正而從邪得於此則失於彼曾不自覺也六二陰柔牽於多愛故設此戒以勸擇善板詩刺厲王失道老夫濯濯然輸其忱欵而不見聽小子則躋躋然得志而驕所從可不謹乎

六三係丈夫失小子隨有求得利居貞象曰係丈夫志舍下也

臣聞同是心也操舍有存亡善利有舜跖一念之發所由分也故人心惟危六二本居中得正係乃在於小子六三本不中不正係反在於丈夫克念罔念之間狂聖易位此心界限烏可不嚴哉吾之所係既能舍邪而從正舍非而從是則無求不獲人之善皆我之善也而猶以居貞爲利不正則雖擇善而從不能固執何益哉然

所係得失當觀之立志之初趨嚮高明則上從
趨嚮卑污則下從三欲舍卑污而進高明宜不
爲小子屈也君道亦然志在於下則係孟明而
失蹇叔係商鞅而失甘龍係林甫而失九齡係
盧杞而失陸贄天下以之而亂六二六三兩爻
政相反玩易者可以類推而知所擇矣
九四隨有獲貞凶有孚在道以明何咎象曰隨有
獲其義凶也有孚在道明功也

臣聞仁者先難而後獲初未嘗有獲心詭遇一
朝而獲十則有心於獲者也人臣之患莫大乎
有心於獲獲心一萌則高者徇名卑者逐利一
念外騫曾莫知返功與道始判而爲二臯夔稷
契伊傅周召道行而功自存乎其中管晏求功
於道之外而功亦泯矣九四以陽剛之材居近
君之位動於中而說於外其心所隨惟在於獲
急淺功近利之計昧至正大公之趨貞固守此
宜其凶也是必順天命本人心以輔治而行其
所無事惟知有道不知有功一忱所存終始無
間則功自道出昭然大明於天下皆歸於仁義
禮樂之中皞皞乎其不自知尚何咎之有夫子
之得邦家立之斯立道之斯行綏之斯來動之
斯和足以盡此董仲舒謂仁人正其誼不謀其

利明其道不計其功足以知此

九五孚于嘉吉象曰孚于嘉吉位正中也

臣聞嘉者善也九五居中得正之君在隨之時以說為體聲色玩好一無動乎其中而惟善之從言必善言動必善行發必善政用必善士其推之四海散之兩間良心善性之感發祥風膏雨之霑被何往而非嘉哉然其要在孚孚者出於中心之實而非偽表裏相應終始相續以不貳不息之心而從乎善斷斷乎有諸已之信以極乎充實之善輝光之大而進乎聖神之域吉孰大焉苟惟矯揉於十手十目之地而放於宮庭之淵遠勉強於一朝一夕之頃而怠於歲月之悠久秉於中者非實意飾於外者皆偽為善轉而惡吉亦轉而凶一念之孚不孚其應蓋不爽也象以位正中為言蓋有是位不可無是德九五之位既正且中而德之正中又能會萬善於一已位斯稱矣是知居天下之廣居立天下之正位必行天下之大道

上六拘係之乃從維之王用亨于西山象曰拘係之上窮也

臣聞民至愚而神可以心感不可以力劫可以道御不可以智籠隨之上六人心悅從有所不

容釋此非智力所能及也大王居邠迫於狄不忍以養人者害人而去之民相與遮前擁後力攀強挽惟恐仁人之舍去既拘係之又從而維之與詩白駒之留賢者繫之維之同意民之留大王者若此大王終不爲之留而從者如歸市有人斯有土故用之亨于西山周家八百年之業於是乎肇迹矣象以拘係之爲上窮蓋上處隨之極高而無位大王爲狄所迫失位而去至於拘係之不可留遂邑于岐山之下豈非隨之窮乎易道窮必變窮上返下宜有亨之理也然則人心之所去秦雖劫之而不能止人心之所趨周雖逃之而不能卻有天下者可不深求撫后虐讎之義而思所以固結斯民之心哉

蠱元亨利涉大川先甲三日後甲三日

臣聞大弊極壞之世天所以開聖人也蠱取壞亂爲義以爻言之自泰來以卦言之繼豫隨之後安則玩玩則媮媮則垢弊日積養成壞證與人久宴溺而疾生於心其爲蠱一也而蠱無終蠱之理故蠱壞之中有元亨者存何則飢易爲食渴易爲飲大弊極壞易爲治方王道板蕩綱紀文章一切掃地英君起而拯之中興不翅反掌是知蠱未有不可治治得其道而大亨雖江

河至險亦利於涉特患乎安於蠱而無興起之志耳然急於救弊者未免用意之太銳切於望治者未免求功之太速險難在前徑涉不懼志壯氣盈視天下事若無足爲而易之易則難者將至過懲前日之不事事適滋後日之多事未保其不然也夫甲者十干之首而事之端旣先三日以謀其始又後三日以圖其終反覆擬論備極詳密使治道日有趨新之功而無矯枉之慮前弊可拯後患可弭矣夫如是然後謂之善治蠱

彖曰蠱剛上而柔下巽而止蠱蠱元亨天下治也利涉大川往有事也先甲三日後甲三日終則有始天行也

臣聞戶樞不蠹流水不腐以其日運而不息也故蠱壞常生於久安不事事之餘人君元然于上人臣靡然於下截然其不相接且下以巽順養諛無切劘正救之益上以逸樂養尊之振厲奮發之意於是紀綱隳於姑息制度弛於因循道揆法守紊亂於私意之膠轄天下之治日入於大弊極壞之境而不自知在卦艮之剛居上九巽之柔居初六巽順艮止而蠱以成正君臣相與拱手安坐以致天下之亂也然蠱豈終於

蠱哉有能以飭蠱爲己任力畢大而規摹壯精神全而風采立一斡旋間掃積壞之弊而興大亨之治有不難者利涉大川必明之以往有事蓋久安不事事所以成蠱往有事所以濟蠱也況作事貴果慮事貴精世之賢君思欲爲天下拯弊起壞而納之治豈非立志之美然或發強有餘而密察不足廣大已致而精微未盡故事隨舉而隨沮令隨行而隨輟皆由未得先甲後甲之義也夫先甲三日以謀始後甲三日以圖終終而復始循環無間精義入神以致用何蠱之不治其在天行如貞之復返於元之復出於震非終之外他有所謂始也故觀天運則知人事

象曰上下有風蠱君子以振民育德

臣聞左氏傳風落山爲蠱風落於山下無物不撓故蠱以取象然致蠱者風之動治蠱者民之靜蓋艮體重厚而篤實不爲物移屹乎山之止也風能撓於一時使山下之物散亂不齊少焉風止草木之高高下下自若山何嘗加損哉君子觀象於蠱以巽振民以艮育德育成君德固作興民心之本而德之育也必以山之靜與山下出泉蒙同吾能體中正仁義而主靜挫衆紛

而不擾應萬變而不亂動與靜無非靜外物孰能盡之吾心無所盡則人心無所盡而天下國家之治無所盡一靜足以制百動也玩易者必因象而求意

初六幹父之蠱有子考无咎厲終吉象曰幹父之蠱意承考也

臣聞蠱自泰來具坤乾之體故諸父幹蠱以父母言父之行事一出於正作室而塗墍茨爲力甚易不見其子幹治之功惟前人蠱壞有待振飭必其材足以植僵起仆使百堵偕作於室毀之餘則幹治之功見矣有子而考无咎正以子能補其過也不然生不之諱没不之既陷父不義猶爲有子乎然聖門以不改父臣父政爲難初六乃於繼父之始亟懲其蠱壞而飭治之必有甚不獲已者而於心終不安故必以惕厲處之事無輕舉舉之必當如此則可以終吉終不失其順也象所謂意承考蓋前人之蠱自我而治不曰我之能而曰吾父之志欲爲而未遂者今特以我之意逆父之意而行之幹治非我功也是不特掩父之過又將揚父之名豈不俱有光榮哉元祐改新法斥姦臣皆推之 神考之志正得此意

九二幹母之蠱不可貞象曰幹母之蠱得中道也
臣聞九二上應六五爲子事母母有不及不可
不正正教或過則易至於傷恩怡聲下氣柔行
巽入使之浸潤而冰釋則蠱爲可治或以貞行
之陰柔之性吝執不回情有所激未必不重其
蠱也貞者事之幹而幹母之蠱不可貞不貞乃
所以爲中蓋闡闢之內聽其自蠱爲不及急於
治蠱爲太過無過無不及則中道得二居巽體
之中猶以是爲子道戒事母難於事父也詩凱
風母氏聖善我無令人痛自尅責幾無以自容
於天地間卒能回母心而成其志可謂得此義
矣推之事君睽之遇主于巷未免委曲周旋陰
柔故也若夫事剛明之主則王臣蹇蹇匪躬之
故惟恐其不克貞

九三幹父之蠱小有悔无大咎象曰幹父之蠱終
无咎也

臣聞舜之齊慄曾子之養志莫非順乎親也子
以順感父以慈應家有蠱壞不治之事隨宜整
飭次第畢舉而閨門雍肅氣象自如乃幹蠱之
善也九三處巽體而過於剛安得無悔然其才
足以克家與其嘻嘻失節置父於有過之地孰
若三諫號泣納父於無過之域故所悔小而咎

不至於大象以終无咎言之迹若非順心未嘗
不順也彼排闥引裾折檻軼輪之臣雖一時若
以忤上爲咎而其心欲使國家動無過舉實存
乎愛君忠顯而咎泯亦猶是也然則子以剛幹
父之蠱而无咎恃父之慈臣以剛幹君之蠱而
无咎恃君之明

六四裕父之蠱往見吝象曰裕父之蠱往未得也
臣聞德可以勉而進才不可以強而能世之賢
子以起家爲已任如善弈者以一着救一枰之
敗非有過人之材不能也六四以柔居艮體之
下寬矣靜厚有餘而材不足方家事之蠱懷非
不思汎蕩振刷而一新之材不逮心詎密強摠
故其蠱僅止於裕裕者寬緩而不迫也事勢搶
攘弊端膠轕人情易於躁忿而能鎮動以靜制
逆以順撫獷戾以柔逶迤容與不求快於一時
而磨以歲月終能使亂繩之自解而蠱亦徐飭
矣苟不量其材冒爲一決則往必見吝吝正以力
常奪於過高變每激於欲速不可以輕進也人
臣治君之蠱亦有隨材就功以爲裕者子產相
鄭修辭令以交於晉楚而外難紓主彊直以盟
於駟豐而內難解鄉校議之而不怨與人誦之
而不怒鄭賴以寧非裕於蠱者乎故孔子美其

有君子之道而不稱其材苟材過於子產而道
非君子則盆成括之死又孟子所深歎

六五幹父之蠱用譽象曰幹父用譽承以德也

臣聞愛敬者孝之始顯揚者孝之終人君出而
當遺大投艱之責仆者興之紛者理之懷者修
之彌縫前人之闕使天下後世不得以議其過
如昭帝繼武帝與民休息已爲難事而况揚父
令譽於無窮者乎六五柔中之君得九二剛中
之臣爲之輔蠱壞之見於前者一意幹治不費
餘力已往之咎與時俱化方來之善隨日加新
而父之譽用之暴白於天下後世此無世承之

以德故也承以材略則必求度外之功承以文
法則僅救目前之過惟承之以德則高明光大
之懿緝熙於九重溥博淵泉之澤滲漉於四海
天下莫不以手加額賀吾君之有子後世亦莫
不稱其爲天下得人之仁父之譽豈不充塞於
天地之間乎文王當商末蠱壞之世志有未逮
武王以聖德繼之而文之聲益廣此父應之
上九不事王侯高尚其事象曰不事王侯志可則
也

臣聞功名之士輕富貴道義之士輕功名世道
蠱壞少有抱負者孰無趨事赴功之心而上

乃不屑事王侯豈其超然忘天下不與世同乎
憂哉費惠公曰吾於子思則師之矣吾於顏般
則友之矣王順長息則事我者也繆公亟見於
子思子思不悅以位則子君也我臣也何敢與
君友也以德則子事我者也上九居無位之地
而道足以爲王者師苟其時上無明天子下無
賢諸侯詎肯屈道而事之潛心太極之先獨立
萬物之表高尚其所行事外物無一足以動其
心志如此其遠也百廿開風猶將興起豈不可
爲世則哉雖然隱居求志正所以爲行我達道
之本一瓢非可受則可以繼四代而興池藥萬
鐘非所慕則可以承三聖而正人心世之興大
事建大業決非患得患失者之所能爲窮苦不
損盛行不加則致君澤民恢乎有餘用矣伊尹
三聘而成格天之功孔明三顧而定興漢之計
道義重故也是知不以富貴功名先入其心者
乃可與圖天下之事

平齋文集卷第二十八

講義下

臨元亨利貞至于八月有凶

臣聞事會沓來乃君子大有爲之機此蠱之所
以轉而臨也夫陽大而陰小有自然相臨之分
方一陽爲復其端甚微五陰在上詎能獨勝故
必待朋來而後旡咎至二陽爲臨則有朋矣陽
得朋則群陰褫氣而退聽故復止於亨臨則元
亨利貞陽寢長而陰寢消也臨據陽長之會旣
能變蠱壞而亨通又能處亨通而正固以此保
大其又奚虞而見遠識微者已不勝其隱憂何

則陰陽無兩盛之理一長則一消其機在反掌間自復而臨以至爲泰爲大壯爲夬爲乾陽極矣而一陰潛萌於五陽之下爲姤二陰則遯也由建子而復至建未而遯凡八閱月二陰之遯與二陽之臨正相反陽消而陰長凶可必也然亂生於治否生於泰理所必至而酣泰宴安者常忽之有能燭其幾於人情之所易忽而轉移機軸於冥冥之中使履霜不至於堅冰陽常進而陰常置於空虛不用之地則大亨以正可常保而吉其凶矣觀至于之辭則知吉凶未定之間儘可可用之地特患乎玩安忘危不知所以用其力

彖曰臨剛浸而長說而順剛中而應大亨以正天之道也至于八月有凶消不久也

臣聞一陽而復二陽而臨剛浸長也下卦爲兌上卦爲坤說而順也九二以剛處中上與六五相應剛中而應也臨有是德故大亨以正也陰陽消長皆非一日之積今陽剛浸長於復返之餘其來有漸然懼其乘方進之機銳於逐群陰而失之暴故繼以說而順說而無所忿順而無所拂心和氣平動循天理則剛不至於過於臣之剛中足以輔乎君君之柔中足以濟乎臣

上下交應同歸一中宜大亨可致且不失其正也豈特人事爲然天爲剛德猶不干時一元運於上而雲行雨施保合太和莫非剛健中正之用天道亦何嘗過於剛哉况陽無常勝之功陰無盡滅之理消長往來間不容髮二陽之臨方長而二陰之遯已知其必至陽消蓋不久也自復至遯閱月九八而謂其消不久何哉疾疢萌於彊壯之時人不自覺也元祐初司馬光一洗新法之弊而奉行差役已有蔡京消豈待久哉遯進而否君子之道盡消則蔡京之禍天下凶莫甚焉夫惟上之人常以防微杜漸爲心遏陰柔於未進之始尚何陽消之慮

象曰澤上有地臨君子以教思無窮容保民無疆臣聞坤地在上兌澤居下地之臨澤最爲切近君臨民之象也地上有水爲比澤上有地爲臨皆以切近取義而水與澤異水流而不盈故比於地而不爲臨澤者水之渚涵深蓄遠濇滄演迤而地之岸際常臨之此具區雲夢大野所以爲澤而不爲川浸也君子觀地與澤相臨之象而得近民之理故教思必无穷容保必无疆无窮者意味深長百世猶有先王之澤則兌之浸潤也无疆者規摹恢廣出日莫非丕冒之地則

坤之包含也人君以是臨民無嫫君師之責矣
蓋君之於民猶父之於子其相親也以情相維
也以道而非可以勢分拘以勢而臨則教思必
淺容保必狹私心町畦公道磔裂尚何足以知
臨之爲大乎大哉堯之爲君惟天爲大惟堯則
之人君方寸之中與堯同大而後可以盡臨之
不然教思何由而无窮容保何由而无疆哉
初九咸臨貞吉象曰咸臨貞吉志行正也

臣聞澤通於山爲咸咸感也凡具陰陽孰能無
感以貞則吉貞者正也君子小人之辨在於正
不正之間臨爲剛長之卦初九與四爲應而此

於二皆臨我者也吾欲感動所臨獲乎上以行
吾道必一出於正曠乎其公而係吝之私不留
純乎其誠而矯飾之僞不作此以正感彼以正
應精神心術之妙相與凝固而不散則君子之
道由是進進乎泰亨之盛所感以正而吉也然
所感之邪正莫謹乎其初志者心之所之在卦
之初此心趨嚮主於正而行則無往不以正合
進以正可以正邦也一涉於邪則見金夫不有
躬進不以正特一時之苟合爾然則下之感乎
上能察乎正不正而爲進退則不至於失已上
之應乎下能辨乎正不正而爲用舍則不至於

失人

九二咸臨吉无不利象曰咸臨吉无不利未順命也

臣聞臨之爲卦以二陽爲主二陽又以九二爲重二承乎五五臨乎二實君臣相與感通之會二剛中五柔中俱得其正宜旣吉且无不利也然自復而臨陽剛浸長固吉矣而長必有消八月之遯已逆計其必凶君臣相與綱維斯世其將聽陰陽之自爲消長付之無可柰何而安之若命乎抑將進陽退陰以制消長之運而自我立命乎命賦於天受於人行廢有定運死生有定數非可以人力轉移然有君子不謂命者存二陽長而爲臨與二陰長而爲遯固天運之所必至苟一以命哲命吉凶委之天而安之八月有凶拱手順受而不思闔闢變通之道臨終爲遯矣我生不有命在天此商之所以亡也惟知賦命在天制命在我旋乾轉坤與世立極陽宜消矣挽而回之使不至於消陰宜長矣尼而止之使不至於長吾方以天自處未容一切惟命之順也夫如是君子常長小人常消而咸臨之吉常存二五君臣各盡其道矣不然何以君相不可言命

六三甘臨無攸利既憂之无咎象曰甘臨位不當也既憂之咎不長也

臣聞君子之樂王天下不與存爲人上者不可以位爲樂也夫以天命難諶民情難保大業難守重器難安夙夜兢惕危懼猶恐不兢而可樂於得位而泰然處之乎甘者說樂之至也六三居下卦之上處兌說之極而以臨人之位爲樂玩聲色之娛而忘美疢之患懷宴安之適而遺鳩毒之慮好樂一形投合四集便嬖側媚相與以巧言令色鼓舞之施之政事宜其無往而利也有能凜然深省幡然大改以所樂爲所憂念二陽方進於下而消不久之凶已兆於吸呼之頃操危慮深若不能以終日切切乎予又集于蓼之懼則前日之咎今可免矣蓋三以甘說爲臨其位不中不正一惟偏私之徇故象示不當之戒又懼夫人耻過而遂非開之自新許以轉甘爲憂雖有咎而不長有國者宜知所擇矣六四至臨无咎象曰至臨无咎位當也

臣聞至臨臨之至也四居大臣之位上比於五君以道合下應於初賢以道親且時當剛長大臣虛心無我援天下陽剛之賢進輔其君與其成致君之業以此而臨豈非

然進賢退不

肖大臣職也。援陽剛之賢與共成致君之業，乃職分之當然。極其至如周公之握髮吐哺，始可以无咎。有一毫驕吝之色，賢者望望而去之，則咎隨之矣。象明臨之能，極其至亦惟處得其位之故。以六居四是爲正位，體柔履順不自矜其能而惟賢是與，德與位稱也。六五之君柔矣，六四之大臣又柔而下無陽剛之賢爲之應，則治淪於姑息，勢失於委靡，謀國者能辭其咎乎？六五知臨大君之宜，吉象曰大君之宜行中之謂也。

臣聞知所以察夫，見之幾制有爲之會。人君之臨天下，轉移萬化，闔闢萬變，必有知行乎其間而知以得中爲難。蓋是知之用不及則闇太過，則察無過無不及，則中六五有深沉先物之知，又下與九二之賢爲正應，不以一己之聰明爲聰明，而以賢者之聰明爲聰明，臨無遺知矣。然知不可以過用，世之小知自私者，用知必過明，帝之苛察德宗之猜忌，何其徧也。故惟大德之君，然後於用知爲宜。明有前旒之蔽，見無淵魚之察，知君子之當進，必推翕受之量；知小人之當退，曾微深疾之心。以大用知而知得其中，即舜之大知也。象言行中之謂，豈非不過用其知。

即舜之用中歟中庸聰明睿知以有臨必寬裕
溫柔以有容正此意

上六乾臨吉无咎象曰乾臨之吉志在内也

臣聞卦終必變君臨天下之道以克終爲難必
用心加厚乎其初則可以保其終乾者厚之至
也何所厚厚於親君子也親君子遠小人之心
久而愈篤則以之畏天必加畏以之愛民必加
愛無所往不用其厚也艮上九乾民以加厚而
吉臨既吉又申之以无咎者爲六三設也上六
居臨之終而應乎三三不中不正上苟私所應
與而親之何以免咎惟舍三陰邪之小人而志

在二初陽剛之君子故宜有咎而免也允爲内
卦君子在内屈已下親不以久而替寧有加於
大亨之鼎母或失於二簋之權輿則賢者肩一
心以輔乎上非箴之庭燎則戒之無逸君臨天
下之道於是乎保克終之吉矣明皇始厚宋璟
韓休張九齡終厚李林甫憲宗始厚杜黃裳李
絳裴度終厚皇甫鎛此心一移卒貽不終之禍
可爲百世戒

觀盟而不薦有孚顒若

臣聞臨觀反對卦也臨二陽在下觀二陽在上
觀如兩觀之觀儀刑揭而群瞻聳也觀之聖人

正心脩身以觀天下一誠之外無他尚猶宗廟
之祭交於神明一誠之外無他物盥即奉饗沃
盥巾以帨手時也祭先盥手然後酌鬯而裸裸
用鬱鬯猶未免託物以求神盥則蠲潔內外與
神默接洋洋乎如在其上如在其左右不假物
而誠已通又何俟腥熟之薦而後達其誠哉爲
人上者能至誠主一無假乎外如盥而不薦斯
民不期孚而自孚矣乎者信也誠之實有諸已
者也人受天地之中以生誰無是誠君以誠感
民以誠應顙然興起不約而同與聖人作而萬
物覩均此機也是知人君之化天下不難於孚
諸人而難於孚諸己

彖曰大觀在上順而巽中正以觀天下觀盥而不
薦有孚顙若下觀而化也觀天神道而四時不忒
聖人以神道設教而天下服矣

臣聞一陰爲姤進而爲遯爲否爲觀爲剥莫非
小人道長觀獨不以陰盛爲憂者二陽在上四
陰順聽於下是上有陽剛之君儀表一世陰柔
雖衆方將化而爲君子之歸其爲觀甚大也觀
合巽坤爲卦以九居五順巽而中正也循理而
行無所拂逆可以懷天下未足以觀天下觀天
下必中且正大明當天萬物咸仰一有偏倚必

有照臨不及之地此聖人所以爲天立極也然必本之以誠誠者物之終始不誠無物此心之誠不存則順巽中正俱失其有猶盟而不薦以誠爲主黍稷不如明德之馨殺牛不如禴祭之福在誠不在物也此誠所格斯民莫不相孚以心顙然尊仰隨所觀而化其觀果何所見哉誠則形也其化果孰使之然哉唯天下至誠爲能化也求諸天道春夏秋冬運行而不息皆神之所爲聖人以是道設教天下不期服而自服又豈非誠則神乎觀之聖人一誠貫通三才之間始與人爲一終與天爲一極而歸於無聲無臭之妙非黃帝堯舜之神化宜民文王之純亦不已不足以當之

象曰風行地上觀先王以省方觀民設教

臣聞自上示下爲觀天下之物凡可以示人者皆有形之觀惟風行乎地上草木均被披拂則無形之觀有形之觀其觀淺無形之觀其觀深故先王取象於風之行地省方觀民而設教五方之俗各有不同隨方省察因民俗而教之以救其偏扶其正使同歸道德之中舜之同律度量衡成王之考制度雖若涉於有形之觀教行而民從猶風行而草偃皞皞乎其不自知實有

無形之觀存蓋誠存乎中不動而敬不言而信
不容以形迹窺也後世省方之禮廢人主深居
九重之上民何由觀教何由設亦惟心存乎群
生之休戚庶俗之媿惡四方萬里皆瞭然於戶
庭之間而以身爲教自正心誠意以至於脩身
齊家無一不盡自然國治而天下平與身歷目
睹所設教何異哉

初六童觀小人无咎君子吝象曰初六童觀小人
道也

臣聞觀以二陽位否剥之間欲化小人爲君子
故待小人恕欲君子益進其爲君子故待君子
嚴九五宅中于上光明碩大之德如日月之照
臨有目皆覩初氣卑質弱而去五遠乃爲童稚
之觀童者蒙而未發孩提之童無不知愛其親
則有可發之機彼其陷於小人豈性也哉物欲
蔽之也苟如童稚於倥侗顓蒙之初有以發之
則昏者可迪塞者可通氣質變化安知小人之
不爲君子故雖童觀而許其无咎象以小人道
爲言其質固不可以語上而申言初六亦示其
上進之路也爲君子而不能以學問開明所見
而甘心與懵無識知者同歸則爲吝矣聖人於
大觀之初恕於待小人所以示皇極大受之法

嚴於待君子所以示春秋責備之法

六二闕觀利女貞象曰闕觀女貞亦可醜也

臣聞聖人之道無窮人心之見有限上帝降衷若有常性靈明虛徹初無聖愚賢不肖之間而氣有清濁材有利鈍故所見亦隨之而廣狹仁者見之謂之仁知者見之謂之知百姓日用而不知此其所以區而別之也闕觀之不能廣大豈非六二氣質之柔闇歟九五陽剛之君大觀在上乃帝光天之下至于海隅蒼生萬邦黎獻共惟帝臣之時初以童稚之見而觀蒙昧未有識知二以闕覘之見而觀有識知矣又自安於卑陋蹇淺僅足以知聖人之汙是惟女子生長於深閨之中幽閒專靜而有守則闕觀猶未至害士君子則害道矣象發明爻辭之所未發謂闕覘爲觀雖女子之貞亦有可醜蓋鑽穴相關闕見室家皆爲不正之視女子雖貞而所視不正心隨境移恐不能保其貞也然則欲廣闕觀之見則何先中庸曰好學近乎知學愈進則見愈廣聖人之全體大用目擊而道存矣故惟人百之已千之雖愚必明雖柔必彊

六三觀我生進退象曰觀我生進退未失道也

臣聞三上承二陽下接二陰而居其中陽爲君

子陰爲小人進而從陽則爲君子之歸退而從陰則爲小人之趨一進一退蓋邪正善惡之關也三於此觀我生生者出於吾身者也其大端則言行是已觀吾之言其進而合於君子耶其未至於君子耶觀吾之行其退而陷於小人耶其遂遠於小人耶君子小人之界限其間不能以寸反觀吾身之所發必欲進與上之二陽同其光明而不欲退與下之二陰同其柔闇能如是三雖處不中不正之位亦未至於失道也蓋三之質易於失道以能反觀諸身去小人而從君子故道爲未失也然未之一辭猶未深保其不失道蓋亦戰戰栗栗於取舍之決爲舜而不爲跖爲堯而不爲桀哉此正大學致知工夫之地

六四觀國之光利用賓于王象曰觀國之光尚賓也

臣聞九五剛中之君在上初與二去九五爲遠故止於童觀闕觀三少近則未失道四切近則利用賓觀愈近見愈親也賢者進退有時行藏有道如麒麟鳳凰其出必待休明之世故觀國之光然後賓也國之光明本君德之光明人君能明吾之明德如鑑不受翳水不受滓則本然

之明常存篤實之光充實之輝皆由此而發在
朝廷則禮樂彰法度著在天下則道德同風俗
一其爲國之光大矣賢者觀乎此而願立於其
朝伊尹起於莘野呂望歸於東海豈非湯文之
時利用賔乎象以尚賔發之蓋道義重則勢利
輕賢者寧甘心於白駒之谷考槃之澗不肯屈
身輕售其出也以時其進也以禮其事君也以
道君望其儀刑而起敬故崇尚之以賔禮而不
敢臣取重者在己重之者在君如此則諫行言
聽膏澤下於民矣苟在己無以取重君且望而
輕之母惟乎有言莫之行也

九五觀我生君子无咎象曰觀我生觀民也

臣謂反觀內省之功儒者所難而况貴爲萬乘
可喜可欲所以移其心者滿於前乎九五陽剛
而中正居巽而應順動無過舉矣然猶於我生
必反而觀之凡言行出於吾身者爲我生觀吾
一言之出皆合於君子之道則言無過言一行
之出皆合於君子之道則行無過行以此示民
可以无咎有一不合於君子則有咎矣吾身未
能无咎顧欲使天下皆有士君子之器表偏而
影正無是理也象又以觀民言者君子之道本
諸身證諸庶民觀群黎百姓徧爲爾德則知言

行之出於吾身者爲善觀情侈滅義服美于人
則知言行之出於吾身者爲不善是觀我生者
必當觀諸民也因觀民之所化而觀吾身則言
行是非不能揜因觀我之所生而觀吾心則念
慮之邪正不能蔽由外而反諸內愈近愈不敢
自恕由內而推諸外愈遠愈不能自隱内外交
相養之道既盡天下觀而化之孰不頤然而孚
乎

上九觀其生君子无咎象曰觀其生志未平也
臣聞上九與九五爻辭同惟我生其生異蓋吾
身之所出爲我生九五之君所以自觀也上九
則觀君身之所出故爲其生五君位上處無位
之地而密比之雖居無位之地一念未嘗忘乎
君常欲納之於無過故觀君之言行果君子耶
則喜其能免於咎觀君之言行未君子耶則憂
其不能免於咎身在畎畝心在王室因所觀而
察之惟恐吾君之出乎身發乎邇者有一毫之
未當無以示四海之儀則其志豈遽平哉然九
五觀我生上九觀其生皆合乎君子之道而僅
止於无咎何耶人君之治身無止法言行極堯
舜禹湯文武之盛不過盡其身之所當爲初非
有餘故君子乃无咎不然有咎矣人臣之望君

無止法以禹湯文武爲未足又耻其不及堯舜
故君德至于君子特喜其无咎未敢遽以爲可
安也此觀之君臣所以各盡其道

噬嗑亨利用獄

臣聞噬者合也噬去頤中之物而合也頤卦合
艮震爲體初上皆剛而中之四爻皆柔猶人之
頤虛其中也噬嗑初上皆剛與頤同而四亦剛
是頤中有物間之故有待於噬而後噬也凡去
間之道皆然時則勿有間之是君臣之際以無
所間而合也人不間於父母昆弟之言是骨肉
之際以無所間而合也彼蠻夷猾夏寇賊姦宄
蓋梗聖人之化爲天下之間者去其間則化行
於天下矣噬嗑亨間去而合即亨也其義利於
用獄獄以推見其爲間之情而去之則梗吾化
者不至於覆出爲惡病根除而正氣還也其在
人心則人欲爲天理之間人欲盡去天理流行
豈非間去而亨乎此又克己工夫之當盡
彖曰頤中有物曰噬嗑噬嗑而亨剛柔分動而明
雷電合而章柔得中而上行雖不當位利用獄也
臣聞頤者養也頤以納飲食致養而有物梗之
故必待噬而後合合則亨矣亨之功在噬噬者
用力嚙去之也小人爲君子之間不用力以退

小人則君子不進夷狄爲中國之間不用力以却夷狄則中國不尊姦民爲良民之間不用力以治姦民則良民不安此皆噬之功所以致亨也以爻言之則三陽三陰爲剛柔分以卦言之則下震上離爲動而明以象言之則震爲雷離爲電二者參合而成章雷取其威電取其明治獄之道無大於此然六五爲用獄之主乃以柔中之道行於上雖以陰居陽爲不當位而治獄以燭見情僞爲先離體虛中而明故於用獄爲利夫獄者民命所係得其情則哀矜而弗喜欽恤之仁行焉苟不以柔治而以剛治則明過於察威過於猛人將無所錯手足失天地大生之德矣噬嗑義在除間而歸於柔中以此知好生者聖人之本心用刑者聖人之不得已

象曰雷電噬嗑先王以明罰勅法

臣聞陰陽相薄而爲雷相軋而爲電故震之一陽動於下離之一陰明於中噬嗑之象取焉卦本先電彖象乃以雷先於電者蓋泰卦上坤而下乾不曰地天交泰而曰天地交泰取其交也噬嗑上離而下震不曰電雷噬嗑而曰雷電噬嗑取其合也電明而雷動雷行而電隨明與威合然後梗化者可去徒明而不威則詳於察姦

而不能除其失也。儒徒威而不明，則銳於去惡而不能辨其失也。闇明行以威威發以明，天下無難去之間矣。先王觀雷電之象，於是用電之明以明罰，用雷之威以勅法。罰顯而枉直各得其情，法飭而輕重各當其罪。利用獄之道盡矣。舜之去四凶，成王之去三監，孔子之去少正卯，皆此道也。然辟以止辟，刑期無刑，聖人豈徒恃法令爲齊民之具，明與威並用，罰一人而千萬人懼法，雖飭而不常用也。雷電之合，隨即開霽，天道亦豈常用其威哉？

初九履校滅趾无咎象曰履校滅趾不行也

臣聞噬嗑利用獄，初上爲受刑之人。人之性本善，情動欲生，遂陷於惡。聖人憫之，故設爲刑罰以懲惡而挽之於善。然善惡觀其所積，欲惡之不積，當於其始而禁之。趾在下爲行之始，加校於屨而趾滅焉，彼雖欲行而不可得，則不進於惡，可以免咎矣。校足械也，滅沒也，校深大至於沒其足也。或謂滅趾爲刑，刑則施踊，何取乎屨有屨，加校非斷趾明矣。唐虞畫象而民不犯，特赭衣菲屨之類，肉刑未嘗用也。蓋小懲而大誡，故能免麗於刑。小不懲則惡積，罪大聖人豈得而私宥哉？其在人心一念有不善，貴乎早覺。

而力過不貳過不遠復之功皆基於此覺之不
早過之不力則去舜就跖悔莫追矣觀易者知
治已則知治人

六二噬膚滅鼻无咎象曰噬膚滅鼻乘剛也

臣聞爲一卦之間者九四也初九與四爲正應
是同惡相濟者也膚柔而易噬猶初之爲惡未
稔而易制鼻高而難滅猶四之爲間甚大而難
治始噬者膚而終至於滅鼻小懲於初遂大討
於四也四之間去則初無與應小人之黨孤何
能爲哉乘剛言二位乎初之上乘初之剛以攻
四之剛因瑕而及堅也蓋二居中得正以用刑

所施不失其序故下能治初之罪上能除四之
間輕重有權尚何過咎之有皇矣一詩文王侵
自阮疆不過用輕兵以臨之而阮自服進至崇
墉則聲罪致伐必是絕是忽而後已彼其剛戾
桀化之罪雖同阮爲易討崇爲難討侵阮則膚
之噬伐崇則鼻之滅聖人初意不汲汲於深治
小人而終有不容不深治者皆其所自取也
六三噬腊肉遇毒小吝无咎象曰遇毒位不當也
臣聞周禮腊人掌乾肉腊物之全乾者也小人
掌盛而勢強其堅難噬與全體之腊同三乘初
應上而隣於四戾小人挾黨爲間欲盡除之然

人之爲惡情有淺深罪有輕重不問渠魁脅從而例殲之是舉腊肉之全體求快於一噬故反遇其毒豈非可吝者乎而其吝小終歸於无咎我之治小人名正言順彼雖有反噬之心無所施也然其遇毒亦以位不當之故無瑕者可以戮人三所處不中不正而欲施刑去天下之間人其肯心服哉齊威公自侵蔡而伐楚猶噬難噬之腊肉屈元如師辭多勃戾有遇毒小吝之象而終於服包茅不貢之罪則无咎矣齊之挾天子以令諸侯位固不當楚雖強不敢不服豈非齊之尊王名正言順乎

九四噬乾肺得金矢利艱貞吉象曰利艱貞吉未光也

臣聞凡物乾爲陽濡爲陰腊肺及肉以乾取義指陽爻言也九四在一卦之中本爲間者以爻言之則四之位近君九之材足以堅決而立斷故資之以除間初九不畏不仁不耻不義四與爲正應猶聯骨之肺肉既乾而堅至爲難噬一旦噬而去之見善明而趨義勇蓋得金矢之象焉有金之剛而無柔懦有矢之直而無回曲義形於色不茹不吐宜難噬者之無不噬也然去間不可有所易以易視之樞機不密未必不反

爲人所制不可有所撓在我不能貞固其守而猶豫遷就安知無當斷不斷之患此所以利艱貞吉也象言未光蓋始與小人密而終力去之雖得去間之義亦宜所謂表裏純一本末坦明昭昭然揭日月而行者乎平勃勸呂氏王諸呂其後卒誅諸呂在漢爲有大功參之王陵以白馬之盟折其萌則二臣爲未光矣大臣任去間之責者當觀諸此

六五噬乾肉得黃金貞厲无咎象曰貞厲无咎得當也

臣聞人主天下之利勢威靈氣燄之所暨以去小人之間則小人消以去夷狄之間則夷狄服權有所歸則勢有所易也腊肉全體最難噬乾肺附骨亦難噬乾肉雖難噬而視腊肉爲易凡三爻之陽皆足以梗化以六五離明之君制之如噬乾肉然何堅之不斷何間之不除正以其得黃金之象也黃取其中金取其剛人君有剛中之德天下之悍戾邪僻無不退聽尤當正固守此而以兢惕危厲行之則惡無覆出凶無反噬尚何咎之有夫有間則有咎其所以能終免於咎蓋以得剛中之道以治間當其宜也六五本柔中爻乃取剛中爲義上卦屬離離一陰居

二陽之間中柔而外剛仁者之勇也君德苟仁有餘而剛不足則無以斷天下之疑定天下之業唐之姑息受制於強藩悍鎮漢之優游養賢於宦官外戚豈不甚可鑒哉

上九何校滅耳凶象曰何校滅耳聰不明也

臣聞初上兩爻皆受刑之人初九小懲而大誡故受刑輕上九惡積而罪大故受刑重何校械其頸也械深大至於沒耳耳主聰有耳而不能聞過徙義聾聵其心而浸至此極其所由來者漸矣夫視曰明聽曰聰本二事也而以不明麗之明於聽德然後謂之聰也天下之耳相似

誰無是聰私心塞之顛倒是非而有誤蠅聲而雞蟻鬬而牛外雖有聞中實蔽惑故聞人之善言而惡其逆已聞人之惡言則悅其順已不明孰大焉使盜跖桀紂能聽人逆已之言而不以順已爲悅亦何至天下之惡皆歸萬世不可湔濯哉此易象示人遷善改過之門最緊切處

斗齋八集卷第二十九

故事

高宗皇帝建炎元年冬十月內侍自京賫內府珠玉二囊來上上投之汴水翌日以諭輔臣黃潛善曰可惜有之不必棄無之不必求上曰太古之世摘玉毀珠小盜不起朕甚慕之庶幾求所以息盜耳

臣聞人主一念之動左右承之百辟趨之天下嚮之故好惡之念當謹其微蓋此心不能兩用有所重則有所輕愛易流之陰者視尺璧如瓦礫寶難得之賢者視遠物如糞壤徑寸之珠不

易齊之四臣連城之壁不奪趙之一士審輕重
之義也魯公伐衛齊人來歸衛寶而意不啻足
齊伐北燕賂以瑤甕玉櫝遂不克而還此念一
爲外物所移志消氣沮矣我高宗皇帝紹開
中興急欲信大義於天下以內侍所獻投之汴
水使左右諸大夫國人皆知志不在小而在大
與光武手不執珠玉同意用能收拾人心於渙
散之餘振起國勢於頽壞之後後聖所當法也
廼者經略山東九重之上初未嘗有嗜好見於
外而當國惟寶玉是徇諸將旁搜巧索爭投所
好奇珍異玩全集私第歸附者得以窺其無志
於中原而動於惡臣願陛下下一懲宿弊而反
之凡以珠玉服玩來獻皆碎之通衢以示聖意
之所嚮邊臣聞風亦將以功名自勵務爲廉白
以服豪傑盜賊之心事功可集矣至若中原銅
鐵亦不必以輦入內郡爲功昔張林告淮閭有
云土地歸本朝銅錢安往識者謂爲至論謀國
者所當察也

晉謝安以荆江二州並缺亘石虔有沔陽之功慮
其驍猛在形勝之地終或難制乃以亘石民爲荆
州亘伊爲中流石虔爲豫州旣以三亘據三州彼
此無怨各得所任其經遠無競類皆如此

臣聞御得其道則天下狙詐咸作使御失其道則天下狙詐咸作敵御之爲言以馬喻也詭銜泛駕之馬跂弛而難制使王良造父御之則鳴和鸞逐水曲進退伸縮無不如意否則驛不受羈矣謝安之用三亘人徒知其經遠無競而不知駕御之術默寓乎其間蓋石虔趨捷絕倫旣奪之上流而石民與伊非所患兼是時荆江豫三州軍事皆在安都督之下而兵權實操於內此首重則彼尾輕也苟朝廷無以操其權而制其命王彪之所謂兵權萃於一門非深根固蒂之宜安焉得不爲之深慮哉知此則知八柄馭臣雖王者有所不敢忽

高帝詔曰欲省賦甚今獻未有程吏或多賦以爲獻而諸侯王尤多民疾之令諸侯王通侯常以十月朝獻及郡各以其口數率人歲六十三錢以給獻費

武帝置初郡十七且以其故俗治毋賦稅南陽漢中以往各以其地比給初郡而初郡時時殺吏漢發南方吏卒往誅之費皆仰給大農以均輸調鹽鐵助賦故能贍之然兵所過縣爲以警給毋乏而已不敢言擅賦法矣

臣聞人君有愛民之實意而後有及民之實惠

漢世詔書出於人主之筆精神心術之微悉於
詔見之觀高帝欲省賦甚之語簡嚴明白繼之
文帝振貸減租之詔勤勤懇懇其愛民實意皆
可以對越天地安有不被其澤者漢賦有三口
賦以食天子算賦以治庫兵車馬更賦以給戍
邊此詔所欲省當是斯時又有獻賦郡國假獻
爲名重賦以爲民害故亟欲省之方楚漢之爭
未決則初爲算賦及天下既定則欲省獻賦以
此見傷財害民無如兵費之重兵費百出而欲
行愛民之政蓋難然愛民之意不可以兵而間
斷也武帝元狩之詔謂君考心也民猶支體支
體傷則心惜怛非無愛民之意而好大喜功移
之臣嘗考司馬遷平準書其論帝取財贍兵本
末凡十餘節一節害深於一節曰江淮之間蕭
然矣曰廢格沮誹窮治之獄用矣曰三人言利
析秋毫矣曰吏道益雜而多賈人矣曰稍稍置
均輸通貨物矣曰無慮皆鑄金錢矣曰公卿大
夫多諂諛取容矣曰楊可告緡令縱矣曰縣官
有鹽鐵緡錢之故用益饒矣曰株送徒入財得
補郎郎選衰矣而終至於曰不敢言擅賦法矣
而極高帝欲爲民省賦帝乃聽吏擅取非經常
之賦夫豈不知有民哉置郡方新顒顒待哺恐

廢前功惟求趣辦雖欲禁吏之不擅賦不可得也益口賦三十輪臺悔之猶幸此意不絕如綫而仁義之澤未至於遽斬此所以壽四百年之脉歟

紹興元年六月辛巳上虞縣丞婁寅亮上書言宗社大計欲望於伯字行下遴選太祖諸孫有賢德者視秩親王使牧九州以待皇嗣之生退處藩服上大嘆寤戊子上諭大臣曰昨令應選藝祖之後宗子二三歲者得四五人資相皆非歧嶷且令歸家俟其至泉南選之

臣恭攷高宗皇帝誕聖於大觀丁亥即位於建炎丁未至婁寅亮上書之歲聖壽方二十有五萬世無疆之計大矣哉

蜀先主將東征孫權群臣多諫不從大軍敗績諸葛亮歎曰法孝直若在則能制主上東行就復東行必不傾危矣

唐太宗欲自征高麗群臣多諫不聽凡拔十城上以不能成功深悔之歎曰魏證若在不使我有是行也

臣聞孟子曰入則無法家拂士出則無敵國外患者國常亡蓋自堯舜不作人主孰能無舉動之過所賴以拂正其非而反諸是惟左右前後

之臣爾而便佞者逢之輕黜者長之具位者拱
視而不暇問畏事者竊歎而不敢言幸而敢言
亦惟一言以塞責而終歸於首鼠人主過舉於
是莫之能救使當舉動少差之初力盡面折廷
諍之誼引裾不從繼以折檻自非諱過復諫之
主安能不矍然悟幡然改惟其若宮之竒儒而
不能強諫故雖諫無益也先主復關羽之耻而
興忿兵太宗討高麗之罪而興貪兵非無黃權
褚遂良等之諫而所諫不力無救於行法魏二
臣猶在必將激烈懇到極其骨鯁不從不止也
夷陵鴨綠之悔當時諸臣安得辭其責哉雖然
亮知惜孝直而考其推擇之素特將琬費禕之
純良向寵之淑均何望其復有孝直之方勁太
宗知惜魏證而田舍翁之怒見於生前仆碑停
昏之恨形於身後取言之氣沮喪殆盡末節欲
望廷臣如證之剴切難矣是則人君平時能養
法家拂士之氣臨事乃獲法家拂士之力
上方欲用文武求之如弗及始以蒲輪迎枚生見
主父偃而歎息群士慕嚮異人並出卜式拔於芻
牧洪羊擢於賈孺衛青奮於奴僕日磬出於降虜
斯亦曩時版築飯牛之朋已漢之得人於茲爲盛
儒雅則公孫洪董仲舒兒寬篤行則石建石慶質

直則汲黯卜式推賢則韓安國鄭當時定令則趙禹張湯文章則司馬遷相如滑稽則東方朔枚臯應對則嚴助朱買臣歷數則唐都洛下閎協律則李延年運籌則桑洪羊奉使則張騫蘇武將率則衛青霍去病受遺則霍光金日磾其餘不可勝紀是以興造功業制度遺文後世莫及

順帝知能任使故士得用情天下喁喁仰其風采遂廼備元纁玉帛以聘南陽樊英天子降寢殿設壇席尚書奉引延問失得急登賢之舉虛降己之禮於是處士鄙生忘其拘儒拂巾衽褐以企旌車之招矣至廼英能承風俊乂成事若李固周舉之

淵謨洪深左雄黃瓊之政事正固且焉楊厚以儒學進崔爰馬融以文章顯吳祐蘇章种暘樂巴牧民之良幹龐參虞詡將帥之宏規王龔張皓虛心以推士張綱杜喬直道以糾違郎顗陰陽詳密張衡機術特妙東京之士於茲盛焉向使廟堂納其高謀疆場宣其智力帷幄容其謇辭舉措稟其成式則武宣之軌豈其遠而

臣聞求賢而不用吉士與不求同知人而不善任使與不知同人主有志於治孰不知非賢罔乂而急於求賢者有行可際可公養之仕亦莫不起而應其求海濱之大老至洛陽之年少至

東山之高卧者至周南之滯留者至明庭立鵠
華階振鷺非不極一時之盛而知不盡所抱用
不盡所知如醫者聚參苓朮桂玉札丹砂於一
橐品雖至珍用與病違雖聚無益也武帝蒲輪
之招一下而異人並出順帝元纁之聘一馳而
俊乂咸事好賢急士之意前後無間然武帝有
儒雅薦行質直推賢定令文章滑稽應對歷數
協律運籌奉使將率受遺所聚凡二十七人而
漢以之盛順帝有淵謨政事儒學文章牧民將
帥推士糾違陰陽機術所聚凡二十人而漢以
之衰蓋武帝於人才之長短小大洞察底蘊隨
所用而各當順帝第知來之而高謀不見納容
辭不見容智力不得宜賢雖滿朝廷足以美觀
聽而已諸葛亮嘗言親賢人遠小人先漢所以
興隆親小人遠賢士後漢所以傾頽一親一遠
之間盛衰判矣易之損益皆以十朋之龜弗克
違明衆賢之助在損之六五虛中自損以從在
下之賢則爲元吉在益之六二賢者欲致益於
君而君之樂受其益未可盡必也則惟常守正
固以待之至王用之以享于帝然後吉有志於
治者其可以徒聚天下之賢哉賢者之聚亦豈
可徒樂簪盍之盛而不思相與其慰天下之望

哉

晉元帝建武元年置史官立太學太興元年帝親
雩初置諫鼓謗木新作聽訟觀二年置博士貢四
年置周易儀禮公羊博士帝親覽庶獄

臣聞物有本末事有終始知所先後則近道矣
先者事之所當急後者事之所當緩緩急先後
不舛其序治道何患於不舉元帝承皇綱解紐
之餘宜思興起國勢如拯溺救焚之急顧乃以
安平之大體治危亡之壞證以守文之常度制
應變之危機故近世論者謂此何等時而舉不
急之務訟觀作矣胡不築將壇以拜淮陰太學

興矣胡不立武舉以招汾陽親雩之禮行矣胡
不屈帝尊而勞細柳博士之貢置矣胡不造樓
船而命將軍諫鼓謗木設矣胡不修車馬備器
械以圖修攘之治是非數端爲可略也典午綴
旂胡羯扛鼎中原豪傑競起而逐鹿時之所急
不在是也使當時內以經制國用爲實政而不
以練衣爲僅足之規外以嚴飭兵備爲實功而
不以玉冊爲苟安之地晉其興乎厥今金甌雖
無玷缺之虞玉關未有閉拒之策戰難於必勝
守難於必固和難於必信而民力國計已但至
於窮不汲汲於豐財強兵先其所當急而論義

理者多清談言政事者多細務折裳補帶以爲巧折柳樊圃以爲固厝火積薪以爲安脫有意外之警臣恐非雍容拱揖之所能辦也

席前左端之銘曰安樂必敬前右端之銘曰無行可悔後左端之銘曰一反一側亦不可以忘後右端之銘曰所監不遠視邇所代

机之銘曰皇皇惟敬口生舌口戕口

鑑之銘曰見爾前慮爾後

盥盤之銘曰與其溺於人也寧溺於淵溺於淵猶可游也溺於人不可救也

楹之銘曰母曰胡殘其禍將然母曰胡害其禍將

大母曰胡傷其禍將長

杖之銘曰惡乎危於忿寔惡乎失道於嗜慾惡乎相忘於富貴

帶之銘曰火滅修容謹戒必恭恭則壽

屨履之銘曰謹之勞勞則富

觴豆之銘曰食自杖食自杖戒之憍憍則逃

户之銘曰夫名難得而易失無懃弗志而曰我知之乎無懃弗及而曰我杖之乎擾阻以泥之若風將至必先搖搖雖有聖人不能爲謀也

牖之銘曰隨天時地之時敬祀皇天敬以先時

劔之銘曰帶之以爲服動必行德行德則興倍德

則壞

弓之銘曰屈伸之義廢興之行無忘自過
矛之銘曰造矛造矛少間弗忍終身之羞予一人
所聞以戒後世子孫

衣之銘曰桑蠶苦女工難得新捐故後必寒

鏡之銘曰以鏡自照見形容以人自照者見吉凶
飭之銘曰樂極則悲沈湎致非社稷爲危

机之銘曰安無忘危存無忘亡孰惟二者必後無

凶

杖之銘曰輔人無苟扶人無容

此武王聞丹書於師尚父爲銘以自警也維昔

帝王之治天下莫不以敬爲主敬則百慮澄不
敬則百慮擾敬則萬善集不敬則萬善隳是敬
非自外而入也上帝臨女毋貳爾心知所畏然
後知所敬也人主身都綦貴心受衆攻非隨物
致戒以警勅之則畏心忘而敬心泯天理之存
者幾何武王惕懼而銘諸物不曰視邇所代則
曰溺不可救不曰其禍將大則曰社稷爲危何
其辭之嚴也天真難保人慾易流出入起居之
際龜鑒在目庶幾常若危亡禍亂之壓其前而
起臨深履薄之懼無一念之非敬也然以武王
之聖豈待睹銘而知懼哉堯舜性之也湯武

之也身之則寧過於檢防求進乎性之之域也
其或收歛於十手十目之地而縱肆於暗室屋
漏之中修飾於親儒生學士之時而玩狎於對
宦官女子之頃雖有此銘如無此銘矣故中庸
大學皆貴乎君子謹其獨
宣公十有五年秋初稅畝初者何始也稅畝者何
履畝而稅也初稅畝何以書譏何譏爾譏始履畝
而稅也

臣謂立法以取民莫患乎其作俑也夫君與民
本一家國用之而取諸民民出其所有以供乎
上猶子奉父孰不敬應然自昔什一之法公田
藉民力而耕收其歲入民田之私則未嘗有稅
魯初法履畝以稅之國用不足蓋有甚不獲已
者聖人於此乃書初以示譏豈非初之所刼疑
若特一時之暫而後之必襲必假是以行其無
藝之歛如螽之生喙其害未有底止二吾不足
而用田賦此其俑也武帝紀書初筭商車初筭
緡錢初榷酒酤頗識此意

梁冀在位二十餘年窮極滿盛收冀財貨縣官斤
賣合三十餘萬萬以充王府用減天下租稅之半
散其苑囿以業窮民

臣聞財用之在天下如血脉行乎一身可通

不可壅王者藏富於民霸者藏富於國其下富不在國又不在民而在於聚歛臣之家蓋自王道不行而人心壞人心壞而吏治壞舍義趨利假公售私朘民自封一孔不貸柄國者又爲生姦受盜之府而天下之富徧聚焉此冀所以積至三十餘萬萬而未屬厭也夫財本吾國之有而取以助國財皆吾民之出而還以予民其理順其政公故收冀家以充王府而減租稅天下以爲快後世莫以爲非不謂威帝能行之也

太祖問李承進曰莊宗以英武定中原享國不久何也承進曰莊宗務姑息將士每出禁兵衛卒必控馬首告兒郎輩寒冷望與抃接莊宗即隨其所欲給之蓋威令不行賞賚無節也 上撫髀歎曰

三十年夾河戰爭取得天下不能用軍法約束此輩縱其無厭之求以茲臨御誠爲兒戲朕今撫養士卒固不吝惜爵賞苟犯吾法惟有劔耳

易曰上天下澤履君子以辨上下定民志上下不辨民志何由定民志不定而欲求國勢之安彊是却行而求前也况三軍以紀律爲重處不知禮則出不知律犯上之意一萌作亂之機已兆尚可望其敵王愾而伸國威哉唐自肅宗簡一時之安平盧節度察軍中所欲立者授以

節自是以姑息爲常至於偏裨士卒殺逐主帥而不問廉遠地則堂高廉近地則堂卑陵夷之勢何所不至此唐所以亡也後唐莊宗猶襲故態不能以軍法約束而威令不行享國不永竟坐姑息之過我太祖皇帝受天明命爲世立極盡革唐季五代禮法蕩析之弊一階一級上下相承川班妄訴必肆顯戮此所以國勢有金城千里之固民生有泰山四維之安也然豈徒以階級之法繩之哉平時撫養不吝爵賞苟犯法則有劔恩施而後威立宜軍心悅服不敢輕於有犯也

憲宗嘗與宰相論治道於延英殿日旰晷甚汗透御服宰相恐上體倦求退上留之曰朕入禁中所與處者獨宮人宦官耳故樂與卿等共談爲理之要殊不知倦也

人心不可以兩用有所慕則有所忘好善者忘酒樂德者忘色八年于外急於拯四海之溺而忘其家日昃不食勤於合萬民之和而忘其身所重在此則所輕在彼也方時瘴暑人孰不惟寬涼之是慕憲宗銳於圖治議政延英日且旰矣汗透御衣而不顧蓋忘其爲暑也謙虛以盡大臣之情而無取乎宮人宦官之與處奮厲以

講中興之要而不求乎深宮廣廈之自逸社稷
生靈之念日切於中凡人情之所共樂者無不
忘之其肯以天下之未安爲一身之適乎況是
時名相皆足以穆天緯經國體所議必非不急
細務徒留盱食之聽者堂堂兩河已盡在規畫
中矣彼避暑九成而忘其親生涼殿閣而忘其
民心移於物惟欲是縱賢君所當戒也

熙寧三年知舉呂公著在貢院中密奏言天子臨
軒策士而用詩賦非舉賢求治之意乞出自宸衷
以諮訪治道至是上御集英殿進士初就席有司
猶給禮部韻及試題出乃策問也既而賜葉祖洽
已下及第時韓維呂惠卿初考策阿時者多在高
等訐直者多在下等

自鄉舉里選之法壞而取士惟虛文是尚漢策
賢良雖未免以利祿入其心科別或有未竟猶
不失言揚之意唐進士得人爲盛特締章繪句
之習工如日五色何益世用 國朝策士初襲
唐人詞章之舊至此始以策諮訪治道與漢制
科等其意美矣然草茅言事豈能皆若素宦于
朝而効忠獻直悉出於愛君憂國之真情言之
當固不以人廢言之過亦貴於能容人君能容
過直之言市駿骨揖怒蛙感發作興之下孰不

以安危治忽之實來告苟有司喜阿逢而惡訐
直以行上下其手之私如呂惠卿輩美意一失
奚以臨軒發策爲哉維我 仁宗之策蘇轍其
言宮中事過於直上曰以直言求人而以直棄
之天下謂我何可謂有大舜之大矣是時考官
則司馬光范鎮蔡襄

唐太宗謂蕭瑀曰朕少好弓矢得良弓十數自謂
無以加近以示弓工乃曰皆非良材朕問其故工
曰木心不直則脉理皆邪弓雖勁而發矢不直朕
始寤向者辨之未精也

虞人有原獸之箴輪人有糟粕之議工執藝事
以諫不聞於世久矣而唐之弓工獨得古意其
言蓋以規太宗功業雖盛而治心之道實未嘗
講也夫心者萬理之會萬事之主此心明白洞
達無一毫迂曲之累則見面盎背皆天理之形
著發號出令盡人心之契合敬義直方所以相
爲表裏也太宗天姿高而學問不足其得在於
好名其失亦在於好名好名故能矯揉爲善惟
名之好而觀省存養之不加故矯揉之力怠而
稟受之偏者不能揜輕我宮人之怒不役一夫
之怒會頃殺此田舍翁之怒以至好大喜功而
多愛無非本心之發露也木心不直脉理皆邪

雖勁而發矢不直弓工可謂善窺其君心術之微矣太宗亦可於此進格物正心之功矣其謂勇辯諂諛姦詐嗜慾輻湊以攻一心是特知制外而未知養內安有內心不治而外邪可閑者哉

孝宗皇帝宣諭宰臣十年來欲令宰執進呈退將得旨文字再具熟狀進入朕再行審閱批出然後施行既免專擅之嫌且無遷令之患

易曰渙汗其大號書曰令出惟行勿惟反反汗非也號令當反而不反是又遂非也然未當而反不若謹之於樞機未發之先一發而民信之孝祖所以欲再行審閱使無遷令之患也苟熟狀之進隨入隨可而思慮不加焉其與不再進何異惟能存主一之敬每事收斂精神熟觀詳繹而後出尚奚舛令之有

孝宗皇帝臨朝每以方寸紙作掌記微偃兩旁而中摺之實在御手若內殿則留香案上三省密院奏事畢即視所記一一宣諭已乃收之

人主日總萬幾之繁而心思有限安能無所遺忘孝祖聰明睿智與神爲謀猶識所欲宣諭之事於掌記可謂文理密察矣故凡禁嚴清燕之地經史之所閱典故之所聞群臣章奏之所

采有當與大臣參酌可否日隨記於其上俟坐
論從容歷舉而訪之大臣所知悉心以對所未
及知則討論以進久而天下事無一不明習而
洞曉其益豈不多哉

明道中執政除親舊二人爲正言司諫上謂曰祖
宗法臺諫官湏出宸選若大臣自除則大臣過失
無敢言者

治平二年以范純仁爲殿中侍御史呂大防爲監
察御史裏行近制御史有闕則命翰林學士御史
中丞迭舉二人而上自擇取一人爲之至是闕兩
員舉者未上內出純仁大防姓名而命之

臣聞臺諫天子耳目之官耳以司吾之聰目以
司吾之明而人執之可乎張行成無先容舉爲
殿中侍御史柳公權有諍臣風屈爲諫議大夫
萬乘親擢邇臣莫與夫如是則任耳目之寄者
激昂振厲思稱主知周而無所比正而無所阿
朝政之得失廟論之是非相業之修廢不吐不
茹悉以上聞不至於懷私恩徇偏見以亂天下
之公我朝祖宗法臺諫官湏出宸選正以
是也異時唐介論文彥博王陶彈韓琦以二輔
臣之賢猶不爲之少隱況下於文韓者乎雖然
臺諫不由進擬固足攬馭臣之枋要必人主有

至明之見而後能奮獨斷以聳衆望否則不謀之外廷謀之左右親暱附下罔上抑又甚矣大明在上邪正洞燭得范純仁呂公著而內出姓名得歐陽脩余靖王素而御筆親除斯無愧累朝之盛

唐正元中宣武都知兵馬使李萬榮逐節度使劉士寧上聞之使問陸贄贄上奏士寧見逐雖是衆情萬榮搃軍且非朝旨願審之謹之上復謂贄曰今議除一親王充節度使令萬榮知留後贄復上奏曰夫制置之安危由勢付授之濟否由才勢如噐焉唯在所置置之夷地則平才如負焉唯在所授踰其力則踣爲國之道以義訓人將教事君先令順長若使傾奪之徒便得代居其任利之所在人各有心此源潛滋禍必難救非徒長亂之道亦開謀逆之端上不從竟以萬榮爲留後

臣聞名分者天下之大閑植之則治隳之則亂唐自天寶以宴安非覺君失其尊肅宗復國宜思挈皇綱於旣墜扶大分於寢隳乃就平盧軍中察所欲立者授以旄節自此廢置之權在軍士而姑息之弊開至代宗專事姑息僅之羈縻德宗加甚焉李萬榮逐劉士寧而自搃官武陸贄以傾奪長亂爲諫曾莫之聽夫姑息者隳夷

之本姑且也息止也苟圖一時之靜急求目前之舒而莫計其窮是以強藩悍將敗國事者不敢問冒國禁者不敢討屈情抑勢俯而就之以順適其意所求必從所請必獲倨傲偃蹇莫知稟承始則節度不知有朝廷久則將校不知有節度更相睥睨見便則奪犯上者必好亂德宗亦安能禁萬榮之自爲留後乎然使當時君德脩明朝綱振肅不以猜忌疎臣下不以聚歛苦民生禁兵非市井之富兒軍政非宮庭之嬖倖以至在列皆陸贄而非盧杞皆李泌而非張延賞則朝廷之勢重於九鼎藩鎮安得而輕視之

藩鎮之敢於干名犯分朝廷輕故也自昔安有朝廷輕於上廉傾級圯而能措大器於安者哉魏世祖東如許昌大興軍伐吳親御舟循蔡潁淮如壽春至廣陵吳徐盛爲疑城自石頭至江乘一日而成又大浮舟艦于江時江水盛長帝臨望歎曰魏雖有武騎千群無所用之未可圖也帝舟遇暴風漂蕩幾至覆沒乃旋師

臣聞江流湯湯萬古一天險也而飛渡者有之曹操之至赤壁曹丕之至廣陵佛狸之至瓜步逆亮之至采石皆望洋奪氣或且送死豈長江隨時而爲險夷耶天險在勢人險在德與政君

無闕德天人交助夫誰敢犯之其次朝無闕政紀綱立賞罰明號令信任賢使能各當其材則入謀咸贊國勢增彊坐有以制勝矣丕之再飲江窺吳輒自廢而返非特川后之効其靈孫權爲國靡政不舉謀臣勇將咸樂爲用疑城相望巨艦相銜而不膽落天限南北宜其不敢以一衣帶水易視之也是知天險待人險而固德政增修勝勢在我東南有太山之安矣

周世宗擊北漢主劉崇於高平之南樊愛能何徽引騎兵先遁帝欲誅愛能等以肅軍政猶豫未決張永德曰愛能等望敵先奔死未塞責且陛下方欲削平四海苟軍法不立雖有能罷之士百萬之衆安得而用之帝擲枕於地大呼稱善即收愛能徽及所部軍使以上七十餘人悉斬之自是驕將惰卒始知所懼不行姑息之政矣

臣聞軍國之綱紀莫大於賞罰有賞而無罰則惠褻而威不振白刃在前誰肯委命此軍法所以不立也近年以來僨軍之將未嘗有顯罰間鏐其階隨即牽復曾無損於毫毛故皆以棄甲曳兵避死趨生爲得計朝廷姑息將帥將帥姑息士卒未戰即潰旣潰即招望風獸奔恬不爲怪於是兵律壞國勢微矣英主欲大有爲宜以

世宗高平之事爲法

群臣請上尊號及作樂

神宗以久旱不許群臣

固請富弼言故事有災變皆徹樂恐

陛下以同

天節虜使當上壽故未斷其請臣以爲此盛德事

正當以示夷狄乞并罷上壽從之即日而雨弼又

上疏願益畏天戒遠姦佞近忠良

神宗親書荅

詔曰義忠言親理正文直苟非意在愛君志在王

室何以臻此敢不置之枕席銘諸肺腑終老是戒

更願公不替今日之志則天災不難弭太平可立

俟也

臣聞詩曰文王陟降在帝左右又曰陟降厥士

日監在茲上天之心與君接人君之心與天通

一陟一降隨寓隨在初無毫髮之間五事有敬

怠則庶證有休咎其應如響之應聲我

神祖

以久旱輟同天節上壽之禮亢陽即日而雨

陛下以雷變寢天基節上壽之禮積陰即日而

霽夫豈人力所能致哉此心即天心天心即此

心也富弼於旣雨之後奏益畏天戒遠姦佞近

忠良蓋姦佞之遠忠良之近即以畏天戒天意

在於進君子退小人人君欽承此意而行之則


寅畏之實也荅詔欲弼不替今日之志君臣交

相儆戒宜有以祈天永命也歟臣故亦願

陛

下與二三大臣不以天意已回爲喜常以天命
難謀爲懼


平齋文集卷第二十七



平岡文集

批之批二
畢

内閣文庫	
巻頭漢	10277
冊数	12 (12
品目	3 1



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM, Kodak



国立公文書館
National Archives of Japan

原本の文字など不明瞭な個所があります。

綴じ部(喉部分)の文字など不鮮明な個所があります。

平齋文集卷第三十

策問

江東漕司不礙格

問國無常勢隨時而爲彊弱周公之於魯太公之於齊乃能逆料預計於數百年之前則其勢亦有時而定也周之季世地不大於曹滕民不衆於邾莒而諸侯不敢有無周之心秦汧埽六合鞭笞四夷自以爲帝王萬世之業而繩樞之子亦得而易視之人有尪羸而壽考物或恭長而夭折理固應爾獨怪春秋以來齊有葵丘之會晉有踐土之盟均爲五霸之盛而心術譎正宜可以占其國何威

公僅能終其身霸業遂替文公之後世爲盟主齊
且屈而從之豈謫正無關於彊弱耶是猶有可諉
者曰國異而勢殊也及觀漢之文宣規摹一家而
彊弱乃有異勢吳王不朝賜以几杖匈奴嫚侮結
以金繒太息流涕之書其不滿人意非一事然兵
無刃而威權自振刑不肉而德化自孚貫朽粟腐
迄成富庶之効而後嗣賴之樞機周密技巧咸精
吏稱民安之餘單于且歎塞而來享中興之治赫
然莫及而一傳之後漢業衰焉弱轉而彊彊轉而
弱始終之變相反若此其必有故矣恭惟 主上
更張萬化總攬權綱舉天下之政滌蕩振刷而一

新之朝廷清明邊鄙不聳四方延頸以望太平而
轉弱爲彊之機不可失也宵旰雖切庶績未凝鴻
鴈之民尚勞於還定鼠狗之盜猶費於掃除而內
外體統之間血脉壅底臂指拘攣識者尤爲之深
慮國勢所係若有待而彊意者刑賞之施惠褻而
威不振耶紀綱之張名存而實未至耶抑亦體
祖宗立國之意守以寬仁道德安彊隱然自有不
可犯之威而天命人心之固在此而不在彼耶諸
君其敷繹濟時之策以告

礙格

問國論之變至乎中而定夫中在易爲二五在書

爲皇極君子小人進退之機天下國家理亂之本
皆於此乎見泰之九二居治泰之位審處泰之道
包荒得尚于中行是以并包兼容而爲中也然泰
自否來君子之道方長閑邪不可以不嚴防微不
可以不謹而負荒穢之累者乃從而包含之得無
啓小人乘間而進之漸耶洪範皇極之疇有猷有
爲有守則念之好德則錫之福宜也至不協于極
不罹于咎亦且大而受之協于極則君子罹于咎
則小人居君子小人之間而爲鄉原之行其害德
爲尤甚受之者何意四凶之惡已著猶得以假息
於堯朝非包荒歟堯不去四凶而舜去之豈包荒

不能如堯之大歟少正卯言行之僞加以兩觀之
誅蓋謂其已罹于咎矣三家分魯陽虎執國命罪
固浮于少正卯而誅反不及胡爲獨受於此彼其
知宦孺專殺之罪而不問遂成優游聽藩鎮陸梁
之勢而莫制寢至姑息得非假是說以自文曰吾
將以求合于中者又況泰以朋亡爲貴洪範以淫
朋爲戒至公無我黨與不立而中道以行漢唐之
季朋黨成風雖賢者不能免豈其自叛于中歟抑
上之人無以并包而大受之故逸爲朋黨之歸歟
厥今更化以來進君子而退小人開衆正而杜
群枉天下莫不服聖上之明而用舍之際猶恐

或激於偏徇議者乃有中立不倚之說蓋欲示尚中建極之意而定國論於不可轉移之地也夫否與泰常相反極與咎不兩立邪正消長間不容髮伊欲恢包荒之量而小人無得以投君子之隙推大受之公而君子自有以制小人之變皇極大明與天下相安於泰和之域若何而可憂世之士盍相與圖之

饒州堂試一

問周有宮正掌王宮之戒禁糾令宮伯掌王宮之士庶子凡在版者皆屬之天官所以嚴宿衛而備非常也漢制周廬千列陛戟百重視周爲加詳光

祿勳衛尉之設即宮伯宮正之遺意亦屬之丞相否乎排闥而入大臣隨之內朝外朝之勢猶未至於隔絕加官旣設之後大臣亦得至內庭否乎入未央宮殿門不納徘徊往來其禁嚴矣使北軍之印未解則將何以制其變清宮具法駕而入謁者之衛端門且誰何之則夜拜衛將軍無乃猶或置疑其間耶置酒宣室敢於形辟戟之言從幸林光有以杜觸瑟之變若不當以詆諧羈虜少之而當時議者欲使列侯郡守二千石各擇吏民之賢者歲貢以給宿衛豈其猶未足爲賢耶儒者侍中特聽掌御唾壺朝廷榮之似不足榮也其榮之何說

願爲中郎出入禁闥而薄淮陽之郡似未可薄也其薄之何意黃門侍郎號爲要覲彼擢之給事黃門又以爲官之拓落何也郡國材官番上宿衛其法果皆便乎南北分屯以相統制其權果孰重乎謁者執楯執戟武士騶與期門羽林之置亦各有說乎世爲衛尉見於同姓而王國人乃不得宿衛何也太傳古官論道經邦而以給事中領宿衛又何也夫以漢世宿衛之嚴防微杜漸皆有深意揆之成周其得失安在邇者議臣有請宮禁侍衛各儆攸司欲以隆主威而尊國勢上丞俞之不識漢制有可施於今日者乎諸君博古通今言之毋

略

二

問恭惟主上撫盈成之運垂延洪之休豫建元良以固國本謹擇天下耆儒端士爲之輔翼儲德日隆洎剛授冊三代有道之長誠不是過自漢以下固不容並論也而有司竊於攷古有疑焉四皓之來衣冠甚偉羽翼旣成而漢之大本以定子房之畫婉矣論者乃謂其植黨締交以相傾軋殆非子房之意然高帝與呂后母子共起於艱難之中漢業甫定顧牽於私愛欲動搖之期期之諫曾莫能回其意則權以濟事似不當以植黨論也至觀

異日開博望苑以延賓客遂至於虧天性之恩無
乃出於招致四皓之故智乎二疏之去知足不辱
有以激漢世頑廉懦立之風亦可謂賢矣而論者
謂是時太子年未冠學未成未可以潔身而退然
宣帝之教太子不過雜霸之制度已非詒謀燕翼
之道獨親許氏而尊禮師傅之意寔薄見幾而作
似不當以潔身論也至攷其既去之餘論語孝經
之學遂轉移於甘泉洞簫頌之好卒無以養成其
德得非二疏遺其憂乎夫齊威會諸侯于首止而
王世子始定高宗舊學于甘盤既乃遜于荒野是
則四皓之來二疏之去蓋非苟然者而得失是非
曾無定論耶諸君以麟趾之英親逢懿鑠自宜
鋪張揚厲編之詩書而無愧商訂及此特以觀講
學之素耳幸茂明之

三

問五百歲而聖人出若囿於天地之定數君臣而
並父子而處胡爲獨盛於帝王之世耶電繞斗樞
虹流華渚瑤光貫月赤龍生風其見於世紀者若
此質之正符亦過於愛奇矣然履帝武敏歆天命
元鳥降而生商詩人猶且永歌之不足得非聖人
之生固與人異而受命之符抑有在耶夫天生聰
明天錫勇智謂之生知之性出類拔萃可也語恠

及神顧安取此至若東南有天子氣南陽有鬱葱
之佳氣得非王氣有所屬乎夢神過於大澤之波
夢吞日於猗蘭之殿得非精神有所感乎重瞳八
彩日角龍顏與夫鳳姿日表之異抑肖貌有不同
乎十四月而生乃立堯母門胡爲誕彌之月適相
似也甲觀畫堂或謂畫九子母於其中果何據也
功成慶善之樂何爲而作誕聖繼天之樂孰從而
獻千秋紀節何所本始節近長春其議安在恭惟
主上天縱之聖冠冕千古膺錄御圖重熙累洽屬
茲良月瑞慶標辰桂海冰天蒿呼華祝同一心
也諸君生逢千一之期目覩五三之盛躋公堂稱
兕觥以介萬壽實維其時是宜鋪張對天之閔休
與生民天保之詩相爲表裏允自昔帝王震風之
盛事盍相與訂推以諗有司

四

問道揆明於上法守嚴於下則天下之治不難舉
矣宅揆之官舊庸熙載三公之職論道經邦古之
大臣所以任天下之重曷嘗以細故自累哉漢唐
之世九卿更進它官參預已失委任大臣之意而
持祿固位伴食摸稜尚何望其職業之能盡其間
少知治體者抑又不能無疑焉錢穀決獄所宜與
聞乃一諉之內史廷尉而不復省事無不統顧如

是耶死傷橫道豈不大於牛喘而科瑣邊吏僅見
於赤白囊交馳之後恐憂邊思職者不爾也聽受
獄訟日不暇給乃至有愧禮樂豈萬世長策未暇
講耶序進郎吏仰視不顧則體貌安在而止擇十
使猶患未盡得人恐兼收待用者不爾也夫坐而
論道謂之王公網舉目張豈無其要而世之喜事
事者乃以身親細務爲稱職不事事者又以無所
建明爲得體漢唐相業之卑得無坐是乎主上
更新萬化圖任老成以恢張治功宜日異而月殊
可也然天下之弊紛如蠅毛二三大臣夙夜盡瘁
於其間而未底厥成故議臣欲清中書之務簡節
疎目而講明其大者揆守之辨要必有在至若賢
材之未盡舉倖門之未易塞兵聚而難散民困而
易搖穀貴尤艱於和糴楮輕尚費於稱提凡此數
端莫非當今之急務孰爲大臣之職孰爲有司之
事輕重緩急當與識時務者籌之諸君其毋隱

五

問兵以多筭勝智者察事機於呼吸之間料敵勢
於千里之外發無不中如矢破的何其神也而謀
之用舍抑又有幸不幸者存焉廣武說成安欲假
竒兵絕信耳之輜重而兩將可致淮陰使人間視
知其不用然後敢下井陘亦可謂竒策矣使成安

果用其計則信將何以應之魏延每隨亮出輒欲請兵異道會于潼關如韓信故事其謀差強人意亮乃制而不用每嘆已才之不獲盡幸而從之不得失勝負燎如觀火隨機而應慮勝而會必有非衆人所能窺者幸紬繹之

六

問三盤五誥之不作而漢制詔幾於典誥得非去古未遠猶有渾灝之遺風耶漢唐有天下皆數百年漢之帝紀詔不一書而唐史略之何耶文帝之詔半爲農下山東布詔令老癯扶杖往聽願觀德化之成可謂善於布宣者矣而當時猶謂吏奉吾詔不勤勸民不明何責吏之深也循良無傳獨一河南抑吏治誠有未至歟憲宗之世藩鎮稟令制下魏博士卒驩動如雷至有倔強何益之嘆可謂易於感動者矣而淮蔡以三州之衆合兵環攻累年乃下何平盜之難也草制失辭至煩改定抑人心亦有未孚歟彼其輪臺之詔奉天之詔均罪已也其辭孰切寬大之詔陣傷之詔均恤人也其惠孰渥河涼三鎮播告之修均所以奪其心也其意孰明視草之才較以除書德音擅名者孰勝期期之請視以批勅壞麻爲忠者孰優此猶未足深議

也後元獨盛於七制元和並列於三宗號令之煥
然可述與溫雅有古風烈乃不見於文帝之替蔭
之威令幾於復振獨於贊憲宗言之而二祖之制
命無稱焉作史者必有深意恭惟主上祇畏天
戒勤恤民隱嘉與海內同躋仁壽廼者明詔荐頒
飭監司守令以奉職之意開盜賊脅從以自新之
塗王言大哉一見可決四方萬里鼓舞於風雷之
下當不止於山東魏博吏士而已也然澄清者流
爲姑息撫字者轉爲催科習俗移人詎能遽革錢
幣久壅而未通穀價方踴而未艾凶歲多暴還定
猶難伊欲吏治興起姦盜革心翕然不應如漢唐
之盛時若何而可憂世之士盍相與圖之

七

問周南爲三百篇之始文王脩身齊家治國平天
下之道悉於此見之亦猶易首乾坤書斷自唐虞
之意歟然自關雎至兔罝凡七詩始言關雎之化
行又四詩而至麟趾始著其應夫王道自閨門衽
席而達乎天下遠而難化者宜莫如拯拔之人近
而易化者宜莫如同姓之親今乃不應於彼而應
於此何耶羔羊爲鵲巢之功致在位皆節儉正直
至其應見於騶虞則天下純被文王之化草木群
生無一不遂夫召南特諸侯之風其視周南王者

之風固爲有間彼之應顯於庶類之微此獨應於公子信厚無犯非禮而已又何耶詩取麟以爲與趾定角果有仁厚之象歟抑謂太平致麟之時歟序言衰世不知果紂與文王之日歟抑謂周之季世歟麟趾鑄金以班諸侯王夫豈無說而良史之作訖于麟其意安在語曰人而不爲周南召南其猶正牆面而立有志於學者必三復於此而好脩之公子尤當佩之而不忘反覆二南之意推之於行葦角弓以究終始盛衰之變諸君事也其爲我索言之

八

問六經著天道人事之極莫詳於春秋雖不言某事有其應而證應具存其聖人憂世之心所由見乎日食三十六蝨蝻蜚蜮之災總十有八雪電星石隕霜無冰凡其關於天人之際雖微必錄而水旱之變尤不敢略僖王正月不雨夏四月不雨六月始雨其不曰旱謂其有志於民而不爲災然文自正月不雨至于秋七月昭上辛大雩季辛又雩旱亦甚矣而不以旱書無乃亦不爲災耶以至夏大旱欲焚巫尪而復止是歲饑而不害然旱以大書爲虐尤酷安有民不困于饑者不然則宣亦書大旱而不書饑亦謂其不害可也或書旱或書雩

或書不雨美惡異辭必有深意宣大水而繼以饑
襄大水而繼以大饑淫潦妨農固宜艱食而威成
之秋大水莊之末年橫流尤數至敲用牲于社于
門何爲皆不以歉告抑豈如七年之水雖無麥苗
不害嘉穀故從而略之然大無麥禾臧孫辰遂至
告糴貽我來年獨非嘉殖歟亦未有降水若是而
嘉穀不害者威之初年有平原出水之害越二歲
而有年其轉凶爲豐者何道它國非無垂沴宋獨
書水淫雨害於塗盛乃知其必興者何說恭惟
主上篤於敬天切於愛民真得堯湯之用心而大
兵之後四方未免以水旱告若幾於春秋之不一

書者天心仁愛固在是歟木飢水毀皆有數歟有
年之慶勃興之兆否泰相反抑權輿於此歟近觀
吾饒去歲常暘今茲常雨官無委積民有菜色而
或者猶以饒在江東爲優得無旱不爲災雨不害
穀如魯史之所書歟諸君學貫天人不愧舒向盍
相與發明春秋筆削之意以諗爲政者毋以訐而
爲直

九

問人主操富貴之柄以御天下錢幣輕重之權當
一出於上不當與天下共之也虞夏金爲三品周
立九府圜法利權所在上實專之至景王欲更鑄

大錢單穆公雖諫而不聽百姓竟蒙其利揆之劉陶之議則不合文帝除盜鑄之令賜鄧通銅山得以自鑄而錢乃至於貫朽質之賈生之論則不然撰直三千錯刀五千何其直之多百錢墊七八與三十五爲陌何其陌之寡是猶未足深論彼漢之五銖唐之開元錢制是爲得輕重之中然五銖旣行郡國多姦鑄而益輕公卿請鑄鍾官赤側以一當五其後二歲赤側以賤而廢三官錢始富矣開元旣用以經費不給始鑄乾元重寶參用以一當十犯法日數百終復其舊然後民便之夫錢出於上而散於下上之所重孰得而輕顧方行而遽輟何耶抑上之人不過爲一時權宜之舉隨即反經耶否則朝廷之上無以主其議以一人之言爲用舍耶漢方再造猶興五銖之思唐凡幾世一循開元之制而赤側重寶不復見抑又何也 國家銅楮並行深得子母相權之意頃以楮幣益輕多爲秤提之術而未底於重於是以開禧新布以二淮三行於輦轂之下利權輕重操之自我可謂得其宜矣或者猶謂貨泉新舊均國寶也而自爲抑揚京城內外皆畿甸也而自爲畛域恐未免抵冒之多然使以二淮三果可通行則錢之布於天下者皆可從而增益否幸以利害得諸目擊者爲有司

告

十

問大江以東衣冠之盛饒爲最螺洲地識異人出焉冠大廷世殊科班班可數皆學校作成之功也漢之番君唐之顏魯公德澤在人至深而獨不聞垂意興學何耶晉虞公爲內史大脩庠序是前此嘗有學矣誰實基之移告屬縣廣招生徒至七百餘人教養之盛若此今所養僅能三之一而壑鹽之態常患不足不知當時雲會輻湊何以爲養先正范文正公相攸於東湖上繼者始築儒宮以據水光山色之會公之詩文胡不及之買田三頃以濟士大書特書詫以爲盛然所入其能幾何今膏腴歲增數凡幾倍而倉廩之積不見有餘抑尾閭之泄無以窒其源耶高堂顯敞不改舊觀硯湖平遠尤覺增明二公所以淑艾後人者雖百世聞風而亦起諸君藏脩其間講明正心誠意之學涵養致君澤民之業以求無負於教育之素盍各爲我言爾志

十一

問世臣之喬木舊德之元龜有國者所甚重而出處進退天下莫不望以爲標的尚論古人顧不能無疑焉復毫卜洛之餘告歸之志則同胡爲乃有

欲去而復留者不惟自留且作書以留同列同列亦爲久留而不去何勇退之難耶海濱二老同爲善養而來歸扣馬之諫鷹揚之舉果孰爲義天下既定表東海者乃不與師保左右之任何耶從心不踰矩之年尚皇皇於歷聘否以天下之達尊自居能終不見諸侯否乘駟而見輦而如公告老猶得以與聞國事至朝廷大議遣廷尉諮問亦乞言之遺意否願棄人間事從赤松子游蓋已見幾而作何衣冠甚偉者始來上閔將軍之老召其子爲太僕可謂貪賢之切何知足不辱者遽去求文武如不及而蒲輪之迎特能詞賦爲治顧在力行而冀邸之議乃先服色據鞍矍鑠非不銳也未免乘下澤車之悔食肉萬里非不壯也未免入玉門關之請而無踰老臣尚堪一行則又好勇至老而不衰其視耆耆黃髮之謀孰得孰失晚應賢良但見不情而多詐周流四公不過恭遜以取媚請尚方劍賜靈壽杖與夫長樂老之自叙血氣旣衰固應爾歟彼綠野堂之遊九老圖之作亦必有所懲而然也著節而稱祭酒攷於周當爲何官遮說而得三老不謂秦尚存此名自諫大夫遷御史大夫爲太傅而封褒德侯漢家校年之法抑又安在書陳舊人之圖任詩歌元老之壯猶年高德邵閱義理

爲甚熟出處大節必有非衆人所能識者幸商訂之

十二

問漢公子之好學莫如楚元王一門之盛元王受詩於浮丘伯諸子皆讀詩至孫辟強亦好讀詩越數世猶有以少通詩書召者豈非過庭之訓而然歟然德修黃老之術得枕中鴻寶苑祕書於淮南其子竟以是下吏恐非所以爲義方之教也而與校祕書於天祿閣太一青藜爲之下照歆復領五經卒父前業可謂能世其官矣然向自主穀梁春秋義歆則欲建左氏春秋論難迭出自爲矛盾豈父書有不必讀耶抑輪扁斲輪不能授其子耶其穀梁左氏於聖人之經爲孰近左氏多古字歆獨好之引傳釋經轉相發明其於字學蓋精蔡則方且問奇字於子雲無乃有貴鶩之意歟向作洪範五行傳嚴爲外戚之戒歆乃挾周官泉府之說爲新室國師父子異心一至於此然國師方貴顯矣蔡以符命投四裔何其忘舐犢之愛也董仲舒爲漢純儒通達古今有補於世向與之相伯仲伊呂無以加之語必非輕許可者淵源不及游夏何爲歆復少之曾孫龔篤論君子以歆言爲然然黨同伐異孰爲至當自交而至于龔弓冶箕裘之業蟬聯十世輝映兩都其間先後異同是非得失不可

槩論意者同於好學而不同於所學亦不害爲世家歟諸君平時自許不在漢公子之下家學之傳亦能若是其盛否

十三

問周之士也貴而肆秦之士也賤而拘疇實使之然賤而且拘秦固以亡貴而至於肆周亦安取此得非周以道勝法秦以法勝道耶太學賢士之關士氣屈伸公論通塞所係爲其重鮑宣爲司隸諸生舉幡集闕下而留之夫司隸內治京師外統諸郡其於太學若無與也愛而留之不忍其去所以能得其心者何固嘗聞鄉校議執政之善否而憎茲多口者欲毀之胡爲於宣獨眷眷如此韓愈爲祭酒招諸生而誨之學競起欺予之嘲夫祭酒爲古司成國人矜式其於弟子負至近而易格也侮而嘲之曾不受教所以莫能回其心者何固嘗聞聚爲朋曹諝罵有司而退然自克者無幾胡爲於愈亦不能少降心以相從耶異時處士橫議名節相望適以趣漢室之衰六館之士不陷非義終無以弭唐室之變遡疏尋源要必有說

十四

問孔門速肖者七十子而名在四科者十人而已果孰爲之區別耶參悟一貫於口耳之外胡爲不

在四科之列夫子傳之曾子曾子傳之子思子思傳之孟子是道之統參乃得之而在四科者反不與何耶借曰政事言語文學不足以盡道德行之顏閔蓋嘗在寢矣平日之所許可之所期屬非曾子所敢望今不傳諸此而傳諸彼必有深意謂參之魯有受道之質歟回也亦如愚謂參之孝爲百行之源歟孝哉子騫初亦何愧意者寶藏於海聽夫人之所自取歟後世以顏孟配先聖而得道統之正傳如曾子僅與游夏齒又有不可曉者願聞其說

十五

問臺諫天子之耳目建置本末可得聞乎九官之命聖讒納言龍獨任其責它官何爲不得與善旌謗木人皆可言而四凶之惡胡不聞有斥其非者周官有御史司諫似以風采議論爲職然御史掌治令贊書之事初不及於觸邪拍佞而弊群吏者乃有小宰司諫掌糾萬民之德亦不及於繩愆弼違而諫王惡者乃有保氏官名與後世同而職業則異何故藉曰凡治者受灋令御史得以劾其違令之罪以詔廢置司諫可以因事而納規三百六十官之中職於糾察者止二人無乃自狹其進言之塗歟漢承秦制以御史大夫爲三公中執法領

侍御史十五人諫大夫無常員多至數十人唐則
監察御史十人又有裏行之名諫議大夫四人而
拾遺補闕亦復並置其視周人設官可謂詳矣而
當時治道曾不能庶幾成周之盛豈惟其人不惟
其官歟方今衆正在列國是堅定臺諫紀綱之地
雖不備其官而一士謬謬嘗首形於王言之嘉歎
然攷之國朝之制天禧中御史諫官皆四員慶
曆有三諫之除元豐有六察之命今焉冠豸伏蒲
各專一官而不並建必有深意謂才難而不輕授
歟賢俊滿朝孰無明目張膽之志否則得其人而
一變自足歟十朋之龜弗克違宜其不厭多也又
否則聖朝無闕小人退聽而皂囊仁筆之可略歟
則人情之謫張國事之膠輅未可盡諉諸太平之
無事意者御史司諫之專其任將以復成周之訓
歟復古之難不可不詳議而熟圖也諸君志於有
用其爲鋪張聖賢相逢之盛事

十六

問與其有聚斂之臣寧有盜臣以其爲國植怨於
民也盜竊寶玉大弓春秋誅之胡獨聚斂之臣不
及賊吏犯法法在茲吏舞法法亡蓋無法則無以
爲國也伐檀之貪鄙無功詩人刺之胡不聞有刺
在位之姦者苟變賦於民而食人二雞子至疑其

傷廉然禮順人情乃或置米肉之遺於不問何耶
劉寵之爲守受一大錢而去人皆稱其賢然法有
明禁受所監臨一孔以上皆職論何耶得非禮法
不相爲用歟頃者貪相債帥之得志上下成風恬
不爲怪 聖化更新首嚴簠簋不飾之禁革貪爲
廉宜翕然不變論者猶謂賞罰不信不足以懲汚
染之習而善類名家科甲之士不當遷就爲之諱
是欲一以文法繩之也禮義廉耻以維持士大夫
之風俗法禁之外亦有可行者乎若曰人心趨利
如水就下禮不足以防其無厭之慾法不足以制
其自營之私又將何術而可史家皆傳酷吏獨無
傳賊吏者伊欲衷爲一書暴諸國史一字之貶若
撻諸市不識可使革心易行精白以承休否

十七

問宰相論可否於廟堂之上以行其道諫官爭是
非於殿陛之間以行其言經綸治功彌縫君德蓋
非它官比也冢宰制國用必於歲杪然周官大宰
歲終受群吏之會其不會者惟酒與膳服耳夫准
辟玉食膳服之不會宜也酒誥一篇歷歷無彝酒
之戒酒而可以不會乎彼庖人膳夫之不會王及
后世子皆然而酒正之不會唯王及后而世子不
與得非養正於蒙不容以是亂德耶歲終天子齊

戒受群臣之諫然周官司諫不過糾萬民之德而掌諫王惡者惟保氏一官進言之路何示人不廣藉曰左右前後皆可繩愆而受諫獨於歲終事有可諫必待卒歲而後言則爲立仗馬者多矣彼孟春徇鐸工執藝事以諫此受以歲終彼諫以歲始抑又何故後世宰相兼領鹽鐵度支諫大夫無常貲揆之周家建官之制然歟否歟朝而問一歲錢穀之數與正旦酌獸樽以賞直言槩之歲杪制用歲終受諫同歟否歟頃建言于朝者請宰相制國用諫官補闕貲歲云莫矣因舉周官王制之疑以爲問

十八

恭惟 主上盛德大業冠冕帝王閑休懿鑠輝映天地廼者自仲秋初吉日御昕朝已而儲闈之授冊宗祀之慶成千秋之上壽元正長至萬玉來庭盛事荐臻祲容迭講凡此大朝會之儀固有曲臺之議在然 國家制作多仍唐舊是不可以無攷也今觀唐制大駕屬車十二乘大陳設則分左右施於衛內三衛番上分爲五仗號衛內五衛元日朔望視朝則服翼善冠其後朔望仍用弁服元日冬至朝會七德與九功同舞其後至有不忍觀破陣樂舞者至於大陳設皇太子而下以次上壽且

奏祥瑞雲物其大略亦若是而已而其間不能無疑者太極宮之承天門受萬國之朝賀既曰古之外朝矣或又謂含元殿在周爲外朝在唐爲大朝何也太極殿者朔望坐而視政既曰古之中朝矣或又謂宣政殿在周爲中朝在唐爲正殿何也而儀殿常日以聽政而視事爲古內朝又以爲紫宸周之內朝漢之宣室唐之上閣亦曰內衙然乎否耶兩儀承慶皆爲受朝聽訟之所而元和中正朔乃御紫宸朝賀寶曆中則又月朔御紫宸行入閣之儀胡爲受朝之地曾無定所舊制以隻日視朝其後乃命輟朝放朝皆用雙日或又五日一御太

在殿胡爲臨朝之日曾無定其

對廷臣何妻見

於延英讀示月令何獨見於宣政入閣之儀開元舊禮本無之後之諸儒從而附益抑又何說也夫以唐家一代之制損益沿革豈無得失之辨仰參周典俯采漢儀其合於古而宜於今要必有一定之說諸君結綬登畿觀國之光有日矣試言其槩

武舉公試策問

乙酉

問恭惟 皇上以聰詰英粹嗣無疆大歷服學聚問辨寬居仁行四方萬里翹跂望治諸君蒙被新美之化可無說以裨新政敢問舜月正元日受終于文祖首察璣衡以齊七政而類禋望徧之並舉

豈觀天交神庶政莫先歟異時月正元日格于文
祖詢四岳闢四門明目達聰惟恐或後且進十二
牧而歷咨之聽言用人又所當急也太甲元祀祗
見厥祖伊尹明言烈祖之成德以訓于王是天下
之政無大於法祖宗矣高宗恭嘿思道君臣相與
告語尤卷卷於遜志時敏之務典學豈容緩歟成
王即政無逸舉三宗以勸主乎畏天愛民而已立
政一書乃以三宅三俊爲不可忽終之勿誤庶獄
爲重意固各有在歟抑又有可疑者禹受命于神
宗不旋踵會群后誓師而征有苗康王率循大卞
大臣進戒未暇他及首以張師爲言佳兵不

禘之器顧先之何歟豈國之在戎不可一日
弛歟新服厥命求以聳四方之觀聽歟人情易玩
泰用馮河之義歟君以乾剛爲德必神武英略而
後足以運天下歟事有本末物有先後知所先後
則近道矣隆古帝王出治之序參之今日所當先
者悉意陳之有司將以復于上

省試一 乙未

問大明當天而萬景隨北辰居所而列曜拱恭惟
主上以文王之聖躬虞舜之孝宮中三年之制畢
將涓剛旦御路朝以延見百官臨撫萬國禮隆典
鉅不可不預蒐而夙講也周外朝在路門外內朝

在路門內燕朝在路寢之庭所謂治朝者果安在
豈即外朝歟天官大宰王眡治朝則贊聽治豈
公坐論關於治道甚大斯謂之治朝歟司士之公
孤卿大夫士朝士之群吏州長衆庶莫不在列揆
之明堂位夷蠻戎狄不與焉豈置之國門之外不
容列於表著歟漢接三代而興奉常綿蕞之習不
過秦儀雜就已知皇帝之貴使得魯兩生相與翼
成之果盡還周典之舊歟德陽殿大朝會夜漏未
盡七刻鳴鍾受賀與長樂之儀先後交映然長樂
陳車俠陛執戟傳警而不設樂德陽乃鍾鼓鏗鉦
室絃燁煜崇禮樂至此而後告

宣室受釐前席

在盛服齊門獨施於少年之目且德幘坐迎笑何
威儀簡略能奪夫說客之氣高帝之朝廷而愛幸
者謀戲於殿上宰相得以折之先帝之正聽而貴
寵者引內於殿中中郎得以卻之佞倖方張二臣
何爲無投鼠之忌小臣廷辱師傅至攀折殿檻而
不顧蓋謂其不能正主益民也而金華入說尚書
論語其有補於帝學者何事武帳不冠不見使人
可其奏而出入禁闥之請曾不克從間見高門之
謾可斬而殿上皆恐遂罷朝不復議何聽納之具
奉珍來朝待以客禮而甘泉受謁稱藩而不名何

禮遇之過朝而問錢穀出入公私之積何其難於
裕也坐朝而日昃未退內外之務何其難於清也
朝堂百僚之位蕭曹邢魏謀謨乎其上司徒府每
天子親幸與丞相決大事是外朝之存者豈非君
臣一堂交孚無間而後足以增朝廷之重歟其歷
攷周漢本末以告

二

問鑑志述事者人主之達孝崇德報功者朝廷之
盛典昔在 寧考親挈神器以授聖明昭哉嗣服
于今一紀而 文母保佑之恩永言孝思亦既升
祔侑食清廟豈無舊弼顧猶缺一可乎盤庚告其

臣民茲予大享于先王爾祖其德與享之功臣如
食於廟商家尚矣而莫名所享之臣伊尹格于皇
天伊陟臣扈格于上帝豈即其人乎周司勳有力
者祭於大烝傳者於王功曰勳獨取輔成王業之
周公而召公之夾輔尚父之燮伐皆所不及豈難
其人乎漢論功定封錄第侯籍臧諸宗廟以至麒麟
雲臺之繪崇報厚矣未聞有列於烝嘗者而先
儒謂漢祭有功於廟庭其詳可得聞乎唐享功臣
祫則配帝則不配其後帝祫皆配果合乎古否也
高祖廟以裴劉故人俎豆其間能無出於私乎太
宗廟以魏證讎臣冠佩其中抑無一之非公平長

風孤騫之仁傑廟事宜也而五王之賢並侑國不
厭其衆乎忠貫日月之子儀廟享亦宜也而中興
第一之功不與亦不嫌其寡乎佐佑王化之說享
之未過也而應變守文之名相皆不在選其有所
抑乎光復宗祏之晟享之誠當也而上不負天子
下不負所學者廼置而不問豈文墨議論不如汗
馬乎翦蜀於清明無敵之日平蔡於惟斷乃成之
時杜裴元功享之俱無媿也而崇文及愬莫非拍
絃之下乃與同升豈將相叶心然後功業有濟乎
許敬宗威勢熾灼傳享於神龍國足以懲滔天之
罪而名宰相如元齡百世猶將之亦以子傳句

以允公論苗晉卿小心謹畏崇於大曆已不
以享當世之望而首贊經綸如裴冕一時無能及
者以即世先後爲疑何以逃清議自武德至于
元和功臣列在祀典凡四十餘人穆敬文武宣而
下廟食靡所著見豈無其人則闕乎抑有其人而
泯乎無傳也夫黃鍾動而氣序轉應龍翔而雲霧
集君臣感召之機蓋非偶然者然一時之功孰與
乎萬世之功左右諸大夫之曰賢孰與乎國人之
皆曰賢人心是非昭如日月侑饗六議可一言而
定也諸君攷古驗今以對母枉

平齋文集卷第三十

平齋文集卷第三十一

墓誌

吏部鞏公墓誌銘

靖康建炎間中原學士大夫多辟地南徙鞏至自東平呂至自東萊愛寶婺溪山之勝家焉地偏俗古文物未振山堂鞏先生首以北方之學授徒著錄常數百人呂成公繼講道明招精舍負笈分集聲氣薰浹淵源濡漸類為世聞人公諱嶸字仲同山堂季孫成公門弟子也幼神氣明粹風骨凝重大父愛其似北人曰必昌吾宗長偕兄豐執經明召鉤遠摘幽神接心領出語輒破的同舍歛衽避

其鋒中淳熙二年第授嚴州建德尉調淮西總
所準備差遣以格知徽州歙縣憂免起知處州麗
水縣當路交薦其材入提轄榷貨務都茶場幹辦
諸軍審計司遷太學博士進大理寺丞出知嚴州
未踰月改邵州擢都大提點坑冶鑄錢司職事修
舉直祕閣因其任七十餘年曠典也除侍右郎官
以煩言畀武夷祠起家知温州擢江西轉運判官
比年丐閑有旨入奏未行除司封郎官罷奉鴻禧
祠祠滿檢會續食而春秋寢高浩然已忘世故垂
車得請日杖屨溪山間弄花漉月昌羊忘返曰佚
我以老上恩深矣寶慶丁亥三月庚申終于武義
里第享年七十有七積階至中大夫爵瀕城縣開
國男食邑三百戶初尉建德世其官拯溺字荒不
遺力父老謂有祖風淮西總臣被命築歷陽倉修
采石戰艦及體訪沿江軍政舉以委公公條畫詳明
悉當上意一日大軍庫延燎拔幟登屋周麾而呼
曰燭士力者賞衆奮火撲觀者勇之歎十有八鄉
訟牒叢夥公日聽鄉二操約御詳庭空如水麗水
以撫字寓之催科如治歙前積負郡逋系萬郡胥
利其稽以索縣賕縣胥乘其索以重民擾公曰此
無補於州而厲民以飫吏可乎力白守刊其籍編
戶以役破家者相踵爲去所以蠹役者民爭應

後東南仰茶鹽爲國計三推務總於轄官討尋源
委如理家事吏莫敢欺歲入數倍富商木械之訟
府尹掣於交謁改屬于理公當承鞠慨然曰天獄
臨安府可乞送耶避嫌止當送隣路白于朝從之
審計輪對論催科筦推之弊甚力暨爲學官適有
詔以火災求直言謂學校公論自出不可徒應故
事上書陳時政闕失多所拍切大略謂兵端不可
開權姦忤矣未幾予郡 陛辭論外攘當先內脩
復寓兵不可輕用之意自信不撓朝舉藉甚江右
劇賊方棘邵與溪洞接蠻徭性狙易動至即增埤
濬隍肄射繕甲以折姦萌發諸勸分置六十四場

澹卹飢羸一郡帖然治司

孝宗朝定鑄額歲上

五萬緡積久寢虧六不及一公推原弊端知楮輕
升重售不酬費故入少而鑄虧乃使楮與升各時
其直輕重足以相權坑丁競勸升務倍 先是冶
卒竄情多遺升泥滓中有司莫之察公置局淘洗
所得皆精良於是盡還故額俄兼憲節積潦薄番
城民廬半沒葉舟掀舞家訪戶歷周卹之見者引
手加額永嘉始至訪名儒之問問所宜先以海瀕
逐末者衆首勸民務本業適歲大比增闢貢闈以
受多士士狃積習以逞試之三日躬警護于棘外
有貴游子挾醉號呶道上莫敢何亟械于市曰七

不自愛者視此訖事無敢譁榜揭校藝官例亟行
緩則群譟遮境上生可否公故宴留至累日乃去
前所未有也時嚴海道之防得 旨造蒙衝二十
艘掾屬請下諸邑公不可捐利誘海商二十人人
造一艘按期辦集符不及民漕臺以官軍討捕劇
賊日費供億公私告匱公綜理綱條補窒罅漏漕
計裕而民不知和糴至百五十萬斛皆商賈願出
於市盡革敷配之弊十一州上供歲團綱六有無
相影數多虧公區別窠名使不相紊卒復其舊豫
章一再攝閫歲和物阜政平訟簡時往來東湖書
院與諸生以義理之學相講磨士風為起釋奠帥

守宿學必露刃以衛曰此何為者卻之士服其知
體去之日邦人揭幟追送擁車後先有經昔不能
舍去者性靜正夷博居官未嘗澤辭色貫聲光以
媒進而儒術吏能每為時所不舍與人不植崖異
周旋委曲惟恐失一士之心至不為利回義疚雖
議其介不顧也平居細謹動中微墨及倉卒應變
多出度外邵陽番汭江右凡三斬馘卒弭患未萌
其識權類此為政務因其俗未嘗容心終歸之愛
利民多繪像祠之始生踰月而孤與兄相依為命
白首無間言母楊夫人通孝經論語毛詩大義所
至奉版輿行日請所以為政如卅角口授章句時

鄉黨稱其孝愛書一過目終身不遺忘作文期於有用非精粹不輕出有厚齋文集八十卷藏于家其先出晉士莊伯世爲真定人後徙鄆曾祖燾左奉議郎贈通奉大夫祖庭芝左承議郎贈太中大夫父灋贈正奉大夫娶何氏繼高氏先卒皆贈今人子友聞儒林郎台州司理參軍貴亨蚤卒友說從事郎温州司戶參軍孫端祖從事郎江州瑞昌縣尉次延祖孫女一曾孫男女五紹定己丑正月庚午朔諸孤葬公于金華縣壽溪原友聞以恭辱公知最早重趼請銘嗚呼柳下惠聖之和者也而三公不易其介卒窮於三黜公遭時且鄉用矣雲出輒還膏施未光其困於命也耶銘曰

可欲之善莫難於有中庸之德莫難於久何以有之典則世守何以久之源流師友公祖山堂而師東萊學貫體用根幹條枚氣定心夷求福不回索麾再節用不盡材孰虧孰成蛻和委順易簣琅然忠孝其訓有苑彼阡山暉木潤過者式之我耆壽俊

孺人吳氏墓誌銘

孺人吳姓諱妙靜臨安將仕郎渭之女承務郎致仕俞君泳之妻子三人修職郎新桂陽軍教授德藻進士德林德榮女二人適進士陳千齡國學吳

元卿吳氏世以詩書孝友爲家法將仕君四女見
聞濡浹皆有淑行孺人幼尤敏悟誦書知倫類識
大義親有疾衣不解帶藥餌非親嘗不進旣嫁踰
月而哭其姑以不獲日奉巾櫛爲終身恨歲時感
愴烝嘗孔嚴承務君性疏直不切切規利約衣節
食以相之身任家事之勞而裕其子於學子未就
外傳孝經論語率口授誦聲鏘然塗紙淋漓輒喜
溢顏面延師聚書斥簪珥無靳色間遣海學裝齋
靡密必經手反必問所習及所與友教授以嘉定
甲戌入太學登舍選癸未中甲科明年秋新天
子大饗承務君與孺人俱受初封族姻交賀孺人
愀然曰吾舅姑餘慶也歲侵輟餐以食餓者疫厲
手和藥以遺病者內外親黨小不咸爲之委曲開
曉使釋然驩洽如初而後已故其歿也哭之皆盡
哀實寶慶丙戌六月癸巳也年五十有九十丁亥
九月丙午葬于平西鄉九山之原教授以某辱與
游一日欵門泣且拜曰母氏攻苦教諸兒閔焉日
望其成德藻甫得一官垂及迎養而棄之不自意
忍死以襄大事百用旣戒敢請銘嗚呼吾母之教
某猶君母疇昔需外教之次而失吾母與君同痛
割迄今未間也尚忍銘君母哉銘曰
山韞玉而長虹水孕珠而五色維子之賢某母之

德鬱鬱林丘過者必式

吳氏孺人墓誌銘

臨安故鍾君子度之妻吳氏守靜以寶慶二年六月丁亥卒年六十有四曾祖贊祖憲父渭將仕郎將仕公壻于鍾夫人鍾出也而歸子度男二人長殤次應僑孫二人甫年孫女二人曾孫三人夫人之卒姑王夫人春秋八十九矣一日呼應僑來前曰吾年至此喪兒女幾盡繫汝母是賴汝母方哭汝妻吾又哭汝母天乎忍哉世非無賢婦賢如汝母不多見未嫁時其母苦上氣疾方療之未愈晨起剔股和糜以進兄孝立感之亦齋戒露禱穴胷析肝以救遂活其母鄉閭稱孝既嫁吾家一手綜理家務以相汝父汝父得專意問學所與游皆當世知名士風月佳時論文氣雋諸公索飲二筭其典中饋隨取輒辦無倦容客去主人頽然奏床鼻息如雷汝母復秉燭料檢中外理明日事矣如是二十四年而嫠嫠居又二十四年未嘗御鉛華所以孝於奉我者終始如一日記汝父無恙時日侍我昌羊後圃半酣奉觴起舞且歌吾欣然和之汝母手挹新果以薦聲怡氣下吾每爲盡醉不幸婦姑俱孀相依爲命杯羹必絮寸跬必掖悲歡榮瘁同之今舍我而先吾不欲生矣應僑放聲哭王

夫人亦哭應僑遂奉大母命來丐銘以葬夫孝者
百行之本也女而孝於母婦而孝於姑其本立矣
以之治身峻而絜以之理家儉而法以之處妯娌
媼族和而有禮訓子孫必以學手足親愛有疾痛
恨不能分其楚鄰有襁褓失哺惻然遣乳媼日字
之如已出歲儉包黍以遺餓者大侵則捐攻苦食
淡之積倡鄉邑爲粥以食之其風槩有介冑不可
犯之色而慈於卹人其言論識趣雖賢士大夫不
能過而信於行事孝之推也於古誼應銘某與其
孤應僑厚當銘故中書黃卿嘗銘某度宰木拱矣
夫人卜以其年十二月丙申合葬于國昌鄉湊水
山之原廼爲之銘銘曰

人生兩間與萬物異孝爲之根其幹也義有齊季
女孝於事親移之事姑厥孝惟鈞孝著而義松堅
玉潔衆善萃焉皆其枝葉凡得於天悉具是彝不
媿于幽維此銘詩

孺人吳氏墓誌銘

孺人姓吳氏臨安新溪人吳與同里郎姓世有連
父憲器孜以妻之生二男思懃懃蚤卒一女嫁吳
公榮孫四人謙諤詠該曾孫八人偉儀倬俶伋儼
僑備元孫四人孫曾元女十人人壽七袞鮮矣孺
人九十有四上壽也上壽百未必一有有之衰病

日侵食費祝動費掖常也孺人晚益堅強視聽不
少衰耄期而堅強累百未必一有有之必含飴擁
郝嬉戲滿前而後憚以舒孺人身見五世家數百
拍矣耄期而堅強身見五世千百未必一有有之
能少長嶢嶢盡在目在乎孺人一門數十年尊不
哭卑兒婦皆七十餘歲時帥諸孫班白者弁者角
者髻髻者羅拜奉觴介壽綵衣紛如也耄期而堅
強身見五世且一門數十年尊不哭卑抑寥乎鮮
矣矧能以詩書華其家偉挹鄉薦伋升太學勝衣
以上層級相師友進未艾也好德者福積善者慶
天道可必如此孺人福慶萃於身鍾於後豈偶然
哉卒以紹定戊子十一月丁酉葬以明年十一月
癸酉合章塢夫兆思謁銘爲書人之所難天之可
必者以勸其奉尊章順相夫勤約以厚承嘗嚴待
骨肉有恩意常事不書銘曰
豐難乎其臧也耄難乎其康也繩繩難乎其將也
噫盛哉壽母之慶也

鍾孺人墓誌銘

余杜門東山下一日有客冒前乞銘其母弗省也
旣而言吾聞君子不以己廢人君能使巴清母傳
寧能使衛姜母詩乎因改容扣其概信不可沒已
孺人鍾姓諱妙清世居臨安西市年十六歸東市

阮君自勵十九娘而寡父林母陳夙愛甚即而唁之喑喑憐之哭而拍其腹曰勿我憐也生男耶守男生女耶守女安之命也逾月得男又即而撫之哭而目其嬰曰天以此厚我矣除喪歸寧母黨具杯勺相勞苦且泛辭覘之哭而罵曰爾不聞良馬不兩鞍耶亟索車去事舅姑謹於夫時舅歿姑老益謹於舅時姑歿輯睦先後篤於姑時惠誨其孤逢時使成立三孫亦秀爽而生日饒每自喜曰可以見吾夫地下矣年五十七而卒實紹定己丑五月一日也古者婦人女子居處有圖史之訓行步有環珮之節用能養其心於禮義孺人里中家人子耳箴紉機杼之外無它習焉方齡之誓雪明日烈根於天性然歟前是逢時痛父歿世無塋爲母預治兆域于錦南平原築堂壽樂環以水竹時奉板輿來游意甚適至是以九月壬申復父魂合葬焉銘曰

亡弟子文壙誌

洪氏世居潛山之谷口大父年二十四生我伯父鏌伯父亦以二十四生我弟琥皆冢嗣也琥字子文生於淳熙丁酉二月丙子後余一歲幼嬉戲相逐長同就外傳既而余忝一官檣浮轡走曾端膚

汗曾不免於窮子文循分理生足不跣腰不折而
疆畝日斤塗墜日華林沼日蕃俎鮮以奉親簞書
以教子優游卒歲兩忘榮辱余未嘗不嘆其計之
得也其爲人脩榦豐下而髯行已恪與人信磊落
明白不爲深險操切且退然若虛里黨推重寶慶
丙戌四月辛卯以渴作一夕不起莫不惋惜之母
妻皆增口阮氏男二人日卿庶孫三人尚幼母夫
人慈而肅禮法行於家春秋七十有六失壯子悲
不自勝末疾增劇明年九月己亥卒又明年正月
壬辰次子璞偕日卿葬夫人于家山鴻起之原從
夫兆同日葬子文于西塢相埒三里弟某攬涕
叙其平生納諸壙

舒夫人墓誌銘

余友毛璲君玉書以舒城尉何光華填諱狀一通
來曰先大父帥屬諱若訥字辯道世爲處松陽望
族娶葉無子歿繼舒氏諱妙慧婺永康人年二十
六來歸生洙次萍次庶子渙文璲父克任幼子也
孫五人璲璲璲璲璲女孫六人慶元己未正月二
十六日大父卒後十有四年嘉定壬申十二月八
日大母卒得壽七十有八性靜而慈相大父惟義
之急不以有亡爲解教諸父必儒璲父酷嗜收書
鬻田園以庾直借書問字者蒲門縱論古今留連

燕飲莫繼燭弗倦至空其家歲庚午春大母且泣
且語吾望而取富貴以華老今顧日貧爾妻死矣
母懷居挈爾子游都門或幸成立不成吾死母歸
夏鬻荷塘屋得緡錢千二百留半爲菽水不虞備
偕遂哭辭以出月移歲改悵悵逆旅莫之省大母
訃聞無斗春以奔喪父子東望號蹕絕已復蘇念
惟忍死賣文以辦葬庶乎不孝之罪可末減於是
曳裾並奏王公貴人門鉤摘繪寫脫手眼青解衣
推食不我靳也紹定庚寅遂侍父歸自惟揚倒橐
中裝經度窵窵相收逍遙觀舊址古洞陽之側山
明水清安歟靈爲宜越壬辰二月廼克葬先是遂
母程氏兆金山之陽地卑多水從弟璋之母程死
焚而末殯同日併遷柩骨夾紵于側置田租二十
斛入逍遙爲丞嘗供挽道士楊祖雲主岳林仍度
一人以世汎埽烏乎樂莫樂於貧米悲莫悲於齧
臂高堂垂白一訣千古爲子若孫者何心哉賴天
畀矜積^難苦二十年了大事子幸哀而銘之水激
則高矢激則遠賢父子激於太夫人一言日夜刻
厲用能以子雲之筆札孔璋之書檄撥窮起悴還
以奉之生之養不過百年而死之奉與山川相爲
久其無憾矣乎小人有母妻其拱木因感愴系之
詞以申孝子慈孫之志銘曰

林洞古兮虛壇瑤草春兮芳蘭笙鶴杳兮雲旗閑
魂返宅兮吉旦安

高朝散墓誌銘

嘉定辛巳壬午間成都通守高才卿泰叔以文學
器能爲西閬賞重某時負外置間與聞末議回首
十寒暑矣其守三峒崎嶇走書天目下爲言先君
子即寔有年識竈之文猶未也蜀非無宗工可屬
必公諸東南庶幾信百世子好我敢請案高姓派
於齊占籍邛蒲江者世有隱操洵生孝立孝立生
興國嘗大書于屏訓子孫學以忠信孝悌爲本君
其長子也諱澤字叔淵少朗明絕人書一再過成

誦荀楊氏韓柳氏漢唐三國南北諸文皆手抄是
非得失反覆究見根極而折以經鄉先生趙澥深
可之侵尋不耦退謂其子曰基之以孝悌植之以
忠信培之以至誠無息天終阨我哉未幾子策名
奉常君喜見顏面曰天所以逸我也屏舉子業不
復省輕車就養笈書以自隨所至雋艾系踵請益
危坐縱論其要歸於涵泳孰復而自得幅巾蕭散
當路欲一見輒謝去不喜誦佛氏書而戒殺嚴甚
曰物我俱生天地間同一氣也用心懣怛類如此
開禧丙寅夏啓手足於普慈郡文學官舍春秋六
十有二累贈

郎娶韓氏事姑婉恪能得其懽

心間君客游手課其子容止服御有常度里黨尊
爲婦則先君十八年卒贈恭人葬仁惠鄉龜山阡
從舅姑也君北卜向六門惟乾食相距三里而近
丁卯蜀變淺殞故廬西丙子四月乙酉延克葬一
子即泰叔今朝請大夫知嘉定軍府事一孫允績
某官曾孫男女若干人士求仁之方莫切於孝悌
忠信四者秉彝所鈞有甚易知易行也往往由之
而不知何哉學失其傳爾君得一語之傳於家庭
知之至守之篤朝夕省飭欲天理之在我者皆實
而無僞其志於仁矣乎明善誠身上可以順乎親
則下可以穀爾子宜其至嘉定而大也銘曰
切已之學莫如求仁求仁維何誠善於身孝悌其
本忠信其質仁莫近焉落華取實翼翼繇繇是似
是傳榮光漏泉何千萬年

佛心禪師塔銘

寧宗皇帝在宥三十有一年元嘿無爲以心學仁
天下聞主徑山如琰得即心非心之祕賜號佛心
禪師婁命就山爲衆說法錫賚甚寵山川震耀夫
敬直義方表裏兩盡下學上達顯微一貫此自昔
聖賢相傳之心法釋氏得之證其體而滅其用以
成之者性爲圈覺以復則不妄爲楞嚴以勿忘勿
助長爲金剛第一義以不失赤子之心爲華嚴最

上乘湛然大虛本無增減雲行月脫隨有昏明
竅靈開鼻端寂觀一喚覺於意識智得之表而大
光明藏無欠無餘南渡百年間大慧杲以是說
授佛照光佛照以授師師寧海國氏子母夢神人
遺大珠而娘生有光瑞能言時母戲之曰人從何
來曰人中來聞者異之十五出家淨土院十八祝
髮二十游方卅一得法於佛照初束包問津雙徑
見大慧高弟仁扣以當時千七百衆咨決之要得
狗子無佛性話默領去江湖徧叅群疑塞囚還求
決佛照於台之報恩夜參聞舉世尊鞭影語曰見
鞭影而行非良馬也言下有省旦日入室問不思

善不思惡正恁麼時如何是琰上座本來面目師
云佛手遮不得曰恁地也未夢見在久之從過靈
隱苦研精索至忘食寢佛照勇其進痛施砭割師
終以未徹憤排遂謁證老衲於番易聞旁僧商略
雲門話墮語云那裏是這僧話墮處豁然洞見佛
照從前機用義諦密融智辯捷出九萬里風在下
矣還參於育王佛照迎呼曰大事辦耶尋復從過
是山朝莫激揚極其造詣佛照每語人曰我握佛
柄以來的契吾機惟琰耳其賞屬如此縣育王分
座出主南劔之含清歷越之能仁明之光孝建康
之蔣山皆迫而後應最後天童與是山宸命也

見趣高深提倡直截所至禪衲川赴平居簡默似
不能言及等室勘驗學徒如驚雷忽電不容湊泊
領衆嚴而奉己約應物圓而處事定叢林推敬謂
浙中尊宿獨此翁因共稱浙翁住山八年春秋七
十五矣以退休請未獲命一日忽剡遣奏遣書別
素所往來公卿抵莫問侍者曰鐘鳴未曰已鳴大
書偈擲筆端逝寶慶初元秋七月戊寅也越九日
塔于東澗之麓其徒了所以師六會語要介法戒
謁辭圖堅銘曰

佛果有心萬賴沉沉佛果無心萬象森森靈明溥
通徹古徹今契非其真省不可尋佛照紺椎雲雨
芥鍼是印非印脫鑛鑄金洳萬古淵開陽關險砲
車起雲奮霹靂音川彪澤恠腦裂氣瘖頃臾恬霽
天垂斗參無去無來谷高岸深護宰堵波龍公夜
吟爲蜜說甜以詔主林

二鍾君墓記

臨安亭川鍾氏景常生子淵子淵生福州助教億
億二子長貴州助教俊卿字子明次將仕郎仁卿
字子壽子明娶徐氏生端禮蚤卒次端詳一孫與
齡子壽娶龔氏生端謨端誼二女適施大用龔奐
二孫道齡佑孫子明忼慨機警遇事無留難子壽
通而敏文多成誦生相後十年志釣材耦以力業

相摩厲凡所規畫兄不日謀必以咨諸弟弟劑度
可否聽兄決之堯倡號和如出一人以故積居懋
化中權而獲厚生理既裕又相與以輕財急義聚
書樂教爲聲華勝士往往願交邦大夫亦賓禮異
等居旁池園深秀結堂竹石間扁以世友暇時相
携娛娛華髮交映兒姪迭起奉觴爲壽雍如也子
壽年六十有四以紹定庚寅十一月晦卒越明年
八月五日子明卒得年七十有五二君無恙時誓
生無異廬死無異兆治壽窆於新安鄉南山之原
右左以序至是同卜以其年十一月丙申葬焉惟
羣友于兄弟知孝於其親而思手足均父母之遺
體則能友矣兄弟之子猶子也知伯叔父即吾父
從兄弟即吾兄弟則能世其友矣子明子壽之友
後人盍求以世之乎嗚呼和樂而家道昌睽疑而
外侮起又可懼乎余探二君友愛之情併誌之
使其子各刻一通藏諸墓以尉九原云十月望日
於潛洪某記

羅迪功墓誌銘

行於蠻貊易行於州里難行於閨門尤難愈近愈
不可以矯揉欺也三代直道微俗日益薄有能積
忠利平實之踐使鄉人尊而信家人親而化耳目
所接得臨安羅君介圭元度焉曾祖將仕曉祖父

學彰父將仕若濟聚族以恩義相陶浹三世不異
爨君意承厥考弗懈偕夫人塵苦節約以奉承嘗
酬應內外一簪弗營其私倒已橐且弗靳而量淺
機深之戒每爲子姪誦之肅雖一門自爲師友升
其堂詩書之聲鏘如也紹熙甲寅水穀賈騰躍道
殫相枕前是里中貧子錢者計緡累萬君嘆若救
死不澹何忍更責若償哀券焚之他歲饑疫率推
食饋藥以振羸乏惟恐不我聞鄉鄰信其長者有
訟不之有司而之君取平相踵也人性皆善氣質
厚薄則有不齊而行事因之君於善利取舍之間
擇明而守確旣行於其家又行於其鄉天者厚矣
歲癸卯連異葩同跼擢于沼而子震龍生壬午工
燕巢于庭辛卯異竹產於書塾之廡義方發祥蘭
院競爽震龍聲撼膠序舍選以優升君時七袞遭
逢慈明大慶遂被初品封天於厚德之報未垠
也明年二月乙卯以微疾考終于家巷哭多失聲
十一月庚申葬平西上沈塢夫人先六年卒同兆
子男四震龍正奏名進士次友龍從龍一龍女四
適俞元龍俞鎔吳伯振郎應午孫男六女二銘曰
盡已忠乎推己恕乎踐其著乎處其裕乎噫庶乎
元度乎

獅巖沈君墓誌銘

浙漕貢士沈溪與余交步趨語默中度文中律執
親喪啜蔬處獨不見齒者三年一日舉內外樞四
竣事謁余銘其先大父獅巖君墓孝子慈孫之請
不得辭也沈氏望吳興避五季亂徙瑞安世以儒
名家惟正生忠訓咸咸生特奏琮琮生君諱貴字
成伯年七十有三以慶元己未五月十日卒娶給
事劉公安上姪女先卒子二振蚤卒抃未除君喪
卒女二適進士鄔說許仲承孫一溪女孫三溪承
考志以紹定己丑十一月癸酉葬君于橫山考祔
焉君少負英氣身七尺射命中聞舊臣宿將說中
原事輒慷慨流涕間往來武夷考亭諸山從偉

訪異聞得八陳微拍因會梓諸家方圓竒正之
著書數千言附以孤虛六甲占風望氣之法期於
有用學成不售杜門評論諸史究見成敗得失以
寄憤鬱氣岸潔然湛盧青萍之在匣有不可蟠屈
者而行己居家動合繩矩事母劉夫人以孝聞訓
育猶子收拾師友遺孤乳保之若己子董勸里丁
鄉校之役若家事行義著矣猶未足爲君多也丙
戌風潮之變死者山積君既負母如亢爽群從少
稚屬至轟逐澎湃震掉心目跬步不能進相與號
呼於浮沉中君奮前不顧手挈而登之人人得脫
魚鼈之涎而君二子反迷失道莫知所之或唁君

若曰是有命既而亦皆免於難士平居暇日孰不知志士仁人爲可慕粹然之變壓于前死生禍福爵於一髮未有不志移氣奪擇利以自謀於此能委命徇義寧忘其身忘其子而不忍遺兄弟之子其惟近古之卓行乎先是君家東美躬行二君子從伊川先生游得其學特奏未冠以明經走京師試行臺爲貢士第一遂介從弟游伊川門君學得於特奏就正於東美抗志制行信有自來哉銘曰學出伊洛如江河近接其流渚而沱醴爲涸渠引注阿漭漉所及黍與禾有相之道嘉且多壬辰冬十有二月庚寅於潛洪某撰

吳致政墓誌銘

東朝慶霽臨安吳君孝先謙仲以子元卿爲太學諸生封初品官越再歲紹定癸巳春正月壬申卒壽六十有八先是君未屬疾晨起語家人吾夢遊穹林邃洞三茅君命之坐殆非久於人間世者自今勿以肉食進越半月曰吾殆病矣四肢百骸無所苦而胃少弱自今勿以粒食進惟日飲參棗湯兩瓦甌又半月曰參棗煮湯固佳未免烟火氣棘人第汲井花水飲我可也如是者又半月水不復飲矣憊然一榻神恬氣明親交省候人人起道寒溫叙殷勤去則執手訣別以寡慾延年樂善受福

爲勸哈殮葬殯纖悉治命忽整衿曰吾苦目青累
年今劃若開明亟取筆來書頌甫畢而坐瞑莫不
異之君讀書務實踐耻爲口耳之學晚勸遊場屋
移志道家書得谷神琴心之旨每謂其說與吾儒
同歸于粹孔子子思孟子仁義孝悌之訓自出機
杆纂爲科典亡慮萬餘言冠珮宣誦聽者竦立家
事付諸子深居燕坐飛神御氣排膠葛而泝沈寥
超搖八極之表水旱綠章精禱雨霽遲速言輒驗
靜則虛虛則明故也性冲澹不忤競而篤愛敬治
家嚴而有節端默堂皇內外無履聲待人接物恕
而慈嘉定己巳大疫暴斃莫辨君慕然累萬舉

老會歸之明年歲大侵道殣相枕首無私廩爲
以食餓者巨家相率致助全活不訂計又明年穀
騰躍猶故盡出伏臘之儲損直以糴爲鄉里先而
包黍以遺飢紉絮以濟寒和藥以拯病歲其常也
人有善誦美如已出有不善惻然閔其失本心見
義勇前苟利於衆不退顧見賢起敬起慕不暇隣
曲小故傷和雍容談笑以平其忿而人犯之不校
親族以事咨訪立爲劑量輕重使不失準雖童稚
必拱而忠告其篤於信道而誠於善自少壯至老
猶一朝夕也卒之日鄉閭遠邇嗟惜不容口室鍾
氏先六年卒墓在福昌玉泉山君以其年八月

申合葬焉曾祖某祖某父某將仕郎男五元卿和
卿舜卿舟卿德卿皆業詩二女適進士鍾甫錢克
俊孫男七人道家以求道也東郭順子人貌而天虛緣而
葆真清而容物深於道矣君中局虛明內行純固
蓋淵乎似之委蛻乘化且有以異於人哉某省疾
牀下辱以幽窶之銘屬掛劍之義不可寒也銘曰
深根寧極絕外營危坐內照虛白生龍章虎錄提
玉衡鞭風駕霆盍上征九光前導八景迎祗歎寥
陽朝通明紫皇潛簡一念精瑤宮璇臺敕標名蹟
功滿千道紀成拍手下招僊人盈獨留黃鶴凌
清遺劍墮鳥搖寒晶靈氣紛葱護佳

郎迪功墓誌銘

余自郎曹以言事擯僑居西市距君舍二里所嘗
過君飲君時已七十餘姿狀厖艾髯髮盡白酒酣
慷慨道平生經行山川之險易風俗之燠惡及可
喜可愕事纏纏有本末且言開禧初淮楚繹騷身
在圍城中間以奇畫干主帥用輒中圍解欲官僕
掉頭挾所得胡人弓矢徑歸每北風塵起拂絃撫
筇猶踴躍自喜恨不獲窄袍快馬蹴踏冰雪効驅
馳也語畢目光炯然如秋隼之欲擊意甚壯之問
君何以不從戎曰吾宗本詩書家也景德六年

祖簡登進士第仕至工部侍郎名在國史衣冠可
絕落莫幾二百年物久鬱必怒奮貨久居必暴羸
僕少游四方閱人多視諸孫當有以儒科進者歸
出橐中裝延師教之晝綜理家事夜張燈挾策坐
孫輩傍吟嘖與相應和老者未寢少者不敢懈以
故偉仅能力于學紹定壬辰同忝科第以續前脉
僕藉是亦階初品孰與鵬冠多因扣君養生以何
術曰寡慾安生以何術曰寡慾治生以何術矍然
握手曰是非考功所當問老夫亦不能語考功也
余今浮湛周行媿且病念君涉多而見博年耆而
識明沼魚畦井可以永日欲歸效太史公訪所以

長老從君執筆記所聞而遽以不起赴噴惜哉
郎姓在漢爲安丘人在魏爲中山人唐五季以來
世爲杭之臨安人贊生瑀瑀生孜孜生君君諱思
字伯永性明直無機械事母老彌篤撫鞠猶子盡
恩平居意色沈毅閨門整暇與人言是是非非不
苟同臨財義不立責券而樂周急生以紹興庚辰
卒以端平乙未十一月八日娶章氏封孺人男三
謙詠該季蚤卒女嫁施廷祀孫男七偉前紹興酒
官儀倅仅新慶元市舶務儼僑備孫女四曾孫男
女十二以明年三月壬申葬君于章塢先域偉
仅奉大母命來乞銘曰曾大母嘗得銘大父不

銘寧不葬惟先生哀憐之因次第其說系之銘曰
動以任乎時爲富靜以安乎命爲壽四世而林立
一科而歧秀其執之深封之茂也夫

平齋文集卷第三十一

平齋文集卷第三十二

祭文

祭俞侍郎文

中興倫魁曷奕顯融穎出天京橫浦與公公殖其
學裏腴表豐井養厥德用汲不窮匪矯爲崖春陽
茸茸溫作之厲飛霆駕風匪阻爲巖晴波溶溶平
激之躍驚濤轟空肆爲文章齋淪春容麾屈軼宋
轢遷軼雄發造化籥爲世迪蒙萬象粵與與天爲
功再入西掖筆老逾工鼓舞八極渾噩媿隆矧抱
勁節志爲氣帥翼如冥鴻碧落無際有冰其山衆
倚而睨有蜜其刃衆嗜而嚼公平閑閑表立一世

卷舌方棘獨犯其銳岸不受馴族焚以噬采蒸羅
山其甘勝薺大明中天攘屏霾曠帝趣公歸不奪
彌勵胡爲孤憤苑結恣憑任重道遠竟死弘毅藹
焉諸生淑艾一藝中流失楫夫誰與濟丹旄悠悠
遮道哭酹匪私之悲邦國殄瘁

龍州新建武侯祠堂祭文

三綱五常之理與卑高俱陳其數也時其存也人
周衰吾夫子作春秋書盜書叛一辭不貲而亂臣
賊子懼公以賊名魏迄能倡天下之大義扶天下
之大倫此聖賢所以有功於人極而百世其仁也
夫以公之功在天下仁在後世豈蜀郡而私之蜀

之薦紳大夫父兄子弟絕公之訓用能不爲鬼
之魏而爲漢宜其德公之深歷千百祀而常新夔
巫以東瀘黔以南岷峨以西劒棧以北莫不家社
而戶稷嘗秋而櫛春江由獨無公祠而祠鄧艾是
知畏敎攘之盜而不知慕鞠復之親知用物精多
之爲厲不知正直聰明之謂神方艾縋兵無人之
境行險徼倖特乘漢運之屯耳魏爲漢賊晉爲魏
賊三尺童子皆知之艾顧嗾昭挾魏以蹙漢漢亡
而魏亦亡天彝泯矣小有材未聞君子之大道適
足以殺其身安能禍福爾民哉某始至毀艾祠垂
去祠公於遺址之西而丹青之背甲而腹壬

而綸巾魚復彌牟之八陣龍騰虎躍左揖右批
駭可愕而不可馴于以鑰疑牖蔽勸不二心之臣
栢溪齋淪玉平嶙峋公兮來妥椒馨醕醇

祭莊侍郎文

嗚呼三代而下何其正且大之難耶西都之士如
洞庭彭蠡匯衆川以爲容非不大也未見砥柱千
仞截鬻乎頽瀾東都之士如峨眉太白拔地而峭
立可謂正矣所少者吞雲夢若八九之寬公造萬
理之根極涵一之胚臍道大學而中庸文五誥
而三盤望之閑閑炙之溫溫扣之盤盤風停水止
渺不知其孰倪孰端及義形於色凜不可干則

峰絕岸坐睨乎橫決而崩奔大而不失之靡正而
不流於隘蓋三代人物之遺也奚兩都之足論去
玉堂其歸乎塞芙蓉而飲蘭歛帝所之謂來徑御
風而不還功在斯文名在太史於公平何憾寬兮
俾兮瑟兮憫兮其如四海善類思君子之不可緩
其出入函丈十五暑寒每進而誨之必曰敬立而
內直義行而外方然後可以闡聖賢之門忽梁木
之告壞撫張紳其永歎遡秋風而一酌誰與作於
九原

祭程廷邁文

嗚呼廷邁君坤之垠我巽之濬氣貫脉應傾蓋

新泛東津之月踏西岑之雲盡日乎醢醢芍藥之
春相瑩以虛相熙以真上下數千祀之論議沉着
痛快眉一伸而百輝是何貌之矐而精神之敷與
言之溫而肝膽之輪囷信抱負之不凡縑蒼壁其
純綸見乎文采政理者特皋蘭之餘芬山風吹衣
馬首劃分胥命維何禁柳壓闌無何我斤而君始
來謂庶幾隔關之相聞書猶在几詩猶在手而君
已招魂大江之濱嗚呼人之生也氣日至而滋息
其盈也氣日反而遊散皆不離乎陰陽往來而屈
伸伸而爲物屈而爲變魂升魄落旣化而無有矣
根於理而日生者固浩然與天地而長存况君之

祭鄒都大丈

靜而明明清而凝宜與根於理而日生者相爲舞
窮乘雲御飈橫八極而憂九旻杳銘旌兮西還嘯
有子兮應門寄一酌於江風眇離索其酸辛

中興百年人物雲蒸大江之東以氣骨稱宮亭彭
蠡藍田昆丘公於其間琅玕天球純明而剛平直
而方落華取實錦衣網裳力回萬牛氣凌三軍宴
坐觀來堅壁挫紛奔鯨盪海崩濤轟空千艘辟易
獨抗逆風雷電晦冥劫火漲天萬瓦俱灰浮屠屹
然見危致命衆雌我雄在蹇六二王臣匪躬上功
莫府我醒衆酣勞而不伐應謙九三蜀控遼夏人

爲金湯探囊取橐神旗央央潼關函谷秋風扇旌
籌筆未試前軍墮星矍鑠如援能飯如頗一朝至
斯於理則那巴秦父老齋咨同詞東南諸生矧公
所竒渠度在目誨言在紳一酌寄悲天乎不仁

靈澤侯生日祭文

龍州

惟神炳山川之靈司一方之命不知其幾祀矣誕
彌厥月秋以爲期民猶生事之欲神之福民無窮
也某敢爲民奉觴上萬有千歲之壽

老人祭疇甫文

嗚呼天目之陽翼翼鱗鱗道同味合吾三數人溪
光澹暮野芳炫春孰賦不旅疇觴弗賔老瓦通肘

柴車共巾山中之樂白頭一真年過六十氣壯意
新期之歲寒開我臂陳君遽舍我如蚤脫輪我不
見君如釣失緝村南村北梅笑柳顰扶筇出門誰
歟問津嗟彼有司賤玉貴珉老死不售連城之珍
此在疇甫達觀屈伸而我所悲殘星向晨銘旌飄
搖寶華輪囷斗酒隻雞遮道酸辛

鍾惠叔哀辭

并序

惠叔臨安人諱應僑與余內同母余仲女其子阜
婦也君蚤敏悟絕人讀書目千言場屋屢見頭角
氣盛志勇風進飄駛得前輩格言題蒲屋壁坐卧
與對伊洛諸老書多隱括爲歌詩時時自諷詠以

苦志得奇疾每發輒神游六虛騖鸞鶴與浮丘
安期相後先寤則索酒轟引耳熱浩歌吸呼月露
以盪習中之崢嶸幾豪矣而操行純白與人交無
貴賤皆盡情奉重閨惟恐少撓其和喪母過哀悴
以死年止四十有五吾黨共惜之余敗官寄廬西
廛期與君周旋作暖熱至未幾君捨之去可勝歎
哉葬有日爲賦哀辭相柩絳且以塞余內余女之
悲其詞曰

凡託形於溟滓兮藐起滅於一漚前乎名世之既
往兮後方來而未休來者不我接兮往者不我留
譬草木苟吾臭味兮攬而祛以寫憂便儼然歎之

紛前兮歸斯人之好脩凝乎其觚而不堅也澹
其靚而不浮素忠信以爲絢兮振詩書以爲羞索
珊瑚於海若兮采夜光於崑丘默會心其躍如兮
獨起舞而長謳樂得朋而講習兮甕米蛆其已芻
暖澗兮泉瀏淒獻兮雲幽松矯矯兮雪明柳濯濯
兮烟柔君其蘭亭竹溪人物之儔耶胡思飭神放
而莫收若士聳身八景之上兮禦寇冷風而跨九
州排赫戲以超遙挾鴻濛與夷猶頰人寰而隘之
不翅蟻垤蜂傭蠅蠖而蜉蝣也徑御母於少廣之
庭謁帝於碧瑤之樓世之壽者未必薰兮夭者未
必藉萊蔭老於霜露兮胡梧桐之不能秋豈謂

聚散之靡常兮聽推還而幹流抑百鬼常瞰乎高
明兮三彭甘心乎爾仇不然萬物芸芸各歸其根
兮蹇彼蒼尚奚尤薄寒兮梅窩歎涼之荷洲佇立
以望兮君不來有酒不樂兮謂我何求嗚呼天乎
何奪吾良之亟兮孰論心乎白頭

祭孫漢州文

嗚呼君宜我杭共此天目竹西定交日稔月熟清
不失和惠濟以肅韞抱國器涵渥民福越在庚辰
太少擇牧旅鶴與琴萬里追逐曉鼓齊發暮燈
宿短髮相扶蘆花映燭風恬日舒山迎綠推蓬
喚酌爛熳魚鮓魚鮓四怒雪四怒雪更呼更呼

岸揖袖嬰馬灝瀟奔瀾飛鏹

久慕釐蛟

巾子桂林峭磴危矗牽車青冥於蒼起伏脫險
曠秀水佳竹交口勞苦挈命博祿頻年過從分
骨肉綢繆勸酬低鬟度曲我守江油君倅綿谷相
望幾驛靡善不告莫府奏功菊坡解蜀我踵而東
君荐華轂風槩絕世等視榮辱尉薦寂寥駢函系
幅政平如水行粹如玉謂壽而臧胡奪之速皦皦
召汚落落起譴人不勝天天定斯復江颺有靈穩
送歸鵠所不滿君早訪松菊西望敬亭設位慟哭
平生故人安得正叔嗚呼哀哉

諸父堂祭此徐丈人文

嗚呼哀哉吾父蚤孤獨當其眇然世業危如一
縷所賴協濟其不及以相其成惟有吾母中寬而
外和上順而下撫茲斯之德薰浹於閨門鴉鵲之
愛均壹於兒女諸兒既及成人相與扶植以不墜
祖父之緒則母訓之故也年過八十孫曾如堵含
飴戲綵婆娑笑語蓋一身之所關實衆福之攸聚
尚安享於期頤胡奄成於千古嗚呼哀哉風木六
傳駒隙易度垂畢素冠三年之喪不忍靈車一日
之去恍音容其在堂飈丹旌其欲舉一酹號攀終
天悲慕嗚呼哀哉嗚呼痛哉

老人祭文

子姪之
有
頌
莫告汲海欲竭脩程方開出門軸折母病在牀
亦求訣吾年寢高晨星孤月何忍見汝母子俱發
祖道一卮春甕初撥汝能飲否我懷如割嗚呼哀
哉

行狀

提舉俞太中行狀

公諱灝字商卿其先晉公子食采於鄆以爲氏
典午永嘉中歙人縱爲征西大將軍幹葉扶疎或
顯或微唐末昱有蹟于朝昱二稠自江南宦居

嗚呼吾父在時德厚福全三子七孫競爽滿前姑妯娒肅然歡然門無哭聲二三十年吾父既歿仍歲憂苦首哭吾妻繼哭吾母若弟若兄俱淪千古諸猶子中亦不堪數恃有婢氏為家典刑粹言懿行蘭椒其馨歲時上壽疊綵照庭環數百拍藹如春榮逾七望入亦既備福晚哭家子遽棄華屋銘旌聯翩子先母續遮道祖酹老淚可掬嗚呼哀哉

同日祭百二姪文

嗚呼吾與汝父友愛純切記屬續時差手為

時 惟

史 奉 居 杭

太中娶于吳興之烏程因徙家焉公幼敏悟一
輒不凡既冠拒浙漕舉材名鬱起大家貴公子
延致為師登紹熙癸丑乙科授吳縣尉秩滿辟戶
部犒賞武康酒庫以格知寧國府宣城縣未上辟
知盱眙軍招信縣逾年改辟鎮江都統司主管機
宜文字嘉定初元充淮東安撫司參議官二年知
臨安府城南左廂公事未上監行在都進奏院兼
添差淮東安撫司參議官三年知安豐軍六年知
常德府七年提舉湖北常平茶鹽尋官中依觀
十二年辟淮東安撫司參議 不詳 崇禎觀

提舉千秋洪禧觀寶慶二年引年致其事先是隨
軍策應守禦恭露屢特褒轉積階至中大夫爵錢
塘縣開國男食邑三百戶賜紫金魚袋東朝大
慶尊禮高年以孫晦封太中大夫初任警捕筦推
職守外無一辭自鬻當路愛其廉而文交推輓不
遺力試邑極邊謂攻守以人心為本首發芻粟振
窮乏家嫗摩之甚得民和王師驟起趨泗隨軍轉
運使倉卒無措約公共議公言敝邑已備夫馬千
囊米以俟使者大喜薄暮促行遲明悉辦因歎服
曰非公幾敗事招撫司調兵道出招言境二可
北浮梁莫不

集邑阻

介點人

至

邑人大恐公謂彼飢民欲就食耳亦安知非嘗試
我者使諭之曰汝等皆中原遺黎慕義而來然須
申明上司方敢受可令徒長至邑議之已而桀黠
者十輩來勞之肴醕潛遣戍兵驅其徒出境歛驚
疑潰去十輩者返岸亡其衆踉蹌而逃自是知邑
有備莫敢窺宣撫丘公密聞其靜定有謀檄使稟
議一見大器賞所陳數策即施行留幕下數月聞
虜且南寇以時貽畢守再遇孤立命攝倅助之還
未數日虜果襲淮陰圍山陽畢被丁求應解圍
甚亟公謂將軍去此虜必引兵壓焉凡不去如

命何畢決計啓行挽公與俱屯于雲山謀報日急
公料虜必深入窺采石請回軍守石梁河以遏其
鋒騎塹漲天人情洶洶戎服行伍中意氣激壯如
平時畢每笑語公吾不料書生亦有此膽也時畢
威名暴振招撫深忌之多掣肘公走樞府力陳利
害乃命畢節制兩淮軍馬亟回守六合虜果分兵
擣虛不得入相距逾月而遁畢尋以都統兼知揚
州念非公無與共濟國事辟置機幕進參謀議邊
計郡政悉委之區區救脫機於矢石之間回震暴
於礮斧之下心平理明軍民悅服留軍戶五萬
親老歸省月海子其
時奏邨參幕議

淮人情僞烈盛言重居多餘黨有來迎師
以久抗王師誅之公以此皆一時迫脅非本心元
惡既殄來者即良民也極力救護全活甚衆各
給據使歸農帥怒其拂己同列咸爲危之公曰死
生命也委順而已卒歡好如初朝廷以佐平淮寇
有勞擢守六安 陛辭論嚴邊備清流品甚切郡
經兵燹一意勞集建治宇黌舍葺軍營井井有端
緒未幾以太中憂去邊氓共惜之守武陵以簡靜
稱隨頌庾節取予中度未數月引疾去自是絕念
榮進矣丘公壽雋帥維揚以公先世老賓客欲羅
致自助掉頭謝去上 采西湖之九里松山門散

步即買舟在所之會意處竟日忘返每舉酒望孤
山而酌曰湖山政爲我輩設也如是者幾二十年
湖旁居人以老僊目之晚喜觀釋氏書疾革屏藥
餌弗御索筆大書偈語而逝紹定四年四月朔前
三日也享年八十有六娶范氏贈令人繼高氏封
碩人二子長遜次修職郎楚州錄事叅軍丙寅先
卒女三人適進士倪良能芮燮秉義郎前監嘉興
府贍軍酒庫沈吉甫孫三人晦從事郎監嘉興府
比較務圻喚業進士公遇郊先任猶子而後孫人
進其義性亮直不苟合而接物必以情待淵黨不
愿退然若不勝衣而精神充滿志氣奮厲爲死

生禍福所移其驅馳窮處出入莫府料敵出奇
破的開禧乙丑開邊日萌芽一唱萬和功在漏刻
張公巖位政府密引公籌之公爲言輕脫寡謀之
人若可喜不可信燕人趙良嗣平州張覺往轍可
鑒力陳之張公然其說後悉驗識慮深遠矣文流
出曾臆擺落陳言詩有晚唐風致詞妙處迫秦晏
客或扣其舊作輒太息言未第時姜潘諸故人相
與泛茗雪登垂虹放浪煙波風露間更倡遞酬以
得句相夸尚夜深被酒膽壯拍手嘯歌魚龍起舞
今無復此樂矣尚何言哉姪孫松得公詩百篇鋟
爲青松居集餘蒐錄未竟諸孫將以其年十二

月癸酉薨于錢塘縣定山鄉排山塢之原其視
公為鄉執謹叙其業履以告太史氏

平齋文集卷第三十二

